

Aage Solbakk

*Julevsámeigellaj járggålam: Lars Th. Kintel ja Anders Kintel*

# SÁME ÁJGIJ TJADÁ 1



**Joarkkaskåvllå J2 ja J3  
SÁME HISTÅVRRÅ**



ČálliidLágádus

Aage Solbakk

*Julevsámeigiellaj járggålam:  
Lars Th. Kintel ja Anders Kintel*

# SÁME ÁJGIJ TJADÁ 1

**Prográmmafáhka sáme  
histåvrrå ja sebrudahka**

***Joarkkaskåvllå J2 ja J3 SÁME HISTÅVRRÅ***

ČálliidLágádus – 2025

# Sisadno

<b>ÁLGGO SÁME JA SEBRUDAHKA</b>	6
Gåsstå båhti sáme	6
Sámij máddara	8
Nuorttasáme árrombátsudisá	8
Oarjjelsáme árrombátsudisá	13
Boarrásamos tjálalasj duodastusá	15
Vehi giellahiståvrrå	17
<b>SÁME GASSKAÁJGEN</b>	23
Vikingja rievvu	23
Harald Hårfagre /	
Vuopptafávrro ja sáme	25
Hålogalasj oajvve Ottar	29
Sámij værrodus –	
gánågisá monopåvllân	41
Ådå værrorrájá	46
Birke sámijt værrodi	49
Kalmardoarro ja sáme	56
<b>BIVDDOSIJDDA 1500-1750</b>	64
Gáldo ja átsådibme	65
Årrom	66
Sijdaj vijddudahka	72
Æládusá ja værro dibme	73
Gåddebivddoásadusá	80
Bivddorákke	80
Vuobman	82
Ákkes	84
letjá gáddebivddovuoge	84
Luossaguolástus ja guollimbierggasa	90
Sijdaj organisierim ja fábmodus	95
Várjjaga sijdda	100
Várjjaga sijda æládusvuohke rievddagoahtá	104
Julevu Sáme sijda	108
Divtasvuodna	108
Tjærro- ja vuovddesijda	111

<b>IESJMIERREDIMES NUORTTARIJKAJ HÁLLDUJ</b>	120
Svierik lij ávdemusán	122
kolonisierimin	124
Nássjá silbbagruvvo	124
Æládusá rievddagåhti	131
Ællosujto ávddán ja vijddán	132
Merrasáme álggin aj slihturij	138
Rijkarádjá 1751 ja Sámekodisilla	140
<b>DANMÁRKO-VUONA STIVRRIMA VUOLLÁJ</b>	146
Danmárkka-Vuodna doarju ádåviesajdiddjijt	148
Báhpa stáhta guhka giehtan	151
Girkko, misjåvnå ja åhpodus	156
Svierik nanni misjåvnåv	157
Thomas von Westen – «sámij apoasstal»	160
Knud Leem	161
Biret-Ánde – Anders Porsanger	162
Garra-Jorta	166
P. V. Deinboll	169
Nils Vibe Stockfleth	170
Ællosujto vijddánibme dagáj gássjelisuodajt oajválattjajda	171
Rájáj stieggi 1852	174
Vájkkudusá ællosujttuj	174
<b>SÁME LIDJIN SUOPÁDISRÁSE VUONA EDNAMIN – GALGGIN ÄLLÄSIT ASSIMILIERIDUVVAT</b>	188
Vuona gánågis nuortta Sáme – «Finnmárko ámastiddjen»	188
Nasjonalissma bájnnegoahktá Vuona sebrudagáv	189
Sosiáladarwinissma	193
Suoma ballo dárojduhttemav ávdedij	195
Skåvlå lidjin ájnnasa	
dárojduhttemin	200
Dænovákke stuovesárro galggin dárojduhteduvvat Vuona båndurin	207
Svieriga biele sámij ællosujto Vuona bielen galgaj gártjeduvvat	216
Vuodna mierredij duodde sámelágan ællosujtov ájn vil gártjedit	218
Svierik dåssju ællosámijt dåhkkidij	219
Vuona-Svieriga ællosujtokonvensjåvnå	222
Gálldásáme – gierddam álmmuk	226

Beahcánsijdda.....	226
Báhčeveaisijdda.....	229
Njávddamsijdda.....	232
Guoládknjárga gálldásáme.....	234
<b>«VIESSUS SÁME ÁLMMUK!» – DÁROJDUHTTEMA VUOSTELDIBME.....</b>	<b>236</b>
Sáme áhpadiddje njunnjutjin.....	236
Sábme Vuona Stuorradiggáj.....	237
Vuona ja Svieriga bielen oarjjelsáme vuododin sáme siebrijt.....	241
Sáme ríkatjáhkanime majt oarjjelsáme ásadin.....	244
Nuorttasáme vuododi ríkaorganisasjávnåv.....	250
1920 ríkatjáhkanibme Bonjáksan.....	251
Sámelissta 1921 stuorradiggeválgajda.....	253
Dæno sámepolitihkkára gæhttjali barggijbelludagá baktu politihkkit.....	255
Ufuhtá sámesiebrre 1921 – 1925.....	259
<i>Diehto I fábmo</i> .....	263
<b>SÁME DÅHKKIDUVVI SIERRA ÁLMMUGIN DÁROJDUHTTEMA LÅHPADIBME 1945-1980</b> .....	<b>264</b>
Sáme oahpestiddje válldi åvdåsvásstádusáv.....	264
Sámegiella vieleduvvá.....	268
Sáme nuorttaguovlo dásen barggagåhti.....	272
Jage 1956 Sámekomitiedja – ággje sámi bælláj járgijdij.....	278
<i>Sámekomitiedja</i> .....	279
Sáme politihkalasj organisierim ådåstuhteduvvá ja dåbmarabbon sjaddá.....	284
«Vuosedup sáme vuojñjanav» – ČSV-seminára Guovdagæjnon 1970.....	288
Sáme njunnjutjijt ja oahpestiddjijt váksjodahtjájin.....	294
1970-låhko – sáme kultuvrradåjmaj luorkijdibme.....	297



## Girje sisadno

Oahppogirje le tjáleduvvam joarkkaskåvlå sámi  
oahppo- ja fáhkaplána vuodo milta joarkkaskåvllåj.  
Fága namma le Prográmmafáhka sáme histåvrrå ja  
sebrudahka J2 ja J3.

Girje oajvenamma le Sáme ájgij tjadá 1 man  
tiebmá le sáme histåvrrå jiegnaájges mijá ájggáj.

Nuppe girje dán rájdon le Sáme ájgij tjadá 2  
man tiemá li sáme árvo ja væráltvuojnno ja  
sámi sadje álggoálmugij værıldin.



# ÁLGGO SÁME JA SEBRUDAHKA


## Gåsstå båhti sáme

Ållo teorijja li sáme ájttegij birra, gåsstå sij båhti ja makkir ulmusjtjerdaj li sij berulattja. Fysihkalasj-antropolåvgålasj åtsådallama li aj dagádum ja dan baktu gæhttjalam duodastit sámijn li ájnnasik ålgop dåbddomerka.

Dålusj sáme mujtalusá subtsasti guhkes vájaldimij birra åvddål gá sáme vijmak jávsådin ednamijda mij uddni gåhtjoduvvá Sábmen. Boarrásamos mujtalusá nähki dan ájggáj goassa sáme álggin noajdástallat. Mujtalusáj milta lej vájaldibme Sábmað dáhpáduvvam guovtet guovlos: vájaldibme nuorttat jali vájaldibme oarjját.

Mij diehtep manjemus jiegnáájge någåj birrusij 13 000 jage åvddåla mijá ájggelågo (å.m.á). Dalloj gåbtjáj viehka vijdes jiehkke mijá guovloj. Ja lej viehka tjoaskes daj ájgi. De biváldatjáj manjenagi, jiehkke suddagåhtin, luohota ællájin ja ulmutja ihtalin.

Gåsstå da álggoulmutja båhtin ja gudi da lidjin, le gássjel javllat. Ållo várudisá li sijá boahtemis. Guokta oajvveteorijja li læhkám: álggoulmutja båhtin nuortas mijá guovlojda merragátte milta oarjját ja oarjeallet; nubbe le sij båhtin oarjját ja oarjelullet, jiehkij lulle-rabdam mij manjenagi suttaj.



Manjemus jiegnáájge loahppa birrusij 10 000 jage åvddåla mijá ájge (å.m.á).

## Sámij máddara

### Nuorttasáme árrombátsudisá

Nuortta Sáme merragádde guovlojn vuohttuji vuostasj ulmutja birrusij 10 000 jage ávddál mijá ájge. Nav boares árromijt li Råmså universitiehta arkeolåvgå Bjørnar Olsen ja Inger Storli gávnnaam Sárnjárga guovlon Máhkarávjon.



Råmså universitiehta  
arkeolåvgå guoradallamin  
boarrásamos dábdos  
gierggeájge árrombájkev  
Sárnjárgan Máhkarávjon.  
Gåvvå: Råmså dávvervuorkká.

Vuona arkeolåvgå Anders Nummedal guoradaláj boares árrombátsudisájt Gorrvárrí lahkusin Álltán giesen 1925. Dáppe sán gávnaj skábanijt, njuollanjunjiit ja gierggenijbijt ma lidjin birrusij 10 000 jage boarrása. Dáv gierggeájge kultuvrav gåhtjudij sán Gorrvárrekultuvrran.

1970-lågon gávnnin ållo báktegåvvusijt Álltán. Tjoahkkáj li regis-  
trieriduvvam 2500-3000 gávvusa ja le Europa stuorámus bákte-  
gåvostjoahkke. Gávvusa li sierralágátja dan gáktuj gá vaddi buorre  
máhttelisuodajt dádjadir gierggeájge ulmutjii sosiála ja vuon-  
jonalasj iellemav.



Báktegåvvusa Jiepmaluovtan  
Álltán. Da li nav sierralágátja, ja  
jagen 1987 váldeduvvin manen  
UNESCO værálda kultuvra-  
árbbelisstaj. Álltá dávver-  
vuorkká vuojnnu duogen.  
Gåvvå: Álltá dávvervuorkká.




Árrombátsudis, goahtesadje, Ceavccageadgin Várjjat. Gåvvå: Várjjat  
Sáme dávvervuorkká.

Várjavuona birrusij li ulmutja árrum gájt 10000-11000 jage.  
Ceavccageadgenjárgan li gávnum árrombátsudisá ma li gájt  
10 500 jage boarrása. Stuorravuona guovlon máhttep tjuovvot  
árromrievddamav lávkkidaktsiehkij milta várrebáldan. Baje-  
mus árromtsiehke li birrusij 6500 jage boarrása.



Dán láhkáj sáme viessun Várja-  
vuona gáttten birrusij 2000 jage  
â.m.á  
Sárggum: Arvid Sveen.




Sárggo la ájádallam suláj náv lij Várjavuona sámij árrromgoahte tsieggiduvvam.  
Sárggum: I. Schanche, Sjøsamene ved Varangerfjorden, 2005.



Dát unnes ulmusjhábme dagádum tjoarves le gávnnum muhem dálusj goahtesajen Stuorravuonan Unjárga suohkanin. Soajttá lij dákku biejadum muhem jábmám ulmutja mujitton.  
Gávvá: Várjjat Sáme dávvervuorkká.


Kárásjjágå (Kárásjoga) mánrbájke kárta masi li sárgoduvvam bivddoråkke ma li gájt 5000 jage boarrása. Bivddoråkke li riggasij mierkkiduvvam.  
Kárta: Davvi Girji.

Bivddorågge Kárásjjágå (Kárásjogas). Vigdis Stordahl tjuodtjomin råkken. Gåvviduvvam 1970-lågon.  
Gávvá: Sámiid Vuorká-Dávvirat.



Giesen 1994 ja 1995 Vuona ja Suoma arkeolåvgå åtsådin ja biejjvijin birrusij guoktalåk bivddoråkke Guovddagæjnon (Guovdagæinnus) ja Kárásjjágå (Kárásjogas).

Kárásjjágå (Kárásjogas) åtsådin duola degu råkkijt mánrbájken Sámij vuorkkádávverij nuorttalín. Åtsådime vuosedi ienemus råkke li biejjviduvvam gávddaj 2500 ja 2000 gasskaj å.m.á. Muhtema li vil boarrásappo. Råkke li gáddebivdduj aneduvvam.



Ájggetábælla vuoset Nuortta-Vuona kultuvrrarievddama oajvveásijt jiegnjaáiges dálásj ájggáj. Sárggum: Christine Hoel.

Gássjel le arkeologija gáldoj vuodon biedjat tjerdalasj namma-dusáv dájda ulmutjíida gudi gierggeájge adnin dájti árudagájt ja bivddoråkkijt. Arkeologija bátsudisá dáppe subtsasti binnáv tjerdalasj gulluvasjuoda birra.

Valla udnásj Finnmárko tjerdajn li sáme boarrásamos tjerdalasj álmmuk dáppe davven. Arkeologija professåvrrå Bjørnar Olsen árvval jahketuvsán á.m.á lij viehka guvdásj gávdda sáme kultuvra hábbmimin.

Antropolåvgåv Knut Odner la muhtem mudduj avtan mielan Olsenin valla árvval sáme tjerdalasjuoda hábbmim dáhpáduváj vehik manjnelattja, birrusij mijá ájggelågo rájes ja Suomaluohta birrusij. Giellaprofessåvrrå Pekka Sammallahti nammat suomagiela ja sámegiela innovasjåvnå jali sieradusá vuohttugåhtin birrusij 2000 jage á.m.á

## Oarjelsáme árrombátsudisá

Sáme li Oarjje-Vuona Østerdalenin árrum gájt de 2500 jage. Dalloj sij viessun sarvva- jali ælljabivdos. Birrusij 1500 jage ájge bivdosáme árrun ja viejddjin Østerdalenav miehtáj, Elveruma rájes oarjján gitta Trøndelága rádjáj nuorttan. Dav arkeolåvgå Jostein Bergstøl tjielggi, guhti I guoradallam dáj guovloj árrom- ja hávddebátsudisájt.

Duola degu e hávddebátsudisá gullu ednambarggoálmugij, valla bivddoálmugij, ja åtsådiddje ij iehpeda dá li bivddosámij bátsudisá. Danen gá sáme hágde li ietjálágátja gá dáttja ednambarggij hágde. Sáme hágde li unnebu ja dajn li ållo njuollanjunje ja bivddoræjdo. Ednambarggij hágdij li dábálattjat doarrobierggasa, dakkára gá svierde.

Sæmmi guovlojn le aj vallje bivddoråkkijs ja li suláj dakkára ma li gávnnum nuortta Sámen. Bivddoråkke sarvajda jali elajda li aneduvvam brânssåájge rájes gitta boarrásap gierggeájge rádjáj, 500-lâhkuj. Manjela adnegåhtin bivddoråkkijt duoddarin. Dalloj lij gádde ájnnasamos.

Bergstøl le aj 1000 jage boaras árrombátsudisájt åtsådam Lesja-guovlon. Da gulluji vikinjaaájggáj. Árran, goahtesaje ja gádjí sailjo li dan lágátja ahte iehpedik li sáme bátsudisá. Sán árvval suv gávnadisá máhhti duodastit sága-giehto vikinjagåñagisá Harald Hårfagre birra guhti vállduj «sámegåñagisá» Svose niejdajn. Svose ároj Dovre-guovlon, ij nav guhkken ierit Lesja árrombátsudisájs (gehtja s. 29).

Oarjelsáme árrombátsudisá li aj dassta ríkarájá nuppe bielen, Vivallen-guovlon, majt svenska åtsådiddje Inger Zachrisson le åtsådam. Da gulluji vikinjaa- ja gasskaájggáj.



Dán sáme hávddesajen Renajågå lahka Åmot-guovlon li gávnnum buollám nissuna ja álmmå bátsudisá ma li 1500 jage boarrásá.  
Gåvvå: Jostein Bergstøl.



## Boarrásamos tjálalasj duodastusá

Oana oadtip gá sáme álmmuga tjerdalasjvuodas dalá manjela gá mijá ájgge lähko álggá. Jagen 98 almoduvvá vuostasj tjálalasj giehtto mij sámi jt nammat. Romak histåvrråtjalle Cornelius Tacitus nammat Germania-girjenis álmmugav *fennin*, gejt átsådiddje árvvali li sáme. Dát sjattaj moadda tjuohte jage sámi jt nammadussan. Álmmuga nammadus sjattaj aj álon årromguovlo nammadussan, Finnmark, mij nappu merkaj «Sámeednam».



## Fennij birra

Fennijn le sierralágasj imáj miehtsedille ja suorgganahtte hæjosvuohta. Siján ælla værjo, e hesta, e goade. Biebbmon li sjatto, biktasin náhke, oaddadahkan ednam. Ájnná dárvo le njuolajn, maj snjutjev sij dahki dávtes gó ij la ruovdde. Miehttse-bivddo viesot sæmmiláhkáj álmmájt ja nissunijt. Da vuojn tjuovvu álmmájt juohkka sadjáj ja gætjájdalli oasev sállahis. Ij la ga mánájda ietjá suodje návdij ja dálkj vuosstij gó muhtemlágásj risselåvdagoadásj. Dáhku barggoumutja máhttsi, dat la boarrásij dárvo. Valla sijá mielas le dakkár iellem buorep gó bældoj nanna sjuohkadi, goahtetsieggimij vájvástuvvat jali doajvoj ja balujn ietjas ja nuppij ábmudagáv huksat. Dárvos ulmutjin ja dárvos jubmelijn li sij állám divna gássjelamos viggamus-saj, namálattjat sij e dárbaha majdik sávvat.

*Romak histávråtjálle Tacitusa, jagen 98.*

Sábmáj: Samuli Aikio.

Tacitusa Germania-girje loahppa manna  
nammat fenni álmmugav - sámijt.




Sáme bivdon, Olaus Magnus,  
jahke 1555.

## Vehi giellahiståvrå

Jagen 1935 almodij suobmelasj giellaåtsådiddje Paavo Ravila teorijav jut sámegiella ja suomagiella libá aktisasj vuodogielas vuolggám, sáme-suoma vuodogielas. Ravila teorijav doarju duola degu suobmelasj giellaåtsådiddje Erkki Itkonen, Mikko Korhonen ja Pekka Sammallahti.

Giellaåtsådiddje ja professåvrrå Pekka Sammallahti la árvvalam stuorra oasse suobmelattjaj mättojs li álggoálgon hållam muhtemlágasj boaras indoeuropealasj gielav ja dá mätto li Gasska-Europas vuolggám.



## Berajtjoarve

Dálásj urála gielaj histåvrålasj suorgudahka máhttá berajtjårvijen góvádit, góanná li aj árvvaluvvam ájgge. Tjuorgas: Britt Hansen.

«Vuodogielas» jali urála vuodogielas li muhtem bivddosebrudak- ja berajvuodabágo bissum. Bivddosebrudagá bágó li: *ájmme* (suomagiellaj: äimä), *bådnet* (suomagiellaj: punoa), *hålgå* (suomagiellaj: ulku), *juoksa* (suomagiellaj: jousi), *nahta*, *njuolla* (suomagiellaj: nuoli), *buodo*, *suhkat*, *suodna* (suomagiellaj: suoni), *viekke*.

Berajvuodabágo li: *tjehtje* (suomagiellaj: setä), *goasske* (bágón ij la vássta suomagielan), *mannje* (suomagiellaj: miniä), *niejdda*, *vivva* (suomagiellaj: vävy), *vuonev* (suomagiellaj anoppi), *vuohppa* (suomagiellaj: appi).

Dán gávddaj gulluji lassen dákkár bágó gå: *bievve*, *tjalmme*, *tjidtje*, *ieme-*, *giella*, *gådtjå*, *guolle*, *jåhkå*, *suollne*, *mårne*, *njammat*, *njoallot*, *njoammel*, *oajvve*, *salla*, *bievlla*, *siedja*, *suoskatt*, *vuodjat*, *vuoppta*, *lådje*.

Suoma-ugralasj vuodogielas li dakkár bágó bissum:  
*adám*, *ahke*, *áhttje*, *båhtjet*, *balvva*, *baksim*, *biellje*, *bårggå*, *buodo*, *tsuodtsa*, *tjaktja*, *tjälllet*, *tjoalle*, *tjuohppat*, *tjuolggo*, *tjuobma*, *dålgge*, *davek*, *aedno*, *ieeddne*, *iehke*, *goahte*, *gåddet*, *gådet*, *gålldet*, *jiegge*, *liebma*, *lådde*, *mielgga*, *njálmme*, *njuovvat*, *oarbes*, *varra*, *vuodja*, *vuobdda*, *vuobddet*.

Dålusj indoeuropealasj gielajs li muhtem bágó boahtám suoma-ugralasj gielajda. Sámegielan dájda gulluji: *tjoarvve*, *guollit*, *tjuohte*, *viehtjer*, *riessjme*, *hierzik*, *oadtje* ja *giesse*.

Suoma-permelasj vuodogielas gávddaj gulluji duola degu dá bágó: *asse*, *ádjá*, *biehtse*, *bielgge*, *vierdav*, *bena*, *boatsoj*, *gáma*, *goasskem*, *gådet*, *guoppar*, *vaddnem*, *snjuktja*, *oarre*, *riehpen*, *vuollat*.

Suoma-volgalasj vuodogielas gávda bágó: *álldo*, *bassap*, *boalldet*, *tjavelk*, *tjåhkåt*, *tjuollat*, *ájvvo*, *doares*, *vanntsa*, *gielldet*, *giersse*, *giesse*, *gidá*, *jávrre*, *gåhpåt*, *mielle*, *njadet*, *sadjet*, *suovva*, *vájmmo*, *vuoggá*.

Sáme-suoma vuodogielas bágó:


*áhkko*, *ájmmo*, *basse* (< germ.), *bievlla*, *boassjo*, *tjiehkat* (< balt.), *tjuollat*, *jårmme*, *juoksa*, *duollje*, *duottar*, *viermme*, *gahper*, *gæjnno*, *giedde*, *gierkav*, *goarrot*, *gukse*, *guojmme*, *jåddo*, *juojggat*, *niehpe*, *åsskot*, *ruovdde* (< germ.), *sabek*, *sátte*, *sábme*, *siebrre*, *sijdda*, *beraj*, *suoloj*, *vadjat*, *viellja*, *vuotta*.

Sáme-suoma vuodogielas le luojkasbágójt válldám dålusj báltalasj gielajs, ma gul-juji indoeuropealasj giellafamilljaj, buojk.: *luossa*, *suollne* ja *hiergge*. Sámegielas ja lullemerasuoma germánalasj luojkkambágo, buojk. *guosse ja lájbbe*, li boahtám guhkesájgij tjadá, soajttá juo álggám vuodogermánalasj gielas ja vissásit vuodaskandinávalasj gielas.

Slávalasj gielaj bágó aj li, buojk. *báhppa*, *báhken*, *ådåsist* ja *gisstá*. Sámegielas la suomagiella válldám muhtem bágójt, buojk. *sivakka* (sabek), *tammukka* (dábmuk) ja *tunturi* (duottar).

Ruossjagielan li aj luojkasbágó sámegielas, buojk. *mårssjå* ja *báldes*. Mårssjå le aj vijddánam gitta ienjilsgielaj, *morse*. Duottar la sjaddam álmmugijgasskasasj báhkon, gå dat le váldeduvvam gieldasámegielas ruossjagielaj ja ruossjagielas válde-duvvam vas ietjá gielajda, dagu dárogiellaj *tundra*.

Gáldo duola degu: Pekka Sammallahti: *The Saami Languages. An introduction*. Davvi Girji 1998.



Mårssjå.

Majt mágtep Tacitusa giehto hárráj javllat? Sán gæhttjal gávvit sámij iellema iehtjádij diedoj ja giehtoj baktu. Sán iesj ij lim sámijt vuojnnám, ittjjí ga maná Sámen.

Gå dárkkelappot guoradallap Tacitusa giehtov, de la jáhkedahtte jut *fennit* – jali sáme – årrun Lullemera lullebielen. Giellaåtsådiddje árvvali sáme årrun dalloj, ierit udnásj Sámes, nav guhkken oarjján gå St. Petersburga guovlojn.


Áramus gasskaájge almoduvvin tjállusa sámij birra ma dákkiji giehtton. Bysántalasj histåvrråtjálle Prokopios (birrusij 490-570), guhti åroj Konstantinopelin (udnásj Istanbulan), nammat histåvrrågirjenis *skritiphinoi*-álmmugav, gudi li tjuojgesáme. Dát subtas sáme li dán dálutja rájes tjuojggam. Tjuojgesámitj aj nammat langobárdalasj histåvrråtjálle Diaconus, guhti viesoj birrusij 725-795. Langobárdalattja årrujin Nuortta-Italiáj álmmukvájaldusájge (bir. 400-500/600 m.m.á).

Oasse Herefordkártas birrusij 1280. Márju li sáme tjuojge sárgoduvvam njárggaj gáhtjoduvvam «Noreya» – Vuodna. Sujna l soabbe ja oanegis sabega.



## Dálusj gárvo lidjin náhkes

Sáme gárvo jali biktasa nammaduvvi vuostasj bále girjálasjvuodan dalloj mañjela Kristusa riegádime. Romak histåvrråtjálle Tacitus tjállá jagen 98 *Germania*-girjenis sáme gárvo lidjin náhkes. Nav tjállá aj bysántalasj histåvrråtjálle Prokopiosa 500-lågo gasskamutton ja langobárdalasj Diaconus 700-lågo láhpan. Diaconus tjállá sán la iesj vuojnnám sámij náhkkegárvojt ma sjumustahti germánaj «tunika», mij ålij buolvajda.



Tjuorggasa vuosedi man láhkáj dálusj sáme adnin gátténáhkijt bivtasgoarromij. Tjuorggasa: Berit Marit Hætta.

## Hárjjidusá

1. Goassa någåj manjemus jiegŋaájgge?
2. Nuortta Sáme, Finnmárko merragáttien li arkeolåvgå åtsådam viehka boares årrombátsudisájt. Man boarrása li da?
3. Gånnå Oarjel-Sámen le arkeolåviggå Bergstøl åtsådam boares årrombátsudisájt. Man boarrása li da?
4. Massta vuolggá nammadus Gorrvárrekultuvrra? Majt diedá dan kultuvrav birra.
5. Majt åtsåt arkeolåviggå?
6. Goassa nammaduvvi sáme vuostasj bále tjálalasj gáldojn? Gånnå árrun sij?

## Duoddehárjjidusá

Juogosbarggo. Dijá guovlon (suohkanin) li vissásijt dálusj årrombátsudisá. Kárttijit ja gávvijit dajt! Man boarrása máhti liehket dá årromsaje jali goahtesaje? Dahkit «åtsådallamav» dan birra ja dágástallit båhtusijt klássalanján. Diedojt máhttebihtit guovlo girjjevuorkás ja dávvervuorkás oadtjot.

## SÁME GASSKAÁJGEN


### Vikiŋja rievvu

Vikiŋjaájgge (birrusij 800-1066) le viehka sierralágásj Nuortta-rikkaj histåvrán. Dalloj jáhtegåhtin ållusa vijddát. Dá ulmutja gáhtjoduvvin vikiŋjan. Sij rievvun, valla sij aj oasástallin, dahkin stádajt, kolonisierijin vijdes guovlojt ja vuododin ådå stádajt.

Vikiŋjamanojt jádedin oajve genna lidjin doarrofouva majna lidjin buorre ja basstelis værjo. Dasi lassen lij siján doarrom vuojnnjan. Gå ålmålidjin manon, de nissuna barggin divna sijda bargojt.

Oasesmanojn vikiŋja aktan barggin hákkuhittjat hávsajt, gálvojt ja barggijt. Oasesmano buoragit vuorbástuvvin danen gå nuortta guovlo gálvo lidjin dárbulattja ja ávkkása. Dakkára lidjin náhke, mårsjátjalána ja ruovdde.

Maneldijn sijáv unnán vuosstálasstin, danen gå Europan lidjin sissnálasj rijdo. Svenska lulás jáhtin, ja dánska dahkin rievvomanojt Englánndaj ja Frankriikaj. Vuonaga vas bárjåstin Atlánta suollujda. Dåbdos vikiŋjaájge oajvve lij Ottar, guhti ároj Hålogalándan. Suv giehtto le tjáledum 800-lågo lâhpan. Suv oajveruhtavuojto lij værov válldet ja rievvot sámijt (gehtja manjelin). Vargga sæmmi ájge viesoj Oarje-Vuonan Harald Hårfagre guhti lij tjoahkkim Vuonav avta rijkkan. Sán lij válldum sáme niejdajn, namájn Snøfrid.



Vikingjaj jáhtema.



Vikingjaj hávsa máhttin guhkes gaskajt bárjástit ja gierddin garra dálkjít.

## Harald Hårfagre / Vuopptafávrro ja sáme

Nav gáktu lip lâhkâm joarkkaskâvlå vuostasj girjen, de Haralda vuopptafávrro tjoahkkij Vuonav avta rikkjan 800-lågo lâhpan. Harald le aj gáhtjoduvvam namájn Harald **Dovrefostre**. Ságagiehtojs boahtá ávddân Dovre lij viehka ájnas várre gánnå mihtoga viháduvvini. Doppe ájvij ja gánågisáj bárne gæhttjalin fámojisá, hâhkuhin diedoijt ja dâppe ievvijin váre nissunijt. Moadda oajve/jádediddje tjadádin gæhttjalimájgev Dovre-váren gánnå de viháduvvini. Nav galggá liehket dáhpáduvvam Harald Vuopptafávruj aj. Nuorran Harald dâppe bajássjattaj ja åhpaduváj.

Haralda rjika tjoahkkidijn lij aj Dovre ájnas oasse. Harald marjenagi vuollâstii guovlov ja tjanáj dajt suv rikkaj gállasjvuodaj baktu. Majemusát válluvin sáme. Snorre tjielggi Heimskringla-giehton gáktu Harald ievvij sáme niejdam Snøfridav ruohttaikeheda Tofte-dâbenn Dovre-váren vuolen. Harald nav gieroj niejddaj, guhti lij sijdaisedajali «sámegánågisá» Svose niejdda. Harald vállduj sujna ja nav sáme aj tjadnasin suv rikkaj. Sâj oattjoja niellja bárne ja akta dajs lij Sigurd Rise. Sigurd Rise áddjov lij Sigurd Syr, guhti lij vas Harald Hardrâde áhttje. Jus galggá ságamujtalusájda jáhkket, de la Snøfrid Vuona gánågisáj máddo Harald Hardrâde baktu. Snøfrid áhkkova bárne Harald Hardrâde gådduj doaron Stamforda Bridge lahka Englândan ragátmáno jagen 1066.

Arkeolåvgggå Knut Odner árvval dát vállda giehtto la jahtto jali bâvvâ. Dav galggá dâdjadit jali ájâdallat dan lâhkâj jut Vuona gánågisvielden lij mak muhtem lágásj tjerdalasj aktijuuohta sáme álmmugij. Letjá átsâdiddje gis li dan vuojnon jut máhttelis lej vuona njunnjusjoajve válldudin sáme sijdaisedij niejdaj, dagu aj arkeologijjalasj gávnnusa árru duodastime.

Arkeolåvgggå Inger Storli tjielggi átsâdimenis (2006) jut gávnnum li nissunhâvdé sáme hervaj vuonagij (dáttjaj) árromguovloj. Nuppe guovlluj li vas gávnnum nissunhâvdé skandinávalasj hervaj tjielgga sáme árromguovloj. Dát árru vuosedime jut sáme nissuna li dáttjaj árromguovloj hávddáduvvam ja dáttja nissuna gis hávddáduvvam sáme árromguovloj.

Nuorttariikalasj-germáinalasj sebrudagán tjanáduvvín álu aktij-vuoda válldumij baktu. De máhttá ájádallat jut hávddegávnnusa vuosedi vuona njunnusjoajve li sáme niejdaj válldudam.



Harald Hårfagre – Harald Vuopptafávrro. Tjuorgas: Olav Engebrigtsen/BONO.

## Giehtto Snøfrida birra

Muhem dálve lij Harald hejajn Opplándajn. De gåhtjoj hejajt dahkat Tofte-dåben. Ruohttaihkedo bådij sábme Svosa dåhpåj dalloj gå gânágis lij bievdan tjåhkkåhime. Svosa sárnoj bágov gânágissaj boahtet ålgus suv lusi. Gânágis suhtaj bágó åvdás, ja ålmåj guhti lij bágov sunji sárnum, buvtij vas gânágisáv vasjev ålgus. Valla Svosa ájn gåhtjoj suv mannat sisi dajna sæmmi måhkijn, ja javllat jut sán le gal dat sábme gesi gânágis lij loabedam goadev tsieggit nuppe bælláj tjåro. Gânágis manáj ålgus, ja de sjattaj nav jut sán loabedij vuolgget sáme fárruj suv sjiddaj. De manáj badjel tjåro vágku muhema vágodin ij galga vuolgget ja muhema vas galggá. Gå de dåhku bådij, de Snøfrid tjuodtjelij bajás. Sán lij Svosa niedda, ja fávromus nissun majt lij vuojnnámv. Sán fálaj gânágissaj gáre dievav juhkusis. Gânágis váldij dav ja vil suv giedav. Gânágis mielastuváj dan ga båttå Snøfridaj.

Gânágis váldij Snøfridav moarssen ja vállduj sujna. Sán iehtsij suv vágmostis. Såj oattijoja niellja bárne: Sigurd, Gudrød, Ragnvald ja Halvdan.

De jámij Snøfrid. Valla ittij sán gáktuk bájnov málso. Sán lij ruoppssismuodok degu dalloj gå viessomin lij. Gânágis tjåhkkåhij álu lijka báldan ja vuordij dav vas ællát. Nav vässin gâlmmå jage. Gânágis lij guhkev surgon gå Snøfrid lij jábmám, ja rjika álmmuk måråstij gå dat vágkudatjáj gânágisá jiermjida. Torleif Spake gåhtjoduváj gânágissaj dáktårin. Sán sárnoj náv gânágissaj: Ij la imáj, gânágis, gå dán dakkár fávros ja buorre nissunav guddneda suv látjon ja skarlagen sinna, degu sán duv bivddij, valla dán sihke suv ja ietjat guddneda uhtsebut gå vuogas le, dajna láginj gå i hávddáda suv.

Snøfridav rumáj de boaldedeváj ja hávddáduváj. Dat rájes bådij vas gânágis almajda. Sán stivriij rijkav ja sjattaj gievrra gå åvddåla, sán besaj vas ávvudallat álmmåjnis, ja sij vas sujna, mij rikkaj sjattaj ávpon.

Sihke gânágis ja suv álmmå jáhkkin Snøfrid lij gânágisá allasis tjadnam noajddegánstaj.

Sábmáj hiebadum: Nils Jernsletten, Låkkangirji 2 1970.



Vuona friddjamærkka mij vuoset Harald Hårfagrev ja sámeniejdav Snøfrid - Dovre-váre vuolen gánnå såj válldujga. Tjuorgas: Posten, Sverre Morken.

## Hålogalasj oajvve Ottar

Miján li viehka buorre diedo hålogalasj oajve Ottara birra suv «Ottara giehto» baktu mij la ájmon bisodum. Giehto baktu oadtpoj aj diedoxt sámij birra gejt Ottar værrodi ja rievoj.

Ottar subtsas sán lij vuonagij nuorttalamos viesát. 800-lågo gi-  
etjen manáj sán oarjás Vuona merragáttev Danmárkkuj ja de  
Englánndaj, gánnå gánágis Alfred suv vuosstájváldij. Ottar subtsas-  
tij årrombájkes ja manoj birra, ja gánágis Alfred gávnaj suv giehtov  
nav ájnnasin ja váldij dav manen **Orosiusa** værálthiståvrågirjjáj  
mav sán lij járggálahttám anglosáksalasj giellaj. Orosius lij spánska  
muunjka guhti lij værálthiståvråv 400-lágon tjállám. Navti bisoj  
Ottara giehtto ájmon manep ájggáj. Histåvrååtsådiddje åskeldi  
állu dasi majt Ottar subtsas, danen gå sán iesj la vásedam dajt  
majt subtsas.

Ottar subtsastij sujna sjidaguovlonis, mij luodjomláhkáj ij la  
tjielggasit tjielggiduvvam, li vehi slihtura. Sujna lidjin moadda låge  
gusájs, sávtsaits ja svijnijs. Dasi lassen lidjin sujna hesta maj sán  
ednamav bålltij. Sujna ij lim stuorra bælldo. Huoman lij sán addnes  
ålmáj, ja lidjin iehtjáda aj dakkára gå sán Hålogaláandan. Sujna lidjin  
daljo gå gánágisáv guossidij, guhtatjuohte vuovdek gæhttjoelle,  
majt sij boahtsun gáhtjudin. Sáme bivddin daj gáttijt.

Sijá ájnnasamos sisboabto lij værro mav sáme hæhttujin sidjii  
mákset. Värov máksin duola degu láttedålgij, gåttenáhkij ja ietjá  
iellijnáhkij, mårsjåtjalánij ja mårsjå- ja nuorjonáhkij.

Dá diedo subtsasti Ottara sáme vuolebuttja ettjin viejddi dåss-  
ju sisednamin, valla bivddin aj merraiellijt, dakkárijt gå mårsjåjt  
ja svállájt, ja tjoaggin láttedålgijt lâddebávtijs merragáttien.  
Sáme máksin värov nákkujn Ottarij dan milta majt ájmmudin:  
Boandámus mávsij lägenanvihta niedenáhke, vihtta gátteduolje,  
avtar biernanáhkev, lågev æbbára dålgij, avtar bierna-jali  
tjævvranáhkkemuottáv ja guokta háksaduoge ma dagáduvvini  
nuorjo-jali mårsjånáhkes. Dát vattos avta ulmutjis lij dan vierde  
stuorre jut sán vissásit mávsij värov nággon ávvå sijda ávdås.  
Ottar le værrodam ja rievvum sámesijdajt ij dåssju merragáttijn ja



Ottara sijdda ja mano birrusij 900 m.m.á.


vuodnabadájn, valla aj sisednamijen. Sis Råmsån rijkarájá guovlon li arkeolåvgå åtsådam goahtesajjt majt árvvali gulluji 800-1300 gávddaj. Åtsådiddje, degu Mulk ja Storli, árvvali dá li sáme årrombátsudisá. Dáppé li familja árrum, sihke álmmá, nissuna ja máná. Råmså arkeolåvggå Inger Storli árvval muhtema dájs bátsudisájs li gábe állduj báhtjema hárráj. Dat merkaj dalusj sámijn liju muhtem lágasj boatsojæladus dálman. Histåvrråprofessåvrrå Lars Ivar Hansen dálku dájt bátsudisájt ietjá láhkáj gå Storli. Sán árvval dalusj sáme bivddin ja guolljin, ja sijá náhke lidjin «sámeværo» majt hålogalasj oajve gájbbedin sijás.

Dá sáme gálvo lidjin nav mávsulattja Ottar-gádtsáj ahte siján lij vissásit doarrovehka mij gájbbedij adnet sámeværov. Doarrovehka lij dárbo ij dássju hákkuhit sáme boanndudagájt, valla aj suodjalit dájt gálvojt jádedijin oarjás. Dájt sámegálvojt fievrrijin Europa oasesmárnániida, gánná máksin buorre hattev gálvoj ávdás. Ájnnasik mávsulattja lidjin mårsjátjalána, majna mak lidjin noajddefámo. Da aj aneduvvin hærvan.

Ottara giehto milta lidjin állo mårsjå nuortta Sáme vuonajn vikingjájge, ja sáme aj bivddin dajt. Sámegielä nammadus mårssjå le manjela váldedum luojkasbáhkon ruossja-, fránskka- ja ieñjilsgielilaj. Sámegielan li viehka állo merraiellij nammadusá, ma substsasti merrabivddo lij viehka boares ja sierralágásj sáme æladus.

Ottar lij márju vuostasj vuonak guhti manáj Vielggismerraj. Dat rájes álggin vuonaga dájvváj dájn guovlojn maneldit. Vuojná Vielggismerra guovlojn lidjin állo mårsjå ja náhkkegálvo. Ágon dá lidjin bivddomano, valla da manjenagi sjaddin rievommannon, mij vájkudij guovlo ulmutja sjaddin álov gierddat.


- Ottara sijdda
- Ottara «rijkka»
- Guojna
- Sámit = Sáme
- Sámit = Sáme
- Ottara mátkkit = Ottara mano
- Bjarmeriika = Bjarmerijkka



Dákkára lidjin sámij árudagá duottar-guovlon vikingjaájge.



Mårssjå mårssjåtjivgajn. Mårssjåtjalána lidjin ájnnasa oasesgálvvon.  
Gåvvå: Atlas Major, Amsterdam 1662.



Sijdda Várjavuona guovlon vikingjaájge, birrusij 1000 m.m.å. Gåvvå: Arvid Sveen.

## Ottara giehtto

Ottar subtsastij hærrásis gânágis Alfredij sán lij vuonagij nuorttalamos viesát. Sán javlaj sán ároj ednama nuorttaoasen, Alleábe lahka. Sán aj subtsastij ednam jali gâdde jávsâdij hármmat guhkás nuortas dassta. Valla dat lij ájbas ávtas, ietján gâ duoggu dâggú árru sáme ma dálvijt viejjidji ja giesijt bivddi meran.

Sán subtsastij akti sunji badjánij miella átsâdit man guhkás nuortas ednam manáj, jali árru gus ávtas guovlojn nuorttalín ulmutja. De sán vuolgij bârjâstittjat njuolggá nuortas. Gålmåm bieje lij sujna ávtas ednam oalges bielen ja rabás áhpe gârâ bielen. Dalloj sán lij nav guhkken nuorttan gâ majt sválesbivdde bruvkuji guhkemussaj mannat. De sán járkij manos njuolggá nuortas nav guhkás gâ sán jávsâdij vil gâlmán biejen. Danna ednam njuolggá gâvaj lulás, jali merra ednama guovlluj, sán ittijj diede goappá láhkáj. Valla dav sán diedij danna sán alâtbiekav ja vehik nuorttobiekav vuordij. De sán lulás bârjâstij gâddeguorav nav guhkás gâ nieljen biejen álij.

Dan manjela sán hæhttuj nuorttobiekav vuorddet, danen ednam gâvaj njuolggá oarjás jali merra ednama guovlluj, sán ittijj diede goappá láhkáj. Ja de sán danna bârjâstij njuolggá oarjás nav guhkás gâ álij bârjâstít vidán biejen. Dâppe lij stuorra ædno mij rhapsij ednama guovlluj. De sij gâvvin ædnorâjge bajás, danen gâ sij ettjin duosta bârjâstít miehtáj ædnonjâlmev balo diehti. Danen gâ nuppe bielen æno lidjin viesáda. Miehtáj suv mano lij ávtas ednam suv vantsa oalges bielen, ietján gâ guolâstiddje, lâddebivdde ja væjddára - ja sij lidjin divna sáme.

Bjarmelattja lidjin ednamijdesa barggam viehka buoragit, valla sij ettjin duosta dâhku mannat. Valla darjesámij ednam lij ájbas ávtas, ietján gâ gâggu væjddárin lidjin árruha, jali guolâstiddje jali lâddebivdde.

Bjarmelattja subtsastin sunji âllo giehtoj sihke sijá ednama ja ednamij birra ma lidjin sijá birrusij, valla sán ittijj diede mij dassta lij duohta dajna gâ sán ij lim iesj vuojnnám dajt. Suv mielas ároj nav ahte sáme ja bjarmelattja hållin vargga sæmmilágásj gielav.

Sán ittijj maná dâhku dâssju ednamijt átsâdittjat, valla ávdemusát mårsjâj diehti, dajna gâ dajn lij sierralágásj buorre dákte tjäláinij - sij buktin muhtem dakkár bâniyt gânágissaj - ja daj náhkke hiehpá buoragit hâksabáden. Dát sváles la âllu unneb gâ ietjá svállá; dat ij la guhkep gâ gietjav állena. Valla suv guovlon la buoremus sválesbivddo, da la nielljalâk gâvtse állena guhke ja stuorámusá vihttalâk állena guhke. Daj birra sán subtsastij sij gudás gâddin dakkáriyt guhttalâge guovte biejen.

Sán lij viehka addnes álmâj dakkár ábmudagáj hárráj massta sijá boanndudahka boahtá, dat merkaj miehttseiellij hárráj. Sujna lidjin dalloj gâ gânágisáv guossidij, guhttatjuohte vuovdek gæhttjoelle. Dájt iellijt sij gâhtjudin boahttsun. Guhtta dajs lidjin vuornedimboahhtsu. Sáme adni dajt viehka alla árvvon, dajna gâ sij daj gâttijt bivddi.

Sán gulluj ríjka njunnusabmusij sæbrráj, huoman ællim sujna ienebu gâ guoktalâhke gusáv ja guoktalâhke sâvtsav ja guoktalâhke svijnev. Ja dav binnáv majt sán pluovvij, pluovvij sán hestaj. Valla sijá sisboado li ienemusát da væro majt sáme máksin sidjj. Dakkár værron lidjin iellij náhke ja dâlge, ja mårjsjâtjalána ja hávsabátte ma li mårjsjânáhkes ja nuorjonáhkes dagáduvvam. Juohkkahasj máksá ietjas máhtukvuoda milta. Addnemusá galggi mákset lågenanvihtta niedenâhke ja vihtta gâtteduolje, ja avtav biernanâhkev ja lågev æbbâra dâlgjís ja avtav bierna- jali tjævrránáhkkemuottáv ja guokta hávsabátte, goappátjagá guhttalâk állana guhke, nubbe galggá liehket dagáduvvam mårjsjânáhkes ja nubbe nuorjonáhkes.

Sán subtsastij vuonagij ríjka lij viehka guhke ja siegge. Divna ednam majt máhttá giedden jali bælldon adnet, le merragáttien. Valla huoman le moatten sajen viehka ráktjo. Lulás ja badjelin li ávtas duoddara, ároduvvam ednamij miehtáj. Dájn duoddarijn árru sáme. Ja ároduvvam ednam le gâbdemus oarjjelin ja siekkep madi nuorttalijda manná...

Ja de oarjjelij oase ednamis, nuppe bielen duoddara la Sveaednam gitta ednama nuorttagæhtjáj, ja mijá ednama nuorttaoase buohta la Guojnaj ednam. Guojna bâhti muhttij rievvommanojda vuonagij vuosstij badjel duoddarij, ja muhttij vas vuonaga rievvu sijáv. Ja duoddarin li juohkka sajen viehka stuorra jávre, ja guojna guoddi vantsajdisá gâjkke ednama milta dâjda jávrijda ja dâppet sij vuonagij guovlojt rievvu. Siján li viehka unna ja viehka giehppis vadnasa.

Ottar giehttua dat guovlo gânnâ sán árru, gâhtjoduvvá Hålogalanndan.

Gáldo: Norges Offentlige Utredninger (NOU) 1984:18. Sámâsta: Aas.

Birrusij 100 jage manjela ietjá hålogalasj oajvve Tore Hund, ráddij Hålogaland. Sán sjattaj viehka addnes Biarmia rievvommanoj manjela.



*Ottara giehtto.*



Hålogalasj oajvve Ottar gájbbedimen værov sámijs. Tjuorgas: Arvid Sveen.



Vikinjja rievvomin Biarmia-rijkan. Gåvvá: Snorre, Vuona gânâgisisjehto.



Manonis lulás Ottar manáj gitta Biarmia-rijkan. Olaus Magnus 1555.

Sân værov válđij ja rievoj sámijt. Viehka mávsulasj gálvo lidjin náhke ja mórsjåtjalána majt sân vuobdij Englándan. Da lidjin buoremus eksportagálvo Vuonas. Vuona gânâgjis oarjján hálijdij ietjas vuolláj oadttjot dáv oassásav ja sisboadov – nav vuollástij sán ábbå Hålogalándav.

Rijddo buolláj. Gânâgjis Olav guhti lij massam fámov oarje Vuonan, gæhttjalij de oadttjot fámov ábbå Vuona badjel. Doarrofuovajn sán Stiklestada bájkev lahkanij Jemtlándas Svierigis. Stiklestadan li Tore Hund vuorddemin ja ietjá hålogalasj oajve doarrofuovajnisá.

Gânâgisia doarrofuova lâdaj. Gânâgjis hávvádahttá Tore Hunda oalgev. Valla suv tjiegos værjo lij assás sáme náhkkebivtas mav sáme lidjin sunji gârrum. Biktasin lij dakkár noajddefábmo jut ettjin makkirak værjo dasi baste. Nav tjállá Snorre Sturlasson. Gânâgjis Olav gâdduj. Sân oattjoj manjela namá Basse Olav, man birra máhtá Vuona histåvrân lâhkåt (*Ulmutja ájgij tjadá 1*).

Manjenagi hålogalattjaj oajve fámoduvvin, ja muhtema jáhtin oarjás ja válldujin Oarje-Vuona ádela-berrahijda. Gânâgjis oattjoj de tsoaptsev stivrrigoahet sáme náhkkeoassásij ja værov válldet sijás.

Tore Hund Stiklestan.  
Gåvvá: Snorre, Vuona  
Gânâgisisjehto.





Gånågis Olav gåttedallá. Gåvvá sárgoduvvam 1300-lågo álgon. Le dálla Nidaros-girkkon.

## Sámij værrodus – gånågisá monopåvllán

Sáme náhke sjaddin nav ájnnasa Vuona gånågissaj, ja sán mierredij jagen 1115 jut nuorttalin «Umeyarsund» jali Ubmejávre ij lim iehtjádijن gå gånågisán loahpe oasástallat sámij ja værrodit sijáv. Dat sjattaj gånågisá monopåvllán. Dáv sán dagáj danen gå dán ráje nuorttalin ittjjí máhte dábálasj værov gájbbedit, dagu ietján ietjas ríkja vuollásattjajs. Nuortta Sábme vuojn ittjjí gullu Vuona gånågisá ráddima vuolláj, ja dáppe gånågis hæhttuj gilbbot ietjá fábmovieldij jali ríkaj náhkkeoasástallij ja rievvárij sáme mávsulasj gálvoj nanna.



Værrorádje 1115. Nuorttalin «Umeyarsund» jali Ubmejávrri ij lim iehtjádijn gå gånågisán loahpe oasástalátjt sámij ja sijás værov válldet.



**S**áme dahkin doarrohávsajt vuonagijda. Snorre tjállá Sigurd Slembe birra guhti báhtarij Sážzái (Senjan) gánnå sán oattjoj sámijt dagátjít sunji hávsajt. Sán lij báhtaram Hålogalánndaj mañjela gá lij gåddám gánágisáv Harald Gille. Årodijn 1138-39 dálvev Sážzán (Senjan) sán oattjoj sámijt dagátjít guokta hávsa, ma lidjin suonaj goaroduvvam, ja lágenanguokta ulmutja suhkin goabbák bielen. Dá hávsa lidjin nav jáduga jut ittjjí aktak háksa nagá doarredit dajt. Nav Snorre tjállá. Sigurd Slembe álmmájis Sážzán (Senjan).

Gåvvå: Snorre. Gánágisgiehto.

1100-lågon lidjin Vuona gánágisá biddnustalle Sámen ávdemusát guojna. Sij lidjin oasestiddje, vzejddára ja rievvára ja båhtin Badáluovta nuorttaguovlos, degu aj Ottar tjielggi. Birrusij sæmmi ájge gárjjela ihtegáhtin Sábmáj oasástalátjít ja rievotjít. Sij gullujin Novgoroda vuolláj mij lij slávalasj stáhtta ja jávsådij dan ájge davás gitta Guoládknjárggaj.

Dáttjaj årrom davás vijddánij merragátte milta gitta Várjjagij, ja oases- ja rievvommano danna nuorttan joarkeduvvin. Da Novgoroda stáhtav ájtin. Nav Novgorodav fursstá gáhtjoj gárjjelij ja ruossjajt rievrot merragátte bájkij oarjás gitta Málatvuona rádjáj. Ja 1300-lågo álgon lidjin rijdo nav stuorum, vargga lij sjaddam doarro Novgoroda ja Vuona gaskan. Sæmmi ájge Vuona fábmodus tsieggij ladnev Várgájda duostotjít gárjjelij ládamijt. Ladne aktijuodan tsieggiduváj aj girkko, mij viháduváj 1307. Vehik mañjelasj Vuodna biejaj virggáj lednahærráv nuortta Sábmáj, Finn-morkkaj. Dán rádjáj gájt árvvaluváj Vuona stáhtafábmo jávsåt.



Tjuorgas vuoset doarov vuonagij ja ruossjaj/gárjjelij gaskan. Mañen li aj «tjuojgesáme», gudi lidjin «jáhtela mannat muohttaga milta giehppis sabegij». Olaus Magnus 1555.



Várggáj (Vardø) laddne tsieggiduváj 1300-lågo álgon, duostotjít ruossjaj/gárjjelij ládamijt. Sæmmi ájge viháduváj girkko dåppé. Mij ep diede makkirin laddne lij dalloj. 1450 ja 1500 gaskan tsieggiduváj ådå laddne, mav dát modælla vuoset.

## Historia Norvegiæ sámij birra

**H**istoria Norvegiæ, mij lij 1100-lågo gietjen tjáledum, li viehka miellagiddis gåvvidusá sámij birra: Rádjalahkusin Vuonajn le ávtas miehttseguovllo, ja da dáv ednamav sierrin báhkenijn. Dán miehttseguovlon árru sáme («finnas») ja vllda ielle. Sáme bárri iellij biergov biellenjuoskan ja adni náhkijt biktasin. Sij li oalle buorre bivddoulmutja ja sij jáhtåli birrusin avtaj avtaj, ælla ga siján fássta árudagá. Sij árru biessegådijن, majt sij guoddi hárdo nanna, ja gå sij giddiji juolggáj šalladuvvon muorajt majt sij gáhtjudi namájn «ondros» ja dav båttåv gå «sarva» (cervi) oaggot tjadá muohtaskáblaj ja badjel vastes ednamij, de sij jáhtelappot manni gå lätte, nissuna ja máná fáron. Dajna gå ælla siján fássta árroma, valla sij vájaldi birrat-birra dan milta gå luohtogij vallje vuoset bivddosajit gå hiebalgis ájgge boahtá.

Dåppe li lohkameahttun ållu villa viessot, bierna, stálpe, albas, riehpiha, sobelat (márju niede), tjævrrá, mievrit, vaddnema. Sámij ednamin li valjet aj oarre ja buojddaga. Divna dáj iellij náhkij sij máksi juohkka jage stuorra værov Vuona gánágissaj, gen vuolláj sij gullujin.

Gállido: Storm 1880. Sámasta: Samuli Aikio, 1986.



Sáme viejddimin – tjuojga. Olaus Magnus 1555.

## Lapp, vuovjjusj, sabmi

**G**asskaájgen ihtá lapp-moallánahka sámij birra. Girjenis *Gesta Danorum* (dánskaj dago) birrusij jagen 1200 *Saxo Grammaticus* gáhtjut sámij ednamav *utraque Lappia*, mij lij oasse nuorttedenamij. *Lapp* sámij nammadussan gávnnu Vuona-Svieriga gánágisá mærrádusán jages 1328 mij nannij birkelattjaj nav gáhtjodum boares rievtesvuodajt jáhtet Sáme ja sámijt værrodit. Árvvaluvvam le nammadus Ladoga-guovlos la vuolggám ja suomagielak birke li dav adnám. Udnásj nuortta-Suobma ham gáhtjoduvvá suomagiellaj *Lappi*. Svierigadárogielan ja estigielan *lapp* merkaj ruvdda-jali náhkkeduognas. Soajttá nammadusáv lidjin álgos adnegoahztám Svieriga vikingja Ladoga-guovlon gánnå siján lidjin árudagá. Dán ájádusá milta la nammadus járggåluvvam sámegiela moallánagájn *vuovjjusj*, mij merkaj ruvdda-jali náhkkeduognas, jali aj bivddosiebrre, mij máhttá læhkám álmmuga ietjas nammadus. Tjielggidus bivddosiebrre árru hiehpamin buragit jage 1328 gánágisá mærrádusá lapp-nammadussaj majt Knut Bergsland la dán láhkáj tjielggim: *jáhte vuovddeulmutja gudi álmmukgiellaj gáhtjoduvvi Lappan*.

Gássjel le oadtjot tjielggasin manen sáme gáhtjudin ietjasa gasskaájgen. Boarrásamos tjálalasj gáldo spedjilassti vieres ulmutij vuojnojt ja tjielggidusájt. Sámij ietjasa nammadusá esski vuohttuji 1600-lågon tjálalasj gáldojn. *Lapponia*-girjenis jagen 1673 Svieriga professávrrå Schefferus tjállá sijá ietjasa nammadus le *Sabmi*, ja dav sij gáhtjudi *Sameednam*. Valla vædjá lieket *semsveinum* boarrásamos tjálalasj duodastus sámij ietjasa nammadusá birra, mij nammaduvvá muhtem islándalasj giehton biejvviduvvam birrusij 1270 jahkáj.



## Ådå værrorájá

Vuodna ja Svierik såbadin aktisasj lihtov jali uniåvnåv jagen 1319. Dan manjela esski de buolláj rido vuonagij ja ruossjaj gaskan. Svierik ja Novgorod lijga aj rijddalahttjám, ja nav snárruj aj Vuodna dájda ridojda.

Sihke 1320 ja 1323 ládin ruossja doarrohávsa nuortta Sáme ja dallusj nuortta Vuona merragáddegouvojot. Ládama vájkudin jut ríka gæhttjalin rijddoássjíjn såbadit.


Nöteborg-ráfe såhpamusán jagen 1323 guorrasin rádjáj Svieriga ja Novgoroda republikha gaskan navti vaj gárjjela máhttin hiedrik sámijt værrodit Badáluovta nuorttalín.

Jagen 1326 såbaduváj dan mudduj vaj nuorttaguovojojn galgaj friddja oasestibme ja jáhtálus joarkeduvvat «degu ávddål». Ájnna-samos huoman lij gárjjela oadtnun rievtesvuodav sámijt værrodit Ivgu rádjáj, manjelasj alás gitta Málatvuona rádjáj. Nuorttaguovlo Málatvuona rájes gitta Guoládknjárga lullegæhtjáj sjattaj de dássta duohku goappátjij stáhtaj aktisasj værrogouvlon gánnå sáme gierddagáhtin guovtegerdak vierromáksemav.

Rádjáássje huoman bátsij tjielgak, ja rievvom- ja doarromano joarkeduvvin gitta 1500-láhkuj. Birrusij säemmi ájge Moskva tsárra, Ivan 3. (1462-1503), váldij Novgorodav vuollásis.

Årrom, rája ja værrodibme 1300-1500.

Kártta: Mihkku Solbakk.



## Tjude

Sámiijn li ájmojn állo giehto ma mujttádahti ruossjatjudij rievvo-mijt Sámen. Sáme gáhtjudin dájt rievvárijt *tjuhten* ja giehto sijá birra *tjuhtesubtsasin*. Tjude lidjin álmmuk gudi báhtin lullet oases- ja rievvommáhkij. Ruossja histåvrán li tjuhten gáhtjoduvvam suoma-ugralasj álmmuk, gudi dan ájge árrun Vielggismerra oarjelin.

Árvvaluvvam la tjuhtesubtsasa gulluji dan ájggáj gå lidjin doaro ruossjaj ja gárjjelij birrusij 1250 rájes 1450 rádjáj.

Gå dárkkelappot åtsåt dájt giehtojt, de gávnnap állo dájs li mihtokgiehto, jali tjielgga subtsasa ma gávådi ibmahijt masi ij la rat jáhkedahtte. Muhtem giehto gávådi aj dáhpádusájt ma li bájkjida tjanádum gánnå luondo dille dahká dákkár giehtojt máhettelissan. Danen viertti liehket viehka várrogis ja lájttalis gå tjuhtesubtsasijt ájnas gálldon adná buojk. oahppogirjij. Valla da dáhkkiji giehton gávvidime muhtem dáhpádusájt ma e dárbaha liehket nav duodalattja.

Sámen li bájkkenamá ma mujttádahti dålusj ruossjatjudij rievvomijt. Dakkár namá li degu Tjudejáhkå, Tjudeoajvve, Tjude-vuobme, Tjudegurra jná.

Dála I muhtem tjuhtesubtsas gálldásámi guovlos Guoládknjárgan:

## Einnávada oahpes

Akti báhtin tjude Njuohttejávrráj. Guoládhkaj dal mannamin, galggi viggat vuojtet Guoládagá lanev. Sij li ålos, aktan lagábuj gietjavláges. Nággidin muhtem álmmåv Njuohttejávres doalvotjít sijáv Guoládhkaj. De vuolggin vuojje hiergij. De sjattaj sieldes muohtailmme. Oahpes ij ga vuojje ienebut riekta gæjnov, valla vuodjá bajás Einnáváðav, bajebujda ja bajebujda. Einnáváðda le sieldes alla várre Njuohttejávri ja Guoládagá gaskan. Tjude lidjin luovasuoddje divna, dåssju giehtalak-hiergge, mij oajvámuttjav gæssá lej tjadnasin, ja dat le gádde, udámat. Oahpes dav diedon lij nav ásadam.

Gå de báhtin alludissaj, de javllá oahpes: «lisj dávk buoremus jus sij divna hiergijt biedji rájddoláhkáj, vaj ij aktak láhppu dákkár nievres dálkken». Ja tjude javllin dat lij buoremus aj sijá miela milta. De tjanádij manjälakkoj divnajt, ja de vuoddjáj.


Vuodjá dakkár sajev gággu l alla tsækkobákte ja juovva vuolen. Vuodjá bákterabdac muohtaskáblaj milta dasik gá divna báhti bákterabda nali, de tjaskij tjadnasav gasskat ja svikkastij hiergijnis badjebælláj. Gáddé (udámat) diehttelis tjaskij miehtebuoldav bávte badjel ja ráhttij iehtjádijt aj fárruj, nav de mannin divna bávte badjel.

De oahpes vuojij ulmutjij rádjáj, gánnå iesj diedij ulmutjijt lagamusán. Åroj dåppe gálmå bieje. De vuojij gehtjatjít Einnáváða juovav, hierge lidjin sármämánam ja ulmutja lidjin jábmám, dåssju muhtema vil bajädallin ávjijdisá. Dajt de vil tsábmetstij jámas. De válđij divna tjudijt dávverijt majt gierrisijin lij gávnnam, ja de manáj ja subtsastij Guoládagá hærrájda majt sán lij barggam. De oattjoj ållo gjitov dat bargostis.

Ájn dállea le lullesámin dat báhkovájas gá soabmásav gáttá láhppum jali hevvanam, jut: vuolggát Einnáváða čihčet logu deavdit. Dadje dat dan leakan maiddái.

(Isak Saba 1918, Njávdán)

Sáme oahpestiddje-filmma,  
Mij sjattaj væráldadåbddusin  
le dagáduvvam tjuhtegiehto milta



## Birke sámijt værrodi

Birke, man vuodon máhttá liehket *bjor* (= bever = vaddnem) jali Birkala (Pirkkala) bájkke Suoman, ihti histåvrråj vuostasj bále jagen 1328, dalloj gá vuosteldin svenskaj kolonisierimav ietjasa guovlojn. Dalloj Svierik-Vuona gánágis nannij sijá nav gáhtjoduvvam boares rievtesvuodajt mannat Sámen ja sámijt værrodit, man ávdás galggín visses divudav gánágissaj mákset.

Sij lidjin dalloj juo vuododam oaseslihtoit Badáluovta nuorttalamos ædnonjálmijda ja juohkám sámij sijdajt gaskanisá. Sij gáhtjudin dái sijdaj oajvveednamijt Giepmá Sábmen, Duornnusa Sábmen, Julevuv Sábmen ja Bihtáma Sábmen. 1400 ja 1500-lågon birkelattjat gæjvvanin gitta nuortta merragáttijda ja doarredin ja værrodin dájt sámij sijdajt Divtasvuona rájes Várjaga rádjáj.

Návti lidjin birke juogadam  
Sáme sijdajt gaskanisá.  
Kártta: Davvi Girji.



Værrodim- ja oasesmåhkijen ettjin birke berusta dåssju sijdaj náhkijs. Sij aj berustin merrasámij sijdaj gájkkeguolijs, ájnnasit 1500-lågo gasskamuttos gó Svieriga gánágis Gustav Vasa vuollástij birkij oasesdájmajt nannitjít stáhtafámov. Dav duodasti duola degu jagen 1552 værrorijdo Várjjat sijdan, gánná gánágis ittij oattjo værov gájkkeguolijs, nav gáktu sán tjuottjodij lij lähkám árbbedáhpen. 1550-lågon jáhtuj bádij aj dábálasj svenska oases- ja guollestasjávnná Várjjagin, gánná lájggobargge guollijin Svieriga stáhta



Svieriga gánágis  
Gustav Vasa.

Duornnusa-oases lij stuorra oasesguovdásj 1500-lågon. Diehki tjáhkanin ruossjaga, birke, sáme, suobmelattja, vuonaga ja iehtjáda oasástalátjt, tjállá Olaus Magnus gírjenis, 1555.



åvdás.

Olaus Magnus tjuorggam niellja nuorttarikalasj tjerda. Gáro bieles: ruossjak, svenska båndor, sábme juoksa giedan ja svenska væjddár. Olaus Magnus 1555.

Birke oasesålmmå buktin sámij sijdajda ávdemusát bårråmus-gálvojt, degu jáfojt, vuojav ja sáltijt ja aj dubáhkav. Lassen buktin gálvojt majt dárbabin guollebivdon, degu ruojvvájt, ja aj ruvdaj ja ruossja ránojt majt sámij duola degu adnin loavddagin/låvdan. Viehka ájnas gálvvo lij buollemvijnna, majna aj sámijt jugádin vaj bessin sijáv biehttet. Oasesålmmåmannin guhkes manojt åttjudit-tjat sámij mávsulasj gálvojt ja fievriin gálvvovalljudagáv Badáluovta merragáddáj (gehtja kártav s. 54).

Dálvvemano dáhpáduvvini hiergij. Oasesålmmå ámaston ietja aj hiergijt, boandámusájn lidjin 40-50 hierge, ma giesijt lidjin sámij gæhtjon. Oasesmanoja dárbañin állo barggosávresvuodav. Ettjin divna oasesålmmå vieje vuolgget dájda lásså manojda, ja rádjin danen ietjasa oasesdievnárijt ja svájnnasijt.

Oasestit sámij sijdaj lij dábálattjat lánudallamoases. Jus sámijen ællim nuoges lánudisgálvomákset gálvoj ávdás majt lidjin oasstám, de hæhttuj oasesålmáj vaddet dajt vielggen. Jus dav ittjij dagá, de sábme luobaj oasessåbadusás ja manáj muhtem ietjá oasesålmmáj. Dán láhkáj sajáduvvini vielgge- ja oasestimaktijuoda sámij ja oasestiddjij gaskan. Valla sámij gal ettjin oattjo nav ednagav vielggin gábuojk. svenska bånnadura, danen gá sámijn ællim dakkár åbmudagá gá bånnadurijn buohtidussan jali pánntan.



Birke manon værrodime sámijt. Olaus Magnus 1555.




Dákkár lij Mikkel Mortenssona  
nammamærkka. Sán lij Áviovári  
(Kárásjoga) sijddaiset 1616-1620.

Sámij vielge ællim nav stuore ja vatteduvvin dåssju oanegis ájggáj. Divna vielge tjanáduvvini silbbabiednigjda danen gá sáme ettjin dåhkkida guohpárbiednigjyt.

Sámij oassása vuodobiednik lij bielle ríkadáler, jali svierigadárogiellaj wágh. Gá sábme sjattaj vielggen oasesålmmáj, de ittjij tjále vielggetjállusav páhppárij. Dan sadjáj vuoladuváj muorraj masi tsiehkestuváj nav galla tsiehke gá lidjin tjoahkkáj wágha. Ja de sábme sárgastij namma-merkasmuorragæhtjáj, nav muorra luoddiduváj, ja oasesålmáj oattjoj nuppe bielev. Muorra gáhtjoduváj gilkcurin.




Tjuorgas vuoset lánudallamoasestimev Duornnusa Sámen (Olaus Magnus 1555). Dáhpáduváj birge vaddin vielggin gálvojt sámijda. Vielgge ittjij tjáleduvá páhppárij. Dan sadjáj vuoladuváj muorra masi. Ja de sábme sárgastij nammamerkas muorragæhtjáj, nav muorra luoddiduváj, ja oasesålmáj oattjoj nuppe bielev. Muorra gáhtjoduváj gilkcurin.



1500-lågo gietje rájes nuortta ríjka duodaj rijddalin Sáme ednamij nanna. Ja moatten sajen sjaddin sáme sijda dan diehti nággoværøv mákset gálmå vaelldáj: Danmárkko-Vuodnaj, Suobma-Svierigj ja Ruossjaj, duola degu nuorttasáme sisednam sijda, degu Guovddagæjnno, Áviovárrí, Dædno/Juoksa ja Ohcejohka.

1600-lågon lij nuortta Sábme juo nav juohkásam nuorttaguovlo vieldij fámo vuolláj, jut sáme sijdajt gæhttjin guovtelágátjin: Danmárkko-Vuodna válđij merragáttev, gánnå merragátte viesada sáme árrun, ållásit ietjas guovllon, danen gå dåssju da dåppen ráddijin. Oajválattja gæhttjin ja admin nuortta Sáme sisguovlov vas aktisajguovllon, gánnå sijá aktisaj sáme árrun. Dáppe guokta jali gálmå ríjka gájbbedin værov sámijs, danen gå avtanik ij lim ålles fábmo sisednam sijdaj badjel. Ålggorijkaga guolligåhtin ja oasástallagåhtin nuortta



Sáme merragádegguovlojuo 1300-lågo rájes. 1500-lågon dá dâjma ávddånin gå ådå oasesgæjnnu nuortta Sáme merragátte guorav Ruossjaj ásaduváj. Jagen 1594 muhtem oarjep ednama ekspedisjåvnná manáj dáppe davven. Mañen lij Jan Heyghen van Linschoten, guhti mannogirjev tjálij ja dagáj kártajt guovloj badjel gánnåmannin. Dá suv nuorttarijkaj kártta li viehka tjábbát sárgoduvvam. Kártan vuojná Guoládaknjárgga le sárgoduvvam Sábmen – Lappland. Duodden le sán sárggum samojedajt, gudi árrun «Nova Semblas» ja viessun báhkendilen, gáktu sán tjielggij.

## Kalmardoarro ja sáme

Doarro Ruossja ja Svieriga gaskan vájkudij Teusina-ráfev jagen 1595. Ruossja hæhttuj luohpadit divna nággo sámeværro gájbbá-dusájt Anársijdas ja merragáddegoulov Várjjagis Divtasvuodnaj. Svierik oattjoj Ruossja boares rievtesvuodajt værrodit dái guovlo sámijt. Dán såabadusá milta Svierik gájbbedatjáj guokta goalmát-oase sámeværos Málatvuonas Várjjagij, sihke sijá (birkij) boares oasev ja Ruossja oasev. Ruossja huoman järkij sámijt værrodit Várjjaga oarjebelen. Ij nuoges dajna: Vuona sunde rievvogåhtin ruossjasámeværov dájn guovlojn hiereditjat Ruossja ja Svieriga værrogájbbádusájt.




Muhem sijda viertjin værov mákset gálmå stáhttaj. Dát lij lásså noade sijda viesáidja. Gávvá vuoset dánsska-vuona sundev ja suv dievnárap gudi libá værov sámijs gájbbedime. Mij vuojnep sáme gieggimin værov dudálasj sunndáj. Dievnár mierkki værro máksemav værrolisstaj. Lilienskiold 1690-lågon.

Dánsska-vuona gánágis Kristian 4 (1577- 1648), sárgoduvvam ávddåla gó manáj nuortta Vuodnaj, Finnmárkkuj 1599 oahpás-muvájt ietjas rijkkaj.

Dá rijdo vájkkudin jut jage 1612 rájes Danmárko-Vuona sunde ettjin desti besa værojt gájbbedit Guoládknjárga sijdajs, degu ávddål lidjin dahkam. Dat rájes oattjoj Ruossja álles stivrimfámov Guoládknjárga moattelåge sijdaj badjel.

Danmárkko-Vuodna ájtij garrisit stráffut merragátte sáme viesádijt jus ruossjasámeværov Svierigij máksin. Svierik vas ájtij boatsojsámit stráffut jus værov Danmárkko-Vuodnaj máksin.

Nav doarro buolláj, mij la gåhtjoduvvam *Kalmardoarron* (1611-1613). Doarro dáhpáduváj oarjelij Svierigin Kalmar-stáda birrusijn, valla dat galgaj tjielgadit rijddoássjjit nuortta Sámen, guhkken ierit doarrosaljos. Doarro galgaj nappu rijkarájáv tjielgadit nuorttan ja guhtimusj fábmo galgaj hálldusis oadtjot nuortta Sáme sijdajt. Svenska galggin hiereduvvat oadtjomis tsoaptsev Nuortta-Vuona vuonajda. Danen vuodnasáme Divtasvuonas davás naggiduvvin jáhtet suollujda vaj svenska sunde e jávså sijáv.






Merrakárta, Lucas Waghenaer dakhkam 1596, mij lij márjju gânågjis Kristiana  
marjen gå nuorttan manáj.



Svieriga gânâgîs Karl 9  
(1550-1611), guhti gæhttja-  
lij vuollâstit åbbâ nuortta  
Sámev. Sân gâhtjudij ietjas  
«divna sámij gânâgjissan».


Åvddål 1595

- Dánmárko-Vuona værroodibme
  - Svieriga værroodibme
  - Ruossja værroodibme




Manjáj Teusina-ráfe 1595 ja Kalmardoaro 1611-13

- Dánmárko-Vuona værro dibme
  - Svieriga værro dibme
  - Ruossja værro dibme



Sámij værrodebme ávddål 1595 (bajep), ja Kalmardoaro 1611-1613 mannjela (vuolep). Kárta: Geir T. Steigan (girjes Hansen ja Olsen 2004).

Ráfesjiehtadusán jagen 1613 tjielgadij jut merragáddesijda Várjaga rádjáj galggin gullut Danmárkko-Vuodnaj, valla sisednama sijdajn galgaj værro dibme ja oasástallam dáhpáduvvat «degu ávddåla», nav gåktu javladuvvá sjiehtadusán. Dat merkahij aktisasj værro dibme joarkeduváj, ja nuortta Sáme sisednama sijda sjaddin ájn gierddat guovtegærddásasj, na muhtema vil gálmágærddásasj værrodimev gitta jage 1751 rádjáj, dalloj såbadin rijkarájáv (gehtja. b. 144).



## «Malmismanno»

Jage 1612 rájes Danmárkko-Vuodna ittijj desti besa værrodit Guoládknárga sijdajt, degu ávddála lidjin dahkam. Ruossjaga gielldin dav. Huoman dánsska-vuona oajválattja máddin dættodit jut siján lij ájn rievtesvuhta Guoládagá sijdajt værrodit. Danen Várjjaga sunnde dagáj juohkka jage manov Guoládhkaj jali «Malmisj» værov gájbbedittjat sámijs. Juohkka bále ruossja ámmátálmáj gieldij sundev dakhmis dav. Ruossja vuosedij Danmárkko-Vuonav mærrá-dussaj, mij ruossjajt gieldij værrodimes sámijt Várjjagis alás. Gåvvá vuoset dánsska-vuona vantsajt bårjåstime Guoládhkaj gájbbedittjat værov sámijs. Lilienskiolda 1690-lågon. 1600-lågo miltta oattjoj Svieriga stáhutta majenagi tsoapt-

sev sijdaj dálvvadisajda. Sij ásadin nanos girkko- ja oasesbájkijt diehki. Girkko háldadus máhtij oadtjot buorep fámov sámij badjel. Vaddin aj oases- ja værromærrádusájt ma galggin sámijt hieredit vájaldimes ja jáhtemis. Oajválattja gæhttjin dáv vahágjin danen gå sjattaj gássjel mierredit rijkarájáv ja åttjudit Svieriga badjelijgæht-tjov diehki. Danen lij aj ájnas sieradit sámijt ierit ednambarggijs. Sierraláhkáj tjielgas sjattaj 1660-lågo låhpagietje mærrádus, mij máhttelisuodav vattij duohtan dahkat åvvå Sáme sierra reserváhttan, gánnå divna sáme galggin årrot. Jus sáme gávnadallin man-namin guovlo ålggolin, de máhttin dalága rájaduvvat ruopptot sijdajdisá.

Kalmar-doaro manjela rievddagådij aj vuonagij dille nuorttalamos Sámen, Finnmarkon. Hansa-oaseslihtto mij gasskaágjen lij Nuortta-Vuodnaj vijddánam, lij binnum. Dát vájkudij guolleoassásij ja dajna aj Finnárko vuonaj ja merragátte årromij. Manjela reformasjávnå guolle ij lim desti nav bivnos fásstoágjig. Ja Biergen-oassásij oasesálmmå gudi 1562 lidjin oadtjum rievtesvuodajt aktu oasástallat Nuortta-Vuonan, ettjin nagá dåjmadir oassásijt sæmmi buoragit gå hansa-oasástalle. Guollejáhto værránij, ja ulmutja, ájnnasit vuonaga, gierddagåhtin nielgev, danen gå sijá iellem lij nav tjanádum merrabivdduj. Vuonaga báhtarahtjin nielges, ja állusa jáhtin oarjás. Sæmmi ájgen merragátte viesádij sámij lâhko lassánij, ja sij gal bierggijin buoragit danen gå máhttin guovlo luondoy ávkit.

Danmárkko-Vuodna gehtjaj dáv vuonagij báhtarimev oarjás  
vahágjin ríkkaj. Vuonagij láhko ittjj desti galga binnot, ja nuortas  
jáhtemav galggin mävtåstuuhettet. Dåbdddosamos la jage 1681  
mærrádus, mij galgaj lasedit ulmusjlågo nuortta Sáme merra-  
gáttijin, udnásj Finnmarkon. Mærrádusá milta lij máhttelis jádedit  
duobbmiduvvam vierredahkkijt Finnmarkkuj. Siján lij máhttelis-  
vuohta válljut duobmov fierddat Oarje-Vuona gruvvojn jali årrot  
Finnmarko merragáttijin. Danen gå dát mærrádus guoskaj vierre-  
dahkke ålmmájda, de tjálestij Finnmarko ámtaålmåj njunnjusj-  
oajválattajda Københavnaj:



Dujska oasesháksa sárgoduvvam 1441. Dákkár hávsaj hansaoassástalle fievri-jin gálvojt Biergen-stádas nuortalamos Sábmáj, Finnmarkkuj.


*Jus diján li ilá állo álmmá ja nissuna fáñngavuodan dáppe, de  
sáddijit muhtemijt diehki. Dáppen nuorttan li binná viesáda, ja mij  
dárbahip ienebut ulmutjít diehki. Jus li vil huorá ja vierredahkke  
gudi e luluj galga Danmárkon liehket, de sáddijit dajt diehki nuor-  
tas. Dáppe mij gal dábmap dakkárijt.*

Dát mærrádus lij fámon gitta 1700-lågo gasskamudduj ja hiejte-duvaj esski 1800-lågo gasskamuttoj.

Birrusij 1600-lågon lij vuona kultuvrra udnásj Nuortta-Vuona suollu-jda ja njárggagietjija sajáduvvam. 1600-lågo miehtáj ja ájnnasit 1700-lågon vuona ednambargge nárrágáhtin ja jáhtegáhtin sámij vuonajda. Sij válldin hálldusisá sámij árudagáj kolonisierimlágaj viehkijn majt oajválattja manenagi vaddin. Nav merragáddesijda hádjánahtjin ja dárojduhitemij vájkudij aj mis-jávnná mij tsoaptsev oadtvogádij 1700-lågo miehtáj.

Vuodna tjadnagádij sámijt stáhta háldadimvuogádahkaj gå biedja-gádij virggáj sierra sámesundijt ma aj gáhtjoduvvin sámelænsskan, «finnelensmann». Da galggin ájnnasit doajmmat boatsojsámij gas-kan ja værov sijás gájbbedit. 1600-lågo láhpa rájes dá sámelenska lidjin dábálattja boatsojsijdaseda.

Gåktu de lij sijdaj sissjálasj dille dalloj gå nuortarijka állásit rijdda-lahtjin ja doarrujin Sámij diehti?



- Dáttjaj sijda 1600-lågo loappagietjen
- Merrasámij oajveárrromguovlo nuortalamos Sámen.
- Gálldásámij árromguovlo

## BIVDDOSIJDDA 1500-1750

### Sábme

Juohkka sajen vuonaj sinna (Finnmárkon) árru sáme sæmmiláhkaj gå ietjá sajen Nordlándan. Valla stuorra duoddarin árru badje- jali boatsojsáme, «Lappefinnerne». Ja dálusj ájge, dalloj gå badje- ja merrasámijŋ lij siján ietjas gânågis, dalloj dán lenan ij la årrum aktak dádtja, valla sámiŋ háldon lij dát ednamoasse gitta Helgelánda lena rádjáj. Ja siján la læhkám sijá ietjas sierralágásj gânågis, sihke Harald Vuopptafávرو ájge, guhti nággiŋ ávvå Vuonav ietjas vuolláj (ietján gå sámijt), ja guhkes ájgev dan manjela, navti vaj Vuona gânågisrjkkä ittjjí jávsåda dan ájge guhkebuj nuortas gå dálásj Helgelánda rádjáj. Valla ábbå dát oasse, mij lijuorttalín, sihke duoddarinja merragáttén, gulluj sámijda, ja Motle sámegânågis lij suv namma, guhti dåppé rádáj Harald Vuopptafávرو ájge. Valla dállea li merrasáme sjaddam Vuona kråvno vuollá-sattjan, ja boatsojsáme sjaddi værov gâlmå gânågissaj mákset, degu dánna ávddålin subtsastuvvá.


Peder Claussen Friis, 1613.  
Sámasta: Samuli Aikio, 1986.



### Gálđo ja átsådibme

Sijdda la guovdásj moallánahkko jali nammadus dájdjadittjat sámiŋ árbbedábalasj sebrudagá organisierimav. Uddni mij dav dâbdddåp duola degu nammadusájn boatsojsijdda, ja sijdda jali bájkke merrasáme hålli guovllon. Sijddaásadus la viehka boares, valla sijdda bágo etymologijja le iehpetjielgas. Árvvaluvvam le dat la berulasj suomagiela *hiisi-báhkuj*, man merkadus le miehtsehállde jali bassebájkke.

Sijddavuogádagáv li átsådam duola degu antropolåvggå V. Tanner (1929), antropolåvggå H. Tegengren (1952) ja etnográffia Ørnulf Vorren (1978). Mañemus ájge li aj Rámså universitiehta histåvrrå-átsådiddje berustam ássjes ja almodam átsådimijdis sierra bájke-girjijen, duola degu Ivar Bjørklund (1985), Einar Niemi (1983) ja Jens Petter Nielsen (1990). Gájka árvvali sijddaásadus la viehka boares, valla la mañenagi rievddam gå stáhtaj værroðibme, oasá-stallam ja kolonisierimpolitikhkka li dasi vájkudam.



Sijda, ávddål gå rijkarádjá gieseduváj jagen 1751. Suláj rájá.

## Årrom

Boarrásamos tjálos mij nammat nuortalamos Sáme bivddosijdajt, le *Unnes giehtto Finnmarko ja dan oasástellama birra*, mij la 1500-lågo gietjen tjáleduvvam. Tjálos nammat årromdábijt, æládusvuogijt, gielav, bivtashámijt ja åskov. Tjálos álggá dán láhkáj:

*Dáppe li guovtelágásj sáme, merrasáme ja badjesáme, merrasáme gudi árru merragáttten ja badjesáme gudi árru várjin, ja dá gáhtjoduvvi namájn «Lapp».*

Tjálos nammat dåssju badjesámijt ja jut sij árru várjin. Dadi ienebuv ep oattjo sijá birra diehtet. Moallánahka *badjesáme* dánnna diedon hæhttua vuosedit årromij, gá sij árru sisednamin, ja ij jus sij li boatsojsáme. Boatsojeládus vuojnnet ij lim ájn sjaddam æládusvuohken nuortta Sámen.

Ja de tjálle tjielggi sámij boahtema birra, jut muhtema jáhkki sáme lulun ma boahtám muhtem imalasj náles, márjuu bednaga náles, danen gá sijá giella ja hållam la nav gilljanis ja dajna gá aktak ij máhte dav riekta tjállet ja oahppat. Valla tjálle gal dasi ij la huoman jákkemin, dajna gá sijá rubmaha li sæmmilágátja gá risstalasj álmmugij hábme. Sán tjállá biktasa li ietjálágátja gá ietjá álmmugij, dajna gá sij e ane moattelágásj skirtoit, ja tjielggi dárkkelappot sámij gárvojt, degu muottáv, gáptev, gistájt jná.

Sáme párra mannamin  
gírkuj, márjuu mánás  
gástadittjat.  
Olaus Magnus 1555.



## Unnes giehtto Finnmarko ja dan oasástellama birra

Tjáleduvvam 1500-lågo gietjen. Tjálle tjállá tjuovvovattjav biktasij birra:

Valla sijá biktasa li ietjálágátja gá ietjá álmmugij, degu dábálattjat sij e bruvkku adnet moattelágásj skirtoit, valla siján li rubmaha lagamussan gättenáhkes duodjuhuvvam gárvo, ma jávsádi tjielibdis gitta tjárbiele gasskarádjáj. Danna li guolga ålgus ja assebielle rubmaha guovluj, ja dav sij gáhtjudi muoddán, «piask». Ja de dasi lassen nubbe ruvddagáppte le vajáduvvam njuolgga sihke bajelt ja vuolelt dan, ja dasi le vil biejaduvvam russjkis åhtsårabdda, ja dan sase li sæmmiláhkáj bajelt vuolelt ja joarkeduvvam njálmenisá ruoppsadjin, tjáhppadijn, russjkadijn jali alegijn.

Valla gá sij vuolgi duoddarij bivdduj jali vuotjátjít, de la siján bajemussan juogu stuorra muoddá jali gättenáhkes duodjuhuvvam gáppte, mij jávsát vähkä rádjáj. Dat gáhtjoduvvá muoddán ja aneduvvá dálvijt, gá sij manni duoddarij bivdduj, navti vaj dat galggá liehket degu muohta ja duoddara ja rávvat dagu dálvve. Dasi lassen la sámen gättenáhkes goarodum gahper, ja dav sán biedjá oajvváj gá bivdduj vuolggá, ja dasi l sán gárrum gitta unna gáttetjoarvájtjít.




Merrasáme giesse- ja dálvvegárvoj. Ovddabielen ålmmán li badjelis muoddá, rivut, gistá, nuhtaga/gálloga giesaduvvam vuoddagij, jali da máhti liehket sahpuga. Lilienskiolda 1690-lågon

Dákkár biktasijt sán bajemussaj válldá gå bivdduj vuolggá, dajna  
gå náv sán máhttá gåddetjårråga lusi njáhkat nav lahka gå sihtá,  
gå sán la dakkárin váren, le sán dalloj le ájbas gättenálak. Valla iet-  
ján la sámen ruvddagahper, dan lágásj, majt sij bæjválattjat adni.  
Dat la duodjuhuvvam járbbåsin navti vaj danna la rabdan guhka  
tjiehka. Dasi lassen li sujna guokta náhkkegistá, ma li gáttegábma-  
sijs dagádum. Dajn la guolggaa ålgosguovlluj, ja da gáhtjoduvvi  
dárogiellaj «grinskunge», ja sámegiellaj le daj namma gistá.


Sämmiláhkáj li sámen bajelt guolggabåvså, ma li aj gáttegábma-  
sijs dagádum ja man guolga li ålgusguovlluj. Daj namma le sáme-  
båvså, «Lape buxer», ja dajt sán adná bivdon duoddarin. Valla dasi  
lassen li sujna båvså ruvdas jali bárkkiduvvam gättenáhkes, majt  
sán adná meran ja gáhttju skoddebåksan, «skode buxer». Sujna  
li vil gättenáhkes dagádum sáme gábmaga, ja dajt sán gáhtjut  
ednamgáman jali láttégáman, valla ietjálágásj gábmagijt le sán  
nuorjonáhkes duodjuham.



Merrasáme nissuna ja niejdamánná giessegáptijn. Oalgesbiel nissuna gápten  
le alla tjehpuris. Lilienskiolda 1690-lågon



Gápte, gistá ja båvså.  
Knud Leem 1767.



Nr. 1, 2, 3 ja 4: nuhtaga, nr. 5: sahpuk,  
sahpuga; nr. 6 ja 7: avve, ave gánnå I  
guottadak ja nállogoahte. Knud Leem  
1767.

Dajt sán gáhttju merragáman, dajna gå dajt sán adná meran ja  
duoijt nuppijt vas váren.

Sámenissunin le aj ruvddagáppte, masi I goaroduvvam áhtsâ-  
rabdda ietjálágásj ruvdas. Sán ij ane lijnev almma badjeoasen,  
muhtema tjebedijn ja soabmása vas tjebeda dagi - unna ruoppsis  
gahper dakkár nielljetjiegak jali járbbå barggogahpera málla ja gállo  
oajvvegárvutja ruvdajn degu tartárajn. Nissunin li aj båvså ruvdas  
jali gättenáhkes degu ålmmán, siekke tjårbieles vuolus gitta juolgij  
rádjáj, párra sámegábmaga, ma li vielggis gálbbénáhkes guolgaj  
dagádum, ja daj nanna njuorjonáktjanás, mij la viehka tjábbe.


Sámasta: Samuli Aikio, 1986.

Oasesgiehto tjálle tjielggi viehka dárkkelite merragátte sáme viesádij árromav ja æladusvuogijt. Juohkka stuorra vuonan árru sáme, ja siján li sijda. Merragáddesáme jáhtáli árudagáj gaskav jábij milta náv:

- Giesijt árru sij vuodnagáttij ja suollujn. Æladussan dalloj le merrabivddo, lâddebitvddo, mânnetjoaggem ja dålgge- ja ujvattoaggem.
- Tjavitjajt jáhti sij vuodnabahtaj, gánnå sij muorajt tjuolli, duoduhi ja vantsajt divudi ja viejddiji ja guolliji lagos badusiin.
- Dálvijt la sijá árudahka sisednamin, gánnå li jávre ja jágå. Dâppe sij jávriy় bivddi, ja bivddi gåttijt ja luohogijt.
- Gidájt máhttsi sij vas vuodnagáddáj merraj gánnå bivddi tjáppa dálkken. Nievres dálkken vas duoduhi ja vantsajt divudi, muorajt tjuolli ja viejddiji.


Dán lágásj árromav ja æladusvuogev duodas professåvrrå Ørnulv Vorren átsådallamis vuodnaguovloj sijdaj birra. Viehka ájnas lij Várjjaga sijdda mij lij akta dajs stuorámus sijdais nuortta Sámen. Dan birra tjielggip manjela (s. 104).

Bielljegoahte.



*Knud Leem tjállá náv man láhkáj merrasáme famillja anij goadev. Árrana birra gájkajn lij vásedijn sadje. Æjgádjí sadje lij oalgesbielen boassjoluojdon, iset boassjo lagámusán. Mánáj sadje lij sáemmi bielen gasskaluojdon. Gáro bielen sisnjemusán lij bárñij ja niejdaj sadje, dievnárij sadje lij uskaluojdon. Uvsá lagámusán gávvá lij bednagij, lippaj ja gálbij sadje. Guolbbe lij duorgiduvvam ja duorgaj nali lidjin duolje biejaduvvam. Boassjon vuorkudin biebmojt ja goahtelihtijt, bivddobierggasijt ja goabddáv.*

*Boassjo duogen lij uvsasj, boassjouksa, mav ålmåmå adnin gá sisi válldin biernagårodav jali – biergojt goahtáj manjela gá lidjin dav bivdon gáddám. Nissuna ettjin oattjo daggu mannat.*



## Sijdaj vijddudahka

Svieriga jage 1553 værrogirjijn li nammaduvvam duola degu dá nuortta sáme sijda: Ájovárri, Guovddagæjnno, Láhpojávri, Leavdnja ja Dædno.

Dájs sijdais lij Ájovárri stuorámus, gájt ulmusjlågo hárráj. Sijdan árrun 11 værromákse jali familja. Guovddagæjnon árrun 8 familja, Láhpojávrin 4, Leavdnjan 3 ja Dænon árrun 4 familja.

Boarrásamos værro- ja duobbmogirjij baktu le máhttelis rekonstruerit dallusj nuortta sáme sijdaj rájájt. Esski 1700-lágon tjálalasj diedo lassáni, ma máhttelisuodav vaddi, gájt muhte mærráj sárgot sijddarájájt Sámev miehtáj.

Ienemus guovlojn sijddarájá lidjin dan láhkáj ásaduvvam vaj juohkka sijdda galgaj buoragit bierggit viejddima ja guollima hár ráj. Danen lij ájnas jus sijda sissjelin lidjin jávre, jáhkåliege ja gáddejåhtulagá. Merragáddesijdajn lidjin vuodnabadá ja suollu ájnnasa. Tjáhtjejuohko sjattaj moatten sajen luondulasj rádján sijdaj gaskan, buojk. sijddarádjá Ájovárri ja Dæno jali Ohcejoga gaskan. Ájovárri sijda guovdásjjágå lidjin Kárášjohka ja lešjohka, ja lagámus bivddoednama lidjin dáj jágåj badjeliin.

Nuorttalamos sáme sijda. Suláj sijddarájá. Jávrrešduottar lij aktisasj gáddebivddoguovlo.



## Æládusá ja værrodibme


Svieriga jage 1553 værrogirjijn oadtjop diehtuj jut gádde lij viehka ájnas æládusvattáldahka bivddosijda ulmutijida. Gåttes lij vallje ja dassta oadtjun bårråmusáv ja bivojt, ja dajna máksin aj iene-mus værov stáhttaj jali «Kråvnuj». Valla værov aj máksin návdij ja luohtogij náhkijs. Viehka ájnnas lidjin riehpihanáhke ja ájnnasab-musa njálanáhke, niede-, gierke- (jierva-) ja vaddnemanáhke.

Vaddnem nammaduvvá nuorttasáme sijdaj værrogirjijn dájvváj 1500-lågo loahppaj, valla e nav ållo. Ájovárrin gáddin dajt iene-musát. Dat bivdos la báhtsám mujton bájkkenamma Mädjet-mohkki, mij la dárojduhtedum «Bæverud» namman. Gasskamærrá-sattjat gáddin sijdaulmutja niellja-viutta vaddnema jahkáj, valla muhtem jagij máhettin gáddet lågev ja ienebuvin.

Vaddnem.




Guovtelágásj vaddnem-bivddusa jágán. Bajep stuoráp jágán. Vuolep unnep jágán.



Biernna diehttua vuorjját værrogirjij, duolloj dálloj akta jahkáj. Dan diehti máhttá liehket gáttedum ienebu gå mij værrogirjij vuojnu. Sámijda lij biernna ájlis ielle, ja márjuu dan diehti dan náhke vuorjját aneduvvin værromáksemij. Biernabiergov adnin aj hærsskon. Biernav lij buoremus bivddet vuoratjismánon gå bádij ålgus guorátjis. Bivdduj sæbrrin moattes. Bivdde birástahttin guorátjav. Muhtem guorásjrággev skurbbagådij *ádjensåppij* balldet biernav ålgus. Guovtes adnalijga goabbák stávráv ruossot guorásjrágge ávdán, vaj biernna ij besa ålgus nav jáhtelit vaj nahki dav sájtijen gáddet.

Báktégávos: *Biernnabivddo*. Bivdde adnal ádjensoappi majna ájggu guorásjrággev skurbbat ja balldet biernav ålgus. Guovtes adnalibá goabbák stávráv ruossot guorásjrágge ávdán, vaj biernna ij besa ålgus nav jáhtelit vaj nahki dav sájtijen gáddet.



*Biernnabivddo.*  
Schefferus 1682.



## Biernnabivddo

Gå sábme lij bierna guorátjav gávnna ja mierredam biernav gáddet, de válljjí bivddorádnajt. Åvddål gå bivdde vuolggin, de dievna-stin ájn Liebbeálmmáv, mij lij biernnajubmel ja bierna suodjaliddje. Noajde goabddás máttij viehkev oadjtjot ja diedojt bivdo birra. Bivdedijen ettjin galga adnet bierna oalle namáv, valla dav garvvin-jali nabdasnamájt adnin, buojk. áddjá, áhkko, buoldak, buovnnje ja ietjá namájt.

Gå biernav lidjin gáddám, de bivdde juojggin biernnajuojgav, mij máhtij tjuodjat dán láhkáj: Gijto Jupmil gå li dákkár iellijt midjjí sjivnnjedam buorren, ja midjjí vaddám jálosvuodav ja fámov vuojttet dákkár sieldes ja fámulasj iellij badjel.

De vuolggin sij sijddaj báråtjít ja viettjatjít hiergev majna dav sijddaj giessi. Sijddaj manádijen válldin sij fárruj liebbebárkov majt sij bálkestin goahtáj nissunija. De vuorddin ålggolin dasik gå nissuna lidjin liejbev suoskam. Gå bivdde biehki sisi boassjobielev, de galgaj nissunijen liehket gábtjás muodoj ávdán ja galggin gæhttjat miessikriggasa tjadá tjålgådattijen liebbeállusav bivddijt muodojda. Nissuna de galggin ålgus gáhtjadir.

Dan båttå gå bivddet viedtjin biernav sijddaj, de iehtjáda risse-goadev dahkin. Dåppe vuossjin biergojt, ja dåppe ålmmá hæhttujin árrot gálmå bieje. Dalloj ettjin galga árrot ietjasa iemedij lunna. Sierra giebmen vuossjin biergojt majt nissuna galggin bårråt, ja dájt biergoj doalvvun goahtáj boassjobielev.

Gáldo: Bähppa Olaus Niurenus (1580-1645). Sámegiellaj hiebadam AaS.

Dá tjuovvovasj terma li Davvisámegiellaj, valla muhtema aj aneduvvi julevsámegiellaj.

## Dábálamos garvvem-nammadusá (metafåvrålasj moallánagá) bierna birra:

<b>Áddjá</b>	
<b>Áhkko</b>	
<b>Buoldak,</b>	
<b>Buoldagasj</b>	Vielti, liehke
<b>Buollaáddjá</b>	
<b>Buollaboadnje</b>	
<b>Buolddacuoppu</b>	
<b>Darffot</b>	Mij darfjt mujttát, dagnasijt divrre.
<b>Luodoj ieddne</b>	Miehttse, luonndo
<b>Muoddá-Áddjá</b>	Boares, addnum muoddá Muottat
<b>Miehttse-áddjá</b>	Meahcehas
<b>Ruomse-gálles</b>	Ruomsi la dagnjasa
<b>Ruomsset</b>	Dåssju aneduvvam njinjálas bierna birra
<b>Smáldi</b>	
<b>Stuorra-muoddá</b>	Fuođdu, viesso, majt máhttá bårråt
<b>Váisi (Ájlis Váisi)</b>	
<b>Várijáddjá</b>	Dåssju aneduvvam varris bierna birra
<b>Viibi</b>	Dåssju aneduvvam varris bierna birra
<b>Eanat</b>	Dåssju aneduvvam varris bierna birra
<b>Easti</b>	Dusse aneduvvam njinjálas bierna birra

## Garvvem-nammadusá bierna gårutásij birra:


<b>Balva</b>	Bierna gæhppá
<b>Jálllo</b>	Bierna vájmmo (jálllo la roahkkadin arvilis ulmusj)
<b>Liejbbe</b>	Bierna varra (liejbbebárkko sjaddá ruoppsadin gå dan suoská)
<b>Várre</b>	Bierna oajvve

Tjállám Harald Gaski.

Gåjkkeguolle ja aj ájnnasit gåjkkehávgga aneduváj værromáksem-ij. Buojk. jagen 1608 ájvoárrelattja máksin værov hávgaj ma dan jage dahkin 128 lispund = S. 1185 kg. Dan sivvan lij duola degu jage 1602 værrenjuolgadus, mij biejaduváj fábmuj jage 1607 rájes. Náhkkeværo sadjáj gáttebierggó ja guolle bådij, mij lij fámon gitta s. jage 1620 rádjáj. Dat rájes vas máksegåhtin ienemusá værov náhkij. Vuojná dái ájgij lij Svierik doarromin Baltikuman ja dárbahij állo bårråmusájt soldáhtajda. Ij lim nav álkke Svieriga stáhttaj ávk-kit náhkijt soldáhtaborramusá sadjáj. Vuostak da galggin Stockholmaj fievridduvvat, ja de vuobdeduvvap Europa oasesmárnánij. Ja de galggin rudáj bårråmusájt oasstet ma de galggin doarrosalljuj sáddiduvvat. Dalloj lij álkkep værov bårråmussan oadtjot, ma de sáddiduvvin njuolggá soldáhtajda ma lidjin doaron. Hávgga lij buorre dan gáktuj gå dat buorebut bisoj gå buojk. Luossa. Hávgav hiebaj buoragit gájkkådit, gå dat ittij massám nav jáhtelit smáhkav ja æladakárvov.



Hávgga lij ájnas værromák- sema nævvon Ájvoáren 1600-lågo álgon. Soffá adnalime hávgav, mav Dænon la guollim.



Silbba le aj nammaduvvam værromáksema nævvon nav árrat gå 1600-lågo álon. 1500-lågo miehtáj ja márju juo 1400-lågo gietjen sáme gæhttjalin oasstet silbab ájnnasit nuortta-Vuona oases-ålmmåjs, ja ájnnasit silbabastijt ma lidjin Biergunin dagádum. Sáme gudi addnen sjaddin, oasstegåhtin silbajt hærvvan ja aj stáhtussymbåvllán. Silbba sjattaj manenagi buorre økonåvmålasj investierimin.

Juohkka ållles værromákse ålmåj galgaj mákset dákkár værov:  
3 gåttenáhke = 3 niedenáhke = 6 gákkehávga + 1 gáttegåroav.

Jagen 1553 dá sijda máksin náv ållu værov gåttenáhkij ja górodij Svieriga státtaj ja dan oasesålmmåjda:

#### **Svieriga státtaj:**

Guovdageainnu sijdda	24	gåttenáhke	6	gáttegåroda
Láhpojávrri sijdda	15	“	4	“
Deanu (Juovssa) sijdda	15	“	4	“
Áviovári sijdda	31,5	“	5	“

#### **Duornnusa oasesålmmåjda**

(gudi dievnnujin kråvnåv):

Guovdageainnu sijdda	10,5	“	3,5	“
Láhpojávrri sijdda	6	“	2	“
Deanu (Juovssa) sijdda	6	“	0	“
Áviovári sijdda	15	“	3	“
Tjoahkkáj	122	gåttenáhke	28,5	gáttegåroda

Berajnjunnutja máksin værov máhtukvuodasa milta. Sijdaiset gal ittij dárbaha værov mákset. Sán galgaj bærrájgæhtjat jut berajnjunnutja tjåhkanin gákka dálveårudahkaj, gási værrooajválattja báhti værov gájbbedittjat. Vuojnet muhtema báhtaraddin merragáddáj giessesajjidisesa Svieriga garra værro gájbbedimij diehti. 1600-lågo gasskamutton lij juo sajájduvvam árbbedáhpen jáhtet muhtem ájge jages merragáddáj bivdátjut merraguolev vuonajn ja luosav jáhkánjálmijen.

Duola degu vuojnnu Guovddagæjno (Guovdageainnu) jagen 1663 duopmoprotokollas jut Hánša-Heandarat berajnis bruvkuj juohkka jage mannat bivddemin merraguolev merragádden, mij lij sijá árbbedáhpe. Áviovárega bruvkujin luosav Álltaænon bivddet. Muhtema mannin aj Fálesnuorráj ja Leavdnjavuodnaj ja suhkin merav ja bivddin merraiellit.

Vuona bielen lidjin dái ájgij nievres dile, ja danen værrogájbbedibme dáhpáduváj merragátties viehka slajet ja akta gáktu. Danen márju sijdaj ulmutja árrun guhkes ájgev jages merragádden vaj e jávsádalá Svieriga værrogájbbediddjis.

Berajnjunnutjj (værromáksij) lähko gudi værov máksin Svieriga státtaj (sijdaseda, hæjo ja sij gudi árrun Vuonan jali lidjin Vuodnaj báhtaram, ettjin mavse værov):


Jahke	Áviovári	Guovdageaidnu	Ohcejohka	Deatnu
1599	25	22	9	10
1609	13	19	10	11
1619	9	16	10	5
1639	23	24	11	14
1648	8	20	6	6
1659	9	18	12	5
1669	6	15	5	3
1679	9	6	9	4
1690	14	25	22	7

# Gåddebivddoásadusá

## Bivddorákke

Sijdaj sissjelin li viehka állo gåddebivddorákke ja -ásadusá, ma vuosedi man ájnas gådde lij dallusj bivddosebrudagá økonomijjan. Muhtem oasse dájs bivddoásadusájs lij registreriduvvam. Bájkkenamá subtsasti aj gåttij jáhtulagájt ja man ájnas gåddebivdo lij dålen. Dakkára li buojk. Gåddevárre, Gåddetjåhkå ja Gåddevahta ma gulluji Deanu jali Juovssa sijddaj.

Bájkkenamá ma subtsasti  
gåddebivdo birra.



Tjavitjait ávddála ragáda tjåhkanin gátte ællon, ja dalloj lij buoremus gåddebivddoágge. Gåddebivddorákke lidjin goajvoduvvam rájddon gåddejåhtulagájt rastá. Dakkára lidjin skeraga, jieggerabda ja jávrregátte. Råkke lidjin rissij gåbtjådum, dagnasij ja vistij. Stuorámus gådderåggetjoahkke Sámen le Golleváren mij la Deanu ja Várjavuona gaskan. Dáppe li moadda tuvsána gådderákke regis- trieriduvvam.


Bivddorágge Dænon



Buornna gási biedji biergojt majt viedtji dálvvesadjáj, dálvadissaj dálvvefierdan.



Gåddebivddorákke.



## Vuobman

Viehka buorre bivddovuohke lij vuobman, mij la moatten sajen aneduvvam. Dav duodas duola degu bájkkenamma Vuobman-jåhkå, mij gålggå Anarjåhkåj. Anárattja adnin sijá bivddoednamijn unneb vuobmanijt majt gáhtjudin *tjivtagárdden*, mij gájt la tjivtváren aneduvvam lahka Áñjela.

Ållo sávresvuoda gájbedij stuorra, vijdes vuobman, man bátsudisá gávnnuji buojk. Noajddetjäron Várnjárgan. Dán vuobmanin li læhkám 500-600 miehtara guhkkusaj gierggebuodo, ma galggin gabnnjit gáttij stuorra gárrdáj - njuovvamsadjáj - gánnå lij álkke iellijt gáddet. Ásadusáj lahka lidjin tjiegá jali tsiehkima, dagáduvvam jali luondulasj saje maj duohkáj bivdde tjiehkádin. Dåppe lidjin aj gierggeburá gási gárådijt vuorkudin båddåsattjat.

Várnjárga vuobman la dan made stuorre jut dat hæhttú liehket dagáduvvam dán dålen ja divodum ja aneduvvam moatte buolvaj tjadá. Ij la máhttelis jut sæmmi vuobman man sáme ájn adnin 1600-lågon, aj lij anon vikinjajaéjge ja gierggeajge. Jåhkedahatte ettjin bivddovuoge rievda nav sælldát nav guhkev gá sáme bivddosebrudahka bisoj. Stuorámus teknologijjalasj rievddadime álggin 1500-lågo gietjen gá sáme adnegåhtin birssojt.

Gåddebivddo Várnjárgan.  
Bivde gabnnjamín gáttijt  
njuovvamgárddáj.

Sárggum Arvid Sveen.



Vuobmana noajddevaldan Várnjárgan.



Tsiehkim jali soadje man duohkáj bivdde tjiehkádi. Dat la dagádum vuobmansájjih lahka.

## Ákkes

Ákkes lij muhtemlágásj gárdde gárdoduvvam jali gieladuvvam gáddebálggáj nali. Danna lidjin giellauvsá majda lidjin gielajt tsaggam roahkastittjat gáttijt. Giellauvsajda máhttin aj sájtijt tsaggat. Bivddovuohke la gájt dåbdos Anárin, ja aneduváj ájn 1800-lågo gietjen.



Ákkesbivddo. Giella  
giellauvsan. Gåvvividuvvam  
1800-lågo gietjen.

## Ietjá gáddebivddovuoge

Ragátájge lij aj vuorjedibme muhtem bivddovuohke, mav hålogalasj oajive Ottar nammat juo 800-lågo gietjen. Tjadnin låjes áldov sjuohpangæhtjáj. Bivdde gænna lidjin gáddenáhkkebiktasa bajelt, vuorjedij áldo duogen mij lij guohtomin. Gáddesarves dav ájtsaj ja nav bádij ruohta. Gå sarves lij ålemmieren, de bivdde dav gáttij.

Gassa muohttagin lij aj buorre gáttijt viejjdit. Dáv gáddebivdv gáhtjudin tjiehkarin. Gå lij gassa muohta, de gátte tjåhkanin tjårrågin ja tjiegardin vistev. Tjiegardattijn sjaddin gurgástagájda. Ijájt biedjin bivdde gielajt dájda gurgástagájda. Gå de tjuovgudij, de luojtin bednagijt guohtombájkkáj jali tjiehkarij, ma gáttijt gielajda oagodin.

Gidádálve tjarvan lij aj dáhpe tjuojgadit gáttijt. Tjarvva guottij tjuojggév guhti álkket jávsáj gáttev mij vuojoj. Gáttev tjuoggijin sájtijn jali sjuohppij. Máhtij aj vuohjet dávggebirssujn jali luodagijn gå dav adnegåhtin.

Gáddebivddo gielaj.




Dávggebirssujn bivddemin  
gáttev.



Gidádálve tjarvan lij aj dáhpe  
gáttijt tjuojgadit, ma tjalga-  
din ja nav bessin dajt gáddet.





Rihta aneduváj urudisáj jali návdij bivddu.

Riebigsárek riebijo bivddu.



Rihta gávviduvvam Etnografijalasj dávvervuorkán Oslo. Dav lij unjárgalasj Isak Saba Dávvervuorkkáj sáddim. Sán le iesj tjuodtjomin ridá guoran.



## Giehtto gáddebivdo birra

Dá ielle li ma gávnuji Sámen, namálattjat moattelágásj ruoppis riehpiha, tjáhppis ja vielgis riehpiha, ma dáppe gáhtjoduvvi njállan dajna gå dajt dåssju val duoddarijn gávnná. Ja de niede, oarre, albbasa, stálpe (návde), bierna, gierke ja vaddnema. Dá manjemusát nammaduvvam ielle gávnuji dåssju val Giema Sámen. Dålen li aj dáppe gávnnum ruoppsisgátte aj, valla dálla e desti. Guoktalåkgietja jage dás ávddåla li val guokta ruoppsisgátte gátteduvvam.

Dálla mán ájgov subtsastit dåssju gáddebivdo birra, gáktu dat bájkij ja jage ájgij milta bargaduvvá. Sáme, gudi duoddarij lahka årru, li vuojn hákkuham guhka luodagis ja guoddelis luodakbirssojt. Dålen li sij adnám ja dálla vil ájn muhtema adni giehtadávgijt. Siján la ájbas ietjá vuoge gáddebivdon gå vuovddesámijen, gudi vuolebun vuovdijen årru. Sij manni dálvijt viehka guhkás duoddarijda, navti vaj avta mähkes ájn ádjáni gáksa, aktse jali lågev vahko.

Gå bivdde I gáddetjárrågav gávnnam, de bæhká sán sjávot garnjelij ja buolvaj nanna, birsso ratte vuosstij, ja njáhká giergij ja skáblaj duogev vaj gátte e suv ájtsa. Ja sán hæhttua agev liehket miehtebielen, vaj gátte e galga sujsta hájav oadtjot. Jus sán dalloj boahtá nav lahka gátte, jut birssujn ålet vuohjet ja dæjvvá tsåhkåj jali tjaveldáktáj, de gádde gahtjá dalánagá. Ja bivdde ájn tjuoggi gáttev tsåhkåj guhka níjbijen. Dakkavide sán dav gáttev njuovvá ja biedjá biergojt gierrisij. De sán vas gáhtjat dan tjárråga manjáj, mij báhtara vuolgij. Ja jus jákså dav, de sán vas dahká sæmmiláhkáj gå ávddåla, ja biejvev miehtáj nav barggá nav guhkev gå vuojnná vuohjet, ja ij ga hiejte ávddål gå sjevnjut. Sujna la agev guojmme fáron guhti bierggasijt fievrri ja sáj de hæhttua miehtsij idjadit.

Dakkár bivdduj bruvkku ávvá sijdda vuolget aktan, valla muhtijen dåssju gallegasj sáme aktan. Gå li bivdos gærggam, de sij juogadi sállahav bivddij (oasálatjaj) lågo milta. Valla da sáme e oattjo oasev, gudi e værov mavse, dåssju val værromákse, jus ij udna vaddet sidjj soames bierggoruovijt vájve ávdås.

Sáme diehti buoragit dav dilev vieledit, gå bæjvásj la muohttagav lieggim ja vas idjatjoasskemis la tjarvvam nav vaj bednagav ja tjuojggev guoddá, de sij dalánagá gárvedi ja vuolsgi dâhku gánnå gátte li, ja dagádi gielajt åvddål gå tjuovgut, gáttij guodudagáj birra divna gurgastágaj nali, gággu gátte li gurgestam vistev guodutjít, mij dálvijt la sijá biebbmon. Dát guodudagá gáhtjoduvvi tjehkarin. Gå de tjuovgut, de luojtti dan guodudahkaj jali tjehkarij bednagijt, ma gáttijt balldi nav vaj da vijmak vavddi gielajda. Valla da ma bádan bessi, dajt doarredit sáme ja bednaga, ja e da hähppida ilá guhkás åvddála gå doarrediddje le sijáv jáksám sájtijnisá. Gievras bena aktu aj gáddå gáttev gå gáskes tjåddágav gasskat. Nav sij gáddi állés gáddetjárrágav, nav vaj ij aktak besa bádan, vájku luluj læhkám man ednak.



Gáldo: Báhppa Johannes Tornæus: Muitalus Sámeetnama dili birra, 1653. Sámegiellaj: Israela Ruong 1967.

Guokta lágas ielle lidjin ájnnasa sijda væjdon, namálattjatj bena ja vuornedimmboatsoj gáddebivdo hárráj. Dát lij åvddål gå boatsoj-æláodus lij sjaddam dábálattjan 1600-lågo gietjen. Bená lij ájnas gáddebivdon, valla dan doajmma ietjájduváj dan milta gå sijdaj iellemvuohke rievdaj. Sáme árrat dábmagáhtin gáttijt vuornedimboahtsun ja hierggen. Vuornedimgáttij dábbmat boahtsun lij juo dábálasj hålogalasj oajve Ottara ájge 890-lågon. Dát bivddovuohke någåj manjenagi gå gádde binnoj. Hiergge sjattaj manjenagi ienep ja ienep mávsulattjan vuojánin ja aj noadehierggen, fievrriit låsså nådijt.



#### Sáme giehtto bednaga birra:

Bena bådij sáme lusi ja gatjádij bessat sunji svájnnasin. Sán ittjjí sidá ietjá bálkáv gå bierggoliemav ja dav binnátjav man ietján máhtij happset. Valla dalloj ittjjí galga sábme tsábbmet suv gå ittjjí desti nagá barggat. Gåvvå vuoset sáme nissunav bednagijnes.

Knud Leem 1767.

## Luossaguolástus ja guollimbierggasa

Steinar Pedersen la gírjenis «Laksen, allmuen og staten» (1986) tjielgadam Deanu tjájtjádagá luossaguollima rievtesvuodahiståvråv dålutjis 1888 rádjáj. Ásijt girjes lev adnám gávådittjat Ájováre, Deanu ja Ohcejoga sijdaj luossaguollima dábijt ja rievtesvuodajt. Boarrásamos tjálalasj gáldo, ma dájt sijdajt nammadi 1500-lågo gasskamutto rájes, dættodi man ájnas Dæno luossaguolástus le tjájtjádagá sijdajda.

Oasesaktijuodan lij aj Dæno luossa ájnas. Muhtem oases-såhpamus, tjáleduvvam Københámnan 1582, vattij loabev muhtem dánska oasesålmmåj vuolgget Dædnuj luosav bivdátjít ja oasástalátjít.


Svieriga gáldojn 1600-lågo álgon nammaduvvá «nät» = viermme bivddonævvon Dænon. Viernev le Deanutjájtjádagá sijda adnám dán dålusj rájes. Dat la viehka dålusj sámegiela báhko ja la viehka boares, márjuu báhtsijdam juo sámi-suoma-ugralasj ájgen. Dan juohkusij gullu aj báhko vanás mij lij ájnas guollimin ja diedon fievron.

Nav guhkás gå tjálalasj gáldo jávsádi dålusj ájggáj, de li sáme adnám ruojvvájt viermmegådemij. Lijnev (lin) li aj adnám, valla huoman viehka unnán danen gå ittij gierda tjátjev nav buoragit gå ruojvvá (hamp). Ruojvvájt sáme åttjudin vieres oasesålmmåjs.



Dænon li aj adnám náhkes goaroduvvam vadnasijt. Manemus náhkkevanás aneduvváj Kárásjágán (Kárásjogas) 1800-lågo gietjen.


Dænotjájtjádahka



Buodo le viehka boares luossaguollimvuohke Dænon. Buodo (mij dánna la gávviduvvam Anarjágán 1925) le viehka boares sámegiel báhko.



Buodo.




Gålldem lij sijdaviesádij aktisasi-bivddo. Bivddovuohke gielde-duváj jagijn 1872-73.



Hársestibme tjavtjajt dáhpáduváj gá ijá sjevnjudahjtin ja åvddål gá jienjoj. Tjuorgas vuoset hársestimev Álltá-ænon 1730-lågon.  
Knud Leem, 1767.



Bierggasa ma aneduvvin hársestimen. Hárssis majna luosav tjuoggi, ja tsekkan man nanna buolle sárvij luosav tjuovgat.



Dænon li aj náhkkevadnasijt adnám.  
Mañemus náhkkevanás dagáduváj  
Kárásjjágán (Kárásjogas) 1800-lågo gietjen.  
Gåvvá vuoset náhkkevadnasav mav Jovna-Ovllá – Jon Ole Andersen la dahkam.



Dålusj deadnuvanás lij guhkke ja siegge.



Sijdatjåhkanibmáj  
tjåhkanam.  
Knud Leem, 1767.

## Sijdaj organisierim ja fábmodus

Sábme lij åvddål gå rijkarádjá gieseduváj jagen 1751, organisieri-duvvam sijddasebrudahkan. Sijddasebrudahka lij sajáduvvam ájgi tjadá buoragit organisieriduvvam sebrudakásadussan, mij bærráj gehtaj sijda viesádij berustimijt.

Ájnas diedo sijdaj organisierima ja fábmodusá birra li miján gálldásámij sijdaj birra (Tanner 1929). Mij aj diehtep ålov ietjá sijdaj organisierima birra, duola degu nuortta sis-sáme sijdaj birra (Solbakk 2000).

Sijdda lij familjaj aktidus mij sijdastivrav válljij. Sijda «buoremus» válljiduváj *sijdaisedin*. Sijdaiset bargaj aktan sijda vuojñjalasj ávjijn – *nåjdjin* ássjjí ma gájbedin suv máhtov ja jiermmásvuodav.

Gálldásámij stivrranammadus lij *norraz*, *norröös*, mij la tjielgga gálldásáme moallánahka. Ietjá nammadus lij *sobbar*, *soppar* mij le márju luojkasbáhko boahztám ruossjagielas, *sobor*, mij merkaj tjåhkanibme jali siebrre. Giema Sámen ja Dænoliegen le ane-duvvam *goahtegearret*, mav suomaglielak værrosunde tjállin «*kotakäräjät*». Sijdatjåhkanibme – gearret lej *goaden* ja nav sjattaj namman *goahtegearret*, julevsábmáj *sijdatjåhkanibme*.

Sijdatjåhkanime jádediddje lij nappu *sijdaiset*. Ietjá nammadus lij oajvveálmáj. Dá nammadusá li bissum gitta udnátjij.




lenemus ássje majt sijdatjåhkaniibme giehtadaláj, gal tjoavde-duvvin såbalattjat ja ma ælla dabrriduvvam páhppárij. Svieriga biele Sámen sjaddin gânágisá sámesunde sijdaj tjåhkanimtjállen. Dat dáhpáduváj danen gå jage 1553 rájes galggin sijddaværov gânágisá jali stáhta ávdás gájbbedit. Duornnusa Sáme værrolista ja duobbmoprotokålla li dállea tjaledum dáhtámasjjinaj ja almo-duvvam kompendium-hámen (Lenvik Bygdemuseum 1996-1999). Dáj gáldoj vuodon oadtpo diehtet ålov nuorttasáme sijdaj organi-sierima, rievtesvuodaj ja árbbedábij birra.

Sijdaviesádijen lij rievtesvuohta divna luondoávkijda sijdarájáj sissjelin. Sijdatjåhkaniibme definierij mij lij aktisasj rievtesvuohta ja mij lij sijdaviesádij persåvnålasj rievtesvuohta. Deanuliege sijdajn lij árbbedáhen jut gâlldem lij aktisasjbivddo, dav båttåv gå juohkka-hasj sierra máhtij hársestit ja buodot. Buodosajjt máhtij árbbit.

Sijdatjåhkaniibme juogij guollim- ja bivddemguovlojt familjajda. Dá guovlo, ma aj li gâhtjoduvvam berajednamin, galggin vaddet æladusáv juohkka familljaj. Duola degu dá berajjávre namma-duvvi svenska værrogáldojn: Čortnatanjávri, Gurtejávri, Látnajávri, Lavdnjos ja Áhkajávri Ohcejohka sijdan, ja Idjajávri, Geaimmejávri ja Vuottašjávri Áviovárrí sijdan.

Sijdatjåhkaniibme aj mierredij man láhkáj ja goassa aktisasj guol-lim ja viejddim galggaj dáhpáduvvat, ja man galles juohkka famil-jas galggin dasi sæbrrat.

Sijdatjåhkaniibme juogij viejddim- ja guollimsállahijt dan láhkáj vaj juohkka famillja oattjoj ietjas oasev, vájku man sivá diehti ællim máhttám sæbrrat bivdduj. Sivvan máhtij liehket skihpudahka jali jus ællim ållessjattuk ålmmá familjan. Sijdatjåhkaniibme aj sjehtadij sijddaguojmij jali ráddná sijdaj, duola degu aktisasj-guollima birra rádjájågåjn. Dákkár sjehtadus lij Ohcejohka ja Várjjat sijdaj gaskan vaddnembivdo hárráj Skoarojågán mij lij sijdaj rádjájåhkå.



Nammadus Deatnu la dárojduhtedum Tana nammadussan. Deatnu lij aj sijda namma mij lij Ohcejohka ja Áviovárrí sijdaj gaskan. Dánska-vuona gáldojn le dat aj tjaledum Tenobyran ja Juxbyan. Jux merkaj juoksa jali dåvgge. Kártta vuoset Deanuliege sijdajt ávddål rijkarájá giessemav jagen 1751. Dasi li aj mierkkiduvvam muhtem berajjávre ma li værrogirjín nammaduvvam. Mierkkiduvvam la aj Skoarojåhkå mij lij Ohcejohka ja Várjjaga sijdaj rádjájåhkå, gânná lidjin ållo vaddnema ja majt sijda aktan bivddin.

Skoarojåhkå lij Ohcejohka ja Várjjaga sijdaj rádjájåhkå, gânná dâlen lidjin ållo vaddnema, ja majt sijda aktan bivddin.



Sijda háldadin ja ámastin tjátjádagá luossabivdov. Sijda máhttin gielldet vierruhijt bivddemis luosav tjátjádagán jus ællim sijdas åhtsåm dakkár loabev. Muhtem merragátte látte jali dáttja sihtin Deanus guollit mávsedijen divudav gânågissaj. Valla sijda gielldin sijáv guollimis. Dáttja máhttin gal dakkár loabev oadttjot, valla dalloj galggin divudav sijdajda mákset, ma aj mierredin hattev.

Miehtáj 1600-lågo lij luossabivddo ållåssijt sijdaulmutjij haldon. Sij juogadin bivddosajijt gaskanisá ja háldadin dav buoremus vuoge milta buorren sijdajda. Duobbmogirje aj vuosedi luossasaje máhttin árbbenn mannat buolvas buolvvaj.

Luossabivddo lij organisieriduvvam dan láhkáj jut familja bivddin sihke aktan ja sierra. Dat tjielggiduváj Áviovárrí tjåhkanimen guovvamáno 15. bieje 1671. Sijdaiset Guhtur-Piera, Peder Gotormsson - tjielggij duola degu dav ahte giesijt åvvå sijda álmuk bivddin luosav Kárásjjágán (Kárášjogas) ja lešjágán, valla familja lidjin luossabivddosajijt gaskanisá juogadam.

Dáhpen lij aj luosav bivdddep aktan ráddná jali sijddaguojme sijda ulmutjij goassa dat lij luondulasj. Henrik Jonsson, Láhpojávri sijdas, ja Gjermund Anderssona, Áviovárrí sijdas, lijga rijddalahtjam luossasaje nanna mav såj lijga aktan adnám rádjáguovlon. Áviovárrí tjåhkanimen guovvamáno 9. bieje jagen 1661 såbadijga såj vas aktan bivddet, ja ássje tjoavdeduváj.

Valla luossabivdo loabedisvuodajn nuppij sijdajn galla ittijj dåhkkiduvá ja dat gujtiduváj. Guovddagæjno (Guovdageainnu) tjåhkanimen guovvamáno 9. bieje 1674 Áviovárrí Guhtur-Ovllá Olof Guttormsson ja Piera-Niljas Nils Persson tjielggijga guovddagæjnoga lidjin luosav bivddegoahám loabe dagi «Särwitz»-jágán. Hæhttú liehket Sarvvesjohka mij gâlggå Gákkajávráj. Tjåhkanimen tjielgaj guovddagæjnoga ællim goassak luosav dán jágán bivddám, mij dålutja rájes lij Áviovárrí gullum. Tjåhkanibme duobbmij jut nav galgaj joarkeduvvat, valla lej áviováregijj duogen berustit gá guovddagæjnoga sæbrrin.

Vaddnem lij mávsulasj návdde mij bivdeduváj aktisattjat. Gá nuora jáksin állessjattuga álldarav, de vierttijin dahkat vaddnemuornnáv. Dájna vuornnájñ loabedin sij buktet sijddaj divna vaddnemijt majt gâddin. Dát ij lim nav imáj, danen gá mávsulasj vaddnemnáhkij sijdda værov mávsij, majt nákkujn hæhttujin oajválattjajda mákset.

Dasi lassen lij vaddnemin ráksá mav sijda ulmutja adnin dálkkasin. Vaddnema gáhtogåhtin nuortalamos Sámen 1600-lågon.

Gåddebivddo stuoráp bivddoásadusáj lij aktisasj viddno. Merra-gáddegouvon lij sváles- ja mårssjåbivddo aktisasj barggo.


Tjåhkanibme bærrájgehtjaj dárkkelit jut guollim- ja viejddim-njuolgdadusá tjuovoduvvin. Sissjálasj ássjij såbadallam lij aj ájnas sijdatjåhkanibmáj.

Sijdatjåhkanime fábmodus lij aj dåhkkidij ådå viesádijt. Ávdep ájgi lidjin dakkár ådåboahtte ienemusát sáme ietjá sijdais. Valla 1700-lågo miehtáj närrågåhtin sijdajda ietjá viesáda, gudi vierttijin årrom-loabev sijdas åhtsåt. Guovdageainnu tjåhkanimen ådåjakmáno 30. ja 31. biejevij 1724 mierreduváj jut guojna Mikkel Henriksson ja Erik Madsson bárñijnisá oadttjun loabev jáhtet Áviovárrí. Áviovárrí sijdaiset Ivvár-Piera ja sijdaájras Piera-Niljas, gudi oassálastijga tjåhkanibmáj, miededijga dasi. Ækton lij ådåboahtte ettjin hiereda áviováregij viejddimav ja guollimav.

Sijdatjåhkanibme dåjmaj aj duobbmostávllán. Ássjálasj jali siválasj gáhtjoduváj tjåhkanime åvddåj aktan vihtanij åvddål gá duobbm tjielggiduváj. Tjåhkanimen lidjin álu «loabedis bielmmadime» ássjen. Álu nammaduvvá duot dát ålmåj lij nuorra niejdav illastam, mij máhtij liehket vahágisválldem. Dákkár dáhpádusájniejda æjgáda sihtin tjåhkanimev duobbmít ássjálattjav. Muodugasj ássje lij åvd-dåla válda bielmmadime, masi lijga goappátja siválattja ja máhtiga sáhkkudallat.

Dáhpen lij aj noajdev adnet viehkken åtsådittjat mieddemijt. Noajdodijen máhtij sán ássjálattja muodov tjátjen vuojnnet ja miella-sirddema baktu nággidit ássjálattjav dábdåstittjat. Jus lij suola, de gájbbbeduváj máhtsadit suolabierggasijt æjgádijga.

Ulmusjåddemássjijen tjåhkanibme duobbmij ássjálattjav gáddutjat. Guovdásjoajválattja galggin duobmov ållidahttet. Gålldåsáme sijda-jn dahkin dán láhkáj: Lijkka gávvot biejaduváj ja ássjálasj tjanádu-váj gábbmot dasi gitta. Ja de goappátja luojteduvájga hávddáj mij soajmma dievdeduváj. Dálvijt máhttin vas ulmusjgåddev luojttet ruddnerájggáj, dibddet danna gáhtsaht moadda tijma åvddål gá jienja vuolláj hájggåduváj.



Guovdageainnu sijda duobbmogirjes 1649.

## Várjjaga sijdda


Várjjaga sijdda lij viehka stuorra sijdda gasskaájge láhpan. 1590-lágon árrun sijdan vargga goalmát oasse regisitrieriduvvam sámijs nuortta Sámen (Finnmárkon). Jagen 1601 lidjin Várjjaga sijdan 67 værromákse. Jus ietjá merragáddesijdaj buohastahttá, de lidjin sämimi jage Deanodagá sijdan 5 værromákse, Lágesvuona sijdan 13 ja Leavdnja sijdan 35 værromákse. Dasi duodden árrun dan ájge juo gallegasj láddelatja ja vargga 30 vuonak værromákse muhtem bájkátjij Várjjaga sijdan. Dá bájkátja gal ájn e nav heva hiereda sijda ulmuttijj jáhtulagájt ja iellemvuogijt. Valla 1600-lágo miehtáj Skandinávia kultuvrra bájnnegrádij sijda sissnjálasj iellemav misjávnå ja oasesdájmaj baktu, ja sijda ælá-dusá ja iellemdábe rievddagåhtin.

Sijda viejddim- ja guollimdábe lidjin ålles fámon ájn 1500-lágo láhpan. Sijda ulmutja jáhtálin árudagáj gaskav jageájgij milta. Duobddágij jali luondo buore galggin jiermálattjat aneduvvat, ja ij ga iehpet gálláduvvat. Iehpegálládibme lij sijdajt hevadam. Ja dan vuorbedis dilláj sijda sjaddagádij 1600-lágov miehtáj, gá sijda ajnnasamos æladusvuohke, gáddebivddo Várnjárgan någåj.

Sijda guovdátjin lij Várjavuodna. Sijddaj gullujin vuodnabadá oarjelia allebiele guovlo ja ienemus oasse Várnjárgas. Dálveårudagá lidjin vuodnabadá birrusijn, gánnå lidjin ållu luohota ja gánnå boalldemusájt gávnnin. Dalloj sijdastivrra tjáhkanij, danen gá sijda familia lidjin tjoahkken ja æladusá bargo ettjin gájbbeda nav ållo fámov gá ietján jagen. Dálveårudahkaj báhtin aj sunde værov gájbbedittjat sijda njunnjutjijs. Oasesálmnmá vas tjáhkanin mánán-bájkkáj Stuorravuodnaj oasástalátjít. Dat lij dálveårudagá lahka.

Giesijt várjjaga sáme jáhtin giesseårudagájda vuodnarájgijs álgus merraguolijt ja svállájt bivdátjít. Manjela gá slidoraadno lij sjaddam dábálattjan 1600-lágo milta, de slihtura tjuovvun manen, vaj rásse besaj ráfen vuodnabadán sjaddat. Guollebivddobájke lidjin merragátttev miehtáj vuona nuorttalín gájt Bierggi rádjáj. Luovta- ja vuodnabadá Várnjárga gietjen aneduvvin aj giesseájge.

Giesijt sij sæbrrin aj luossabivdduj Detnuy, gánnå sij aktan bivddin duola degu Ohcejágå ja Deanodagá sijdaj ulmuttijj. Dán aktisasj luossabivdos sij gæssádin 1700-lágon.



Várjjaga sijdda

Dalloj lij boatsojæládus ávddánam viehka ájnas æladusvuohken nav vaj ij lim desti dárbo sæbrrat Deanu luossabivdduj.

Tjavitjajt sij sirddin sisednamij tjaktjaårudagájda gáttijt bivdátjít. Árratjavta bivddin gáttijt Várnjárgan ávddál gá gátté jáhtegáhtin sisednamijda dálveguohtomijda. Manjetjavitja gærggin gáttijt bivddemis Gollevárri birrusijn ávddál gá dálvaj. Gáttijt bivddin gádderákki ja vuobmanij. Dássju Vuodnabadá ja Deanu gaskan li regisitrieriduvvam moadda tuvsán gádderákke ja Várnjárgan vuob-mana gáddebivdduj.


Manjela gá gáddebivddo någåj manjetjavitja, de Várjjaga sijda sáme vas jáhtin ruopptot dálveårudahkaj vuodnabahtaj.



Dábálasj lij merrasámij gaskan nissun lij manjen bivdemin merraguolev, tjielggi amtmánne Lilienskiold birrusij jagen 1690.



Sválesbivddo Várjavuonan.  
Lilienskiold 1690-lågon.



Várjavuona ja Deanu gaskan li registratoriduvvam moadda tuvsán gådderåkke, majt moadda sijda aktan adnin.



Stuorravuodna lij viehka ájnas oasesguovdásj sijdajda dálusj ájge. Dåhku båhtin oasesálmimmå lullet ja allet oasástalátjít sámij.

## Várjjaga sijda æladusvuohke rievddagoahktá

Sijda æladusvuohke juo rievddagoahktá birrusij 1600-lågo. Dádja-dahtte ja diehttelis ittijj bivddosebrudahka ietjájduvá állu ijá badjel. Oase dát sebrudagás rijbbin ja ámastin ådå æladusvuogjt. Duola degu viejddim le lähkám ájnas vuodnagátte sámijda gitta udnásj bæjvváj.

Sválesbivddo joarkeduváj Várjavuonan. Tjuodtjelij aj ådå æladus, boatsojæladus mav vuodnagátte sáme álgadin. Álgon oajválattja gåhtjudin sijáv Várjjaga sábmen. Valla manjenagi gå boatsojæladus dáppe vijddánij ja sajájduváj, de gåhtjudahtjin sijáv Várjjaga jáhttesábmen. Dasi lassen álggin vuodnagátte sáme slidorsujtujn, mav vuonaga lidjin guovlluj buktám. Valla jáhtema årudagáj gaskan joarkeduvvin ájn.

Æladusvuogjj rievddamij sivvan árru liehkemin ávdemusát luohtogij ja gåttij iehpegållådibme Várnjárgan, degu ietjá saijin Sámen. Dasi lassen oasástallam ja garra værro gájbbádusá ma vájkkudin miehtseiellida. Diedo ma miján li oasástallama ja værro gájbbedimij birra, subtsasti gåtteduolje ja -náhke ja ietjá dárbbaga majt oadtnun gåttes, lidjin bivnnusa. Gådde nammaduvvá álu 1500-lågon bivnos sáme gálvvon. Stuorra oasse gáddegálvos doalvoduvvin álggoríkkaj. Várjjaga sijdda tjadnasij stuorrværálda oasesmárnáni.



Várjjaga boatsojsidan.  
Lilienskiolda 1690-lågon.

*Ednambarggo tjuodtjelij  
Várjjaga sijdan 1600-  
lågo álgon. Lilienskiolda  
1690-lågon.*



Boatsojæladusá ja slidorsujo ávddånbime ittijj dáhpáduvá rijdoj dagi. Rijdo lidjin sihke sámij gaskan ja sámij ja vuonagij gaskan Várjjagin. Sámij gaskan tjuodtjelin rijdo danen gå sjiddavuogá-dahka álgij boatsojæladusá guhka jáhtulagáj diehti hädjánit. Muhtem sáme ásadin stuorra boatsojælojt, rasstigåhtin boares sjiddarájájt ja gæjvvánin ietjá sijdaj duovddagij ja ednamij nali. Rijdo vuonagij ja vuodnagátte sámij gaskan tjuodtjelin danen gå sjattaj gilbos sládjogietij nanna majt goappátja álmmuga sihtin sijá slidorsujtuj adnet.



Sválesbivddo aj vájkkudij rijdojt. Sválesbivddo la viehka boares Várjjagin. Svállás lidjin dan ájge nav állo jut muhtema tsoahkkujin vuona sisi njuoraj nali, ájnnasit garra dálkken gå gátte vuosstij biekkaj. Manjenagi gå vuonaga árrudin vuodnagáddáj sisnejebuj ja sisnejebuj, de sij ribádahtjin aj oasev dájs tsoahkkum svállájs. Sjaddin dikke ja birrusij jagen 1600 mierreduváj tsoahkkum svállá vuona sinna Sválesluovta sissjelin gullujin sámijda. Svállá ma gádujin álggo vuonan, gullujin vas vuonagijda. Manjenagi dát sváles-rádjá sajájduvvagådij aj tjerdalasj rádján sámij ja dáttjaj jali láttij gaskan. Duola degu manná uddni buorggorádjá daggú Unjárga suohkana ja Čáhcesuolu suohkana gaskan.



Čáhcesuoloj (Vadsø) 1500-lågo lâhpan. Sárggum Arvid Sveenav.

Valla æladusrievddam vajkkudij aj dan guovluj vaj aktisaj-barggo tjuodtjelij sámij ja dáttjaj gasskaj. 1600-lågo gietjen oadþop diehtusin jut dáttja gudi li Čáhcesuolluj árrudam, aj ámasti boahtsujt ma li sámij gæhttjon. Sáme svájnastahtji aj Čáhcesolu dáttjajda.


Sáme svájnastahtji Tjáhtjesuollu (Vadsø) dáttjada manjela gå Várjjaga sijda æladusvuohke rievddagådij. Svá-jnnasa árrun goadátjijn lahka oajvvegoade. Sárggum Arvid Sveen.



1500-lågon ålggorijkaga bivd-degåhtin svállát duola degu Várjavuonan. Sárggo le sváles-bivdov vuonan gávådam birrusij 1600. Tjuorgas aj vuoset gáktu bisodin ja vuorkudin svállebier-gov ja -buojdev. Sárggum Arvid Sveen.



Sválesluokta. Svállá ma gátteduvvin dán luovta sissjelin, gullujin Várjjaga sijda sámijda. Uddni manná buorgorádjá daggu Unjárga sámesuohkana ja Čáhcesuollu suohkana gaskan.



Duola degu dákkár sámegálvojt oassttin ålggorijkak oasesålm-må oasesmárnánijin Várjjagin 1600-lågon. Sárggum Arvid Sveen.

## Julevu Sáme sijda

### Divtasvuodna

Divtasvuona sijdda guluj Julevu Sábmáj. Álgo rájes divtasvuonaga bivddin gáttijt várjin lahusin ja guolljin Divtasvuonan. Ep vissásit diede goassa hiejttagåhtin gáttijt bivddemis stuoráp gáddebivddo-vædtsagij. Lisj dávk 1200-lágo miltta gå Bierguna hanseáhta oases-tiddje stívrígåhtin nuorttalij merragáttij gájkkeguolleoasástallamav, ja lufoahttaguollim sjattaj mávsulattjan. Lufoahttaguollim ja gájk-keguolleoasástallam hiebaj sidij iellemlájben.

Sijda æladusáj vuodon lidjin agev læhkám dimmbarij tjuollam ja guollim, ja árvvedahtte sijddavuogádahka lij vuodon gå galggín vantsaj juohkusijt gárvedit loufoahttaguollimij. Dát vuobddemuollim ittij dárbaha sijda iellemvuogev vahágahttet. Vuodnaguollim Divtasvuonan járkij degu ávddála. Vuonan guolljin nuorjojt, smáv svállájt, tjævrrájt ja vuossjamguolijt. Gátten bivddin riehpihijt, buojddagijt ja ietjá luohogijt. Daj náhkijt hálijdin gárjjela ja birkelattja, ja dajt vuobddin lulleværálda oasástiddijda.

Vantsa Lufåhtaguollimin.



Dákkár vantsa manni  
gájkkeguolij nuorttat oarjás  
Biergunij ja jáfoj ruopptot.




Julevu sijda



Sijda æladusvuohke ednagit rievddagådij gå slihturij álggin ja árrujin stuovesárron. Dát dáhpáduváj 1500-lågo milta, gå svenska værrogirijin jages 1559 vuojnnu Divtasvuonan lidjin dalloj ednam-barggoståbe sjaddam dábálattjan. Oajvveårrom – dálvveårudahka – lij davvelin vuodnanjálmen, ja oajvveäládus lij guolástus ja slihtura. Sáme lidjin sjaddam stuoves árron. Vuodnabivddo járgij vuona sisnjemus ásijn, gánnå ettjin desti áro jagev birra. Várreguovo-lojn lahkusin bivddin vehi gáttijt, dajs lij binnum rievvoma diehti. Dát dáhpáduváj ájnnasit rádjessidajn nuppe bielen Ednamtjavelga ja vágkkudij boatsojsijda báhtsijdin. Dáppé boatsojæládus vijddánij Divtasvuodnaj. Dát dáhpáduváj 1500-lågo loahppagietjen.



Návti Schefferus gávádij  
sámjí dimmbartjuollamav  
1600-lågon.  
Schefferus 1682.



Divtasvuona sijdda. Árrom jagen 1665. Kártta: Mihkku Solbakk.

## Tjærro- ja vuovddesijda


Julevu Sáme lulásj oasen lidjin 1500-lágon niellja sijda. Divtasvuona lagámussan lidjin tjærrosijda *Siergaluokta* ja *Tuorpun*. Lullelin lidjin vuovddesijda *Dálvvadis* (*Jåhkåmåhkke*) ja *Vuolle-sijdda*. Boatsojæládus badjánij álon tjærrosijdajn, ja *Siergaluovta* ja *Tuorpuna* boatsojsáme jáhiegåhtin boahtsuisá merragáddáj Divtasvuodnaj gieseájge. Divtasvuona stuoves árro sáme ja tjærro-sáme lánudahttjájin gálvojt ja viehkedattjájin guhtik guojmedisá. Navti álgij ráddnavuoha, mij la vijddánam Sábmáj miehtáj ja la stuoves árro sámij ja ællósámij gaskan gitta udnásj bæjvváj rijbbam.

Tjærrosámij gal ællim álon stuora ælo, dagu uddni li. Juohkka familjan lij álldotjárrå mav båhtjin. Mielkes stiellijin vuostáv majt ietja bårrin ja muhttijin vuobddin. Båhtjema diehti sijda tjæro ulmutja ræjnnujahtjájin boahtsujt. Tjuovvogåhtin boahtsujt ájgev miehtáj jali birra jagev.

Svænsska gânâgis Karl 9. lågådij boahtsujt miehtáj «Svieriga» Sáme jage 1605. Låhkåm vuoset boatsojælädus lij vijddánam Julevu Sámev miehtáj. Julevu Sábme lij sjaddam boatsojælädusá ájnnasamos guovllon, madi sáme oarjjelin ja nuorttalín ájn dimmbarijt tjuollin ja guolljin. Valla Várjaga sijdan gal vuoojnne-goahtep álggobootsojælädusáv dái ájgij, dagu lip ávddåla namma-dam. Esski 1600-lågo gietjen sajáduvvá boatsojælädus ájnas æladussan nuorttalij Sámeednama miehtáj.

Jage 1605 boatsojlåhkåm aj tjielggi æloj stuorrudagáv. Stuorámus ælloniehke lidjin Tuorpuna sijdan jali tjäron. Boandámus ámastij suláj 70 boahtsu. Siergaluovta sijda stuoremus ælloniehken lidjin suláj 30 boahtsu, ja Dálvvadisan suláj 20 boahtsu.

Vuona værrogirjyn 1600-lågon vuojnnep Vuona sunnde vierro-gåhti tjærrosámijt gudi merragáddáj boahtsujisá båhti. Værrogirje aj subtsasti ienemusoasse binnu Divtasvuodnaj. Moaddása båhti aj Sáltovuodnaj giesen. Muhtem jagij máksi badjel 40 ulmutja gudi Divtasvuodnaj båhti, boatsojsámeværov. Dát låhko la dan madi stuorre jut ælla dåssju Tuorpuna ja Siergaluovta tjærrosáme máksám dáv værov.




Svenska gânâgisá Karl 9. «Boahtsuj låhkåm» miehtá «Svieriga» Sáme jagen 1605. Låhkåmin ij la manen Várjaga sijda boatsojælädusá álggo, danen gá gânâgisá boatsojlåhkkijn márju ællim diedo sijda boatsojælädusá badjánime birra, mij 1600-lågo ágon dáhpáduváj.

Sáme li áldojt dálutja rájes båhtjåm, gáktu Olaus Magnus tjielggij girjenis 1555. Valla gávvå ij la ållu duohta, danen gá båtje-dijn áldov gal márju ettjin ane ståvlåv, ja båhtjem-lihette dánna gal ij la náhpe hámen mav sáme adnin álldobåhtjemij. Olaus Magnus 1555.



Divtasvuodna la aj ráhtåsam ietjá sijdaj sámijt. Dát la dádjadahtte, gá Divtasvuodna la dán guovlo stuoremus merragáddesijdda ja danen sjattaj árrat boatsojsámij gálvoj ájnnasamos mårnánin. Ja márju sáme båhtin noadehiergij gitta Dálvvadisá jali Jåhkåmåhke rájes lånudalátjít gálvojt ja oasástalátjít. Vissásit muhtem sáme álggin oassálasstemij, buojk manjela gá Jåhkåmåhke sjattaj ájnas mårnánbákken 1600-lågon. Dåhku båhtin svenska oasástalle gálvoj, ma lidjin aj bivnnusa Divtasvuona ja ietjá vuonaj mårnánij. Navti Julevu Sáme sijda tjadnasin árrat Euruhpá mårnáni.



Noadehiergge. Schefferus 1673.

Birrusij jahkáj 1600 ællim vil boatsojsámij ælo, ja guohtom lij nuoges sijá álldotjårrågijda ja noadehiergijda. Esski 1600-lågo loahppagietjen sjaddagåhtin ælo, ja guohomednana gárttjogåhtin merragáddeguovlojn. Histåvrådutke árvvali esski suláj 1670 sjattaj boatsojælädus ájnnasamos æladussan Julevu Sáme tjærojn ja vuovdijn.

## Vuostasj boahttsu

De lij dan ájge gå ettjin gávnnu boahttsu Sámen. Sáme bivddin gåttijt. Guokta familia årodin avtan sijdan. Akti lidjin nissuna aktu goaden, dan båttåv gå ålmmå lidjin gåddebivdon. Åvddål vuolggan lidjin råggåm ållles bivddoråggegárdev jávrreájjddáj sijda lahka. Råkkijt lidjin rissij gábtjåm ja lavnjjij.

Nággin biejeve bådij gáddetjårrå guotsa daggu ájde milta. Gåtte ettjin vuojnnám råkkijt. Muhtem gádde guotsaj nággin råkke næjingga ja tjalgaj rissij tjadá ja gahtjaj råggåj, ittijj ga besa bajás. Dat lij álldo guovtijen miesijen.

Vehi manjelasj nissunguovtes vuolgijga áhpatjít bivddoråkkijt. Gávnajga dav miesseáldov. Áldov gal njuovajga. Valla miese lidjin nav tjáppa váj ejga rásski njuovvat. Váldijga goabbák mieseve sijdaj, gási juo manájga.

Nuppe nissun njávkadij dav unna gáddemæsátjav ja dibdij dav muhttijen sisi goahtáj boahtet. Le gudát mánno. Rahttá lij ihtegoah-tám ja vuovdde ruonudisjgoah-tám. Máná tjoaggin rásijt juohkka biejeve mæsátij. Bena vuohtoj siejbev ja njoalodij mieseve tjebedav.

Gáddemiesse låjoj, hárjjánij ulmutjida ja sijájt iehtsegådij. Ja tjuovoj mánájt gási da bermannin. Ja agev gáddemiesse bådij dan buorreluondok nissuna lusi ja biejaj oajvev suv asskáj ja sidáj gal-gaj suv njávkadit. Duot nubbe nissun gis tjanáj ietjas gáddemiesev vieddesjuohpanijen goahteguorraj soahkáj. Sán náv tjuvrij mieseve. Biebmaj gal. Valla ittijj njávka dav goassak, ittijj ga mieseve goassak besa goahtáj boahtet.

Ja danna lij viek moarrás bena. Dat agev tselaj nav vastet. Gáddemæsásj lij agev balon. Ájgge gáláj. Muhtem sjievnnjis tjaktjaijá gáddemiesse báttev boarkkij. Dat lij giesev miesskam ja rassjum.

Miese manáj gæjnnusis. Sán ij lim desti tjadnasin. Sán lij dálla friddja.

Gáddemiesse ávdemusát ruohraj dan nuppe miese lusi. Dat lij livvajime iemedja, dan buorreluondok nissuna, goade guoran.

Boade dal! Báhtarinno ulmutjiijs ierit, javlaj gáddemiesse guojmmásis. Valla dat nuppe gáddemiesse ittijj sidá tjuovvot suv. Sán lijkuj ulmutjida ja bátsij suv lusi. Valla dpn baháluondok nissuna gáddemiesse báhtarij ietjá gáttij lusi várijda.




Valla dat mij ulmutjiijs lusi bátsij, sjattaj stuorren ja ároj dan buorreluondok nissuna lunna. Dat áhpaj gierrisijt gieset ja nådijt guoddet.

Muhtem biejeve lij vas akta gáddemiesse bivddoråkken. Ja buorre-luondok ulmutja lidjin sämme buore dan ådå miese vuosstij. Dat aj sjattaj ja goade ulmutjida hárjjánij ja lijkuj sidij. Goappátja sjattajga lájes boahttsun, álldon ja sarvván. Álldo guottij miesijt ja navti oattjoj dat buorreluondok nissun lájes elutjav. Dav sán sujt-tidij dav båttåv gå iset ja bárne lidjin bivddemin. Da lidjin ulmutjii vuostasj boahttsu.

(*Israel Ruong hiebadam dålusj subtsasa milta. Nijlas ja suv sijdda, 1965*)



Sáme lidjin tjehepe duodjuhit, tjállá Schefferus girjenis mij latijnagiellaj almoduváj jagen 1673: Álmmá li tjehepe duodjuhit vantsajt, gierrisijt, smáv vedurijt, gijsájt, mársojt ja gájklágásj muorra- ja tjoarvveduoijt. Nissuna li tjehepe goarrot biktasijt ja gábmagijt ja bådnet suonajt ja duoijt hiervvit.



Nuorttasáme lidjin tjehpe gádet ránojt ma aneduvvin sihke gábt-tjásin ja lávdagoaheloavddagin. Sij lidjin aj tjehpe duodjuhit heargelenggiid ja dajt hiervvit. Nav tjállá Knud Leem, guhti bargaj misjonerran Áviováre, Levnja ja Álaheadju guovlojn 1728-1735.

Julevu sáme biktasa.  
Fr. Robson 1827.



Oarjjelsáme gárvo.  
Norske Nationaldragter, 1852.

## Hárjjidusá

1. Majt sijdda-nammadus merkaj duv birrasin uddni?  
Gatjáda vuorrasap ulmutjíjs!
2. Gávna duv guovlov sijda kártan.  
Tjielggi sijda geografijjav jali ednamijt ja tjáhtjádagájt!
3. Tjielggi duv sijda æládusvuogijt oanegattjat!
4. Gåddebivddo lij ájnas juohkka sijddaj.  
Makkir gåddebivddoásadusá lidjin duv guovlo sijdan?
5. Tjielggi oajvvesieradusáv sijda ja stáhta organisierima gaskan dalloj!
6. Makkir fábmo lij sijdastivran jali goahteriektátjáhkánimen?
7. Dutka Várjaga sijdav. Ma lidjin sijda æládusvuogij rievddama sivvan?
8. Manen badjánij boatsojæladus dáppe juo 1600-lágo álgon, guhkás ávddál gå ietjá nuorttasáme sijdajn?
9. Manen rijdo tjuodtjelin várjaga sámij ja dáttjaj/láttij gaskan?
10. Mij lij Divtasvuona sijda ájnnasamos iellemvuohke ávddál 1600?
11. Tjielggi oanegattjat Divtasvuona æládusrievddamav.  
Manen nav dáhpáduváj?
12. Suláj goassa idij boatsojæladus Julevu Sábmen ja manen?
13. Tjielggi verddevuoda (ráddnavuoda) tjuodtjelimev.  
Doajmmá gus verddevuhta desti duv guovlon uddni? Tjielggi.

## Duodde hárjjidusá

### Noajdástallam


Várjagin lij ålmåjcgen namma lij Melker-Máhtte. Sån lij válldum ja máhtij aj girjijt lähkåt. Jagen 1704 noajddegádtse båhtin suv lusi ja fállin åhpadit sunji noajdástallamav. Sån ham gulluj noajddudagá berrahij mij dállea lij luottanimen. Danen gá sán ham lij riegádam ja vuojneduvvam vuosstáj váldátjít dáv dájdov. Valla sán vuornoj. Sån ittijj sidá oahppat dav, vájku luluj riegádam ja vuojneduvvam lågev gierde dasi. Dasi duodden lij sujna rasjes oajvve mij ij gierda nav moatte dájdov ja rahtjamusáv. Sån lij dállea vuostatjín oahppam girjijt lähkåt, ja danen sán ittijj máhte loabedit oahppat noajdástallama dájdov, danen gá suv oajvve ittijj gierda sisadnet guovte sierralágásj dájdo. De sihtin suv jáhkket girjjásis ja jábmet ja vuojnnet makkir ávkke sujna lij dassta. Gá dállea ájggun suv givsedit ja vuornnot dállutjíj gå jábmá, danen gá ittijj mátte vuosstáj válldet dav buorre dájdov mij lij suv máttaræjgádija gullam, ja mav lidjin adnám viehkedit-tjat sihke ietjasa ja iehtjádijt dávdaj, vuorbedisuodaj ja divna ietjá bahávuodaj ja åttjudit allasisá bierggimav ja vuorbev ja guhka iellemav. De ålmåj dakkavide skihppáj, ja noajddegádtse givsedin ja vuornnun suv, gitta jámij dájna dávdajn.

Návti tjállá misjonerra Isaac Olsen (b. 1680-1730) Várjaga ålmmá Melker-Máhtte birra, gæssta noajddegádtse lidjin hekkav válldám. Olsena tjoahkkidum diedo sáme noajdevuoda ásko birra: «Om lappernes vildfarelse og overtro» (1717), li viek miellagiddis gáldo nuorttasámij ásko birra, ávddál gå misjávnnåulmutja «bájnne negåhtin sámij mielajt».

Tjále oanegis subtsasav sámij noajdevuhta ásko birra, ávddál gå misjávnnå bájnne negådij sámij vuojnjalasj iellemav. Ane gálldon duola degu: «Bálvvosbáikkit ja noaidevuhta Deatnogáttis».

## IESJMIERREDIMES NUORTTARIJKAJ HÁLLDUJ

Sáme bivddosijda hádjánahttjájin juo 1600-lågojn udnásj Vuona ja Svieriga bielen, vehi manjnelabbo udnásj Suoma ja Ruossja bielen. Ríkä birrusin tjavggijin væroj tjoahkkimav Sámen ja kolonisieri-gáhtin Sámev. Dá vájkudin sijdaj bierggimij ja iellemlájbbáj. Sijda ulmutja hæhttujin gáddet ienep ja ienep gáttijt duhtadittjat værrosundijt. Gáddenálle vargga luottanij. Navti badjánij ællosujto, mij garrisit rievddadij sijdaj ednamanov. Ællosujto buvtij aj aktugasj ulmuja åbmudagájt ja daj sujto dárbov. Sijdaj vuojñjalasj iellem aj rievddagádij garra misjávnndájmaj diehti. Oanegattjat javladuvvam de dán ájge sáme garrisit gierdin gá birásrika rijddalahttjájin sáme ednamij nanna ja kolonisierigáhtin Sáme sijdajt. Dá rijdo juhkin Sámev láhpalattjat nielje rijka vuolláj. Da dáhpáduvvin jagijn 1751 ja 1826.



Sáme li dálutja rájes hiergjít adnám vuojánin, aj lásså nádijt suvdátjít.  
Tjuorgas vuoset sábme l hiergjín vuodjemin, ihkap Julevu Sámen.  
Schefferus 1673.


Nuorttarijkaj oajválattja ja báhpa diehtin ettjin nagá ållásit vuojtet sámiyt ja sjá sijdajt allasisá jus ettjin vuojte sámiy sielojt aj bællásisá. Danen dárbahtin gádotit sáme noajddeåskov. Nav de misjonierim tjavggiduváj. Jus sáme gávnadallin noajdá-stallamin, de galggin jábmemij duobbmiduvvat. Noajdástallam gehtjaduváj værábun gá ietjá vierredago. Danen galggin oajválat-tja nájdijt garrasappot giehtadallat. Risstalasjvuohta gilveduváj fámujin ja vahágahttema baktu.



Noajdde noajdástallamin. Schefferus 1673

- Vuona girkko biggiduvvam åvddål 1600-lågo
- Vuona girkko biggiduvvam 1700-1751
- Svenska girkko biggiduvvam åvddål jage 1702
- Ruossja girkko biggiduvvam åvddål jage 1702
- Udnásj rijkarádjá

Ájnas oasse misjonierimis ja kolonisierimis lij girkkojt tsieggit sáme sijdajda.



## Svierik lij åvdemusán kolonisierimin

Luohtogij ja gáttij lâhko gæhppánatjáj 1600-lågo milta garra bivdo diehti. Sáme náhke lidjin bivnnusa Euråvpán, ájnnasit ádel ulmuttijida. Gå sáme vil åttjudin birssojt, de dat aj vájkudij riev-vomij. Dán duobbmima ja bivtasmálaj rievddadime diehti Euråvpán de 1600-lågo álon stuorra náhkkeoases vargga någåj. Danen mierredij Svieriga gánágis jagen 1602 ådå værronjuolgadusájt Sáme gáktuj. Sáme galggin divudav mákset boahtsuj, guoli jaháhkij ávdás, ja dasi duodden divuda juohkka lågåt gátte ávdás majt gáddin. Dát vájkudij sijdajda.

Ij dåssju dat. Jagen 1606 ávttijj Svieriga stáhtta Svieriga koloni-stajt jádåtjít guhkás nuortas nannitjít Svieriga árromav. 1600-lågo gasskarájen Giema sáme lidjin gujddim boandás bânndura nárrin sijáv sijdajda, válldin sijá guollejávrijt ja åttjudin nuorajt dâhku.

Jagen 1671 gæhttjalij Svieriga ednamhærrá Johan Graan sámijt sjávodahattet. Ettjin dárbaha ballat massemis sijá ednamijt ja rievtesvuodajt. Dát lij aj gánágisá miella, javladuváj. Valla sæmmi ednamhærrá miejnnij sáme sijda galggin kolonisieruvvat. Dâhku galgaj nav jáhtelit gå ber máhettelis slihturijt jádedit. Sán miejnnij ednambarggijn ællim sæmmi dárbo ja berustime gå sámijt ednamijt ano hárráj. Sij ham adnin ednamijt iesjguhtik láhkáj. Svenska adnin giettijt ja sládjogiettijt, ja Sámen lidjin duodden vuovde majt máhtij giedden boaldet ja rádjat. Duodden lidjin dâppe lasstavuovde aj majt máhtij slidorfåvrrán adnet. Gánágis máhtij jálot kolonisierimav tjadádit ávkken stáhttaj, danen gå sáme álggoálgon lidjin boahtám amás ja barbáralasj tjærddan ietjá guovlojs. Lidjin gal guhkep ájge badjel árrum Sámen valla ettjin máhte vuosedit makkirak gánágislasj girjjáj, mij luluj duodastit sijá ednamijt ja guollejávrijt rievtesvuodajt. Danen lij sadje sihke sámijda ja ádåviesajdiddijda. Dát ávttjimus dagáj 1673 sáme-ednamgirjev, nav gáhtjodum Sámeplakáhtta, mij jagiin 1695 ja 1749 ådåstuhteduváj.

Johan Graan lij sáme mättojs. Suv áhttje, Gerhardus Jonæ, lij riegádam Ubbmemá Sámen, valla bajássjattaj muhtem báhpá lunna Bihtámin. Sán sjattaj báhppan. Johán lågåj filosofijav ja lágav ja sjattaj jurisstadåktårin. Jage 1642 sán nammaduváj Svieriga Alemusrievtá duobmárin – assessorin. Jage 1645 sán ádelastáduváj. Javladuvvam la dát lij ájna bále gå sábme la bessam Svieriga riddarvieso (ádela) sebrulattjan. Jage 1653 nammaduváj ednamhærrán.

*Qabum Ylueádon, qáj. Georg. Fløyber*  
23. júni. 1653.

*fil min. 23. júni. 1653. I...vendájij  
fragsne lundesáttse*


Johan Graana nammatjála jagen 1653.

*Johan Graan.*


Ednamgirje loabedij buorijt jali ávkijt ádåviesajdiddijda gudi sihtin jáhtet ja árrudahttet Sáme sijdajda. Ettjin dárbaha værov mákset 15 jahkáj, ij ga dan maanjela ienep gå sáme. Dasi duodden bessin doarrodevnastusás gudik goassak. Javladuváj gal ettjin galga sámij rievtesvuodajt dâssjidit. Valla gilpos huoman sjattaj sijdaj buorij jali boanndudagáj badjel, danen gå ednamgirje lij åvdemusát kolonisierimberustimijda: dat galgaj stáhta gruvvoberustimijt gáhttit ja vieledit girkko dâjmajt. Sáme sielo galggin lánestuvvat, ja guovlo galggin ienep viesajdiddijt oadtjot, javladuváj sáme-ednamgirjen. Guovlo ma lidjin ájdåmiehtse, galggin ednambarggij bargaduvvat ávkken. Ja gruvvodájma galggin jáhtuj biejaduvvat gánnå lij máhettelis.

## Nássjá silbbagruvvo

Lij ájnas joarkket gruvvodåjmajt ma lidjin 1630-lågon álgaduvvam Násáváren Bihtáma Sámen. Ja oajválattja ettjin sámijs berusta silbav råkkådijn. Sáme hæhttujin barggat oarjen, suvddin mál-mav hiergjinisá gruvvos Silbbajåhkåj, gánnå suddadin mál-mav. Sáme gæhttjalin vuosteldit. Gujddijin ja gæhttjalin vuornnot barggamis, valla ittij liissi. Jus sáme ettjin jegada, de stráffujin sijáv buojk návti: Tjuollin guokta rájge jiegnaj, tjadnin lábtjev sáme tjiebedij, tsåggín suv rájggáj ja giessin suv bajás nuppe rájge tjadá ja navti jægodij.



Násávárre silbav ájtsaj sábme Jöns Persson jagen 1634. Gruvvodoajmma álgaduvváj jagev manjela.



Sáme fievrrimin mál-mav noadehiergij Násáváre gruvvojs Silbbajåhkåj. Tjuorgas muhtem kártan suláj 1640.

Jus Sáme sihtin nággbargov garvet, de lij ájnna bierggim báhtarit nuortas nuorttalap Sábmáj jali Gielasa badjel Vuona merragád-dáj. Vuonan hæhttujin vuornnot ahte ettjin desti sidá máhttsat silbbagruvvuj barggen ja ettjin galga vahágijt dakhkut Vuona bielen. Jagen 1659 oahpestin nággin sáme Vuona doarroålmmáj Silbbajåhkåj, mav boalldin.

Násá silbbagruvvo garrisit vájkkudij sámij iellemij ja rievtes-vuodajda. Nággbarggo vájkkudij ællosujttuj mij lij sjaddamin ájnas æladussan Bihtáma ja Julevá Sámen. Gruvvodoajmma lij ájnas oasse Sáme kolonisierimis, ja dasi duodden lij máhttelis sámijt adnet barggofábmon. Jage 1673 Sámeplakáhtta gieldij sámijt jáhtemis Vuodnaj, ja dát gártjedij sijá jáhtemijt.


Jage 1683 Vuovddenjuolgadus galgaj aj gruvvodåjmajt huksat, danen gå gruvvo dárbabin muorajt. Njuolgadusá vuodon lij dat dádjadus jut miehtse majt e ane ja maj ávdás e mavse værov, gulluji stáhttaj.

Gruvvodåjma gájt galgaj kolonisierimav ávdedit. Valla nav ittjjí dáhpáduvá. Oajválattja oadtjun unnán ádåviesajdiddjijt Sáme sijdajda jádåjtjat. Ællim Svieriga merragáttien liggje ulmutja, gudi lulun máhttám årrudahttet Sáme vuovdijda ja tjäerojda. Dáj gássjelisvuodaj diehti sjaddin mañjela stuoráp doaro aj, majda Svierik sehkanij.

Jage 1673 Sámeplakáhtta ittjjí vatte fártav jali valludagáv koloniserimij. Danen oajválattja ádåstuhttin dav. Nav de mierredin mierredin jage 1695 Sámeplakáhtav. Mærrádusáj lidjin ádå værronjuolgadusáj, sámesundij dåjmaj ja Sáme tsieggim, ma de galggin ednambarggokolonisierimav måvtåstuhttet.



Ednambarggokolonisera diehti dáhpáduváj goahtetsieggim jali fásstaårrrom ja priváhta ednamåmastime riektá Sámen. Gåvvá vuoset ádåviesajdiddjij ednambarggoståbjit Duornosvákken, tjuorgadum jagen 1736. Gehtja gó ábmudagá birral gárddé! Sáme gal ettjin dárbaha ednamgirjev tjælldáj. Sidjii lij ájnas «såbadit» gadnihij ja dakkárattijá gó árudagáv válljijin. Tjuorgas: Rignaud Outhier, Paris 1744.



Sámeplakáhtta 1673.

Sáme galggin ájn ienep værov mákset. Sámesundij ájnnasamos barggon dássta duohku lij værov gájbbedit ja sámij jáhjemijt váksjodit. Sijá jáhjemijt galggin gártjedit. Sámes sámij undij fábmo sámijda galgaj gievruuvvat. Ájnnasit guoskaj dát riektádoajmmaj jali duobbmofábmodussaj. Sijdaj duobbmofábmodusáv galgaj háddjij ja hæjodit.


Sámeplakáhtta nannij ádåviesajdiddjij jali kolonistaj værrofriddja vuodav ja vælggogissan dagáj sijáv sáddjitjít ja sujtitjít ednamijt, ietján láhppin ietjasa riektájt ádåviesajdiddjen. Ádåviesajdiddje galggin aj vuovdij boalldemav giehpedit, mij lij ilá vijddánam Giepmá Sámen váj vuovde lidjin gáhtomin. Dási máhttep lasedit jut vuovdij boalldem Giepmá Sámen láhpa-láhpan háddjij ja gámedij dán guovlo sijdajt.

1690-lågon ij lim kolonisierim ájn vijddánam nuorttalap sisednama sijdajda. Ådåstuhteduvvam sámeplakáhtta gal ittjjí måvtåstuhte nav ållo ådåviesajdiddjít jádåtjtí nuortas, dagu oajvállattja lidjin vuorddám. Birrusij 1700 ja muhtem jage åvddåljuovlluj lij sámij iellemvuohke ja dábe ájn mij mierredij dájn guovlojn. Dåssju duoppen dáppen gávnnujin ådåviesajdiddjít ståbe.


Jage 1749 Sámeplakáhtta jali sáme-ednamgirje åvdedij kolonisierimav. Danga ednamgirjen tjielggiduváj sáme ja ådåviesajdiddje ettjin gilpustalá sämmi boanndudagáj ja luondo buorij nanna. Dássta duohku galggin ådåviesajdiddje binnebu tjuollat ja guollit. Farra galggín árrut ja suittigoahet slihturijt, vaj lulun sjaddat ienep ednambarggoståbe Sábmáj. Moattelák jagen kolonistaj ståbij lâhko lassánij viek ålov Bihtáma ja Duornnusa Sámen. Jage 1749 mærrádusá diehti sáme aj árrujin ådåviesajdiddjen. Dan diehti bargaj ájnnasit Pehr Högström, guhti lij Jielleváre báhppa.

Jage 1749 sáme-ednamgirje sjattaj ednambarggokolonisierima njuolgadussan gitta 1800-lågo lâhpa rádjáj.


Ådåviesajdiddje boalldin vuovdijt gudnan ja sáddijin farra ednambarggugj ávkken. Suoman dát ájn dáhpáduváj 1800-lågon, dagu gávvá vuoset.



Kolonisierima vijddánibme nuortas Svierik-Suoma bielen.  
Suláj jahkelågo.



Suláj sáme árroma rádje  
Kolonistaj bájke s. jagen 1751



Kolonistaj bájke s. 1800  
Suláj sáme árroma rádje

## Æládusá rievddagåhti

Dagu ávddåla lip nammadam, de rievddagåhtin sijdaj æládusvuoge 1600-lågon. Tjuollam ja gáddebivddo nåhkågåhtin garra ano, oasástallama ja kolonisierima diehti. Sæmmi ájgen ællosujto ja sáme álggoednambarggo ællájin.

Dimbarbarggo lij viehka ájnas æládus bivddosijdajn. 1600-lågo nalluj hiejtij vaddnembivddo nuorttalamos sijdajn. Tjævrrá ja nuorjjobivddo gæhppánij. Stuorámus rievddadus lij huoman dálusj gáddebivddo hiejtij. Aktisasj gáddebivddo någåj. Dát hæjodij sijda sissnjálasj avtamielakvuodav ja sábalgisvuodav ja sijda fámov aj.

Gå tjuollam ja gáddebivddo gæhppánin ja sjaddagåhtin lijggeæládussan jali duoddeæládussan, de ij lim desti nav ájnas gå ávddåla suodjalit sijdaj ednamij ådåboahttij jali kolonistaj vuosstij. Farra sjattaj dárbbó ietjá æládusájt ávdedit. Dát dáhpáduváj aj danen gå ulmusjlåhko lassánij Sámen.



Fránska mannojuogos sárggom Duornnusa Sáme boatsojsidas jagen 1736. Riginaud Outhier, Paris 1744.

## Ællosujtto ávddân ja vijddán

Ællosujtto sælldásit ávddânij Sámev miehtáj, ájnnasit sisednam sijdajn. Bivddosijdaj ednama gártjun, ja nav vijddânij boatsoj-æloj jáhtem merragátte sijdajda. Navti dáhpáduváj duola degu *Guovddagæjno*, *Áviováre*, *Dæno* ja *Ohcejágå* sijdajn 1600-lågo lâhpa rájes. Bihtáma ja Julevu Sámen ja Várjjaga sijdajn dáhpáduváj dát vehi ávddåla. Dássta sjaddin stuorra gássjelisvuoda merragátte sijdajda. Sijá ednamijda ihtin boatsojælo, ma vijdes ednamijt dárbahin *boatsojsijdajda*, ma lidjin tjuodtjelam. Aj muhtem merragátte sáme sujttigåhtin boahtttsujt, ja muhtema sjaddi viehka boandá, duola degu Várjjaga sijdan. Merraguovllosijda gæhttjalin ánodit viehkev Danmárko-Vuona oajválattjais boatsojsijdaj vijddánimev vuosteldittjat. Valla oajválattja doarjun farra boatsojsijdaj oabllomav merragáddáj dajna dåjvujn dát luluj ávkken sidjij ríkarájá tjielggidusán nuorttalap Sámen, mij dáhpáduváj jagen 1751.



Várjjaga sijdan muhtema sjaddin viek ælloniehke. Várjjaga sáme hiergj.  
Lilienskiolda 1690-lågon



Gåvvå: Mats Andersson

Boatsojsija sjaddin ájnas institusjåvnnán Sámev miehtáj. Da rievddadit sijdaj ráijjt, organisasjåvnnámálav ja ednamij anov ja rievtesvuohstadåbddo. Aj sijdaboadnje doajmma rievda. Dat oattjoj stuorep åvdåsvásstádusáv danen gå hæhttuj duodden oajválattjajt dievnnugoahet. Sijda åvdåstibmáj duodden sán sjattaj aj oajválattjaj sámelænsskan.




Boatsojsijdaj jáhtulagá nuortamus Sámen, Finnmarkon, suláj jahke 1700. Kártta I dagáduvvam sáme misjonerra Thomas von Westena diedoj vuodon. Sán dagáj gálmå mano nuortamus Sábmáj, jage 1716, 1718-19 ja 1722-23.

1. Várjjaga aéllosáme.
2. Buolbmága/Dæno aéllosáme.
3. Áttánjágå aéllosáme
4. Levnya-guovlo aéllosáme.
5. Sválesnuore aéllosáme.
6. Ávjováre aéllosáme.
7. Guovddagæjno aéllosáme.

Jagen 1750 lidjin Svieriga oajválattjaj diedoj miltal dallusj Duornnusa Sámen, Čohkkirasa rájes Ohcejágå rádjáj, 25.500 boahtsu. Anára sijdan lidjin sæmmi jage 62 boatsojfamilja gejn lidjin tjoahkkáj 500 boahtsu.


Guovddagæjnon lidjin 40 boahtsufamilja gejn lidjin tjoahkkáj suláj 4000 boahtsu. Ávjováren vas lidjin 18 boahtsufamilja gejn lidjin 1100 hekka. Boatsojsijdaj familjain ællim ájn nav ållo boahtsu. Danen sijda ulmutja duodden muorrijin ja guolljin.



Boatsojsijdaj jáhtulagá, sajájduvvam åvddål ríjkárájá mierredime jagen 1751.



Knud Leem lij Levnja ja Ávjováre ja Áltá misjonerran 1728-1734. Jage 1752 nammaduváj Seminarium Lapponicum profæssurin. Dá tjuorggasa li viettjaduvvam suv girjes «Finnmarkens Lapper», mij almoduváj jagen 1767. Tjuorggasijt la O. H. Von Lode dakhkam Knud Leema tjielggidusáj milta. Tjuorggasa li viek imálattja. Tjielgas la ahte von Lode ij la dåbddåm sámijt jali sáme kultuvrav nav buoragit. Huoman tjuorggasa li huj ássjálattja ja tjielggiji viehka buoragit dallusj ællosujtov, man birra Leem tjállá girjenis. Leem, 1767.




## Merrasáme álggin aj slihturij

Merragátte sijdaj iellemvuohke aj rievddagådij 1600-lågo nalluj. Vuonaga jali látte buktin ámijt merragátte sijdajda, dagu Várjjagij 1600-lågo álgon. Suobmelattja jali guojna vas buktin ámijt duola degu Guovddagæjnnuj, Áviovárráj, Dædnuj ja Ohcejåhkåj 1700-lågo nalluj.

*Stuora nuorttarijkaj doarro* (1709-1720) dagáj muhtem suobmelattja báhtarín doaros ja árrujin nuortta Sáme ædnovákkijda ja vuonajda. Suobmelattja sámájduvin ja viessogåhtin sábmen.

Åbbánagi sijdaj iellemvuohke garrisit rieddaj dán ájge, ja dát dagáj stuora gássjelisuodajt aj nuorttarijkajda gá ríkkarájáv tjielggidahttjájin Sáme tjadá.

Slihtura. Leem 1767.



*Merrasámij slihtura. Nissun båhtjemin gusáv. Knud Leem, 1767.*



*Ednam ja slihtura lij sjaddam ájnas ælädussan Várjjaga sijda sámijda 1600-lågo lâhpan. Gåvvå vuoset suojunestávråv. Lilienskiold, 1690-lågon.*



## Rijkarádjá 1751 ja Sámekodisilla

Manjela Stuora nuorttarijkaj doaro (1709-1720) Dánmárko-Vuodna ja Svierik guorrasin láhpalasj rijkarájáv mierredit. Rijka sjiehtadin biedjat bargguj rádjekommisjávnåj tjielggit rájев dálusj ráfesjiehtadusáj ja rádjegirjij vuodon.

Barggo ij lim nav álkke gå álgos lidjin jáhkkám. Esski jage 1734 sjiehtadin álles rádjegatjálvisáv tjielgadit oarjját nuortas. Ájnnasik ájnas lij tjielgadit ja rijkarájáv mierredit nuorttalap Sáme tjadá, gánnå nav gáhtjodum aktisasjguovloj badjel lidjin rijdo ja stuojme. Danmárkko-Vuona vuojnno lij duola dagu *Guovddagæjnno*, Áviovárre, Dædno ja Ohcejåhkå lidjin dálutjis juo lähkám Vuona ednama. Esski manjemuus ájge lij Svierik dajt fámujn válldám.

Svierik lij girkkojt tsieggim ja ásadam duobbmofábmodusáv dájda sijdajda ja miejnnij da lidjin Svieriga ednama. Svenska vuoseden duola dagu birkálaj vidnudagájda ávdusj ájges ja miejnnijin birkála lidjin dájt ednamijt válldám Svieriga ávdás.

Rijka sjiehtadin Ednamtjavalgav mierredit rijkarádján gitta udnásj Finnmárko rádjáj. Dat lij luondulasj. Dat rájes lij gássjel tjuovvot dav njuolgadusáv, danen gó ednam vijddánij stuorra duoddarin. Aj dáppe lij máttelis gávnnat tjáhtjejuogov, valla ij val ednamtjavalgav mij luluj lähkám luondulasj rádjen.


Danmárko-Vuona rádjekommisjávnå jádediddje, major Peter Schnitler manáj Sáme tjadá jagijn 1742-1745 dutkatjít rádjegatjálvisájt. Sán lij dat vuojnos ahte rijkarájá nuorttalap Sáme tjadá galgaluluj dan vuodon mierredit gáktu sijdaj ulmutja admin duoddarav. Danen ieredij sámijt sierra juohkusijda ma lidjin: *Vuona merrasáme, privatijva Vuona ællósáme ja aktisasj ællósáme*. Suv vuojnno lij aj aktisasj ællósáme galgalulun Vuodnaj gullut. Guovddagæjno, Áviováre, Dæno ja Ohcejágå sijdaj ællósáme admin ednamijt navti jut gidán jáhtálin boahtsujisá merragáddáj giesseårudagájda.

Tjavitjan sij ruopptot jáhtin dálveårudagájda ma lidjin sisednamin. Ællósáme «aktisasjguovloj» máhttin ællobargojsá joarkket *jus besalulun ieme jáhtulagájt bisodit. Boatsojsijdaj jáhtema lidjin ájnnasamos sivvan jut åvvå duoddarav vaddin Vuona hállduj*, tjállá dåbdos histåvrrådutke Gudmund Sandvik.

Sjiehtadaládijn rijkarájá badjel jagen 1751 vuojtij Danmárko-Vuona vuojnno. Dan sivvan lij ierit ietján álggorijkapolitikalasj dille, mij lij ienep ávkken Danmárkko-Vuodnaj gó Svierigij. Dav anij Danmárkko-Vuodna ållåsit.

Rijkarádjá avtaláhkáj luoddij Sámev, ájnnasit boatsojsijdaj miehtáj Ednamtjavalgja ja aj Dænovákke ja Várjaga guovlon. Boatsojsijdaj ednama ja ulmutja guovte stáhta vuolláj juogeduvvin. Valla ríka ettjin sidá háddjit ja biejsstet dáj sijdaj sajáduvvam jáhtulagájt ja rievtesvuodajt. Danen rádjesjiehtadus oattjoj tjuovvusav, nav gáhtjodum sámekodisillav, mij aj la gáhtjoduvvam Sámi Magna Cartan, ietjá bágoj javladum: *Sámi rievtesvuodaj vuodogirjje*. Dat galgaj liehket sämmi stuoves ja nanos gó rádjesjiehtadus. Sámekodisilla galgaj Sáme nasjávnå bisodimev suoddjít ja ællósámjida jáhttet rievtesvuodajt adnet jáhtulagájt ma ådå rijkarájá rasstijin. Valla hæhttujin válljít stáhtaboargárvuodav.

Schnitlera «Vardehuus-Amt»-tjálos.




Ienemus ællosáme, gudi vierttijin ådå ríkárájáv rasstit, válljjin sjaddat Svieriga stáhtaviesádin. Vuolle Dæno ællosáme válljjin sjaddat Danmárko-Vuona stáhtaviesádin.

Sámekodisilla sjattaj ienemusát ávkken boatsojsijdajda. Dat suodjalij Vuona biele boatsojsámij rievtesvuodajt Svierigin ja Svieriga biele boatsojsámij rievtesvuodajt Vuonan, åvdemusát guohtomrievtesvuodajt. Sámekodisilla vuodon ællosujto gievroj ájnnasamos sáme æladussan ietjá sáme æladusáj gáktuj, ma ettjin oattjo stuoves suojev lága baktu.

Sáme gudi dárba hin rasstit ådå ríkárájájt æladusáj aktijuodan, ájnnasit ælloniehke, galggin visses miere divudav mákset nuppe ríkkaj. Dav máksin guohroma, tjuollama ja jávre ja merraguollima åvdás. Ohcejágåga bessin merraguollimav joarkket Várjatuonan ja Dænovuonan dagu juo dán dálutjis lidjin dahkam. Dat gielde-duváj jagen 1852 (gehtja b. 178).

Sámekodisilla mierredij aj «Sámeriektá» manna lij duobbmimfábmodus, rádjeguovlluj. Dænovákken dat dájmaj tjuode jage.



Oasse Schnitler kártas mij vuoset oasátjav Dænos ja masi l aj sárgoduvvam Buolmájtávrre – «Bolma» (1744-1745). Sámekodisilla «Sámeriektá», manna lij duobbmimfábmodus, dájmaj Dænovákke rádjeguovlon 1751 rájes gitta 1800-lágo gasskamudduj.

## Sámekodisilla 10. paragráffa:

Gå sáme dárba hi goappátij ríkaj ednamav, de galgi bessat dábe milta tjavtjajt ja gidájt boahtsuisá ráje rastá jáhtet nuppe ríkkaj, ja dássta duohku dagu åvddåla aj sæmmiláhkáj gå ríka ietjas vuollásattja – ietján gå dakkár sajijn ma dánna vuollelin nammaduvvi – de bessi ednamav ja gáttij juhtusijdesa adnet ja ietjasa æladussaj.

Sijáv galggá rádnalattjat duosstot, suodjalit ja viehkedi, doarro-ájge aj, mij ij galga dahkat makkirak målssomav sámij ássijida. Ja amás sáme e galga gierddat rievromijt jali makkirak nákkov jali vahágahttemijt ma doarov tjuovvu. Farra sijáv galgi agev gæht-tjat ja giehtadallat degu lulun ietjas vuollásattja dan ríka bielen gánnå sij dalloj árru amás ulmutjin.

(Sábmáj: Samuli Aikio. Girjetjálle vehi gjelav álkkebun tjállám.)

**Første CODICILL og Tillæg  
Til Grense-Traktaten imellem Konge-Rigerne  
Norge og Sverrig**

**Lapperne  
Betressende**



- 1751: Danmárkko-Vuodna ja Svierik sjehtadin ríjkaráját Sáme tjadá gitta Golmmešoajvváj Lulle-Sáme duohkáj.
- 1809: Svierik láhpij Suomav, mij sjattaj Ruossja tsára stuorra hertugviellden.
- 1826: Vuodna (-Svierik) ja Ruossja (-Suobma) sjehtadin ríjkaráját Lulle-Sáme allesijdaj tjadá, mij sjattav Sámev luodit guoktaj.

## Stálo subtsas

Sáme báhppa Lars Levi Læstadius (1800-1861), guhti lij Fránska diedækspedisjávnå oahpestiddjen Sáme tjadá jagen 1839, subtsastij duola degu dáv subtsasav Stálo birra gå lidjin iehke-dis tjåhkåhimen dållågáttien. Subtsas la dan birra gáktu sábme Stálov biehtij vaddnem-bivdon. Jali ietjá bágój javladuvvam: Gáktu sáme li hæhttum adnet sluogasvuodav ja fámojt gå li vasjulat-tjaj vuosstij dårrum, jali gáktu nárriji sundijt gudi nággijin sámijt mávsátjtí väröjt gânågisá stáhttaj.

Stáollo-subtsasa li dan birra gáktu de galgaj hiehtedilen ulmutjahttet, gå lij sáhka doarroma birra buore ja bahá gaskan:

Stáollo lij viermijt biedjam maj ájgoj vaddnemijt bivddet. Unnin dåbbelij miehtsen lij dållim, nuoladam ja viellidam vuojnastittjat. Vaj diehtá goassa værmmáj la dæhppum vaddnem mav mähttá gitta válldet, lij sán tjadnam hárpor (aláv) værmmáj ja tjadnam dav bielluj mav lij biedjam dasi lahkusij gánnå iesj vellahij. Gá biello tjuojaj, de diedij sán viermen la vaddnem, ja vájku iesj lij aj oaddám, de gulláj jienav.

Muhtem sábme lij dáv gânstav vuojnnám, ja gå Stáollo lij oaddám, de manáj sábme ja hárpor ráhttij. Stáollo gáhtjadij viermev åhpatjít, valla dåppe ij lim mige. Dan båttå lij sábme háhpidam Stálo biktasij dållåj bálkestit. Gá Stáollo ruopptot bådij, de vuojnij divna biktasa li buollám ja suhtaj allasis gå lij læhkám nav tjuorbbe ja ietjas biktasijt dållåj luojttalam gå lij viehkalam viermev åhpatjít.

Gá lij dållågáttien liekkadallam oanegattjav, de guláj Stáollo biello vas tjuodjagådij. Sán vas værmmáj gáhtjadij, valla ij lim ga dán bále vaddnem viermen. Madi lij gáhtum, de sábme viehkali jádditjít Stáollo dálåv, ja gå Stáollo ruopptot bådij de nav sælldát goaloj. Niedastis giedajis gálggigådij máno guovluj ja javlaj: «Gehtja Áhttje, bárnnát galmmá!» Valla dassta ij lim ávkke ja Stáollo jámás galmij.

(Gálldo: Roald E. Kristiansen: Davviguovlluid eamiálbmogiid oskkut ja sámi dološ osku. Sámegiellaj: Berit Margrethe Oskal. CálliidLágádus 2004.)

## DANMÁRKO-VUONA STIVRRIMA VUOLLÁJ

Manjela 1751 nuorttalamos sáme sijda sjaddin Danmárko-Vuona stivrrima vuolláj. Da lidjin duola degu Guovddagæjnno, Ávjobárre/Kárásjjáhkå ja Dænovákke alleoasse, mij gáhtjoduváj Buolbmát. Ådå stáhta tjadnasibme gal álgon ittjij hiereda dáj guovloj ælädusájt ja jáhtemijt. Valla dássta duohku gal hæhttujin vieledit ådå oajválattja riektávuogádagáv jali -årdnigav ja girkko-dájmajt.



Danmárko-Vuona gånågisá skierre Dædnogáttén. Ríkarádjámærkka tjuoladuvvam jagen 1766.

Dálla galggin Vuona sunde Vuona lágajt ja njuolgadusájt bærrággæhtjat. Vuona báhpa máhttin binnáv sámegiela dile birra dáppe. Valla ruvva vatteduváj giella ja åhpadusláhka mij gieldij adnemis sámegielav hålajn ja åhpadusán (gehtja b. 204-205).

Jage 1760 mierredin oajválattja láhpadit Guovddagæjno ja Ávjobávre guovvamáno oasesmárnán, danen gå sihtin kontrollierit sámij oasástallamijt ja unndit Svieriga biele oasesålmmáj oasástallamijt dáppe. Vuojná bivddosijda ájge lidjin oasesmárnán sajáduvvam duola dagu Guovddagæjnnuj ja Ávjobárráj. Manjela 1751 Svieriga oasesålmmá joarkkin dáv oasástallamav dáppe. Hans Dahl, guhti lij Guovddagæjno ja Ávjobáre báhppan jagiin 1755-1759 ja åroj Guovddagæjnon, subtsas Svieriga Duornnusa oasesålmmá báhtin diehki sámij oasástalátjít. Oasstin sámijs duola degu duoljijt, muottájt, gisstájt ja gábmagijt. Dájt gálvojt máksin dudnoj, dubáhkajn ja buollehvijnajn.

Ij dåssju dat. Svenska oasesålmmá joarkkin oasesmanojt gitta Stuorravuona oasesmárnánij Várjjagin. Ámtmánne Hammer sidáj dájt oasesmanojt láhpadit, danen gå da vaháguhttin Vuona biele oasástallamav. Ij lim sáme álmmugij buorren dát oasástallam, danen gå oasesålmmá nárrijin sámijt oasstet buollehvijnav, jugádin sijáv ja de vas sijáv skælmmadin oassásin.



Stuorravuona oasesmárnán láhpaduváj jagen 1760. Ådå oasesmárnán ásaduváj Ceavccagærggáj jagen 1784, ja 1800-lågon jádedij Nordvi-familjja dav oasestimev. Gåvvá vuoset Nordvi oassásav Ceavccagiergen, gávviduvvam jagen 1870. Oalges bielen «hotælla ja dávvervuorkká».

## Påsta suvddem

Vuona bielen ásaduváj poasstajuogedibme 1600-lågon. Poassta suvdeduváj sihke mera ja ednama milta. «Duottarpoassta» duohtan dagáduváj gánågisálasj mærrádusá baktu jagen 1789. Dálven poassta suvdeduváj gierishiergij ja tjuojga, giesen vátse, noadehiergijn ja jáhkåvantsajn. Duola degu lij jagen 1833 sisednama poasstarukto návti: Áltá – lešjávrre – Mollešjåhkå – Kárásjåhkå – Buolbmát – Gollesuoloj.

## Per Klemetsen (Outakoski)

Eilert Sundt, guhti lij Vuona vuostasj sosiolåvggå, manáj Finn-márkon giesen 1863. Sân alvaduváj man guhka gaska dáppe lidjin ja gáktu da ulmutjjit ja bájkijt ieredin. Danen rámpoj ulmutjjit gudi bierggijin mannat dájt gaskajt ja jávsádin gási galggin. Nágín dákkár lij Kárásjågåk Lemet-Piera, Peder Klemetsen (Outakoski), gev iejvvij dán manon ædnogáttien. Jage 1822 sân lij biejaduvvam virggáj suvdájtjat påstav Kárásjågås Áltáj ja Kárásjågås Buolbmáti. Dálla lij sán dievnnum poasstaålmmán 41 jage ja lij muhtem máno åvddåla vijmak dákkipidam hiejttet virges 79-80 jage vuorrasin.

Vájku sujna lij lähkám garra ja stuorra barggo, de lij hæjos sábme giehtoj Sundtaj. Poasstaduvvdem ij lim oadtjum heva bálkkáv, ja dasi duodden lidjin sujna 10 njálme biebbmat. Sujna ællim nav galla hiergev ma dájda guhka manoja dárbahuvvin, de hæhttuj álu lájggit duodde vuojánijt. Subtsastij aj muhtem máno lij Poassta-departemænntaj sáddim åhtsåmav oadtjot vehi pensjåvnåv.

## Danmárkka-Vuodna doarju ådåviesajdiddjít

Danmárko-Vuona oajválattja berustahtjájin ienebut ednambargo kolonisierimis. Nuortta Sáme merragáttien ja vuonajn lij láttijen ednambarggo dåssju duoddeeládussan. Sijá oajveäládus lij guollim. Dasi duodden nievres økonomijjalasj ájge 1700-lågon ájttin láttij merraguovloårromav.


Gå Sundt bådij ruopptot Kristianiaj, mij lij dalloj Vuona oajvvestáda namma, de guovladij Poasstadepartementan guláskuttatjat PieraLemeha ássje birra. Dåppe oattjoj dav diedov jut Lemet-Piera lij oadtjum «15 Spd. Gratiale». Sundt tjállá Folkevennenij:

*Ham faar nok et Gratiale af 15 Spd. Peder Klemetsen er hans navn. Siden han faar Gratiale, og siden han ikke faar det større, saa kan man vel sige, at Peder har været tro i det Lidet.*



Dálven oasesålmmå ja poasstaålmmå gesadin gálvojt ja påstav hierggerádoj. Tjuorgas: A winter in Lapland, 1827.

Sáme lidjin tjanáduvvam juogu de ællosujttuj jali tjoahkke-æladusájda. Duodden muorraluoddomij ja guolástibmáj de manjela gá lij manemus påstav suvddám, de sujttijin vehi slihturijt jali ámijt, ja jáhtálin ájn tjeldes tjælldáj jageájgij milta. Dáj gáktuj oajválattja vuojnnin guojnajt ávkken dássebit ja ávdedit ednambarggoårromav merragáttijen nuorttan. 1700-lågo milta vuojn lidjin suomagielaga, gejt guojnnan gáhtjudin, jáhtem ájnna-sit Råmså guovlluj ja ednambarggokultuvrav buktám manenisá. Vaj ednambarggo luluj ávddánit, de oajválattja mierredin jage 1775 ednambarggolágav, mij máhettelisvuodav vattij priváhta ednamav ámastit nuortta Sámen jali Finnmarko ámtan.



Kolonistaj ståhpe sis-  
Råmsån.

Guojna buktin aj ednam- ja slidordåjma Dænovággáj. Sij bessin diehki jáhtet Sámeplakáhta diehti, man birra I ávdebun tjáledum. Vuostasj ådåviesajdiddje familjajnis bådij Duornosvákkes Kárásjjágå baktu Buolbmáti 1730-lágo álgon. Sán lij Beaska-Heike, jali suomagiellaj Peski-Heikki, gut lij sámevierregijs. Gierra-  
ga sábmen sjaddin.

Dalloj juo årrun birra jagev Dænovákken tjáhtjegátteulmutja, gej oajvveäládus lij luossaguollim, jávrreguollim ja miehtsim. Dalloj lij oajvveårrom Ruossja-Suoma bielen, mij lij Ohcejágå suohkan. Valla Ohcejágågijn lidjin giessesaje Vuona bielen, majt adnin. Valla 1800-lágo milta moattes jáhtin Vuona bælláj. Akta sivájs lij ulmusjlågo lassánibme Ohcejágå suohkanin ja ruossjaballo aj. Vuojná Ohcejágå suohkan lij Suoma nuorttalamos sámesuohkan, ja jagen 1809 lij Suobma sjaddam Ruossja vuollásasj ríkkjan jali stuorrahertugviellden.

Stáhta nammadin virggeulmutjijt gudi galggin garrisit stivrrit sáme suohkanijt. Dakkára lidjin duola degu báhpa.



Kárásjjáhkå 1827-28. Muhtem guojnnafamilja båhtin Kárásjjáhkåj 1720-lágon. Siján lidjin slihtura. Tjuohtejage manjela sijá gierraga lidjin sámájduvvam ja stuovesárron sjaddam. Gåvvå vuoset ierit ietján hierggerájdov ja stuovesárronis- sunav, guhti I suojniyt giessemín vuovsájn, mij lij stuovesárruj vuoján.

## Báhpa stáhta guhka giehtan

Báhpa ruvva sjaddin stáhta guhka giehtan. Siján lidjin moatten lágásj dåjma. Åhpadusá ávdås vássteden, ja galggin vájvánijda jali hæjojda gehtjadit ja ulmutjij varresvuoda dilev gáhttít. Dasi duodden galggin sæbrrat dikkijda, ja galggin viehkedit sundev tjuovggidit álmmuga iellelav ja åbmudakdilev. Galggin girkkogirjij tjállemav háldadit, buojk tjállet riegádimijt, hejajt ja jábmemijt. Bærrájgæhttjin ietjasa báhppasuhkanij álmmuklåhkåmijt aj.

Jage 1751 rájes jage 1813 rádjáj lidjin Guovddagæjnno ja Ávjobárre/Kárásjjáhkå aktisajj báhppasuhkan. Jagen 1813 da sjaddin Tjudegiette (Porsángo) báhppasuhkana vuolláj. Jagen 1851 sjattaj Guovddagæjnno sierra báhppasuhkanin ja Kárásjjáhkå vas jagen 1872. Muhtem jage ávddåla, jagen 1866, lij Kárásjjáhkå iereduvvam sierra suohkanin.

Morten Clemetsen (1832-1909), Guovddagæjnno. Sân gulluj dåbdos Luhkkárberrahij ja bargaj viesso-májgev kloahkkarin ja åhpadiddjen. Sân lij aj muhtem gaskav suohkanoajvve.



Jagen 1814 lij Vuodna sjaddam Svieriga vuolláj. Dalloj ásaduváj Vuona-Svieriga uniåvnnå, mij vibáj 1905 rádjáj.

1800-lågon, ávddål gå dárojduhttempolikhka garraj jahketjuode láhpan, dåssju duolloj dálloj vállijin sámev suohkana njunnutjin. Jagen 1859 válljiduváj vuostasj bále sábme Guovddagæjno suohkanoajven. Sân lij Ole Isaksen Hætta (1822-1912), guhti jage 1856 lij nammaduvvam Bikkejávre várredåbe jádediddjen. Dan ávddåla lij barggam suohkana länsskan, valla hæjtádaláj Guovddagæjno stuojmij ájge jagen 1852.

Aj Ávjováren ja manjela Kárásjjágán ávdåstin báhpa ríjka oajválat-tjatj juohkkalágásj vidjurin. Sáme åhpaduvvin viehkkeåhpadiddjen ja girkodievnárin. Muhtema länsskan nammaduvvin, duola degu Anders Johnsen (1819-1899), guhti lij Kárásjjágå länsska jagijn 1845-1868. Sân bargaj aj girkkolávlon ja åhpadiddjen. Mathis Isaksen – Luhkkár (1827-1904) bargaj åhpadiddjen 1851 rájes gitte suláj jage 1900 rádjáj. Sân lij aj suohkanoajven jagijn 1867-1893. Sân lij tjiehpes åhpadiddje vájku ij lim åhpadiddjeskávlåv váttsám. Sân sárnnedij sámegiellaj gánágis 2. Oscarij, dalloj gâ nuortta Sáme manádijn guossidij Suohpanjárgav vuolle Dænon giesen 1873. Mathis Isaksena bárne lij dåbdos girjetjálle Matti Aikio, guhti dåssju dárogiellaj tjálij.

Luhkkár – Mathis Isaksen (1827-1904) lij guhkijt Kárásjjágå suohkana åhpadiddje ja lij aj jagijn 1867-1893 suohkanoajvve. Gå Vuona-Svieriga gánágis Oscar 2. manáj Finnmárkon giesen 1873 ja guossidij Suohpanjárgav vuolle Dænon, de lij Luhkkár suohkana juohkusijin dâppe buorástahttemin gánágisáv. Dánna oasse suv hålas gánágissaj:

**Ármmogamos gánágis!**

Badjeednama sáme ja ædnogátte sáme sávvi dunji ármmogamos gánágissaj, ávvå vájmonisá buorisboahtem diehki! Adnep dáv ármmon Jubmelis, jut mijá buolvajda le vatteduvvam vuojnnet gánágisá árudijáv, majt sáme ælla gudik goassak ávddåla vuojnnám.

Dålusj subtsasijs diehtep mij, jut árvo milta li 350 jage dallutjis gå muhtem gánágis la Sámeednama áhpenjárgajt guossidam, valla ij subtsastuvá, jus dallusj sámijda vatteduváj dat vuorbbe ja guddne jut gánágisá árudijáv bessin vuojnnet, ja mij ienep la, vil suv Allavuodajn ságastit, navti gák midjij la dáhpáduvvam uddni. Gánágisá lahkanimev Sámeednamij adnep mij duodastussan suv Allavuoda ja gieres vájmo mielav aj mijáj sámij vuosstij, dagu dan vuolle gamos sajen daj vuosstij avtadum ríkjaj sinna; dagu e lulu gánágisá lávke njuolggam diehki guovlluj, gâ ij la gieresvuhta dajda unnemusájda, mij luluj suv lávkijt vuojedam diehki.

Diehtep ja dåbdåstip mij lip danen vuolemus sajen ulmutjin daj aktiduvvam ríkjaj sinna, ja gâ mij huoman uddni vuojnnep, jut suv Allavuoda sidot la vuojnnet ja ságastit vil suv unnemusáj, de lip galla ávon állles vájmos, ja mij ja ávvå sámeálmmuk sávvap sunji, mijá iehtseduvvam gánágissaj, moatte gierde buorisboahtem.

Jubmel, guhti stivrij gánágisá lávkijt diehki, sán luluj vaddet vuorbev ja buorissjivnnjádusáv divna dajda liegga sávvamijda, divna dajda vissjalis bargoja ja divna dajda gieres ásadusájda, majt suv gánágisálasj Majestiehtta máhtáluluj adnet, ja ávkken gávnnat ásadir Boatsojsáme ja Dædnogátte Sámij dile buoredime diehti. Dagu ietja lip unnagattja, návti li miján aj smávva vánnesvuoda, vájku ietjáláhkáj lulujma sávvat, ja majda lulujma dárbaht Duv gánágisálasj Majestiehta viehkev, valla dan birra ep sidá huoman sárnnot Dunji, o gánágis, uddni dan ávvobæjváma nanna, valla ienep sárnnot návti:



Oskar boahtá,  
Badjána muv vájmmo ja gehtja  
majt åvddåla illa vuojnnám!  
Ij ietjá gânágis  
Duv náv ármmogisát, gærrásit oahpásmuvvam.  
O, ávvo ja guddnebiejvve!

Gânágis Oskar boahtá,  
Badjána muv vájmmo, gå suv  
Vijsesvuohť vuojná suv luottajn!  
Ij gæsásta sán hesta vogn' mañnjáj  
Ájn rijkan sán iesj sihtá  
Dåbddåt dan ålgomus tjiegajt!

Gânágis Oskar boahtá,  
Sán gákaj dilev åtsåt,  
Vil Sámiyt guhkken sán åhtså,  
Gejn ælla sadjásasj dikken.  
De hærráj sán loahpádusáv vaddá,  
Válldá kruvnos ja ráddi suv rijkan!  
Viessus gânágis Oskar!

Luhkkár sárgoduvvam giesen 1851. Akvarælla:  
Skáhtalasj Francis Campbell guhti Sámev  
guossidij sihke 1851, 1852 ja 1862.

Finnmárko ámtadigge  
1868. Gasskarájdo gáro  
rabdan: Mathis Isaksen,  
Kárásjjágå suohkanoajvve.  
Gasskarájdo oalges  
rabdan: Ole Isaksen  
Hætta, Guovddagæjno  
suohkanoajvve.



## Hárjjidusá

1. Mij lij gåttij rievvoma sivvan?  
Majt dát bivddosijdajda merkahij?
2. Manen mähtep javllat ahte Svierik lij åvdemusán  
Sáme kolonisierimin?
3. Majt sisadná jage 1673 sáme-ednamgirje jali sáme-plakáhtta?
4. Gåktu vájkkudij Násá silbbagruvvo álgadibme  
sámiida?
5. Tjielggi jage 1695 sámeplakáhta sisanov.  
Gåktu dát vájkkudij sámiårromij?
6. Tjielggi bivddosijdaj æladusáj rievddama sivájt!
7. Gåktu dát vájkkudij bivddosijda fábmuj jali vælldáj?
8. Manen gáhtjuduvvá Sámekodisilla Sámiij  
rievtesvuodaj vuodogirjen?
9. Mañjela jage 1751 rádjesjiehtadusá sidáj  
Danmárkko-Vuodna ådåviesajdiddijit doarjjot  
gudi sihtin Sábmáj årrudahttet. Manen?

## Girkko, misjåvnnå ja åhpodus

1700-lågo álggogietjen sjattaj Svieriga misjåvnnådoajmma dábmarabbo. Dan diehti viddánin girkkotsieggima nuorttan, ja jage 1701 tsieggiduvvin girkko Guovddagæjnnuj ja Ohcejåhkåj ja hållaståbåsj Ávjovárráj. Vuona bielen nammaduváj Thomas von Westen sámemisjåvnå njunnutjin. Misjåvnnå lij álgadam Misjåvnnåkollegiumav Københámnan.



Guovddagæjno girkko, mij tsieggiduvváj jagen 1701.



Tjuorgas vuoset Kárásjjágå bájkev manna girkko vuojnna mij tsieggiduvváj jagen 1807. Vuostasj girkko jali hållaståbåsj lij tsieggiduvvam jagen 1701. Skillingssmagasinet 1880-lågon.

Sihke Svierigin ja Danmárko-Vuonan dájmaj sámemisjåvnnå pietisma vuojñjanin. Sámij sielojt vuotij risstalasjvuohatj gá ájlis tjállu-sijt åttjudij sámegiellaj ja åhpadij ja sárnnedij sámegiellaj.

Pietisma ájgegávdda vibáj 1700-lågo loahppaj. Dat rájes *tjuovggi-dusájgegávdda* ja rasjonalissma ráddigådij misjåvnnå ja åhpodus-politikhav Sámen. Danmárko-Vuona bielen girkkooajválattja vuosteldahtjájin sámegiela anov misjåvnnå- ja *tjuovggidusbargojn*, ja jage 1802 aj någåj Misjåvnnåkollegiuma ávdåsvásstádus sámemisjåvnåv jádedit. Suláj 1820 rájes 1860 rádjáj oajválattjaj vuojnno vehi loadtjánij sámegiela ano hárráj åhpodusán. Valla suláj 1860 rájes vuojnno ållu ietjáduváj, ja dallutjis gitta 2. værál-dadoaro rádjáj oajválattja vuojedin garra dárojduhttempolitikhav mav manjela tjielggip.

## Svierik nanni misjåvnåv

*Stuora nuorttarijkaj doaro* (1709-1720) manjela bádij friddja-vuodaájgge, ja ulmutja vuojnnegåhtin *tjuovggadap* boahtteájgev. Svenska oajválattja doarjogåhtin misjåvnåv ájnnasit dan diehti vág sámijt nannusappot tjadni Svieriga ríkkaj. Oajválatjja mierredin jagen 1723 skåvllånjuolgadusáv, mij galgaj risstalasjvuodav ja åhpodusáv ávdedit sáme guovlojn. Skåvlå tsieggiduvvin ja báhpa galggin buktet sámástit. Báhpa galggin aj máhttet *tjuovvot* boatsojsijdaj jáhtemájgev. Skåvlåjn galgaj liehket risstalasjvuoda åhpodus sámegiellaj. Danen lij dárbbó ásadir ienep sámegiela oahppogirjijt ja dakkárottajt. Sáme galggin aj bessat svierigá-dárogielav oahppat jus sihtin.

Nuorttalamos skåvlå tsieggimbájke badjel ettjin guorrasha. Sáhka lij goappá bájkáj galgaj skåvlåv tsieggit, Guovddagæjnnuj vaj Ohcejåhkåj. Skåvllå tsieggiduvváj gájt víjmak Ohcejåhkåj jagen 1728, valla esski jagen 1743 vuorbástuvvin skåvlåv jáhtuj oadtjot.

Álon lij gássjel oadtjot mánájt skåvlåv váttstájtit, valla muhtem jage manjela gáhtjudallin gájt gáktsa nuora álgget skåvllåj. Muhtema báhtin gitta Guovddagæjnos, buoik *Par Mickelsson Manga* (Magga). Ávjováres Ohcejåhkåj vas hæhttujga vielljaguovtes *Nils* ja *Anders Parsson Nikki* (Nikkinen) vuolget váttstájtit «Skåvllåjádediddje Hærrá Anders Helander» skåvlåv. Skåvllå låhpaduvváj jagen 1750.

Vuostasj báhppan lij *Anders Helander*, guhti jage 1743 rájes lij dáppe barggam åhpadiddjen. Sân gæhttjalij sámegielav vieledit ja sárnnedij sámegiellaj aj. Valla ienemusát sân gal sárnnedij suomagiellaj. Helander guossidij aj vuolle Dænov sárnnedimen girkkon mav Thomas von Westen lij tsieggim. Dalloj sân gal garadaláj Danmárko-Vuona oajválattjajda.

Máttajávrre I læhkám Ohcejágå girkkobájkke dán dálutja rájes. Gåvvå vuoset girkoståbåtjijt Máttajávren, gåvviduvvam 1900-lågo álgon.

Anders Helandera manjela bådij *Henrik Wegelius*, guhti lij Ohcejágå báhppan 1757-1765, gal vissjalit bargaj sámegiela vuosstij ja gáhtjudij dav «bednagagiellan». Sân ávdedij suomajduhitemav, mij Fellmana ájggáj vibáj. *Jacob Fellman* lij Ohcejágå báhppan 1820-1832, ja sán doarjoj ja anij sámegielav tjuovgidusbargon. Sân vikkaj sámegielav oadtjot åhpadusgiellan, valla suv bajep oajválattja vuosteldin dav. Suobma lij sjaddam Ruossja tsárra hertugviellen jagen 1809, ja manenagi vatteduvvin njuolgadusá ma gielldin sámegielav adnemis åhpadusán ja girkkon.

Máttajávrre I læhkám Ohcejágå girkkobájkke dán dálutja rájes. Gåvvå vuoset girkoståbåtjijt Máttajávren, gåvviduvvam 1900-lågo álgon.



Guovddagæjnno lij sjaddam sierra girkkosuhkanin jage 1673, ja dan vuolláj sjaddin Áviovárre ja Ohcejåhkå. Guovddagæjno vuostasj báhpa árrun Mázen. Vuostasj báhppa guhti girkkobájkáj árruj, lij *Johan Tornberg*. Suv manjela lij suv viellja Anders Tornensis (S 1625-1705) gen ájge girkko tsieggiduváj (1701). Anders Tornensis lij bargális báhppa, valla sán lij narik ja iesjájvak. Sân lij agev rijddalimen bájke ulmutjij guollejávri ja sládjogietti nanna, sáhtoj ja rievtesvuodaj nanna. Suv árbbásj ij lim makkirak buorep. Diggegirje subtsasti doarromij, juhkalisvuoda, buollemvijna vuobbdema ja illastimij birra báhppagoaden. Akta sunnu bárnijs, *Johannes Tornensis* (riegádam 1690) jádij Návuodnaj ja sjattaj Thomas von Westena barggoguojmnen ja katekiehttan. Iejá bárne árruin bájkáj ja sijá gierraga uddni gulluji Guovddagæjno Tornensis-berrahij.

Guovddagæjno girkkosuhkana svænsska báhpaj hållamgiella lij ienemusát suomagiella, valla sij sárnnedin sámegiellaj aj.

Nágin báhpa ja katekiehta lidjin viek juhkke. Akta dajs lij Muonio katekiehtta Kollström. Javlajáge 1848 Guovddagæjnok Anders Bær suvdij katekiehtav Kollströmov Muonioniskes Áltáj. Dánnna oasse dat manos:

Vuoddjájma Kollströmajn manjela javllabasij Áltáj. Kollströmin lij dat gádnosjasj buollemvijnagággja badjel lahkijn vijnna sinna majt lij Muoneváren váll-dám. Gå lijma boahtám Roavvotluohká vuolláj, de báhppa Kollström váldij vijnnagákkas bajás ja gáhtujuj muv allasis snjárrat jugástagáv. Snjoarrijiv jur báhppaj jugástagáv. De ájn vuolgiima ja bådijma sjevnjudattij Luossačaza nali. De ganugijma ræjnnuhittjat munnu hiergijdimme. Buorádalájma danna iehtjama báhpajn dav båttåv gå hierge guohtun, báhppa vijnnagákkajn ja mán vas lájbbevuossajn ja vuodjaskáhpojn. De ájn vuoddjájma ja bådijma Skárjjájávrátjij nali, de báhppa vasten tjuorvoj muv ganugit ja boahtet allasis snjárrat jugástagáv. Snjoarrijiv jur vasten jugástagáv báhppaj. Báhppa sjattaj nav gárramjida, jurra gierrisin bisoj. Gå Biggejávrráj lahanatjájma, de nágin bále tjuorvoj muv ganugit ja boahtet suv duollitjít, gå sán lij vierralam garnjnelbiele nali gierrisin váj nuppijn giedajn adnal gierisrabdas gitta ja nuppijn giedajn vas garnnjelijen doarju ja gieseduvvá garnnjelbiele nanna.

## Thomas von Westen – «sámj apoasstal»

Danmárko-Vuona bielen nammaduváj 1700-lågo álgon Thomas von Westen sáme oajvemussan misjávnnábargguj, mav stivrij Københávna Misjávnnákollégium. von Westen ásadij misjávnnábjrajt gitta Várjjaga rádjáj, tsieggidahtij skávllådåbåtjijt, hålladåbåtjijt ja girkkojt ja majduk Unjárggaj, Dædnuj, Nuortasijddaj ja Mázej. Álgadij misjávnnåskåvlåv, *Seminarium scholasticum*, mij galgaj misjávnnábarggijt åhpadir gudi máhttin Sámen manádit ja åhpadir ja sárnnedit sámegiellaj. Roandema bissma Peder Krogh vuosteldij von Westena giellapolitikhav, ja gæhttjalij åhpadusáv ja hålajt dárojduhttet von Westena jábmema (1727) manjela.

Valla Thomas von Westena giellavuojnno vas vuotij 1740-lågon, ja ádå misjávnnårjuolgadusá dættodin sámegiela anov tjuovggi-dusbargon. Ásaduváj vas ádå misjávnnåskåvllå, *Seminarium Lapponicum*, mij galgaj misjávnnábarggijt åhpadir ja ájlistjállagijt ja oahppogirijt kåmadit sámegiellaj. Dan jádediddjen nammaduváj Knud Leem.



Thomas von Westen.



Bissma Peder Krogh.

## Knud Leem

Knud Leem lij lähkám Thomas von Westena oahppe Roandemin. Sámegiela lähkåma manjela barggagådij misjávnnábáhppan, vuostatjin Porsángo ja Lágesvuona guovlon 1725 rájes ja ja de Áltá suohkanbáhppan jagijn 1728-1734. Gå dan manjela lij barggam báhppan oarje Vuonan muhtem jagev, de máhtsaj Roandemij jádedittiat misjávnnåskåvlå *Seminarium Lapponicum*. Sán bargaj von Westena vuojnjanin gitta jámij jagen 1774.

Sæmmi jage (1774) *Seminarium Lapponicum* lähpaduváj ja ádå dárojduhttemvojnjan vibáj 1800-lågo álgguj. Dán ájgegávdan guokta dánska lijga bissman ja gájbbedijga divna håla ja åhpadus galggin dárogiellaj dáhpáduvvat, jali jus ållu riekta dánskagiellaj. Nubbe dan guoktásin miejnnij sámegiella ij åvvánis hieba gávådittiat vuojnjasj ájádusájt ja ássjijt.



Dávk Knud Leem sárndimen sámijda álggoájmo ávdân.  
Leem 1767.

## Biret-Ánde – Anders Porsanger

Misjåvnnåpolitihka rievddama sjattaj vájven duola dagu báhppaj *Biret-Ánde – Anders Porsanger* (1735-1780), vuostasj nuortta-sábme guhti alep åhpav váldij. Biret-Ánde lij Leaibevuonan riegádam Porsángon jagen 1735 ja hevvanij aktan familjajnis gá lij vanntsamanon Danmárkkuj tjavtjan 1780.

Biret-Ánden lidjin buorre láhkåmij ja oahppamij vaddása. Dav ájtsaj Roandema bissma Gunnerus gá lij nuortta Sámen maná-dimen jagen 1751. Gá Knud Leem nammaduváj misjåvnnåskåvlå *Seminarium Lapponicum* jádediddjen ja profæssurin, de sidáj sáme barggoguojmev guhti máhtij sihke dánska ja sámegielav ja máhtij suv viehkedit oahppo- ja báhkogirjebargujn. Danen sjattaj Biret-Ánde bisma viehkken.

Bissma Gunnerus



Roandemin Biret-Ánde dåmaj guokta ájgegávda. Vuostatjin jage 1752 rájes muhtem jage ávddåljuovlluj dan båttå gá lij misjåvnnåskåvlå oahppen, ja ja de jage 1766 rájes jage 1770 rádjáj. Sán låhkågådij teologijjav Københávnan jagen 1759 ja váldij teolåvgggå dutkamav jagen 1761 buorre karaktieraj. Sæmmi jage nammaduváj Várjjaga ja Dæno guovloj misjåvnnåbáhppan.

Sihke Leem ja Roandema bisspa rámpojga Biret-Ánde máhtulasj-vuodav, ja danen bisspa sidáj Biret-Ándev máhttsat vas Roandemij Leemav viehkeditjat guhti dállea lij skibás ja vuorastuvvam. Valla bispa vuojnno Biret-Ánde hárraj jáhtelit rievda gá Biret-Ánde gájbbedadatjáj ienep bálkáv bargo ávdås. Ij dåssju dat. Biret-Ánde sidáj aj sjaddat Seminarium Lapponicum profæssurin Leema manjela. Bisspa dállea miejnnij Biret-Ánde lij sjaddam ilá stuorrásin, iesjbuoren ja bievregin. Bievregin sán gal ihkap lij aj sjaddam. Sán lij agev ruhtaniedan ja gájbbedij agev bálkkálasádusáv, dav båttåv gá badjelij váldij duoddebargoj dasi duodden majt Leema ávdås bargaj. Danen bisspa oajvwadij Misjåvnnåkollegiumij jut lij nuoges gá Anders Porsanger boahtteájggáj sjaddá dåssju lektåvrå ij profæssurin, danen gá dákkr virgev máhtáluluj sunji dahkat ienep gáloj ja tjævllodit suv viessogoadátjít guoros iellemav.

Biret-Ánde lij ihkap mihás ulmusj, ij lim bådnjåmin ja vuornnomin. Danen oattjoj gássjelisuodajt suv bajep oajválattjaj, gudi sámijt dåhkkidin dievnárin valla e jádediddjen.

Vuordedijen nammadimev ádå virggáj vuolgij Biret-Ánde Københávnnaj jagen 1770 ja lij dåppe 1771 ádåjakmánnuj. Danmárko grevva Holstein lij Biret-Ándev gáhttum boahtet dåhku viehkeditjat unggára gielladutkev Sajnovičav, guhti lij vehi sáme-gielav oahppam manádijen nuorttalap Sámen nágín jage ávddåla. Sán lij gávnadam sámegiella ja unggargiella lidjin fuolkkegiela. Valla ij lim dudálasj sámegiela tjállemuogijen ja sidáj adnegoahtet tjállem-vuogev mij lij unggáragiela lagábun. Dán bargon de galgaj Biret-Ánde suv viehkedit.

Dille gal ittijj buorrána Biret-Ánndij gå Marcus Bang nammaduváj bisspan jagen 1773. Sán njuolgga vasjodij Biret-Ándev. Dan sivvan máhtij liehkjet gå Bang vuosteldij sámemisjávnå dâjmajt ja danen bilkkedij ja ålgodij sámijt.

Biret-Ánde ittij oattjo Roandemin báhppavirgev, mav lij åhtsåm. Girkkooajválattja sihtin dállea Biret-Ándes bessat Roandemin ja suv sáddit nuortas Sábmáj gási gulluj.

1772 moarmesmáno Biret-Ánde nammaduváj suohkanbáhppan nuortta Sábmáj Tjáhcesuollu guovlluj, ja nuortas jádij aktugasj ja vuollánam ulmusj. Jagev manjela bisspa Bang sáddij sunji gatjálvisáv jus lij gå Apoasstalijt járggålam sámegiellaj. Biret-Ánde vásstedij sán lij járggålam «divna jage Evangelumijt», muhtem sálmajt, 1. Mosesa girjev ja sáme grammatikhav. Valla gå lidjin nav vastet doajmmam suv vuosstij Roandemin, de lij divna boalldám.

Biret-Ánde birra sjávvunij. Muhtem tjállusin Gerhard Sandberg, guhti lij Várjjaga ja Dæno guovloj misjåvnnåbhppan 1770-lágon, tjállá návti Ánde birra:

Anders Porsanger lij oahppam ulmusj ja tjiehpes báhppa, gå bargaj sámij ja láttij gaskan. Sån háludadij virges buoragit. Risstalattjan sujna lidjin vánnesvuoda sihke ájádusáj ja viessomvuoge gáktuj, valla dát ij lim nav stuora vágne.

Anders Porsanger lij vuostasj nuorttasáme girjjetjálle. Luodjom-láhkáj li dåssju suv dárogielak tjállusa ja divta ájmon, ma li viek romantihkalattja ja virmmelisá.

Manádijen Københávnaj iemedijen, guovtijen niejdajn ja bárni  
vuojoj hqksa Oarjje-Vuona merragátte ålggolin galgådismáno 10.  
biejve 1780, ja ávvå famillja fellaj. Nælját mánná lij muhtem jage  
åvddåla jábmám.

*Biret-Ánde – Anders Porsangera tjálos (oasse) nuorttasámegiela tjállemvuoge birra, mav sán sáddij Mis-jávnnåkollegiumij jagen 1767.*

## Garra-Jorta

Suláj sæmmi bále gå Anders Porsanger lij Islándalasj Olav Josephsen Hjort (1740-1789) misjåvnnåskåvlå *Seminarium Lapponicum* oahppen. Bisspa Gunnerus lij suv skåvllåj åttjudam. Mañjela válđij teolåvggå dutkamav Københávnan nievres karakteraj. Jage 1770 nammaduváj Porsánjo sámij misjåvnnåbhappan. Jage 1774 sán biejaduváj Guovddagæjnnuj, gánnå lij báhppan 1780 rádjáj. Sán jámij jagen 1789.

Olav Josephsen Hjort gåhtjoduváj Guovddagæjnon *Garra-Jorta* danen gå sán nav garrisit vuosteldij pietistalasj åsskolabudallamav mij lij Duornosvákken álgaduvvam ja vijddánam Guovddagæjnnuj aj. Dá ásskoulmutja gudi ienemus oassáj lidjin ællosáme, gåhtjoduvvin *Tjuorvvon* danen gå sij tjuorvvun duoppen dáppen, sihke girkko lahka, saljojn, gádijn ja ietjasa boatsojsijdajn. Sij ávttijin ulmutjijt birra járgestit ja buorádusáv dahkat. Garra-Jorta ittij lijkku sidjjí álgon. Sijájt juohkka sajen oagodij, sjávvunij sijáv ja sijáv gieldij aj girkkuj boahtemis.

Garra-Jorta doarjoj állásit dárojduhttemav, jali jus állu riekta dánskaduhttemav. Vuosteldij sámegiela anov åhpodusán ja hålajn. Sán aj manáj sáme familjaj milta ja ribádij sijájs sámegielak girjijt, majt duola degu *Seminarium Lapponicum* lij ásadam.




Misionerra Morten Lund (1686-1755) nuorttasámegiellaj Lutheran katekismusasj mav sán járggålij ja mij jage 1728 almoduváj: Dat lij vissásap adnemin Guovddagæjnon dalloj gå Garra-Jorta dáppe bargaj báhppan.

Jens Andreas Friis (1821-1896), guhti lij Oslo universitiehta sáme ja suomagiela profæssor, tjálij girje Lajla birra. Girjen gávviduvvá Laagje ja Garra-Jorta ságastallam skåvllådåben. Laagje I boahtam viettjatjít Lajlav ja Melletav. Sán buolvvet uksaguorraj gulldalitjat mánáj láhkåmav. Åtsánis sán ráhttii vuoras sámegiel-dárogel katekismusav vaj bæssá oahppij láhkåmav tjuovvot. Ij lim nav moadda jage dallutjis gå gulldalij gå máná åhpaduvvin sámegiellaj. Mujttáj man tjábbát dat tjuojaj bælljáj gå sámegiellaj javllin. Valla dát, majt dália javllin, gal lij vasste suv bælljáj. Sán gáhtjat Garra-Jorta lusi (AaS hiebadam sámegiella):

- Gulá, gieres báhppa! Ælla gus dujna ienep sámegiel girje majt máhttep adnet, dagu dákkárv. Sán ráhttij åtsánis girje mij lij sassnevuossatja sinna.
  - Vattestu munji dav de gehtjav, javlaj báhppa. Gå Laagje gálggij sunji girje, de biedjalij dav bievde nali.
  - Mujna ælla ienep dákkár girje, sán javllalij.
  - E gus boade ienep?
  - E boade. Dássta duohku galga dán ja ietjat máná dárogelav oahppat.
  - Manen galggá dárogelav oahppat? Lip dudálattja gielajnimme.
  - Danen gå dárogiella I buorep, boandáp ja ávkkásap giella.
  - Duv giella I vuollelis giella gå boahtsuj birra ságastip, duod-darij ja duobddáigij birra, bieje tjuovga ja ijá sjievnnejeda birra ja divna ássjjí birra ma mijá bæjválasj iellema dárbojda gulluji. Le gus duv giella boandáp? Ij de, duv giella I viek hædjo midjjí.
  - Ij la dåssju nuuges bæjválasj dárbojt duhtadit, javllá báhppa.
  - I galga vajálduhttet jut ávdemusát galga ájádallat ietjat jáme-gahtes sielo dárbojt.
  - Na-a, javla duohtauodav, javllá Laagje vuollegattjat. – Galggap ávdemusát ájádallat mijá jámegahtes sieloma badjel.
  - Dalloj la buorep jus dárogelav åhpa ja lågå dárogelav.
  - Ij gus Jubmel-áhttje dájdada divna gielajt?
  - De dádjat, valla åhpa suv buorebut dábddåt ja máhtá buorebut sujna aktivuodav oadtjot dárogiela baktu.
- La gus sámegiella nav fuonos giella jut Mijá hærráma ij visjá gullat dav? gatját Laagje ja mujttá majt bissma Bang lij sárnum.
- Ij la, valla máhtá moadda dárogel girjijt oadtjot ma e gávnuu sámegiellaj. Oattjo tjuohte dan sadjáj gå dáv avtav.
  - Manen ehpit vatte midjjí ienep?

- Danen gå galgabihtit dárogielav oahppat nav vaj máhttebihtit oadjtot nav moadda gå ber sihtabihtit.
- Bátse dalloj varrásin, mudárt Laagje ja ánot girjes ruopptot.
- Dánna I dunji ietjá, stuoráp ja buorep girje dárogiellaj, javllá báhppa ja gálgi sunji dav.
- Iv dav lágeda, sidáv ietjam girjám.
- Válde dáv. Váldáv duv.
- Iv lágeda duv girjев. Vatte munji girjám.
- I dav oattjo.
- Iv gus oattjo dav! Báhppa, dán suddoda. Sidá mujsta válldet muv gieres åbmudagám. Sidá mujsta rievrot muv ájnna dálverav mij la muv gærrásamos mav guottáv átsåstam gánnå dal manáv, ja mav ienepr árvon anáv gá illemam. Iv duv goadev girjám dagi guode.
- Jubmela namán, de maná váldátjít dav ja maná ålgus, báhppa suhtojs tjuorvvi.



J. A. Friisa Lajla-girje  
ålgusj. 1952-prienntidus



Peder Vogelius Deinboll (1783-1874),  
gåvviduvvam jagen 1863.

### P. V. Deinboll

1800-lågo álgon girkkooajválattjajda tjelgaj dárogiellaj sárnnedit ja åhpadir ij lim sámij tjuovggi-dusdásev bajedam. Farra lij boasto guovluj mannam. Dán ájge sjatta jNuorttalij-Vuodna sierra bisspaguovllon ja virggáj nammaduváj bisspa guhti sámij tjuovggidusbargos berustahtjáj. Buorre barggoguojmnen åttjudij bisspa *P.V. Deinboll*, guhti nammaduváj Tjáhtjesuollu báhppan Lulle-Finnmárkkuj jagen 1816. Deinboll válljiduváj Stuorradikke ájrrasin 1821 ja 1824. Sihke báhppan ja politihkkárin sán garrisit ratjáj tjuovggidusbargov ávdedittjat, ájnnasit sámij gaskan. Sán lij dan ochkon jut tjuovggidus ja sárnnedibme galgaj sámij ietjasa giellaj dáhpáduvvat. Danen lij dárbbo sámegielak báhpajt ja åhpaddirjat åhpadir ja oahppogirijt ja ietjá girjálasjvuodav åttjudit sáme-giellaj.

Deinboll ævtodij sierra åhpaddirjekåvlåv vuododit Finnmárko gáktuj. Bisspa doarjoj oajvvadusáv. Navti Vuona Stuorradigge mierredij åhpaddirjekåvlåv álgadit, mij Trondenesan doajmmagådij Rámså ámtan jagen 1826. Dalága manjela ævtodij bisspa skåvlåv jáhtet Buolbmáti, danen gá sáme ettjin sidá áhtsát Trondenessaj. Dav vuosteldij Nils Vibe Stockfleth, gen birra manjela tjelggip. Skåvllå jádeduváj Rámså stádaj jagen 1848, gánnå dat la lähkám dat rájes.

Åhpaddirjekåvlå galgaj aj sajev vaddet sáme-gielak oahppijda ja dasi duodden åhpadir sáme-gielav látte oahppijda gudi sihtin sámegielak guovloj barggat. Skåvllå muhtem láhkáj járkij giella ja åhpadirpolithkav majt *Seminarium Scolasticum* (1714-1727) ja dan manjela *Seminarium Lapponicum* (1752-1773) lidjin dájmadam.

Dájt ásadusájt lidjin álgadadam báhpa gudi nannusit jáhkkin misjávnnåbarggo sámij gaskan galgaj sijá ietjasa giellaj dáhpáduvvat ja jut sáme galggin dákkár bargguj åhpadir.



Nils Joachim Christian  
Vibe Stockfleth (1787-  
1866).

## Nils Vibe Stockfleth

Deinbollav tjuovojoj N.V Stockfleth. Sân bâdij báhppan Tjáhtjesuolluj jagen 1825. Dâppe sán bargaj báhppan muhem jage ávddål gâ åtsåj Nuorttasijda báppavirgev. Jage 1832 rájes lij sán Oslo universitehta sámegiela åhpadiddjen ja dutken.

Degu Deinbolla nav aj Stockfletha bælostij sámij rievtesvuodav oattjotjít åhpadusáv sijá ietjasa giellaj. Jagen 1848 oattjoj oajválattjat mierredittjat ahte galggá sámegiela máhtov dættodit gâ virggáj biedji báhpajt sáme guovlojn. Sân aj doarjoj guojnagiela anov guojnagiela guovlojn Nuorttalij-Vuonan. Sân miejnnij oajválattja galgalulun guojnajt sæmmiláhkáj giehtadallat gâ sámijt. Moattes gudi suv doarjun misjåvnná- ja tjuovggidusbargo sámij hárrij, ettjin dâhkkida guojnajt galgaj sæmmiláhkáj giehtadallat. Guojna lidjin Vuodnaj jáhtåm iesjmiellusattjat, ja danen ettjin galga sierra rievtesvuodajt oadtjot. Sáme lidjin dâppe agev årrum ja danen galgaj sijáv buorebut giehtadallat.

Álgon doarjun Vuona oajválattja Stockfletha giellapolitikhav, valla 1800-lågo gasskamutto rájes vuosteldatjáj Vuona Stuorradigge sámegielav, ja ájnnasit suomagiela anov åhpadusán ja sárñijn.

Jage 1851 Stuorradigge juollodij rudájt foanndaj mij galgaj dáro-gieloahpo nannimav doarjjot. Dárjav oadtjun álgos skåvlå ma galgin sámemánájda åhpadir dárogielav guovlojn gânnå lij máhttelis dárogielav nannit. Guovlojt gâhtjudin dárojduhttemguovllon, ja dat lij nuorttalamos Vuona merragádde. Valla manenagi foannda, mij lij oadtjum namáv Finnefondet, juollodij rudájt dájmajda ma galggin dárogielohpov nannit suomagielagij gaskan.


Stockfletha giellavuojnno vuojtädallagådij, ja dárojduhttempolitihka vuohttugådij. Manenagi jahketjuode málssoma ájggáj vaddin oajválattja lágajt ja njuolgadusájt ma dættodin dássju dárogielav galgaj sárñijn ja åhpadusán adnet. Sámij ájnna lánestibme lij sjaddam ládden. Oajválattjaj dárojduhttempolitihkka garraj.

## Ællosujto vijddánibme dagáj gássjelisuodajt oajválattjajda

Jage 1751 rádjesjehtadusá ja sámekodisilla milta bessin ællosáme ríjkarájáv rasstit. Navti ællosujto nanniduváj ájnnasamos sáme æladussan ietjá sáme æladusáj gáktuj ma ettjin oattjo sæmmi láhkasuodjalimev.

Ællosujto garrisit ávddånatjáj 1800-lågo álgo rájes. 1830-lågon Vuona (Vuona-Svieriga) ja Suoma (Suoma-Ruossja) oajválattja gâtsedahtjin boatsojsijdaj jáhtemijt ríjkárádjáguovlojn. Suobma lij Ruossja vuolláj sjaddam jagen 1809. Vuona bielen badjánij «ruossja ballo». Manen Ruossja nav berustahtjáj rádjeguovlo ællosujtos. Lidjin gus danna tjiegos berustime, buokj vijdedi ríjkav gitte Finnmarko merragáddáj buorre háksahámnajt åttjudittjat. Finnmarko ámtmánne dåbdåstij dav 1840-lågon: *Sámij diehti gal ihkap e bieja nav állo fámojt dasi, valla danen gâ li tjiegos ájggomusá, majt gæhttjali vigedis ássjj duohkáj tjiehkat.* Ruossja sidáj aj Suoma bielen bisodit sámij rievtesvuoda duola dagu guollimij Várjjagavuonan. Dav lidjin Sámekodisilla milta dahkam.

Suoma bielen lidjin gujddim Vuona biele ællosámi jåhtålimijt gitte Ánarjávre duohkáj. Da ájttin Ánara sámij iellemvuogev ja biergimav.





Ællosuttofamilja giesselielden Fálán. *A Winter in Lapland*, London 1827.



Ællosáme giesseårudagán Måhkarávjun (Magerøya).  
«Norge i tegninger», 1848.



Guovddagæjno ællosábme Erik Eriksen Eira (1767-1844).  
*A Winter in Lapland*, London 1827.

Geologa Keilhau guossit Rávdná-Niljas Biehtára – Peder Nilsen Banne (bir. 1762-1843) jagen 1827, ja tjállá sán lij Lulle-Finnmárko boandámus ælloniehkke. Sujna lidjin gaskan 6 000 ja 10 000 boahttsu, javllin ulmutja. Giesijt lij suv årudahka Várnjárgan gánnå sujna lij boatsojgárdde áldoj báhtjemij. Dálven sán jádij rijkarájá rastá gitta Anárjávre duohkáj, gánnå suv dálveårudahka lij.

Báhppa Stockfleth guossidij suv dálveårudagáv 1828 guovvamáno, ja árvvalij suv ælon lidjin 8 000 hekka. Gå Stockfleth jávsådij suv lávdagoahtáj, de alvaduváj man unne dat lij. Jákij hæjos ulmutjij lávdagoahte lij dát. Valla da ållo bednaga ja tuvsánij milta boahttsu ma lidjin daggu lahkabirrusijn, subtsastin sán lij boandás ælloniehkke. Sán iesj buolvvedij lávdagoaden, gánnå aj lidjin suv guokta bárne ja guokta niejda. Iemet ja suv ietjá máná lidjin ietjá lávdagaden. Sán lij ållo boahtsujdis lárkkam moatte sierra ællon ja danen sujna lidjin moadda lávdagoade.



Ællosáme famillja dálveårudagán, prienntiduvvam Keilhau girjen jagen 1827.

## Rájáj stieggim 1852

Ríkia ettjin guorrasa, ájnnasit danen gå Ruossja-Suobma ittjjí dâhkida Sámekodisillav sjiehtadallama vuodon. Dutkam la vuosedam Vuona-Svieriga sjiehtadalle ettjin sidá guorrásit Ruossjajn «ruossja balo» diehti. Vuodna-Svierik ittjjí dâhkida Ruossja gájbbádusájt. Ruossja-Suobma de tjievastij ierit Sámekodisillav ja stieggij rájев ragátmáno 15. biejve jagen 1852. Vuona bielen ettjin desti Finnmarko ællosáme besa rasstit ríkárájá rastá nuorttalap Suobmaj.

Vuodna-Svierik dagáj dav sæmmi. Ruossja-Suoma boatsojsáme ettjin besa desti ríkárájáv Finnmarkkj rasstit. Dasi duodden Ohcejohka ja Ánar ettjin desti oattjo loabev guolli Finnmarko vuonajn.

Dæno tjáhtjádagán gal joarkeduváj aktisasj luossabivddo muhem ájge vil berustik ríkárájás. Valla gå dárojduhttem garraj, dát aj buorkoduváj (g. b. 211).

## Vájkudusá ællosujttuj

Rádjestieggimin lidjin sihke oanep ja guhkep ájggásasj vájkudusá ábbå Finnmarko ællosujttuj. Tjoahkkáj lidjin Finnmarko ællosámijen birrusij 50 000 boahtsu. Siján lidjin dálveárudagá Suoma bielen. Rádjestieggim dagáj massin ájnas dálveednamijt. Dat vájkudij duola degu Unjárga ja Buolbmáta boatsojsijdajda navti jut lágév jagen, 1850-1860 ájgegávdan, binnoj boatsojlåhko dáppe birrusij 15 700 boahtsus 9 300 boahtsuj.

Rádjestieggim ittjjí vájkuda dåssju Finnmarko ællosujttuj. Dat vájkudij aj Suoma biele ællosámijda. Siján lidjin birrusij 15 000 boahtsu majna lidjin giesseguhtomednama Finnmarko merragáttén. Massin divna dájt ednamijt. Muhem Ohcejágå ællosáme jáhtin nuppe bælláj Dæno ja árruin tjahtjegátteulmutjin. Muhtema jáhttájin boahtsujisá Eanodagá-Gárasavvuna guovlluj mij ittjjí dagá ávkev dái guovloj ællosujttuj.

## Befjendtgjørelse.

Den russiske Keiser har bejrent Straf for det tilhørende, at næste Lapp med sine Neenbjørte eller disse sidste uden bogter betrade det finlandse Lapmarks Grængange. — Denne Straf skal bestaae deri, at Neenstyrenes Eier ved den finlandse Øged eller Lenemann fratas en Tiendepræ af sine Neen og desuden saa mange Neen, som udfordres til at erstatte den Stat, disse maatte have gjort. — Neenstyrenes Eier vil da blive forlagt en Tid, inden hvilken han skal have fort sine Neen ud af Finland, og bliver han slægt samme Straf, derom han ikke til den Tid er kommen over Grænsen med Neene.

Hvor Rigegrænsen går efter en Elv eller andet naturligt Mæle, bliver denne Straf anvendt, saaart Neene ere komme over Grænsen. Hvor Rigegrænsen ikke har et saadt naturligt Mæle, bliver Straf ikke anvendt, med mindre Neene ere komme 3 Müll ind i Finland.

Dette skulde jeg herved bringe til samtlige Hjelphandels Rundstak.

Lapmarks Amt 22de Juni 1853.

Harris.

Died'etæbme.

Ruoshjaednam keisar le gielldam daroednam sabmeladsljaid boenuidasek laddeadnam guottom sajidi doalvomest, mak suoluji gollujek; jos si oftanaga boenuidasekgoim daihe sin boenk vridalassi bottek laddeednam guottomsajidi, de si shjaddek laga rangashtusa vuollai. Dat rangashtus, maid keisar le asatam daihe bigjam suoluji, gotte su gotzhjoma bagjelduolbma, le, atte laddeednam valldy daihe lensmanne erit valldy boecui eigadest logadas oase su boecuin ja dasa vela dam made boecnid, go gaibeduvujek mayset dam vahaga, maid si tek dakkam. Ja de visses aigge mærreduvu boecui eigadi, mast son galgga doalvot boenuides laddeednamest erit, ja son shjadda semma rangashtusa vuollai, jos son oftanaga boenuidesguim i tek boattam rajid bagjel dam mærreduvum aiggal. Gost rika ragje mamma joga mield daihe ærra fundulash marka mield, adnujuvu dat rangashtus dakkavid, go boenk tek boattam raje bagjel. Jos dæggar fundulash markka i tek ragjen, de dat rangashtus i adnujuvu, andal go boenk tek boattam hænagullam hæle laddeednam sis.


Dam kæsar gotzhjoma lem mon adnam gednegasvuottanam died'etet buok sabmeladsljaidi.

Samednam Amt 22. Juni 1853.

Harris.

Rádjestieggim almoduváj sihke dáro- ja sámegiella.

Rádjestieggim vájkkudij aj navti jut tsieggiduváj vuostasj boatsoj-gárdde, mij manáj Várjagavuona Vuonnabadás Skiippagurra baktu Dædnuj. Gárdde galgaj hieredit boahtsuit mannamis Suoma bælláj. Dåppe lidjin mierredam 10 prosenta ríjkarájá rass-tim boahtsujs galggin stáhta hállduj váldeduvvat buohhton.



Ællosámi jåhtema jage 1852 rádjestieggima manjela



Jage 1852 rádjastieggima manjela tsieggiduváj vuostasj boatsojgárdde mij Várjavuonna Vuonnabadás manáj Dædnuj, mij dánna l gávviduvvam 1900-lågo álgon.

Muhtem Guovddagæjno ællosáme vállijin Svierigij jáhtet. Ájgegávdan 1853-1873 vargga 300 ællofamilja jáhtin Gárasavvuna guovlluj. Siján lidjin badjel 20 000 boahtsu. Duodalasj láhko littjisj dávk vil stuoráp. Svenska stáhtaviesádin sij máhttin joarkket adnet giesseljieldijsá nuortta Råmså merragáttien ja suollujn.

Jáhtem vájkkudij nuorttalamos Svieriga ællosuittuj, danen gá Guovddagæjno ællosámijin lidjin stuorep ælo gá Gárasavvuna ja Čohkkiras sámijn. Guovddagæjno ællosáme nappu buktin sierra ællosuittovuogev manenisá. Giesselarudagájn dibddin boahtsuit liehket ienep friddja. Suládahttin boahtsuit.


Gárasavvuna boatsojsijdajn ællim nav ållo boahtsu. Giesseljielden barggin 2-3 familja aktan. Juohkka famillja ræjnnuhij ietjas boahtsujt, ja ræjnnuhiddje lidjin boahtsuj lahka. Lij aj dáhpén boarkkit luovvasijt (rånojt ja tjermaqijt) ælos, ja ræjnnuhit dåssju áldoijt. Dát lij ájnas danen gá guottedime manjela båhtjin áldoijt ja adnin ávkev boahttsumielkes.

1860-lågo milta rievddagádij dát ællosuittovuohke. Dállea famillja vuorját lárkin sierra. Áldoj båhtjem ij lim desti nav dábálasj. Jahketjuode láhpagæhtjáj lij áldoj båhtjem vargga náhkåm. Dát dagáj famillja máhttin giesselájge árrot nágin gaskav ietjá sajen gá boahtsu, ma lidjin friddja.

Guovddagæjnos ettjin jáde dåssju Svierigij, valla Vuona merragáddáj aj, ja muhtem familja jáhtin suollujda, buojk Skierváj (Skjervøy). Dalloj bessi buorebut sæbrrat guollimij, sierraláhkáj sájdev guollijin. Dájna jáhtemijن ihkap doajvvun gæhppadappot bessat sájddenjuorajda, maj badjel Skiervá guollára lidjin sijájn rijddalam. Merraguolle lij dan áige huj ájnas oasesgálvvon Ruossja pomávråoasástallama aktijuodan. Ruossja oasesálmmå jali pomávrå giesen lánudin guolev jáfojda ja ietjá gálvojda, dalloj gå Nuortta-Vuona oasesálmmå ettjin oaste guolev. Pomávråoasástallam vibáj gitta 1917 rádjáj; dalloj Ruossja stieggij ríkrajáv.

Rádjástieggim ihkap vájkudij vil ienep Kárásjjágå boatsojsijdajda gó Guovddagæjno. Moattes jáhtin merragáddáj. 1860-lågo milta ållo Kárásjjágå boatsojsáme jáhtin Čudegæddáj ja Nuorttasijddaj (Nordkapp). Valla ettjin jáde merragáddáj ávddål gó boatsojlåhko lij nav binnum váj ettjin desti bierggi ællosábmen. Dav tjielggi ámtmánne jahkediedádusájnис.

Ællosámi jahtema merragáddáj. Njárgaj, vuonaj ja suolluj namá.



Muhtem sijdajn lij ájn dáhpe áldojt båhtjet. Kárásjjágå nissun båhtjemin áldov giesseårudagán, gávviduvvam 1900-lågo álgon.

Rádjástieggima manjela tjuodtjelin gássjelisuoda aj boatsojsijdaj gasskaj Guovddagæjnos lulás. Kárásjjágå boatsojsida gujddigáhtin Guovddagæjno sijda nárrágáhtin sijáv giesseduobddágijda Mähkarávjuj ja Vuorjenjárgaj, ja dasi duodden aj sijá dálvetieldijda. Kárásjjágås muhtem ællosuttofamilja vas jáhtin Buolbmáta ællosijda Dæno allebælláj, ma lidjin báhtsám «ávddasin» manjela gó Ohcejágå boatsojsida massin dájt ednamijt jagen 1852.




Buolbmáta ællosábme jali ælloniehkke Láve-Piera Niljas – Nils P. Måsø (1890-1966), gahperahtá, gávviduvvam familjajnis ja fuolkij ávdaála doaro. Suv áhttje, Láve-Piera – Pera J. Måsø (1865-1938) jádij familjajnis Kárásjjágås Buolbmátij 1900-lågo álgon.

Jage 1852 rádjástieggim ittji dåssju boatsojsijdajt háddji, valla aj familjajt ja fuolkijt. Ávddål 1852 lij buokkulvissaj muhtem ællosámijn aktisasj dálvvetjiellde Guovdagæjno/Gárasavvona guovlon vájku lidjin gálmå sierra stáhtaj viesáda. Dæno guovlon vas lij Bieski-vieljatjijen aktisasj sijdda vájku ællim sämmi rijka viesáda. Ríkkarajájt rasstijin.

Vaj aktisasj siiddastallam luluj nåhkåt ållu, de Vuona oajválattja mierredin jage 1854 ællosujtolágav, mij galgaj garrisit stráffut Vuona biele ællosámijt gudi Suoma bielen válldin sámij boahtsuj Vuona biele guohtomijda. Valla dát dákpe gal ittji nágå dakka-vide. Lágev jage manjela ájn muhtem Suoma biele ællosáme luojttin boahtsujdisá fuolkijisá fáron giesseljælldáj Finnmarko merragáddáj.

Jage 1854 láhka galgaj aj ietjá gássjelisvuodajt tjoavddet ma lidjin Finnmarko ællosujton tjuodtjelam. Láhka gieldij adnemis sisednamijt giesen. Da galggin dállea aneduvvat dálvveguohtomguovllon. Ednama de juogeduvvin giesseårudahkan ja dálvveårudahkan. Guovddagæjno ja Kárásjjágå ællosujto gáktuj mierreduvvun aj tjaktja- ja gidáguohtomguovlo. Mærrádusáj diehti tjåhkanin giesijt viek állo boahtsu merragáddáj. Danen oajvá-lattja vuojnnin dárbulattjan mierredit tjielgga rájájt tjielij gaskan ja gási guhtik boatsojsijdda máhtij jáhtet.



Boatsojsujtoláhka mij mierreduváj jagen 1854, gieldij adnemis sisednamijt giesen. Ednama dállea juogeduvvin giesseårudahkan ja dálvveårudahkan.

Jage 1888 boatsojsujtoláhka, mij nappu guoskaj dåssju Finn-márkkuj, vattij dáv máhttelisvuodav. Láhka aj vælggogissan dagáj mærkkot divna boahtsuit ja vattij lárkkimnuolgadusájt aj jus ælo masstin.

Jage 1854 ja jage 1888 boatsojsujtolága huksin ællosujo berustimijt. Da muhtem mudduj gáhttijin guohtomednamijt ja jáhttin árdnigav æladussaj. Vásij guhkev ávddål gå Finnmarko ællosáme gierddagåhtin mærrádusáj ja lágaj diehti ma guoskin ællosujo ja ednambargo vidjurijda, dagu boatsojsáme Rámså guovlon oarjás gierddagåhtin 1880-lágo rájes. Da mierreduvin værámus dárojduhttemájgen.



Kárásjjágå ælloniehke giesseárudagán, gávvidum jagen 1867.

## Ællosámij árbbedábálasj gábmá

Vuostatjin gå sisi manná, la uksa. Da ma li birra, li loavddaga. Ådnårísá li oajvvemuora, ja avllemuorra mij daj tjadá manná. Doaresmuorra vas gassko, ja de li dæhkága: ájn boassjodæhkága ja gasskadæhkága. Rájgge baddjen la riehpenräjgge. Riehpenea birra I nálesj, hårsås goaroduvvam. Gassko I árran, guovte bielen árrana la luojutto, ja de vil la uksagiehtje ja boassjo.



## Sáme jáhti Alaskaj

1800-lågo lâhpan jáhtin muhtem sáme, ájnnasit Kárásjjágås ja Guovddagæjnos, Alaskaj dievnnutjit Amerikja stáhtav. Sij galggin ællosujtov åhpadir Alaska iemeálmugij. (Lågå ienep Alaska sámij birra girjen: Sáme dievnastusán Alaskan. ČállidLágádus 2009)

Kárásjjágåk Samuel J. Balto (1861 1921) jádij Alaskaj jagen 1898 bargatjít boatsojsvájnna. Balto, guhti 1888-89 lij rass-tim Ruonáednamav Fridjof Nansenek ekspedisjávnå sebrulattjan, rámmpu Alaska iellemav. Sân vissjalit sáddij tjállusijt Nuorttanaste-avijssaj.

Sujna lij guhka tjálos Nuorttanasten nr 22 ja 23 jagen 1912. Dalloj lidjin suláj 30 000 boahitsu Alaskan. Dåppe vargga ettjin gávnnu stálpe, e suollaga gudi vaháguhti. Dálve lij suláj sæmmi-lágásj gå Sámen. Dåppe lidjin ållo gátte ja buorre guohtoma. Bårramusáv åttjudin årudagá ålggolin, gå dasták miehtsijn lij nuuges luohtok ja jágájn ållo luossa.

Dánnna oasse Samuel J Balto tjállusis Nuorttanasten jagen 1912: Mr. Ole Andersen!

Dálla anáv astov tjálátjtij dijá bládáj. Dálla lav dåppe Alaskan árromin muv 14. jahkáj namálattjat dat rájes gå Kárásjjágås vuolggiv. Vuolggiv aj dan juohkusa fáron gudi Amerikkaj viettjaduvvin, stáhta mávsojn ællosábmen ja poasstavuoddjen. Sij galggin inuihtait åhpadir boahtsujt giehtadalájtij jná Lij dan jage 1898 gå Alaskaj bådijma, gánnå galgajma doajmmasimme...

Vuojnáv avtav familjav guhti diehki bådij sæmmi ájge gå mij aj ja guhti Alaskaj ganugij. Suv namma I Per Andersen (Lindi) ja áhkásj Sofie. Sunnun la ståhpe merragádden. Gidán gå luossa boahtegohtá vuodnaj, de biedjaba viermijt tjáhtjáj bivddema diehti, ja ij la guhkep viermijt lusi gå hágalbirssujn vuohjtá. Danna suvddá dat ålmåj luosav gáddáj degu sájdev. Áhkká tjåhkkåj gætjo bieje ja sláhkki luosajt ja såj dajt gákkaabibá benabiebbmon. Gå náv libá avta móanov barggam, de libá 6-700 dållåra tijnnim ja de la gal jahkáj biebbmon ja biejaduvvá vil ruhta aj báñjkaj.

Silldá aj la dåppe ja rievsagijs viek valljen; goade badjel háledi stuora doahkken 100 500 Oanegis båttán vuohjtá vájk man ednagav.

Dat vuoras nissun álu subtsastij dav dilev ja æládusgæjnov, mij dåppe lij, gánnå sán bajás sjattaj, namálattjat Gárássjágånn. Akta ståhpe, gánnå lidjin gálmmá gusá, bargaj ijá biejvev aktan familjajnis ittjij vil åvvánis muossádam vuojav ge åvvå jagen, navti dávk lij. Dat lij dåssju barggat. Dåppe ij lim ber guolijt oadtjot. Valla gal dåppe gávnu valjes, vájk man stuora familljaj...

Vielljalattjat

S. J. Balto

Elgon Wash. Amerika

Per Andersen (Lindi), riegádam 1853, jámij Alaskaj. Ællobargge, gállerågge. Válldum 1887 nuppát bále árbátjijn: Sophia Nils-datter Šuoššjávrre, riegádam 1843. Såj jádijga Alaskaj, gási libá goappátja jábmám.



Samuel Balto hiergjin, gávviduvvam Nomen birrusij 1903. Gåvvå: O D: Goetze.

## Hárjjidusá

1. Tjielggi Svieriga sámemisjåvnnåpolitihkka oajvveulmijt 1700-lågon!
2. Svierik mierredij jagen 1723 skåvllånjuolgadusáv. Gåktu galgaj dat liehket ávkken sámijda?
3. Gåsi tsieggij Svierik nuortalamos sáme skåvlåv?
4. Gåktu dåmaj skåvllå?
5. Guhti lij skåvlå vuostasj åhpadiddje.
6. Manen báhppa Wegelius gáhtjudij sámegielav «bednagagiellan»?
7. Gåktu organisierij Thonan von Westen sámemisjåvnåv Vuona bielen?
8. Biret-Ánde – Anders Porsanger (1735-1780) lij vuostasj nuortak guhti alep åhpadusáv váldij. Gåktu sjattaj sán gierddat Danmárko-Vuona misjåvnnåpolitihkka rievddama vuojnjana?
9. Islánda Olav Josephsen Hjort (1740-1789) lij muhtem ájge báhppan Guovddagæjnon. Manen dåppe suv gáhttjogåhtin Garra-Jorta?
10. Tjielggi oanegattjat guhti P V. Deinboll lij?
11. Nils Vibe Stockfleth (1787-1866) bådij báhppan Finnmarkkuj jagen 1825 ja baelostahtjáj sámij rievtesvuodav oattjotjít åhpadusáv sijá ietjasa giellaj. Manen?
12. Álgon oajválattja doarjun Stockfletha giellapolitihkav, valla 1800-lågo gasskamutto rájes Vuona oajválattja vuosteldahtjájin sámegiela anov åhpadusán ja hálajn. Manen?

13. Ællosujto garrisit åvddåni 1800-lågo álgo rájes. Tjielggi manen navti dáhpáduváj!

14. Tjielggi nuorttasáme boatsojsijdaj jáhtulagájt åvddåla 1852 rádjástieggima!

15. Gåktu vájkudij jage 1852 rádjástieggim boatsojsijdajda?

## Duodde hárjjidusá

### Máhttet ællosujto buojkuldagájt

*Ællosujton li állo sierralágásjuoda majt hæhtt diehtet. Gå ræjnnuhiddje boahtá lávdagoahátáj, ja gå nubbáj tjielggi guohtoma birra, gåktu boahitsu bierggiji ja gåktu fierdda lij, de dasi gájbbeduvvá máhtto amás ulmutjis dav dädjadittjat.*

*Boahtsuj guohtom la ávkkás nuorttaguovloj luonduj nav guhkev gå guohtomednam ij guorba. Gidágiese muohntagav suddadattij boatsoj manná rahttá manen ja bievlaj milta. Gidáguohtoma buoremus sjatto li vuovdde- ja gieddesino, stárro, sávtsasino ja iesjguhtiklágásj suojnnesjatto ma árrat ruonudi. Iesjguhtiklágásj jieggesuojne li dárbulasj guohtomsjatto. Sierga ja soahkelasta ja ietjá lasstamuora li mávsu- lasj guohtom. Buorre gidáguohtomin buojddu boatsoj gå bæssá ráfen guohtot. Miese aj sjaddi gå áldojn la buorre guohtom ja li mielkká.*

*Tjavitjabælláj boatsoj guorri guobbarijt, ja aj njuohtso ruohtsajt. Tjavitjan bårrå rissijt, dagjasijt ja sarrelastajt. Dalloj guohtogoahztá vistev aj.*

Tjálos la viettjaduvvam muhtem kultuvrramáhto girjes. Dat subtsas ællosujto giella I viek boandás. Lågå duola degu Nils Isak Eira girjev: «Bohccuid luhtte», Dat 1994. Tjále essayav (2-3 biele) sijdastallama birra.

# SÁME LIDJIN SUOHPÁDISRÁSE VUONA EDNAMIN – GALGGIN ÅLLÅSIT ASSIMILIERIDUVVAT

## Vuona gânågis nuortta Sáme – «Finnmárko åmastiddjen»

Napoleon-doaroj manjnela Vuona stáhta dille ållåsit rievda. Jage 1814 Vuodna luovvanij Danmárka fábmodusás ja mierredij ietjas vuodolágav. Valla Danmárka gânågisá sadjáj sjattaj Svieriga gânågis aj Vuona gânågissan ja mierredahttjáj Vuona álggorijka-politikhkav. Dáj rievddamij diehti Vuona oajválattja hæhttujin vas háldadusáv tsieggigoahtet ja nannit aj nuorttalap Sámen. Dá lidjin muhtem ájggáj buorren sámijda navti jut oajválattja dâhkkin báhpaj rahtjamusájt ávdedit ja adnet sámegielav áhpodusán ja tjuovggidusbargon. Valla nuorttalamos Sáme jali Finnmárko ednamij rievtesvuoda hárráj gal Vuona ráddidus sárnoj jage 1848 tjuovvovattjat:

*Riekta Sábme (Finnmárkko) la dålusj rájes gullum gânågissaj jali stáhttaj, danen gâ álggoálgon dáppe li årrum jáhtte álmmuk, sáme gudi ællim stuoves årro. Manenagi diehki árrun ádåviesaj-diddje, gudi e riekkniduvá ednamåmastiddjen.*



Fredrik Stang (1808-1884), namma-duváj stáhttáráden jagen 1845  
Sân ja ietjá stáhttáráde mierredin jage 1848 jut nuorttalamos Sábme, Finnmárkko lij dålutja rájes gullum stáhttaj.

## Nasjonalissma bájnnegohtá Vuona sebrudagáv

Nasjonalissma tjuodtjelij Fránska revolusjåvnå ájge 1700-lågo lâhpan, ja 1800-lågon vijddánij Euråvpåv miehtáj. Aj Vuonav bájnij nasjonalissma 1800-lågo nalluj. Lij vielggis europalasj guhti lij ideálla, ájnnasit nuorttarijkalasj ulmusj guhti lij tjuovggis ja gænna lij guhka oajvveskálltjo. Vuona historihkkára ja girjjetjálle sihtin ávdedit Vuona ránna dábijt ja vuogijt ja oadtjot ulmutjijt vuoseditjat duohta ájtteklândav, na Vuona gieresvuodav. Sij guddnedin Vuona histåvråv ja sihtin dav dahkat dâbddusin dålutja rájes. Ednambarggo aneduváj kultuvra guovdátjin. Båndor-æládus lij Vuona gierggejuolgge.

Historihkkár Rudolf Keyser (1803-1864) almodij jage 1839 girjev manna sán tjielggij vuonagijt mâttojt ja berajaktijuodaj birra. Vuonaga lidjin Vuona vuorrasamos álmmuk jali «iemeálmmuk», ja dárogiella lij vuorrasamos ja rájnnasamos giella Vuonan. Dav sæmmi doarjoj nubbe historihkkár P A. Munch (1810-1862). Sunnu histåvrålasj dutkama vissjalit aneduvvin Vuona stáhta tsieggimij.

Sunnu vuojno milta lidjin same amás álmmuk. Sij lidjin jáhtte ulmutja gejn ij lim «doarroma gievrrodus» ja viessun «primitivja» iellemav. Dán álmmugin ij lim mige buktet Vuona stáhtta tsieggimij. Sæmmilágátja lidjin guojna, gudi sæmmi berrahij gullujin gâ sáme. Guojna lidjin «biellevilda tjuheteulmutja», ja sijá kultuvran ij lim ávddånam fábmo.

Danen sjattaj ájnnasin sihke sámijt ja guojnajt dárojduhttet. Gâ dárojduvvi, de oadtju iellemgievrrodusáv ja bierggiji Vuonan. Sámij hárráj sárnoj Johan Sverdrup (parlementarisma áhttje): *Sámij ájnna lánestibme l sjaddat ládden.*

Dát politikhka sjattaj sebrudakvojnon duola degu Vuonan ja oattjoj namá sosiáladarwinissma.



Dájddára sárggun tjáppa luondo gåvåjt ma galggin vuonagij identitiehtav nannit. J.F.L. Dreier, 1826.

Båndor-æladus lij Vuona  
kultuvra gierggejuolgge. Lito-  
grafijja vuoset båndorståbåtjav  
Jæren-guovlon Oarjjelij Vuonan.  
J.M. Calmeyer bir. 1830.



Lij ájnas tjalmostahttet tjáppa bunad-biktasijt. Båndorpárra Valdres-guovlon. Sárgum J.F Eckersberg.

Dákkárijn gå merrasáme næjtson ittjj galga liehket sáme boahtte-  
ájgge Vuonan. Miejnnijin dárojduhttet. «Fisherlapp», Čorgaš,  
Hopseidet. Sárggum: Campbell giesen 1852.



Ij ga dán Kárásjjágå ællosujttobáhtjan lim vissa boahtteájgge Vuonan. Sárggum: Campbell giesen 1852.

## Sosiáladarwinissma


Ienjils luonndodutke Charles Darwin (1809-1882) almodij girje «Nálij álggoboahem» jagen 1859. Moattes alvaduvvin suv árvvalusáj diehti. Darwin miejnnij sán máhtij duodastit jut ulmusj lij láhpalasj ladás guhka ávddânbmerájdon. Juhtusa ja ulmutja lidjin ájgij tjadá ávddánam «luondulasj tjuolldema baktu». Dat gáhtjoduvvá evolusjávnnán. Darwin iesj lij sosiáladarwinissta. Sán miejnnij «villda ulmutja» vierttijin manjenagi gáhtot gå europalasj sivilisasjávnnáj tjadnasin. Dasi duodden miejnnij árbálasjvuoda dutkam máhtij almodit ulmutjijt gejn lidjin stuora rubbmelasj ja psykalasj vánesvuoda, ja nav gæhttjalit sijáv hieredit oadtjomis mánájt.

Muhtem sebrudakdutke hiebadin de Darwina oajvvadusájt ulmutjij sebrudahkaj. Gievramus tjerda bierggiji ja sjæbttjá hevani. Bajemus dásen lidjin vielggis ulmutja gudi nav gáhtjodum sivilisasjávnåv ávdåstin. Dát ávddânimvuojnno sjattaj sebrudakuojnon Euråvpán 1870-lågo rájes ja mij la gáhtjoduvvam nammadusájn sosiáladarwinissta. Dát sebrudakuojnno jali ideologija mak vattij sivilisierduvvam tjerda jda morálalasj rievtesvuodav ja vælloggisvuodav bajedittjat «primitijva tjerdalasj ulmutjijt».


Sosiáladarwinissta vájkkudij aj nuorttarijkaj láhkamærrádusájda, dutkamij ja ábbánagi praktihkalasj politihkkaj 1880-lågo rájes. Dat vattij oajválattajda tsoaptsev miejnnit jut sáme gullujin bæjssko tjærddaj ja kultuvrraj man «åvddâname laga» duobbmijin hevvanitjat. Sijá ájnna lánestus lij sjaddat ládden.

Sosiáladarwinisma guhka giehta lij imperialissma, rasissma, fascissma ja nasissma maj birra I tjáleduvvam oahppogirjen «Ulmutja ájgij tjadá 2», TjállijAlmmudahka 2011.

Charles Darwin (1809-1882),  
brihtalasj luonndodutke.



Darwin dutkamin juhtusijt Galapagos guovlon.




## Suoma ballo dárojduhttemav åvdedij

Dutkij gaskan li læhkám moadda vuojno dan hárráj manen Vuona oajválattja jádedin garra dárojduhttempolikhav sámij ja guojnaj jali láddelattjaj vuosstij. Moattes li dáv guoradam skåvlå ja áhpoduspolithka tjuovgan. Histávrådutke Knut Einar Eriksen ja Einar Niemi almodijiga jagen 1981 vuodulasj, histávrålasj dutkamav dárojduhttempolikhka birra. Dutkamin Suoma ájto (*Den finske fare*) såj buojkodibá sihkarvuohapoliitihkalasj sivájt dárojduhttema vuodon. Ulmmen lij dárojduhttet nuortta rádjeguovloj láddelattjajt jali guojnajt, danen gå lidjin sjaddam sihkarvuohapoliitihkalasj ájton Vuona oajválattjajda. Manen dav miejnnijga? Ájnnasit 1860-lågon láddelattja ihtin rádjaguovlojda Lulle-Finnmárkkuj ja nuortta-Råmssåj. Sij båhtin gitta Gasska-Suoma rájes. Suoman lij dalloj hiehtedille ednambargojn. Moattes lidjin hæjo. Lidjin sjatidis jage, ja danen moattes vuolggin nákko diehti nuortas Nuorttamera merragáddáj – Ruijaj – gånnå gullam lidjin guolijs ja biebmojs la galle.

Dát lij akta dajs stuorasuoma kártajš ma Vuonav balldalín. Dát kártta almoduváj suomegiel ájggetjállaga åvddåbielen «Aito-Suomalainen» («Rievtes suobmelasj»).





Láddelasj Aleksanteri Korhonen guhti Suomas jádij Várjjagavuona gáddáj Njávddamij (Neiden). Gåvviduvvam 1920-lågon.



Buolbmáta sámenissun Juhánaš-Marit - Marit Johansdatter (r. 1828), suojniit tsábbmemin. Gåvviduvvam 1900-lågo álgon.

Láddelattja lidjin nappu boahtám Suomas, mij jage 1809 rájes lij hæhttum Ruossja tsára stivrrima vuolláj. Ja Vuona oajválattja gæhttjin aj Ruossjav stuorámus ájtton. Nav guhkev gå Suobma lij Ruossja stuorrahertugviellden, de gæhttjin láddelattjajt jali guojnajt Ruossja guhka giehtan ja váksjárin jali spiåvnnán. Navti Suoma ballo badjánij Vuonan valla dav sihtin oajválattja tjiehku- sin adnet. Danen hæhttujin ietjá sivájt gávnnat ja almodit dáro- duhttemij, mij 1870 rájes garragådij ja nanniduváj suláj 1880 rájes. Ij dåssju dat. Sámijda aj vájkkudij dárojduhttem.

Oajválattjajda sjattaj gássjel sámijt ja guojnajt ieredit, ájnnasit rádjeguovlojn, gánnå årrun lahkalakkj, ja sijá årrom ja iellem vargga lij sæmmilágásj. Danen oajválattja tjadáin vargga sæm- mi dárojduhttempolikhkav goappátjij juohkusij vuosstij, vájku sámijin lidjin moadda bælostiddje, ájnnasit báhpaj gaskan. Bælostiddje, dagu Stockfleth, tjuottjodin sáme lidjin guovlojnisá årrum dálusj rájes ja danen lidjin siján iemeálmukrievtesvuoda. Guojna lidjin ádåboahtte.

Oajválattja vuosteldahtjin Stockfletha vuojnov danen gå Stockfleth sidáj sæmmiláhkáj giehtadallat guojnajt gå sámijt. Oajválattjajdárojduhttemvojnno lij tjielgas, valla dat galgaj ietjá namma- dusájn almoduvvat ja álliduvvat: namálattjat iednegiela, jali dáro- giela áhpadusá politihkkan. Jus dárojduhttem galgaj álliduvvat, de dat galgaj guhkev dáhpáduvvat, luondulasj «åvddånibmen», ij tjavgga, garra politihka baktu.

1880-jagij rájes dáro ádåviesajdiddje ednambargge sámeguovlojn oadtjun buorre doarjjagijt ma aj galggin sáme ællosujtov ja árbbedábálasj miehtsebargov gártjedit. Stuorasebrudahka berustahttjáj aj dália ienebut Sáme miehtsijs ja duoddarijs. Dáppé gávnnin málma, ja dan diehti vas dahkagáhtin ruovd- rahtijt gruvvojda.


Ofuohta ruovdderahjtj biggijin 1900-lågo álgon. Muhtem dáro histåvrrådutke tjálij dan birra duola degu:

«Munji árru tjielggamin jut ruovdderahjtj tsieggim sjaddá váralat-tjan sámij boahtteájggáj dájn guovlojn. Iejvvijiv muhtemijt dát tjerdas dán guovlon ja sij degu dádjadin sijá ájgge i nähkåmin, ja jut Ofuoahrtá várjin ij lim desti árådahtte ij sidjj iij sijá boahtsujda. Sivilisasjávnna ij la vájmulasj. Suovajnis ja strávvijnis sán njæjjddá sjierves tjerdaj ednamij berustik sijás. Ep agev dádjada gáktu dat dáhpáduvvá ja manen navti galggá liehket. Valla navti gájt la...»



Álgon dárojduhttempolihkka ávdemusát giellapolihkka. Valla manenagi tjanáduvvín dasi ietjá sebrudaksuorge, dagu ednambarggokolonisierim, gæjnnobargo, skåvllåinternáhtaj tsieggim, medijádájma, doarrodievastus jnv. Ja jahketjuohemálssoma rájes dárojduhmma dákma aktiduvvin.

Dáruiduhttinpolitihka diehti vuostasj bále misjåvnná ja njunnusjoajvállatja ettjin guorra-sáme vidjurijn. Stáhtafámo vuojnno sjattaj dássta duohku najággin. Dat merkahij duola degu jut stáhta juollodime misjåvnnáj ja sáme-giela tjállusij åttjudibmáj láhpaduvvin. Stáhtta ittjij juolloda rudájt rámádav sámegiellaj prienntidittjat. Dav lij sámegiellaj járggálam Jákhusj-Lásse – Lars Jacobsen Hætta tjivvahijn Akershusa lanen 1854-1867. Misjåvnná dállea hæhttuj luohitedit iesjmiellusasj därjajda. Danen vuododuváj Norsk Finde-Mission jali sámegiel-laj Sáme misjåvnná jagen 1888. Dav vuododij Johannes Skaar (1828-1904), guhti lij namma-duvvam Nuortta-Vuona bisspan jagen 1885. Skaar ittjij doarjo oajvállattjaj dárojduhmmopolihkav, ja danen sáme gáhtjudin såv sámebisspan.



Johannes Skaar (1828-1904), «sámebisspa». Gåvvá vuoset girje ålgutjav mij la tjáleduvvam suv birra.

Nuortta-Råmså báhppa Eriksen ittjij sámijt manenik ane. Jage 1903 válljiduvái Barggi-belludagá ávdås Vuona Stuorradiggáj. Dalloj muhtem avijssa gatjádij suv ulmutij aktivuoda birra Nuortta-Vuonan:

*Muhtem bákjij gal la ulmutijin unnán máhto, valla guollárijen dáppe nuorttan la buorre jiermme, ájnnasit siján gudi li látte. Dáppe li gal edna sáme. Sij li gássjelis ulmutja, sij ii lájke ja ælla jærmá.*



## Skåvlå lidjin ájnnasa dárojduhttemin

1800-lågo gasskamutto rájes Nuortta-Sáme merragádde lij mierreduvvam dárojduhttemguovllon. Dáppé nanniduváj dárogiela áhpadus. Jage 1880 oajválattja mierredin skåvllánjuolgasáv mij gieldij adnemis sáme- ja suomagielav áhpadusán. Dát njuolgadus sjattaj moadda jage ávddáljiguovlluj dárojduhttema vuodogirjen, tjállá dutke Helge Dahl girjenis «Språkpolitikk og skolestell i Finnmark 1814 til 1905», Oslo 1957.

Jage 1898 skåvllánjuolgasus nannij 1880 njuolgadusáv ja lij fámon gitta 1959 rádjáj. Danna mierreduváj sáme- ja suomagielav besaj dåssju viehkken adnet risstalasjuoda áhpadusán jus ietján ittij guládalá oahppij. Dálla lij åvvå Nuortta-Sábme sjaddam dárojduhttemguovllon.

Jage 1898 skåvllánjuolgasus mij gieldij adnemis sámegielav sáme skåvlájn

### Instruks

aangående brugen af lappisk og kvænsk som hjelpesprog ved undervisning i folkeskolen, hvor dette af kirkedepartementet er tilladt i henhold til landskolelovens § 73, 2 led.

§1.

Lærerne i de distrikter, hvor lappisk og kvænsk er tilladt brugt som hjelpesprog ved undervisningen i folkeskolen, skal de med yderste flid stræbe efter at udbrede kjendskab til de norske sprog og såge at fremme dets brug i de kredse, hvori de virker.

§2.

Samtlige lappiske og kvænske børn skal oplæres i at læse, tale og skriflig anvende det norske sprog.  
Undervisningen i norsk sker saavidt muligt paa grundlag af de i distriktet raadende norske taalesprog; ved siden af at opøves i dette, oplæres børnene efterhaanden tillige at forstå og skriftlig udtrykke seg i det almindelige bogssprog.

§3.

Skolens undervisning foregaar i det norske sprog. Det lappiske eller kvænske sprog bruges kun som hjelpemiddel til at forklare hvad der er uforståelig for børnen.  
Ved benyttelse af lærebøger med dobbelt sprogttekst har læreren nøje at overholde denne regel; han bør derfor stadig holde børnen til at bruge den norske tekst og først da naar denne er uforståelig for dem, ty til den lappiske eller kvænske.  
Læreren maa under sin gjerning stedse have for øje, at ved skolens arbeide for udbredelse af kjendskab til det norske sprog såges opnaet, at dette ialfald i den sidste del af børnenes skoletid udelukkende kan blive brugt ved undervisning.

Kirke- og undervisningdepartementet, Kristiania den 18de april 1898

### Wexelsen

Oajválattja gártjedahtjin sáme- ja suomagiela áhpadusáv áhpadidjeskávlán, mij lij Trondenesas jádedevvam Rámså stádaj jagen 1848. 1850-lågo álgo rájes lij vuojn ruhtaviehkijn bessam láhkåt sáme- ja suomagielav áhpadiddjeskávlán. Oahppe oadtjun nav gáhtjodum friddjasajev skávlán. Dasi bessin aj sámegielaga ja suomagielaga. Friddjasaje árnik manjenagi gártjedevváj ja láhpadváj láhpalattja jagen 1905. Dan åvdás bargaj ájnnasit Bernt Thomassen, guhti jagen 1902 nammaduváj Finnmarko skåvlládirekterran. Virgge ájnnasit ásaduváj dan diehti jut dárojduhttemav galgaj gátsedit ja nannit. Ájnas oassen skåvlládirekterra bargas lij stáhttainternáhtajt tsieggit dárojduhttemguovlojda. Internáhtaj tsieggima álgaduvvin Oarjel-Várjjagin, mij lij rádjáguovlo. Vuona oajválattja adnin internáhttatsieggimav dáppe viehkken dáro kuluvra ja ríkarájá nannimij.

Sisnelap Sábmáj lij dárbo internáhtajt dahkat vaj dárogiella dáppe aj luluj gievrot. Dav máhtij buoremusát dahkat tjoahkki-djin sámemánájt internáhttaj dárogielak áhpadiddjjii áhpadussaj. Gå Vuona Stuorradigge 1900-álggojagijn juollodij sierra bálkkálasev Guovddagæjno ja Kárásjjágå áhpadiddjjida, de galggin lasáodusájt oadtjot dåssju látte. Manjenagi gå Guovddagæjno ja Kárásjjágå sámegielak vuoras áhpadiddje hiejjtin, de biejaduvvin dåssju látte sijá sadjáj. Nav tidáhpáduváj Buolbmáta suohkanin aj.

Chr. Brygfjeld tjuovoj Thomassena manjela ja gátsedij dárojduhttemav 1920-lågo álgos gitta 1935 rádjáj. Sán vuosteldij divna sámij gájbbádusájt. Sujna lidjin tjielgga rasistalasj vuojno ma ávddán báhti duola degu dát tjállusis njunnusj oajválattjada:

Sámij ælla læhkám fámo ja ij miella gielasa adnet tjállemgiellan... Muhem ulmutja gudi vil gávnuji iemesáme tjerdan li dálla nav guorranam ja bæjsstanam vaj vargga ij la doajvvo áttjudit sijájt buorep dilláj. Sij li vuorbedime ja gulluji Finnmarko ienemusát bátsádallam ja hæjomus álmmugij ja li sjaddamin stuoremus juohkusin skajj ásadusájda.




Bernt Thomassen, Finnmarko skåvllådirekterra 1902-1920. Sân lij garra nasjonalissta ja gåtsedij vissjalap dárojduhtte-mav sámeguovloj skåvlâjn.



Guovddagæjno internáhtta, mij lij tsieggidum jur skåvllåmánájt dárojduhtátjít. Dåssju risstalasjvuoda åhpodusán besaj åhpadiddje adnet sámegielav viehkkegiellan. Internáhtta boalededuváj doaroájge.



Guovddagæjno skåvllåmánájur doaro manjela. Rivggo åhpadimen.



Ládde Lyder Aarseth (1886-1951), bådij åhpadiddjen Guovddagæjnnuj jagen 1913.



Sarvesvuona (Kolvik) skåvllåmáná gåvvividuvvam jagen 1933. Merrasáme skåvllåmáná sjaddin garra dárojduhttempolitihkav gierddat.



Kárásjjágå skåvllåmáná ståhkamin, gåvvividuvvam doaro ávddåla.



Buolbmága skåvllåmáná, gåvvividuvvam 1920-lågon. Skåvllådirekterra garrisit måjtij Buolbmága åhpadijdjev Hans Baukop guhti dárojduhttema njuolgadusájt vuosteldij.



Buolbmága internáhtta lij marjemuus internáhtta mij dárojduhttema namán dagáduváj, jagen 1938.

Skåvlik-Heandarat (Henrik Olsen Erke, 1843-1895), guhti lij Buolbmágin riegádam, bargaj moadda jage áhpadiddjen ja katekiehttan Dæno guovlon. Ittjjí dárbaha værámus dárojduhtema ájgev vásedit. Dánna suv girje iemedises Caganvuonan davep Dænuvuonan tjáleduvvam gâlgâdismáno 12. biejve 1868:

#### Gieres áhkátjam!

Návti duv gjítáv gå la munji sáddim dav lummagirjev man sinna muv Almanáhkka lij.

Dav uhtsa vuossatjav mán iektu oadttjuv Guhtor-Ovllá giedas, gå sán bádij râhkusij. Iektu lij 18át sådnåbiejvve. Subtsastit iv majdik diede dunji. Varrásin lav dán rádjáj viessum. Boahtte bierjjedagá la vil vahkko dallutjjí gå Caganvuonan ålliv. Da, da Caganvuona ulmutja li juo munji viek gærrása. Dakkár ulmutjjíjt iv la gávnna gássták gå Olleš-guovtes áhkásj huoman libá. Lav danna sunnu ståben degu ståbenam. Såj libá náv buore muv vuosstij, jut biebbmaba muv degu mánáska vájku dav javlav dárbbamahttásin, sunnus bårråt aktelt. De subtsastibá luondoska, jut sunnun la dakkár garra hállo ulmutjjíjt viehkedit, ja sunnuj e biebmo boade jus soames amuk la sunnu ståben ja dat galggá aktu juohkka hárráj. Dán rádjáj iv la ietjam nanna iehtjádav adnám gå dåssju káfajt ja jáffobiehkijt.

Dasi duodden li dállea muv skåvlân lågev skåvllåmáná, gejn ietjanisá ij la åvvå mige bårråt, sijá hæjosvuoda diehti. Valla såj vil biebbmaba dá 10 máná. Jubmel luluj buorissjivnnjedit sunnuv dan åvdås sihke ájgen ja ihkeven ájgen.

Mannin illim munji girjev tjállám dan uhtsa vuossatja sisi. Iv máhte gullat duv birra ságajt, jut gáktu dán væjá. Barga dán aj munji girjev tjállet ..(daggu li muhtem bágo gáhtum).. gen milta sáddip dav Njeareveadjáj. 20át sådnåbiejve jáhkáv lav juo Njeareveadjen.

Dállea lav mán ávon gå dákkár guhka tjaktja la. Littjisj má fiekse juo gærggam. De vieso varrásin gieres áhkátjam, ja ale vajáldahte manov mij miján la dán ilmen dán. Adnala giedajdat bajás náv gå Moses dagáj vájaldattij dán værálda åjdåmiehtsen. Mujte mij lip jáhtte ulmutja ja manoj nanna alme Kanaana bájkkáj.

Vieso Hærrán

Sárno varrudagájt muv fuolkijda jus sij lulu vissjat gullat, valla ájnnasit vuonemim ja Máre sibjugij.

## Dænovákke stuovesårro galggín dárojduhteduvvat Vuona bånndurin

Dárojduhttem vájkudij Dænovákke stuovesårro sámijda aj. Dat guoskaj ednamvuobddemij ja luossabivdduj.

Jagen 1902 mierredij Stuorradigge jut stáhta ednam ittjjí galga vuobdeduvvat ulmutjjida gudi ettjin dárogielav buvte. Dat vájkudij ájnnasit Buolbmága ja Kárásjjágå suohkana stuovesårro sámijda Návt javlaj stáhttárade W Konow:

*Mijá ednam la dát, Vuona ednam, stáhta ednam. Hættup dav vieledit gå ednamav vaddet, jut dat galggá Vuona tjerdalasj-vuodav nannit.*

Láhka diedon ittjjí hiereda sámijt sjaddamis lárde ednambargen. Ulmmen lij farra sámijt oadttot hilgotjít sámevuodav ja lárden sjaddat. Láhka ádåstuhteduvváj 1965, valla giellagájbbá dus sihkoduvváj ierit.

Oajválattja mierredin aj luossaguollimlágajt ma oajválattjajda vad-din fámov háldadit Dæno luossaguollimav. Rádjeviesajdiddje sáme goappátjjí biele Dæno lidjin dålutja rájes hárjjánam aktan luosav guollit. Sámekodisilla milta (1751) Ruossja-Suoma ja Vuona biele luossaguollárá aktan háldadin luossaguollimav. Luossaguollim tjanáduvváj gádjida manenagi gå da oadttjun ednamgirjev ednam-åbmudahkaj. Sij gâlgâdin ja gâlldin aktan. Vuovdaguoika guovlon bruvkkujin aj Ohcejágå ja Kárásjjágå sáme snjilltjamánon Dænov stieggit rastábuodoj. Dáv aktisasjbivdov gal sáme ietja láhpadin 1860-lågon. Gâlldem, duhastibme ja gâlgådibme gal joarkeduvvin.


Gå ieñjils turisstaoaggo boahtegåhtin Dædnuj 1800-lågo gasska-mutto rájes, de hæhttujin mákset oaggomdivudav tjáhtjádagá stuovesårro luossaguollárida. Dat dáhpáduvváj tjáhtjádagá rádjá-guovlon gânnå lidjin buoremus oaggomsaje.

Valla ruvva Ruossja-Suoma ja Vuona oajválattja sihtin sámij háldadimrievtesvuodav ja aktisasj guollimvuogijt láhpadit. Nav de båhtin jagij 1872 ja 1873 luossaguollimlágá ma de gielldin gâlldemav ja duhastimev.

Ja de Vuodna mierredij jage 1888 luossalágav mij luossaguollim-rievtesvuodav tjanáj ednamåbmudahkaj. Láhka vieledij tjáhtjádagá stuovesárro luossaguolláríj rievtesvuodajt. Rievtesvuhta tjanáduváj goahtáj. Valla dárojduhttempolikhka garraj ja jage 1911 gânágisálasj mærrádus tjanáj luossabivddorievtesvuodajt ednambarggúj. Jus ájguu värnmástellat, de hæhttuiji sláddjit unnemusát 2000 kg ájviis jahkáj. Oajválattjaj ulmmen ij Dænotjáhtjádagá sámijt dárojduhttet Vuona ednambarggen. Oajválattja váldin hálldusisá aj luossaguollima háldadimrievtesvuodav. Dat vibáj jage 2011 álgguj. Dalloj Vuona ráddidus mierredij ådå Dæno luossaguollimlágav (guovvamáno 4. bieje) mij vijmak vattij Kárásjjágå ja Dæno luossaguollárida rievtesvuodav Dæno luossaguollimav háldadit.

Avtse ulmutja stivrra la válljiduvvam mij de galggá Dænotjáhtjádagá luossaguollimav háldadit. Vidás båhti Dæno suohkanis ja nieljes Kárásjjágå suohkanis.

Dænotjáhtjádhaka



Dænotjáhtjádagá bájke ma 1800-lågo milta sajáduvvini. Jahkelågo dalloj vuosed i gá vuostasj ednambargo Vuona bielen tjáleduvvin ednamgirjjáj. Gådijda de luossaguollima rievtesvuoda (viermmim) tjanáduvvini.



Ienjils «luossalorda» båhtin Dædnuj Áltá baktu. Muhtem skottlándak gen namma ij John Francis Campbell (1821-1885) guossidij tjáhtjádagáv sihke jaglyn 1851, 1852 ja 1862. Dav tjállá girjenis «Frost and fire», mij almoduváj jagen 1865. Manojnis sán dagáj tjáppa akvarellajt. Gåvvá jali akvarælla vuoset suv ja suv oaggomrádna campingajev Leavvajágå guovlon 1851 bårggemáno. Gåvvá oalges bielen la suhkke Johanas guhti bådij Kárásjjágås.

**K A R L.**, Ibmel armost dača ja vuota, gotbalážai ja Vendalažai gonagas;

Dietterassi addep: Dam laga nichlo mi addjuvvum la 29ad báive april manost 1871 ja mäsa tajetuvvu, märeduvvu dača bælo tævo dashui hivo diti Dænöst\* nuft:

§ 1.

Deno tæceai daihe Dæno bivddorngai gulla:

a. Skiečamjokka, Anarjokka ja dam joatka — Dædno dam golgedzbinai merri.  
b. Dak dam tæceai daihe danda jogaidi boatto olgejogak, dana muddui, man muddui viessa dittu, atte luossa [didde] daidi goargos.

§ 2.

Aigest 14ad báive rajast september manost 15ad báive ragjai april manost galgga lat gildujurvum luosa (didde) daihe guvča bivddemest daihe golgedzbinet mainingo rugin daihe addemest daihe diktet bivddosid, mak luosa (didde) ja guvča varas lick bigjum, (tæces) orrot, ja nuft gallegik mäida buok buodot lat gaddal valdum, rissik 20ad báivai september manost ja čuoldak, oarrajuolik ja gædgik las báivai december manost.

§ 3.

Æreb dam oudalest unamatuvrum nige, man kiste gildum la bivddemest, gildujurvuu vela mainage vagin bivddemest golgedzgin ja nutin fad tina rejast levardaga akked fad tina ragjai sodnabeive ukked.

§ 4.

Fierbine, mi rakaduvrum la luosa (didde) ja guvča bivddo varas, gildujurvuu adnumest, jos dat njuoskasein la baskeb go  $2\frac{1}{4}$  tunnia čuolnai gaskast. Dat giellos fabmoi šadda 2 jago gæcet odsast.

§ 5.

Bivddosin, man slajast juo leččik, rakaduvrum čuovča, soavvel ja njaza varas, mi galga čalmek lat baskebut go 1 tunnia čuolnai gaskast, goas dat la njuoskasein, nige galga dak guollešlajak bivddujurvut las báive rajast oktober manost las báive ragjai december manost.

§ 6.

Goldini, nuftgo mäida duhastehme ja liuastallam galgga lat gildum.

§ 7.

J oktage galga vuordet, oastet daihe vuostaivaldet luosa (didde) ja guvča, mi bivdum la dam nige siste, goas davalazat la gildun (§ 2). Jgo dast galga oktage bivddet daihe vuordet luossa- daihe guvčuvejekid, mak ei læk ucemussan 10 tunnia gukkusazak.

§ 8.

Olgejogain ja dam oascet Dænöst, mi ragjan ilick nubbe rika vuostai, bisso fainost, mi oallefavo (guordas) harrai se märeduvrum 28ad báive april manost 1866 addjuvvum lagast dam §§ 2 ja 3 niste, daddeko nuft, atte dat 50 ulanač gaskast mäneb fast gutteduvvu 100 alenan.

Dam oascet Dænöst, mi guvčo rika gaskast la ragjan, i galga bivddos daihe buoddo bigjuvvut rasta oallefavo (guordas). Jos bivddosak guvtebale gaddest bigjuvvujek, do galga dai favelemus gečči gaski baccet ucemussan vidadas oasse joga gordoulagast ravason, goar jokka la gerde tæcas, ja inuddoi ucemussan 100 alan joga gukkudaga miede lokkuurvum. Dak märradusak mi guoska golgedzbinai daihe nuostallami.

§ 9.

Embo 2 buodo gildujurru juokke bivddet oktan adnemest.

§ 10.

Nicmmanjarggeče ja Stanganessa vuodualebbui Dænonjalmé vuostai i galga bigjuvvut kilanuote daihe dam sullasač bivddos luosa oudi. Dak davalazat adnujávvum njangosermek (buodok) mattik logo ja baiki harrai adnuit nuft most dam ragjan.

§ 11.

Jos guttege, gæst vuogadvuotta i læk jogast bivddet, galgač mäitet oggott luosa (didde) ja guvča, de gaibeduvu, atte sudnji la loppe addjuvvum sundest (valdest), mi i mate addjuvvut mra go 2 speise rajast 15 speise ragjai manno vervo vuostai, ja dam bagjili, atte daggar loppe ozjuvvurru mäida nubbe rikast goggo jokka la guvčo rika gaskast ragjan. Dat vervo addjuvvu amman (herra) lagadusa miede bagjeligeččami jogast. Rekegdagoin männodurvru amman märrademe miede.

§ 12.

Rikkosak sanin daihe dagoin bagjeligečči vuostai lokkujavujok dasi rikkosiguim politibálagi vuostai.

Maid buok guoskolačak vuollegačamusat gallegik doattalet.

Stockholma sloatast addjuvvum 4ad b. Mai m. 1872,

Min gieda ja rika sæila vuolde

**K A R L.**


R. Kierulf.

J. Aall.

Jage 1872 Vuona bielen luossabivddoláhka lij sámegiellaj járggáluvvam. Járggáliddje lij sámegiela ja suomagiela profæssor Friis.



Gåldem lij Dænotjáhtjádagá luossaguollárij aktisasj guollimvuohke. Dat gieldeduváj 1872-73. Tjuorgas: Isak Johansen.




Duhastibme dáhpáduváj tjavtjan gå sjevnjudahttjáj ja ávddål gå Dædno galmij. Dat gieldeduváj 1872-73. Tjuorgas vuoset duhastimev Áltáænon 1730-lágo álgon. Tjuorgas: Knud Leem.



Jage 1911 luossabivddoláhka tjanáj viermmimrievtesvuodav ednambargguj. Jus ájggu værmástallat, de hæhttuji sláddjit unnemusát 2000 kg ájvijs jahkáj. Ednambarggoståhpe Sirbmán.



*Buodom la viek boares  
luossabivddovuohke  
Dænon mij ájn la anon.*



*Buodo ja dan buojkuldagá.*



«Dæno juogos» mij ævtodij áddå Dænotjáhtjádagá luossabivddoresolusjávnåv, mav Ráddidus dákkiidij guovva-máno 4. bieje 2011. Háludadibme biejaduváj Kárásjjágå ja Dæno luossabivddij hállduj. Gáro bieles: Kjell Sæther, Kárásjjágå suohkan; Reidar Varsi, Dæno viermmebivdde; Edvard Nordsletta, Dæno viermmebivdde; Audhild Schanche, Sámedigge; Heidi Ekstrøm, Birássuodjalimdepartemænnnta, jádediddje; Karl-Arne Larsson, Norges Jeger og fiskeforening; Ingrid Nordal, Dæno luossabivddosiebrre; Frank Martin Ingilæ, Dæno suohkan.




Oaggom la viek ájnas Kárásjjágå ja Dæno luossabivddija gejn ij la viermmimrievtesvuhta (luossabreava). Guovlo oaggo ja viermmebivdde máksi simbolalasj jahkedividav luossabivdo ávdås. Turista-oaggo hæhttuij jándur-divudav mákset. Gåvvå vuoset guovlo vanás-oaggov ja turista-oaggov Ohcejágå guojkan.

## Luosa nammadusá

Luosan li buojkulvissaj sierra nammadusá ma álldarav ja sjiervev tjielggiji:

- *Diddi* la luosasj mij la gitta 3 tjuv rádjáj, ja goarnju Dædnuj mihtsamárraágje.
- *Lindor* la luosasj vehi stuorep gå diddi.
- *Luosjuolgi* la 3-6 kilosasj luossa.
- Luossa I guolle mij la jáksåm «állesálldarav», dajs 6 tjuvus bajás.
- *Ninjelisluossa* I luossa mij gådå ja manna li miedema.
- *Goadjin* la luossa manna I guoksa.
- Čuonžá la buojdes luossa mij ij la gádoguolle; danna ælla miedema, ij guoksa, ja goarnju jáhkåj tjavtjan.
- *Vuorro* I luossaguolle mij árru badjel dálve jágán.
- *Šoaran* árru badjel dálve ænon, manná merraj gidán ja goarnju buojdesguollen ædnuj manjetjavitjan.
- *Guvttja* I guolle mij dárogiellaj gåhtjuduvvá sjøørret.
- *Gudjor* la guvttja mij la árrum badjel dálve ænon ja manná merraj gidán.



## Svieriga biele sámij ællosujt-to Vuona bielen galgaj gártjeduvvat

Vuodna sidáj Svieriga biele ællosujtov gártjedit Vuona biele ednambargoj diehti. Ájnnasit Råmså ámtan (fylkan) lidjin ællo-niehke ja ednambargge ednamij badjel rijddalahtjám. Návti ittijj máhte joarkket. Jagen 1883 sjehtadin de Vuodna ja Svierik aktisasj sámelágav mij galgaj ællosujtov gártjedit ednambargoj diehti. Svierigij lij dát láhka ávkken gå dat regulierij Svieriga biele ællosámij guohtomrievtesvuodajt Vuona bielen.

Vuona bielen láhka guoskaj ájnnasit Råmså ámtaj jali fylkkaj. Dat vattij máhettelisvuodav boatsojtjieldijt jali *boatsobjirajt* ásadit. Lága diehti soajttin ålles sijdda jali bijrra sjattat buohttidusájt mákset jus boahttsu duolmmun jali guodun ednambarggijt bældojn ja giettijn. Majenagi gå boatsobjirja ásaduvvin, de nammaduvvin sámesunde ællosujtov gáttitjít. Finnmarkkuj nammaduváj sámesunnde esski jagen 1929.

*Svieriga bielen ællosáme famillja giesseårudagán Ivgo (Lyngen) guovlon Nuorttalap Råmså. Áhttje mánájis lávdagoade álggolin, dávvera snuorrij gatsostuvvam. Turistajt dávk vuorddemin.*



*Ieddne guovtijen mánájn, njuorakmánná gierkkamin.*

## Vuodna mierredij duodde sámelágan ællosujtov ájn vil gártjedit

Vuodna ij lim dudálasj 1883-lágajn. Dat anij dav ilá slájven regulierit sissjálasj ællosuttoássjijt ednambargo vuoksuj. Danen oajválattja mierredin jage 1897 duoddesámelágav. Dálla ij lim loahpe barggat boahtsuj boatsobjiraj ålggolin ednamámastiddjj loabe dagi.

1890-lågo milta båhtin muhtem regulierima ma garrisit vájkku-din oarjjesámij ællosujttuj. Jage 1894 oajválattja mierredin boatsobjiraj rájjit dan láhkáj jut ájnas boatsojguohtomednama sjaddin boatsobjiraj ålgusjbælláj.

Dáv nannij jage 1897 láhka, mij aj dagáj máhttelissan gielldet ællosujtov visses guovlojn sihke boatsobjiraj sissjelin ja ålggolin almma buohto dagi. 1900-lågo álon Vuona oajválattja garrisit gártjedin oarjelamos ællosámij guohtomednamijt.



Oarjelsáme familja  
Steinfjell, Derga ja Jåma,  
gåvvituduvvam 1900-lågo  
álon.

## Svierik dåssju ællosámijt dåhkkidij

Aj Svieriga bielen lij dárbbó ádå lágajt vaddet. Vuostatjin buktin jage 1886 lágav mij guoskaj stuovesárro ja ællosámij aktij-vuohtaj. Ja de bådij jage 1898 láhka manna lidjin dakkir ássje dagu gánnå ja goassa besaj boahtsuj barggat. Dasi duodden lidjin danna njuolgadusá man vuodon mierredin buohttidusájt vahágij åvdås majt boahtsu lidjin dahkam. Åbbálattjat Svieriga stáhta anij állo fámojt regulieritjít ællosujtov, mav dåssju sáme ælädussan dåhkkidin. Ietjá sáme gudi ettjin gullu ællosujttuj, vajálduhteduvvin.

Svenska stáhta ællosujtopolitikhka nappu sjattaj ienep rahpasin gå Vuona stáhta. Dav dagáj ællosujttosjiehtadus mav Vuodna ja Svierik gaskanisá dahkin. Vuona ællosujtolága vaddin ednam-barggijda ienep rievtessuodajt Vuona boatsojguohtomguovlojn gå majt Svieriga lága vaddin Svieriga biele tjieldijn jali tjerojn.

Boatsojsijdaj ríjkarájá rasstima máhttin dan láhkáj vájkudit jut nuppe rijka mærrádusá máhttin nuppe rijka ællosujttuj vájkudit. Dájn ássjij Vuona ja Svieriga berustime ællim avta dásen. Svieriga biele ællosámijin lidjin stuoráp boatsojguohtoma Vuona bielen gå Vuona biele ællosámijin Svieriga bielen. Vuodna lij dán ájge mannamin ålgus Vuona Svieriga uniávnás, mij dáhpáduváj jagen 1905. Danen dat anij juohkka vejulasjvuodav vuosedittjat danna lij iesjmierredimfábmo ja fábmodus Svieriga gáktuj ja besadij divna Svieriga rievtessuodajt ma lidjin Vuona bielen. Gå Vuodna ájn nagáj gártjedit Vuona biele ællosámij rievtessuodajt Vuonan, de lij danna mak vuodo njávkastittjat Svieriga biele sámi rievtessuodajt gis Vuonan, namálattjat gældátjít boahtsujt ríjkarájáv rasstimis.


Svierik vas sidáj dav gártjedimev hieredit. Svierigin diedon lidjin ålggorijkapolitihkalasj sivá bisodittjat rievtessuodajt Vuonan. Dasi duodden rádjástieggim luluj gártjedit Svieriga biele ællosámij guohtomednamijt Svierigin. Guohtomriido jádeduvvin oarjás oarjel-sáme boatsobjirajda jali tjerojda. Dá sjaddin vájven ja noaden Svieriga stáhttaj. Dán ássjen Svieriga stáhta bælostij Svieriga berustimijt. Sámi berustime ællim nav ájnnasa.

Huoman la tjielgas jut Svieriga sáme-politikhka 1800-lågo lâhpagietje rájes nuppe væráladooaro rádjáj lij buorep gâ Vuona. Gâjt ællosámij vuoksjuj. Dav nannij jage 1908 *rijkabiejve-mærrádus*. Dat dættodij oajválattja galggin gâhttit ja suodjalit jáhttesáme álmmuga iellemav ja ællosujtov ávdedit, ja de viehkedit ietjá sámejuohkusijt besadit sijá gássjelis dilijs.

Dåssju ællosámijin lij boahtteágge danen gå lidjin friddja jali luonndovijdes ulmutja, gudi miehtsijin ja duoddarijn viessun. Ietjá sáme galggin svænsskan sjaddat. Dáv politikhav gæhettjalin oarjjelsáme siebre ja daj njunnusj Elsa Laula vuosteldit. Da ettjin sidá hâjedit sámijt, man birra mannjela tjielggip. Danen oajválattja hiebadin dâjmajt ma sijá iellemav vieledin. Ij nav vaj galggin rudálattjat ávddânit ja nav gâhtjodum sivilisasjâvnâ iellemav rievddat guovlluj ja dássáj. Sij galggin gámájn ja lávdagâdijin viesot ja årot. Máná galggin goahteskâvlâjt vádtset, vâj e åhtsâla ierit sáme miehttse ja duottariellemis. Ietjá sámij máná galggin Svieriga skâvlâjt vádtset.



Katekiehtta «Báhppa Ándaras», Anders. J Sarre (1832-1913) oahppijis.



Svenska stáhtta ásadij goahteskâvlâjt vâj ællosujo máná ettjin galga åhtsâlit sáme duottariellemis ierit. Goahteskâvllå Vazáza (Vittangi) guovlon, gâvvidum jagen 1932.



Oahppe riekknimin, gâvvidum jagen 1939.

## Vuona-Svieriga ællosujtto-konvensjåvnå

Dagu lip ávddálin tjielggim, de lidjin Vuodna ja Svierik sjiehtadam jage 1883 aktisasj ællosujttolágav mij regulierij boatsojsijdajt ma ríkjarájáv rasstijin. Dat lij fámon sæmmilágátjin gitta jage 1905 rádjáj. Dalloj Vuodna luovvanij sierra ríkkán, ja nav Vuodna ja Svierik guorrasin ádå boatsojguohtomsjiehtadusáv mij lij fámon jage 1919 rádjáj gå ádå sjiehtadus vas sjiehtadaláduváj.

Ávddål gå ríka 1919 ællosujttokonvensjåvnåv sjiehtadin, de ríka rijddalin ja dágástallin garrisit, ájnnasit boatsojguohtomednamij nanna sis Rámsán. Dáppe Vuodna sidáj guohtomednamijt gártje-dit nav álov gå ber máhttelis váj sjattaj sadje ednambarggúj ja vuovddetjuollamij. Svierik vuosedij ájnnasit nuortamus boatsoj-bijrajn jali tjærojn ællim giesseguohtomednama Svieriga bielen. Vuona oajvvegájbbádus lij rájáv stieggit állu, valla dav gal Svierik ittijj dåhkkida makkirak láhkáj. Svierik huoman dåhkkidij suollujs ja muhtem guovlojs gæssádit fylka alleoasen. Ríka aj guorrasin bajemus boatsojlågo báhtsám giesseguohtomednamij gáktuj.

Konvensjåvnnå vájkudij jut Svieriga biele nuortalamos boatsojsijda massin ájnas giesseårudagájt Vuona bielen. Nav hæhttujin nákko diehti boatsojlågojt unnedit. Huoman oajválattja miejnnijin nuortalamos vuomijin ájn lij sadje ienep boahtsujda ja mierredin nággojáhtemav. Muhtema gæhttjalin vuosteldit dav, valla hæhttujin stuorra sáhkoj diehti vuollánit. Muhtem Gárasavvuna guovlo boatsojsáme sjaddin de oarjás jáhttát oarjelsáme guovlojda.



Nággojáhtem Muhtem Gárasavvuna ællosáme nággiduvvin jáhttát oarjás gitta oarjelsáme guovlojda.

Gáktu nággojáhtema vájkudin.  
Gárasavvuna sábme Jonas Andersson Blind fállá snuvsav Árjapluove sábmáj Jonas Eriksson Steggo. Goappátjagá gulluba LuoktaMavas tjerruj jali tjælldáj. Sunnu guládal-lamgiella lij svierigadárogiajella. Gávvitudum jagen 1945.



## Svieriga biele ællosámij giesseguhtom- rievtesvuoda Vuona bielen

Jahke	Geografijjalasj guovlo	Jähttämäggje Vuodnaj	Boatsojlåhko
1883	Åvvå rádjáguovlo	01.05	80 000
1905	Råmsså ja Nordlánnda	15.06	«Dagu lähkám»
1912	Råmsså (visses guovlo)	15.06	30 000-40 000
	Nordlánnda	01.05	Dájs 8 000-20 000
1919	Råmsså (visses guovlo)	15.06	Tjoahkkáj 39 000
		01.05	Dájs 16 000
	Nordlánnda	01.07-31.08	Oasse 39 000 lågos

(Gálldo: Norsk utenrikspolitikkens historie, bd. 2)



Nordlánnda, Helgelátte ællosáme gávviduvvam  
1900-lågo álgon. Gáro bielen Elsa Laula Renberg,  
ja suv duogen suv boaddnje Thomas Renberg.  
Elsa lij Svieriga bielen riegádam ja sebraj organi-  
sieritjít 1917-sáme ríjkatjáhkanimev, gehtja bielev  
248.

Ællosáme nuorap Gárasavvuna guovlo  
biktasij, gávviduvvam jagen 1939.

Muhtem guovlojn sjaddin giellagássjelisvuoda, ájnnasit oarjjelsámiij ja nuorttasámiij gaskan Dearna guovlon. Gå ájggun vehi guládallat, de hæhttujin sijá nievres svierigadárogielav ságastit. Aj sijá guovte lágásj ællosujo mårjvárásstin ja dahkin rijdojt.

Svieriga biele sámij boatsojguohntoma Nordlándan ja oarjjelsáme guovlojn ællim nav vijddása, ja sjiehtadaládijn ettjin dagá dakkár gássjelisvuodajt gå Råmså fylkan. Vuona biele ællosámij ællim sierralágásj guohomednama Svieriga bielen. Råmså ja Nordlánna guovloj ællosáme gudi sihtin guohomednamijt Svieriga bielen, oadtjun juohkka jage mierredum duobddágijt vuovddeednamijt Norrbottenin ja Vesterbottenin. Ræjnnuhimággje lij gálgådismáno 1. bieje rájes vuoratjismáno loahppaj.

Jage 1919 ællosuittokonvensjávnná lij Vuodnaj ájnas danen gå dat nannij Vuona stáhta nasjávnnådåbdov sáme guovlojn nuorttan. Sáme rievtesvuoda gártjeduvvin. Vuodna sjattaj ienep láttij rijkkan.




## Gålldásáme - gierddam álmmuk

Gålldásáme li guovlojdisá adnám dålutjis. Sij lidjin ednamijdesa juohkám gaskanisá vuogálattjat. Sijdaráje álu tjuovvun tjáhtje-juogoit. Oajvetjátjádahka lij sijda ájnnasamos bierggimguovllo.

Vájku muhtem sijdajn lidjin boahtsu, de ællosujto ij lim stuorámus ja ájnnasamos bierggimvuohke. Dat lij oasse sijdaj miehtsimis ja guollimbierggimvuoges.

Jage 1826 ríjkárájá sjiehtadusá milta Vuodna ja SuobmaRuossja juogadin gålldásábme sijdaj Njávddamav (Neiden), Bähčeveaji (Pasvik) ja Beahcánav (Petsamo). Goabbá ríjka oattjojga suláj lahkev Njavddamis ja Bähčeveajis. Ienemus oasse Beahcánis hæhttuj Ruossja vuolláj. Ådå ríjkárájáv ij lim loahpe rasstit boahtsuj. Sjiehtadus vattij sijda ulmutjijda gudá jahkáj rievtes-vuodav adnet juogeduvvam guovlojt dagu åvddål. Gålmå jage duogen galggin de mierredit goappá stáhta viesádin sihtin. Njavddama gålldásáme sjaddin Vuona stáhtaviesádin, ja Beahcána ja Bähčeveaji gålldásáme bissun Ruossja vuolláj.

### Beahcánsijdda



Gålldásáme sijda.

Beahcánsijda oajvveguovllo lij åvvå Beahcánjágå tjáhtjádahka. Sijdda lij guhkke ja siegge. Dan ráddnásijda lidjin Muotke-sijdda lullen, Suonjel-sijdda oarjján ja Bähčeveaisijdda allen. Beahcán-siidan lij merraguollim aj ájnas. Sijdda ámasti lahkev Giehkir-njárgas (mij uddni gullu Ruossjaj).

Sijdda oadtjogådij vuostasj gássjelisuodajt 1820-lågon. Dalloj nárrágåhtin nuorttasáme ællosáme duodaj sijdav guovlojda gási muhtem familja lidjin juo 1700-lågon nárråm. Dálla muhtem nuorttasáme familja jáhtin ájn nuorttalabbo, gitta Beahcán-sijddaj. Siján lidjin stuora ælo, suláj 6000-10000 boahtsu. Dát garrisit vájkudij Beahcánsijda iellemvuohkáj. Dálla sjaddin boahtsujt ræjnnuhit vargga birra jánndurav. Ettjin desti assten dagá guollit. Sijda ulmutja aj bálkkigåhtin Vuona bielen hæjos merrasámitj ræjnnuhiddjen, vaj ietja asstin ienebuv guollit. Valla dát ittij lij lijssimin. Gålldásáme ja nuortaga masstadin boahtsujdisá. Ja manjenagi unnoj gålldásámi boatsojlåhko, ja nuortagij ælo vas stuorrun. Låhpan gevaj nav jut gålldásáme biedjin tjárrágattjajisá nuortagijt boatsojgæhttuj.

Gålldásámij ællosujtuj vájkudij aj kolonisierim mij gæjvvanij sijá sijdajda 1800-lågo milta. Beahcánsijddaj gæjvvanahtjin åvdemusát suobmelattja 1800-lågo gasskaráje rájes. Ja de båhtin ruossja, gárjjela ja aj vuonaga jali látte. Merraguollim aj gártjoj dán ájge. Ådå Beahcánkloastar gájbbedij kloasttarriektájt ja luossaguollimsajjt, dagu lij læhkám kloastara álggoájge. Aj vuonaga ásadin guovlluj oasesguovdájtijt, ma tjoahkkáj hæjodin gålldásámij iellemvuogev ja árbbedábjt.

Beahcána kloastar



Suonnjelsijda gálldásáme

1900-lågo værálbedoaro ja daj vájkudusá manjutjissaj háddjj ja biebstij Beahcánsijdag. Jage 1920 ráfesjiehtadusá milta hæhttuj ienemus oasse Beahcánsijdas Suoma vuolláj. Suobma lij sierra ríkkjan sjaddam jagen 1917. Dalloj viessun sijdan 76 gálldásáme. Suobma gal gæhettjalij doarjot sijda æladusájt ja oadtjot ællosujtov juolge nali. Valla ájnas giessetjielen, Gieh kernjárgan, lij lahkke sjaddam Ruossja bælláj. Bierggimvuodo lij garrisit hedjunam. Ja manemus vahágis dáhpáduváj nuppe væráldeoaro ájge. Dagu Suonnjelsijda ednama, de sjaddin Beahcánsijda guovlo aj doarrosalljon. Ja ulmutja báhtarín guovlojnisá. Doaro manjela sjattaj Beahcán Sovjetlihto vuolláj ja ulmutja ettjin desti sidá jáhtet ruopptot. Beahcán ja Báhceveaisijda ulmutja oadtjun ådå årromsajjt Anárjávre lulásj bælláj muhtem mijla Čeavetjávres (Sevettijärvi) oarjás.



## Báhceveaisijdda

Jage 1826 rádjesjiehtadusán oadtjun Suobma-Ruossja ja Vuodna goabbák suláj lahkev Báhceveaisiiddas. Sijda viesajdiddje gudi dál-la lidjin Ruossja stáhtaviesáda, bessin gal ájn jáhtet merragáddáj Báhceveaivuodnaj ja Ruovdavuodnaj luosav guollitjít árbbedábálasj luossasajjnisá. Sij joarkkin árbbedábálasj æladusájt aj Vuona bielen. Merraguollim lij duoddeaeládussan luossaguollimij ja sávttsadoajmmaj. Sij váldin sávtajdisá manjen luossaguollimsajida Vuona bælláj.

Rádjásjiehtadusá manjela árrujin ienep ådåviesajdiddje Báhceveaisijddaj, ja rijdo álggin. Ådåviesajdiddje vuodjelahtjin gálldåsámiyt sijá luossaguollimsajis. Gálldásáme moaddi vuojnnin goade gánná sij guollidijn árrun, lidjin gajkoduvvam gá gidán båhtin luossaguollimsajidisesa.


Vuona ådåviesajdiddje miejnnigåhtin Báhceveaji gálldásámijin ællim makkirak rievtesvuoda anátjít Vuona biele guovlojt. Ja 1900-lågo álon Vuona oajválattja gártjedahtjin sijá guollimrievtesvuodajt Vuona bielen.



Báhceveaisijda gálldásábme Lavran familjajnis luossaguollimsajen giesseårudagán Oarjel-Várjagin. Sán ja iehtjáda suv sijdan láhppin divna luossaguollimrievtesvuodajt Vuona bielen 1920-lågon.



Geavŋnis (Boris Gleb) Báhćeveaivákken, gálldásámij tjielde.



Kolonisstaståpe Báhćeveaivákken.

Vuostasj værálaldoaro maŋjela Ruossja biele Beahcánsijdda hæhttuj Suoma vuolláj (Tartu ráfesjiehtadus 1920), ja sijda viesajdiddje sjaddin Suoma stáhtaviesádin. Jage 1918 Suoma doarroålmmå ietjasa vuolláj válldin Ruossja biele Báhćeveajev, ja sijda dámja hádjánin. Suoma doarroålmmå hieredin gálldásámij tjaktjaguollimav ja ællobargojt, ja boahtsu hádjánin.

Vuona oajválattja dálla miejnnijin Báhćeveaji gálldásámij guollim-rievtesvuoda Vuona bielen lidjin lähpaduvvam, danen gó lidjin málssum rijkaviesátvuodav. Vuona ja Suoma oajválattja sjehtadallagáhtin tjoavdátjtjat gássjelisuodajt. Vuona fálaldahka lij Suobma luluj gáhttjot Báhćeveaji gálldásámijt hiejtedit divna sijá rievtesvuodajt Vuona bielen. Dan ávdás Vuona luluj mákset 18.000 krávnå (12.000 gállekrávnå) Suoma stáhttaj, mij galgaluluj adnet jahkásasj rænnton «gálldásámijda buorren». Muhtem láhkáj gálldásáme nággiduvvin dákkitit fálaldagáv, ja tjavtjan jagen 1925 mávsij Vuodna 18000 krávnå Suoma stáhttaj.

## Njávddamsijdda

Njávddama gálldásáme ájn ráddijin állásit guovlojnisá 1800-lågo álon. 1800-lågo lárde-koloniierim ittijiv vájkuda Njávddamsijddaj. Dat ájnnasit vájkudij Báhčeveaisijddaj, navti gáktu lip ávddálin tjielggim. Valla sijddaj árrujin manjenagi guojna, ja ruvva lidjin stuorra ieneplågon. Jage 1845 árrun 45 guojna ja 28 gálldásáme Njávddamsijdan, jage 1869 árrun 138 guojna ja 11 gálldásáme.

1800-lågo milta nuorttasáme ællosáme jáhtegåhtin sijda ednamij tjadá gitta Beahcána duohkáj. Álon dá ettjin dagá gássjelisvuodajt njávdán-gálldásámij æladusvuohkáj. Valla manjenagi gå nuorttasámij ælo stuorrun, de gárttjogåhtin Njávddama gálldásámij guohtomednamav ja gálldásámij iellemvuohke ja kultuvrra gierdda-gådij. Unjárga ja Várnjárga merrasáme aj árrujin gálldásáme bájkijda.



Ællosábme Ole Banne,  
suv iemet Marit ja niejdda  
Ingvá. Sán ja ietjá Várnjárga  
ællosáme adnegåhtin  
Máttavárjjaga sisednamijt  
guohtomguovllon jage 1852  
rijkarjá stieggima manjela.

1900-lågo álgo rájes sijdda hádjánatjáj. Njavddam-gálldásáme láhppin vuostatjin luossaguollima akturiektáv, ja de láhppin aktisasj ednamav gártje birra. Låhpan vil ællobargov láhppin, mav iehtjáda válldin hálldusisá. Nuora jáhtegåhtin guovlojstisá, muhtema Girkkonjárggaj, gánnå álgaduváj gruvvodájmabime jagen 1906. Ja dán dilen sijá giella aj gáhtogådij.

Nuppát værıldadoaro manjela njávdán-gálldásáme li dikkij jali riektätjähkanimij baktu gæhttalam ruopptot oadtjot rievtesvuodajdisá, ájnnasit ællosujttuj. Dán rádjáj la tjielggam siján li dasi rievtesvuoda, ma ælla goassak sijájs váldeduvvam.




Gálldásáme nuohttimin.

## Guoládknjárga gálldásáme

Guoládknjárga gálldásábme sijdaj árbbedábálasj iellem rievddagádj 1800-lågo gietjen. Dalloj boahtegåhtin komia stuora boatsojæloj dákku. Ja nav álgij rijddo ednamij ja æloj badjel.

Dan ájge ruossja barggagåhtin gæjnovej aj Biehtár-stádas nuortas Guoládagá ja Murmánska stádajda, gási jáhtegåhtin ienep ulmutja. Ja sáme nággiduvvin hiergijisá gálvojt giesset gæjnnobarggjida. Subtsastuvvá hierge jábmin tuvsánij miltta lásså lássáj diehti.



Industrialisierim, gruvvodájma ja stádaj tsieggima dahkin sáme hæhttujin nákkoi vuolen vuolget guovlojstisá. Nággojåhtema vihipin guhkijt, ájnnasit manjela gá Sovjetlihtto kommunismá ideologijja vuodon kollektivisierigádj sijdajt. Dálla galggin sijdaj ednama, jággå, jávre, boahtsu jnv gullut álmmugij, jali praktihkan stáhttaj jali aj belludahkaj. Sáme gudi ettjin duhtada kollektivisierimav, stráffuduvvin ja biejaduvvin giddagissaj. Nágina gáddujin.

Ienemus oasse Guoládknjárga sámijs árru dálla stuoráp bájkijn ja stádajn. Badjel lahkke árru Lujávren, mij la gassko njárga. Moattes barggi boahttsuj. Dav bargov stivrriji komia ja ruossjaga. Sámijs dille l viehka nievres stuora juhkalisuoda diehti. Jage 1989 vuododuvváj Guoládknjárga sáme siebrre man barggon la ierit ietján gæhttjali sámijs sosiála dilev buoredit ja nannit ja ávdedit sijá kultuvrav.

Sovjetlihtto kollektivisierij Guoládknjárga ællosujtov ja hierge vierttijin stáhttaåbmudahkan stáhta fievro-dárbojt dievnnut.

## Hárjjidusá

1. Vuona biele dárojduhttempolikhka vuodon lij Suoma ballo. Tjielggi dan duogátjav!
2. Tjielggi buojkuldagáv sosiáladarwinissma. Gáktu aneduvváj dat ávkken dárojduhttemij?
3. Tjielggi jage 1880 ja 1898 dárojduhttema skávllå-njuolgadusáj sisánov. Man guhkev lidjin da fámon?
4. Guhtimusj lij Bernt Thomassen?
5. Manen galggin Dænovákke stuovesárro dárojduvvat Vuona bânndurin?
6. Goassa gielde duvvun luossaguollimvuoge gálldem ja duohasteapmi Dænon – ja manen?
7. Manen galgaj Svieriga sámijs ællosujtto gártje-duvvat Vuona bielen?
8. Vuodna ja Svierik sjiehtadin jagen 1883 aktisasj sámelágav. Mij lij lága ulmnen?
9. Vuodna mierredij jagen 1897 duoddesámelágav. Masi dat galgaj liehket ávkken?
10. Vuodna ja Svierik dâhkkidin jagen 1919 aktisasj ællosujttokonvensjåvnåv. Tjielggi dan duogátjav!
11. Gáktu vájkkudij Vuona-Suoma/Ruossja ríjkarájá sjiehtadus jagen 1826 gálldásábme sijdajda?
12. Tjielggi Báhćeveaisijda gálldásámij jáhtulagájt åvddål vuostasj værıldadoaro. 1920-lågon sij láhppin luossaguollimsajjt Vuona bielen. Manen?

# «VIESSUS SÁME ÁLMMUK!» – DÁROJDUHTTEMA VUOSTELDIBME

## Sáme áhpadiddje njunnjutjin

Sij gudi vuosteldin dárojduhttemav nuorttalap Sámen, lidjin iene-musát áhpadiddje. Sij lidjin oahpov válldám Råmså áhpadiddje-skåvián.

Áhpadiddje Anders Johnsen Bakke (1819-1884), Skiervás (Skjervøy), lij akta dajs vuostamusájs guhti gujddij sáme máná e oattjo nuoges buorre áhpadusáv sámegiellaj. Skåviå oajválattja álgodin sámegielav. Dát politikhka hæhttlu låhpaduvvat.

Dan båttå gå áhpadiddjen lij Návuonan, Ánde Jovnnabárne almodij sámmagirjev sámegiellaj. Girje galgaj sámegiela áhpadusán aneduvvat. Gå sán hiejtjå áhpadiddjen jagen 1883, de guovlo skåvllåstivrra ævtodij láttev nammadit dan virggáj. Ittij máhte sámegielav. Dárojduhttem lij merragátte guovlon garagoahtám.

Dæno ja Unjárga skåvllåstivrra gal biedjin virggáj sámegielak áhpadiddjiyt vájku Finnmarko skåvllådirekterra Thomassen ittij dav sidá. Sáj lijga Per Fokstad ja Isak Saba.

Guokta sáme áhpadiddje gudi lijga njunnjutjin sáme-politikhkalasj bargojn 1900-lågo álgon, lijga Isak Saba ja suv áhpadiddjeskåvlå venak Anders Larsen. Barggájga de aktan dárojduhttempolitikhav vuosteldittjat. Barggon sjattaj vuosteldimev organisierit. Nav bæggá vuostasj bále namma Sáme siebrre. Diedon ij lim dalloj dábálasj sámesiebrijt vuododit dalloj. Aj sáme avijsa almoduvvin. Da lidjin lájddijiddjen. Ájnas lij sáme oadtidjot válljiduv-vam Vuona Stuorradiggáj ja dåppe vájkudit dárojduht-tema vuosstij.


Ánde Jovnnabárne (1819-1884) ásadij ietjas *girjealmmudagá baktu sámmagirjev «Kris-talæš Salbmagírji»* jagen 1860. Sán lij iesj ienemus sálmajt járggålam sámegiellaj.



## Sábme Vuona Stuorradiggáj

Jage 1903 tjállá Isak Saba Larsenij ja oajvvat sáj galga-luluja aktan barggagoahtet politikhkalattjat:

*Mij sáme hættup guhtik guojmmásimme åskeldit ja iehttset guhtik guojmáma degu vielja. Dat la vuolggám sámeálmmuga mávsulasj mättos. Viessus sámeálmmuk!... Oattjo jáhkket sárnnedav muv skåvllåmánájda gá Mosesa histåvråv áhpadav. Iv másja merustallamis egyptagij ja israelattjaj vidjurijt, dasi mij dáhpáduvvá sámij ja láttij gaskan. Gev lulujda viehkedit, sámijt vaj láttijt, jus lulujda vuojnnet sámev ja láttev doarromin? gatjá-dav. Ja ávvudaláv gá agev oattjov vásstdusáv: Sámev! .. Dálla galgaluluj aj oadtidjot ålessjattugijt vásstedit sæmmiláhkáj. Ja dasi duodden galgalulun aj liehket sárnnoma ma bákti, ja avijsa ja diedon sámegiellaj.*



Návuona sáme siebrre vuododuváj jagen 1903. Siebrre almudahttjáj Sagai Muittalægje-avijsav. Gåván siebrre vuododiddje Larsen-vieljatja.

Anders Larsenij lij luondulasj vuolgájtjít fárruj dán politikhkalasj barggúj. Juo sæmmi jage, javllamáno 28. bieje 1903, tjåhkanin muhem Návuona sáme siebrev vuododottjat mij ierit ietján galgaj dåjmadahtját sámegiela avijsav. Tjåhkanibme tjadáduváj Silvetváhkin Návuonnan, ja avijsa namma sjattaj *Sagai Muittalægjen*. Ánde válljiduváj siebre tjállen ja avijsa dåjmaddidjen, ja suv viellja, Lásse, njunnjutjin. Lásse bargaj vissjalit Barggijbellu-dagán Návuona guovlon. Ánde dåjmadtjáj avijsav sijdánis Riehpovuonan gánnå sán lij áhpadiddjen.



Aviisan lidjin guokta dâjma. Dat galgaj ådåsijt ja álmmuktjuovggi-dusáv gilvet Vuona biele sámijda, ja dat galgaj sámij politihkalasj berustimij bielev rahtjat. Vieks ájnas lij guovdásj oajválattjajt oad-jot dárojduhttempolitikav rievdatjat, gá dat lij tjavggam Sámev miehtáj. Ándi-gáttsen lij jáhkko jut ássjálasj diedo lulun sådját oajválattjajt sámij bælláj. Gá oajválattja ávddála lidjin badjel gæhtjam ja sámijt álgodam, de lidjin dav dahkam gá lidjin nav diehtemahtása sámij vidjurij birra.

Ánde vuojnij máhettelisvuodav oadljot Isak Sabav válljidum Vuona Stuorradiggáj 1906 válgan. Navti aviissa 1905 javllamáno ævtodij Isak Sabav Finnmarko Barggijbelludagá ja sámij ævtodussan Stuorradiggeválggaj. Navti sjattaj aktisasjbarggo sosialistaj ja sámejuohkusa gaskan. Issát iesj vuojnij dáv aktisasjbargo luondulattjan sosialisma prinsipaj vuodon, danen gá:



Unjárgak Isak Saba – Sápp-Issát (1875–1921), sáme stuorradiggeáras 1906–1912. Sán duola degu tjálij sáme berraha lávllagav, mij vuostasj bále almoduváj Sagai Muittalægje-avijsan vuoratjismáno 1. bieje 1906.

Dán rjka ietjá politihkalasj belludagá li barggam gádodittjat sáme tjerda dán ednam nalta. Sosialissma ij dav sidá. Dat sihtá vielljavuodav tjerda gasskaj.

Issát aj sebraj válggaj sierra sáme-politihkalasj programmajn, manna nammaduvvin ájnnasamos sáme ássje maj ájgoj Stuorradikken barggat. Issát de válljiduváj Barggijbelludagá ja sámij ájrrasin Vuona Stuorradiggáj gánná lij guokta ájgegávda (1906–1912).

Isak Saban ij lim nav álkkes barggo liehket sámij ávdåstiddjen ja bælostiddjen Stuorradikken. Ittij oattjo nav állo ájggáj stuorradiggeájgegávdanis. Suv belludahka ittij ga lim doarjomin sámekultuvra ávddånahatttemav. Ságastattijn Stuorradikken jagen 1911 sámegiela profæssorvirge ásadi men Oslo universitettag (man virggáj Konrad Nielsen nammaduváj manjela), de belludagá stuorradiggejádediddje Nuortta-Råmså báhppa Alfred Eriksen javlaj:

.. dán álmmugin, jali dán tjerda manna I sáhka, ij la nav ájnas sadje mijá álmmuga gaskan, jut dat ánssit profæssorvirgev.

Ællosuittoássjijn Barggijbelludahka doarjoj politikav mij sidáj nav álov gá máhettelis gártjedit ællosuitov, mij lij hieredussan ednam-bargo ávddånbimáj Nuortta-Vuona vuonajn ja miehtsijn. Isak Saba belludakrádna lidjin dâssju látte, gudi rjka sosiáladarwinismav doarjun sáme giella ja æládusássjij giehtadaládijn, vájku dat moatte dáfon ittij hieba sosialisma ájádussaj ja vuojnnuj.

Moatte jahkáj nuorttasámij politihkalasj rahtjamusá manjela gujddiduvvá gá Sagai Muittalægje-aviissa hiejtij doajmmamis 1911 javllamáno, ja Isak Saba ittij desti válljiduvá Stuorradiggáj jagen 1912.

## Isak Saba jage 1906 válga sámeprágramma oajvvetjuokka:

1. Jubmeldievnastus galggá sámegiellaj dálkkuduvvat sæmmi ålov gå ávddål.
2. Åsko oahppogirje, rámát ja sálmmagirje, galggi ájn sámegiellaj gávnnut.
3. Merrabivdde galggi ájn bessat oasástallat ruossjaj sæmmi ålov gå ávddål.
4. Gæhtjalit sjiehtadit Suoma, Ruossja ja Svieriga oajválattjaj boatsojræjnnuhimrievtesvuodaj hárráj, nav vaj Vuona bielen sáme uhtsa divuda ávdás máhti boahtsujdisá ræjnnuhit dájn ríkajn jus hæjos fierda ja dálke dahki nievres guohtomijt ja dan diehti bukti niedajt Vuona biele sámijda.
5. Sámijn galggi liehköt sæmmi máhttelisvuoda gå láttijen ednamijt oasstet.

Isak Saba jage 1906 stuorradiggeválga sámeprágramma mij lij dárogiellaj.

## Samernes program.

(Tillæg til Det norske arbeiderpartis ordinære stortingsvalgprogram for Arbeiderpartiet i Finnmark fylke).

- |   |  |
|---|--|
| <b>1. Skolesaken.</b>   | hvor der også foredrages samisk kultur.  |
| a) Folkeskulen: Samisk skal være undervisningssprog for alle samiske barn hele skoltid, da ut i alle fag undtagen norsk. Norskundervisningen skal begynne først fra barnets 12. år. Undervisningens formål er for det meste | i) Stipendier for samisk ungdom som vil søke universitet, tekniske høiskole eller Landbrukshøiskolen.<br>g) Egct professorat ved Universi- |

## Vuona ja Svieriga bielen oarjelsáme vuododin sáme siebrijt

Sihke Svieriga ja Vuona bielen oarjelsáme vuododin sáme siebrijt vuosteldittjat oajválattjaj ællosujtopolitikhav, mij lij sidjj garasit vájkudam. Oarjelsáme politikhka lij danen ællosujtopolitikhka.

Jage 1904 vuododuváj Fatmomakke sáme siebrre. Njunnjutjin lij Elsa Laula, nuorra, oajvvás sámenissun. Siebre njunnjutja vuododin sæmmi jage ríkaorganisasjávnåv Lapparnes Centralförbund, mij ádåstuhteduváj jagen 1918. Ríkaorganisasjávnåv álgadij aj avjsav Lapparnes Egen Tidning manna ilmmin vihtta nummara ájgegávdan 1904 javllamános gitte 1905 snjilltjamánnuj. Jage 1919 rájes dat almoduváj namájn Samefolkets Egen Tidning, mij uddni ájn la dåjman namájn Samefolket.

Elsa Laula-gádtse gæhtjalit oajválattjajt oadttot fievrri politikhav mij luluj vaddet rievtesvuodajt divna sáme æladusájda, ij dåssju ællosujttuj. Dan hárráj sán tjálij girjátjav mij Ríkabæjvváj sádduváj. Tjállusines sán bælostij divna sámejuohkusij tjáhtje- ja ednamrievtesvuodajt. Sáme álmmugin ámaston ednamijt ma lidjin sáddjimrájá badjelin. Valla sáddjimrádjá-mærrádus ittjj hiereda ednambargo vijddánimev sáddjimrájá badjelin. Ja rádjá suodjalij dåssju ællosámij adnemriektájt. Mærrádus ij lim heva. Sáme gudi ettjin ámasta boahtsujt, hæhttujin Svieriga bákjida jáhtet ja dákku hedjunit ja hávkkat. Girje låhpan sán ávttij sámijt sebratjít vuododittjat sáme siebrijt ja aktisasj, gievras organisasjávnåv mij luluj rahtjat divna sáme æladusáj bielen.

Svenska oajválattja ettjin guorrasha Laula-gáttse ávttjimusájda.



Elsa Laula tjálos, mav Svieriga rijkabæjvváj sáddij.

Tjállusines sán baelostij divna sámejuohkusij tjáhtje- ja ednam-rievtesvuodajt. Sáme iemeálmmugin ámastin ednamijt ma lidjin sáddjimrájá badjelin, tjielggij ierit ietján.



Aj ednambargge kolonista garrisit moajtin Elsa Laula bargojt ja dagojt. Navti oajvveorganisasjávnå álggorahjamusá fámoduvvin ja gujddiduvvin. Akta sivájs máhttá aj liehket dat gå Elsa Laula jádij Vuodnaj ja vállduj Helgelánta guovlo Tomas Renberg nammasasj boatsojsámijn.

Valla Elsa Laula Renberg gal ittij hiejte sáme æladus- ja riektá-ássij barggamis. Bådnijnis sebrajga vuododittjat sáme siebrijt Trøndelága ámtajn ja Helgelátten. Vuododuvvin manenagi Søndre Trondhjems Amts Lappeforening, Nordre Trondhjems Amts Lappeforening, Helglandske Samiske Forening, Brurskanken Samiske Lag ja Brurskankens Samiske Kvindeforening. Siebre buoragit guládallin ja almodahttjájin bládev Waren Sardne, mij 1910 ja dárogiellaj boahtegådij.

Elsa Laula Renberg sidáj nuorttasámij vidjurijda oahpástuvvat ja bargagoahet sijáj siegen vuosteldittjat dárojduhttemav. Giesen 1911 vuostasj bále nuorttalap Sámen manádij. Subtsastuvvá sán oattjoj buorre aktijuodav ájnnasit vuodna- ja merraguovlo sámij sámevuodav ávdedit. Sidjij lij vuojn vájkudam dárojduhttem-politihkka sæmmi garrisit gå oarjelsámijda. Sæmmi jage, 1911, vuododuvvin sáme siebre Porsáñnguj, Dædnuj ja Buolbmáti. Jage ávddála lij Kárásjágå sáme siebrre vuododuvvam.

Vuona bielen oarjelsáme, ájnnasit Helgelándezas oarjás, ællim dudálattja ællosujtolágján mij bádij jagen 1897. Sij sihtin aj vájkudit ådå ællosujtoláhkaj, mav oajválattja lidjin gárvedimen ja mij galgaj guoskat divna Vuona biele ællosámijda. Láhkaássje sjattaj aj viek ájnnasin vuostasj sáme ríkatjáhkanimen Roandemin jagen 1917.



Uhtsa-Jovnna – John Johnsen jr. (1872-1925), Hillágurra, sebraj vuododittjat Buolbmáta sámesiebrev. Sán válljiduvváj siebre tjállen. Sán bargaj Buolbmáta suohkana ruhtavásstediddjen. Gåván aju suv oabbá, Jovnna-Liisá – Lisa Johnsen.

### Buolmak Samesærvest.

Vuoddalost 1911 dam 1. januar dimo 4 m. g. vuoddoduvvui Buolmak Sainisærve, valddo (general) éoaggalnias dollujuvvui, sagga sardnujuvvui, vuoddolaka bajaslokkujuvvui, lattok sisacallujuvvujegje ja njuolgatusadoallam (stivrrijubme) valljuvvui særve vuoddodægje bokte, S. A. Samuelson, Tanast.

Njuolgatusa doallami valljuvvujegje:

1 oudastolmai (formand) Henrik Aslaksen Vanagsieddest Varreolmajen Anders Eriksen Hormast, éatlen (sekretær) John Johnsen junr. Hillagurast, kasseraren Erik Andersen Buolmigest, ja bærraigæččen (revisoran) S. A. Samuelson, Tanast.

Særvvai ſadde sisacallut 30 latto gæk buorrendovdde, dokkitegje ja vuostaivaldde buok daina olgsuslokkujuvvum ja olgussaddijuvvum 17 paragrafain vuoddolagast, mi fabmosis

*Nuorttanaste tjálij siebre vuododime birra.*

## Sáme rijkatjåhkanime majt oarjjelsáme ásadin

Elsa Laula Renberg lij aj njunnutjin ásadimen vuostasj sáme rijkatjåhkanimev, mij lij Metodista-girkkon Roandemin guovvamáno 6.-9. bievvij jagen 1917. Ásadiddjen lij *Brurskankens Samiske Kvindeforening*, man njunnusj lij Elsa.

Ællosujo lähkaássje sjattaj aj ájnnasamos ássjen tjåhkanimen. Dáhpádus vijddát gulluj ja dagáj stuora berustimev Vuona avjsaj gaskan, vájku lij væráladooarro. Lidjin tjåhkanam suláj 150 sáme, ienemus oarjjelsáme ælloniehke. Svieriga bieles lidjin boahtám suláj 20 ælloniehke, valla nuortalamos Sámes Finnmárkos dåssju guovtes: Kárásjjágå ællosábme Klemet Mathisen Somby (1868-1942) ja Unjárga suohkana ruhtavássteddiddje John Roska (1876-1956). Såj åvdástijga Finnmárko ællosámijt. Tjåhkanime jádedid-djen válljiduváj Elsa Laula Renberg, ja sadjásasj jádediddjen Roska.

Tjåhkanime rabádijn Elsa Laula Renberg dættodij sámij aktisasj berustimijt rijkarájaj badjel ja javlaj ierit ietján:

*Miján sámijin ij la læhkám aktisasjbarggo, ep la oahppam aktan barggat tjærddan. Uddni mij vuostasj bále Svieriga ja Vuona biele sáme gæhttjalip aktan barggat.*

Dási ettjin oajválattja liikku, gå tjåhkanibmáj lidjin aj boahtám sámesunde ja ráddidusá ællosuittogáhttár Kristian Nissen ássjegiehtadallamijt tjuovotjít. Kristian Nissen bargaj njuolgga vuosstij sámij rahtjamusáj såbatjít aktisasj oajvvadusájda. Sån njuolgga javlaj nuortta- ja oarjjelsámijn ællim aktisasj berustime buojk åhpadusássjíjn. De ij lim nav imáj jut jur Elsa Laula Renberg gáhtjudij suv ja ietjá sámesundijt gudi lidjin tjåhkanimen, oajválattjajs sáddidum politijjan.

Elsa Laula Renberg ja Daniel Mortensson ejga oarjjelsámij ællosujo boahtteájge hárráj guorrasa. Mortensson, guhti lij Røros-guovlos, sidáj dættodit ulmmelasj ællosujtov, mij bierggobuvta-dimev dættodij. Laula Renberg javlaj dibddit dajt sámijt gudi sihti, biergov buvtadit, valla dibddip mijáv gejn la suláj 100 boahtsu sámij árbbedábálasj iellemav viessot.

Daniel Mortensson ittijj doarjo sámegiela åhpadusáv skávlájn. Sáme máná galggin dåssju dárogielav oahppat. Daj birra sán tjálij Waren Sardne avjsanis. Oarjjelamos sáme lidjin juo moatte láhkáj viehka mudduj dárojduhteduvvam.

Tjåhkanibme válljj lähkajuohkusav mij galgaj 1897 ællosuittolágav gehtjadit ja rievddadusájt ævtodit ma vieledi sámijt ja ælloniehki berustimijt, váj sáme bessin bierggit jáhlettesábmen Vuonan boahtteájgíjda. Gáhtjun Svieriga biele sámijt tjuovotjít juohkusa bargov. Dát oajvvadus gergaj jagen 1919.

Tjåhkanime ásadiddje:  
gáro bieles: Ellen Lie,  
tjåhkanime tjálle; Anna  
Löfwander Järwson,  
tjåhkanime «ruhtaministar» ja Elsa Laula  
Renberg, tjåhkanime  
jádediddje.





Vuostasj sáme rijkatjåhkaniibme, mij lij Roandemin 6.-9.2. 1917.




Muhtem avijssa almodin dát tjuorggasav jahketjåhkani-  
mes. Sárnneståvlân Unjárgak Johan Roska. Oalges  
rabdan tjåhkåhimen Kárásjjágåk Álet-Lemet – Klemet  
Somby.



Álet-Lemet – Klemet Somby sárgoduvvam tjåh-  
kanimen. Sárggum: Astri Aasen.



Oarjelsábme Daniel Mortensson guhti ittij doarjo  
sámegiela áhpodusáv skávlâjn. Sán dâjmadij avijsav  
Waren Sardne 1910-1913 (mij vas ilmaj 1922-1927).



(Waren Sardne)

Ællosujto láhkaássje lij aj guovdátjin rijkatjåhkanimen Roandemin 1921 guovvamáno. Lidjin ienemusát oarjjelsáme gudi tjåhkanibmáj sæbrrin. Dåssju akta lij Finnmarkos boahtám: Ingá-Biehtár – Petter Nilsen Banne, Unjárga ællosábme. Tjåhkanimev stivrri-jin látte ámmátulmutja: ællosujttogáhttár Kristian Nissen, guhti tjåhkanimev jádedij, skåvllåjådediddje Bernt Thomassen (guhti ávddåla lij barggam Finnmarko skuvledirektevran, 1902-1920), ja sámesunde. Tjåhkanimen sáme oadtnun unnán ájggáj, vájku guovtes sámesundijs doarjojga sámij gájbbádusájt rievddadit oajválattjaj láhkaoajvvadusáv váj luluj ællosujtov buorebut sujttit. Esski jagen 1933 vatteduváj ådå ællosujtoláhka mij lij åbbå rjika gáktuj.



Rijkatjåhkanibme Roandemin 1921 guovvamáno. Gåvå gassko: Unjárga ællosábme Ingá-Biehtár – Petter Nilsen Banne.

## Rijkatjåhkanibme Svieriga bielen 1918

Svieriga biele oarjjelsáme gudi Roandema tjåhkanibmáj sæbrrin 1917, ásadin muodugasj tjåhkanimev Staaren (Östersund) 1918 guovvamáno. Guovdátjin lidjin ællosujtto- ja åhpadusássje. Daniel Mortensson sebraj tjåhkanibmáj.

Tjåhkanibme vas mierredij hekkav båssit Lapparnas Centralförbundaj, mij ij lim doajmmam moatte jahkáj, ja avisav almu-dahttját. Navti almudahtjáj avissa *Samefolkets Egen Tidning* 1919, mij uddni ájn almoduvvá namájn *Samefolket*.

Dán dáhpádussaj ettjin lijkku Svieriga oajválattja, ájnnasit danen gå tjåhkanime ásadiddjij «lij aktijuuohta sosialistaj». Dalloj vuojn lij sosialissta revolusjåvnnå vijddánam Euråvpåv miehtáj. Ja sámjn gal lij aktijuuohta sosialistaj. Daniel Mortensson, tjåhkanime ságastalle, gáhtjudij ietjas sosialisstan, ja Finnmarko sáme giellaberustiddje lidjin aktisajbargov álgadam látte sosialistaj, mij lij buktám Isak Saba lij válljiduvvam Vuona stuorradiigjáj jagen 1906 Barggjibelludagá prográmma nanna. De Svieriga oajválattja aj vuojnnin hæhttujin gáhttigoahetet sáme-politihkalasj tjåhkanimijt ja dajt stivrrigoahet.

La iehpetjielgas lidjin gus Svieriga oajválattjaj gátsadime danivvan gå oajvveorganisasjåvnnå ittijj dåjma sáme biektelis, politihkalasj organisasjåvnnán. Esski nuppát værálaldoaro manjela buorráni aktijuuohta oajválattjaj ja sámij gaskan, manjel gá Svieriga sámj ríkasidebrre lij vuododuvvam jagen 1950.



Sáme rijkatjåhkanibme Staaren jagen 1918.

## Nuorttasáme vuododi rijk-organisasjávnåv

Nuortta merrasáme lidjin garra dárojduhttembiekkav gierdda-goahtám. Merragátte skávlåjn jurra desti gulluj sámegiella. Dat lij gieldeduvvam. Dav ettjin máhte desti dákkitit merrasámij njunnutja. Sij lidjin gullam Roandem-tjåhkaniibme jagen 1917 lij buoragit vuorbástuvvam.

De biehtsemáno 9. biejve jagen 1919 tjåhkanin badjel 100 sáme Bonjákasaj Dædnuj. Ilenemusoasse båhtin Dænos. Ráddidusá ællusujttogáhttár Kristian Nissen lij aj boahtám. Tjåhkanimev rabádijn dænok Pávvél Niljas – Nils Pavelsen (1863-1958) javlaj sámegiella lij dálle sjaddam vuorbedis dilláj, danen gå skávllålähka gieldij adnemis sámegielav skávlåan:

*Mij sáme lip akta viek uhtsa tjærdda dán mijá ednamluoda nanna, gudi lip læhkám rjido nævvon. Vájve i vuojnnet muhtem oasse láttijs sihti ierit rievrot mijávdívrassamos ja gærrásamos åbmudagáv, iehtjama iednegielav... Diedon galgap mij oahp-pat dárogielav buorijn mielajn, valla ij garra nákko vuolen. Garra dárojduhttem skávlåjn ij la beru buorissjivnnjádusáv buktám, valla aj garrudusav.*

Sámegiela hárráj tjåhkanibme sárnoj tjuovvovattjat:

- Sámegiella galggá aneduvvat divna ásskoåhpadusán sámemánájda divna jahkedásijn.
- Sámegiella galggá åhpadusán aneduvvat sámemánájda gájt gálmimmá vuostasj jage.
- Dárogiela åhpadus sámemánájda galggá sæmmiláhkáj dáhpáuvvat gå amás giela åhpadus Vuona skávlåjn.

Javllamus sáddiduváj Vuona ráddidussaj.

Sæmmi giese rjkaorganisasjávnå Sáme Sentralsearvi vuododuváj. Marit-Lemet – Klemet Pedersen Solbakken, Rávttoš-njárgas Porsángos, válljiduváj njunnutjin; tjállan John Haug, Nuortta-Råmsås ja ruhtadoallen LemetLemet – Klemet Klemetsen Hætta, Guovddagæjnos.


Sieburre galgaj doajmmat rjkasiebrren ja barggat divna sámj ássjjij. Dat gæhtjalij aj barggat ællosujtojn láhkaássjjij, mij lij sæbrráj ållu ådå ja amás. Vuojná oajválattja lidjin dåbdådam lidjin gárvedimen ådå ællosujtolágav mij galgaj ávvå rijkav gåbttjåt. Láhka vatteduváj jagen 1933.



Dænok Pávvél Niljas – Nils Pavelsen (1863-1958) buoris-boahema hålav sárnoj sáme tjåhkanimen Bonjáksan biehtsemáno 9. biejve 1919.



Porsángok Marit-Lemet – Klemet P. Solbakken (1878-1926), Sáme sentralsearvi njunnusj.



Guovddagæjnos LemetLemet – Klemet Klemetsen Hætta (1883-1955), Sáme sentralsearvi stivrrasebrulasj ja ruhtadoalle.

## 1920 rijkatjåhkanibme Bonjáksan

Sáme sentralsearvi ásadij rjkkatjåhkanimev Bonjáksan Dænon snjiltjamáno 10.-12. bievjöt 1920. Badjel 100 sáme lidjin boahtám. Aj oarjesábme Elsa Laula Renberg lij tjåhkanibmáj boahtám. Sujna lij vuogas hålla, manna dættodij sáme hæhttujin aktan barggat várjjalittjat sijá árbbedábjit ja rievtesvuodajt. Dav dættodijga aj siebre njunnusj Marit-Lemet – Klemet P Solbakken ja tjállle John Haug, De ij lim imáj jut tjåhkanimes båhtsijdij sámj tjerdalasj mårjidis, dagu muhtem aviisa aj tjállin. Ásadiddje dahkin slávgáv aj masi lij tjáleduvvam: ledne tsåhke varddá gå ietjas máná e sidá suv dåbddåt. Nav garrisit lij dárojduhttempolitikhka vájkudahtjám sáme familjajda.

Tjåhkanibme válljj sáttajuohkusav mij galgaj Vuona oajvvestádaj vuolget «sárnotjit sáme ássjjit» ráddidussaj. Duola degu galgaj sáttajuogos sierra sáme ájrrasijt gájbbedit Vuona stuorradiiggáj. Sáttajuohkusa sebrulattja lidjin: Nils Pavelsen, Dædno; Klemet P Solbakken, Porsángjo; Josef Isaksen, Kárásjåhkå; John Haug, Nuortta-Råmsså ja Elsa Laula Renberg Nordlánnda. Miján ælla diedo dan birra sjattaj gus sáttajuogos guossidit oajvvestádav «sáme ássjjit sárnnot».

Åvddål Bonjákasa ríkkatjáhkanime giesen 1920 Piera-Jovsset – Josef Pedersen Baukop, Sarvesvuopmi (Kolvik) sáme siebre ávddáulmusj, sáddij dáv tjállusav Nuorttanaste-avijsaj (07.06 1920). Dánna prienntip vuostasj oasev tjállusis:

## Iellem jali jábmem!

Sáme vielja ja oappá! Diehtebihtit mijá gaskan la dálla dakkár viissjalis buolle, beraj lihtudis mij barggá tjoahkkitjít ja aktij tjanáttjtít divna sámijt, guhkken ja lahka, avtan doahkken, avtan álmmugin vág gáhti ja suodjal vuojnjalasj árbev, ávddål gá sámeálm-muk állu massá suv «árbbesilbajdis» ja dávverijdes. Suodjalime gáktuj mijá uhtsa ja hæggarahppen berrahattjav, guhti huoman la dálátjj starjjam tjadá divna vuostemannamij ja doarádallamij jahketjuodij tjadá. Guhti I starjjam huoman viesotjít, ja ávddánam dan dætto vuolen majt garra luonndo ja álmmuk li midjjí rásskim, guhkes mujtoidis ájge miehtáj. Sáme vuolus-duolmmijiddje li ávddála imájdallamij sjaddam ájtsat jut «biejve bárñijn», sámijin la dakkár sávres hægga ja iellem. Sij li agev hevvanime rabdan læhkám. lednegiella lij dat tjegos «giejdde fábmo», mij la mijáv várjjalam hádjusimes ja mijáv adnalam tjoahken gitta udnásjga bæjvváj. lednegiella, dat gájk stuoremus ja gærrásamos majt akta ulmusj árbbi suv ájttegijs! Dat la berraha «árbbesilbba!». Dat la dat ájis árbbeoasse mav bierrip gáhttít dagu hekkama. Jus gielama massep, de massep divna! Histávrå basstelis bena dalloj sihkku ierit mijá namáv histávrå bláde nanna... Allop ávvánis dibde návti gevvat!



Sáme ríkkatjáhkanibme Bonjákasan Dænon giesen 1920. Ávddálin háhtta oajven: Marit-Lemet – Klemet P. Solbakken, Sáme sentralsearvi njunnjusj. Duogen slávggá masi lij tjáleduvvam: ledne tsåhke várddá gá ietjas máná e sidá suv dåbdddåt.

## Sámelissta 1921 stuorradiggeválgajda

Sáme sentralsearvi organisierigádij sámelistav aj 1921 stuorradiggeválgajda. Lij ájnas almodit avijsav mij luluj tjuovggit válgabar-gov. *Sagai Muittalægje* lij låhpaduvvam jagen 1911. Navti riegádij Samealbmug-avijsa, man dâjmadiidjen válljiduváj Piera-Jovsset – Josef Pedersen Baukop (guhti lij njunnjutja, Marit-Lemeta, viellja).

Avijsa almodij lista ævtodusájt ja ávttijí sámijt jienastittjat Finnmarko sámelistav – *Samernes liste*. Lista njunnjutja lidjin: Ole Erik Tapi, Buolbmát; Per Fokstad, Dædno; Josef Isaksen, Kárásjjáhkå; Klemet Klemetsen Hætta, Guovddagæjnno ja Klemet Pedersen Solbakken, Čuđegiedde. Lisssta oattjoj binná jienajt, ja vargga 50 jage gállin ávddål gá Finnmarko sáme vas ásadin sámelistav stuorradiggeválgaj (1969).



Nr. 4	Olagut heotta evigande valent ja maksu kr. 8,00 jikkholagasi	Vadsø den 21. oktober 1921	Utkommer en gang i vinter og kommer ikke ut i sommer	1. Ert.
<b>Samealbmuk</b>	<b>Stem paa samernes kandidater!</b>	<b>Samernes liste</b>	<b>Til Aboneenterne!</b>	
berrejk dal doallat ovtamela-lazzat sin jiečaset lista bæte dal dam vuostasarga.	Mandili stemmet venstre daibe era parhlistat miele? Maid burid la venstre ja dak erressat bargum samidi —?	Ei maideg arago adnam sin ålo duške stemma spivien!	„Samealbmug“ er hittil ukommet i 3 nummer, og da kvartalet først begyndte i oktober, blir dette halvnummer at betrakte som et ekstra valgnummer.	
Det er denne liste som alle upolitiske værigere i Finnmarken nu mås samles om.	Samei seige la domregjaid goddam Haab. Land stuora-diggat.	Det er denne liste som alle upolitiske værigere i Finnmarken nu mås samles om.	Redaktionen.	
Vi faar	Osoddet dambiev dia jietjå-det olma erdam!	Vil du Finnmarks ve og vel saa: Stem paa „Samernes kandidater“!		

Buolbmát Jávo-Erke – Ole Erik Tapi (1867-1935), lij Finnmarko sámelista njunnjusj 1921 stuorradiggeválgajda. Sán lij oasesálmåj, girkkodálkå ja lij aj muhtem ájge Buolbmáta suohkana suohkanoajvve.

Samealbmug.

## Stuorradiggeválga 1921. Sámelista jiena Finnmárkon

JIENA		
Suohkana	Låhko	Prosænnta
Guovddagæjnno	15	19,0
Áltá	7	0,5
Fálesnuorre (Kvalsund)	5	1,9
Porsánŋgo	26	6,8
Kárásjjáhkå	108	44,4
Dædno	63	14,1
Buolbmát	47	41,6
Unjárgga	76	23,5
Oarjjelij-Várjak	63	4,5
Gáŋgavijkka	8	0,2

Gálldo: Regnor Jernsletten: Samebevegelsen i Norge. Ide og strategi 1900-1940.  
Universitetet i Tromsø, 1986.

## Dæno sámepolitihkkára gæhttjali barggijbelludagá baktu politihkkit

Sáme sentralsearvi sjávvunij ruvva, gå siebre ájrrasij gaskan lidjin ulmutja gudi láhpalåhpan gámedin dan dákajt. Ettjin oajvá-lattja ga gehtja tjáppa tjalmij dán ríjkavijddásasj organisierimij.

Jage 1924 stuorradiggeválga sáme vas gárvedin, valla dán bále sierra sámeprógrámmajn mij lij lasádussan Barggijbelludagá prógrámmaj. Lasádusáv lidjin dahkam «Dænok belludakvenaga». Prógrámma duodjár lij åhpadiidje Per Fokstad, guhti 1921 lij sámelista nuppádin ævtodussan. Dálla sán gæhttjalij sámepolitihkav fievrrit Barggijbelludagá baktu, dagu Isak Saba aj lij barggam nággin jage åvddála.

Prógrámma sulástij sámelista jage 1921 válgaargumentatj ja -ássjijt. Ájnnasamos tjuokka lidjin: skåvllåássje, ednambarggo, ællosujtto, virggeulmutja, sámegielak bájkkenamá ja diehto-juohkemtjállaga. Duodden ællosujtuj, mij láhkasuodjalimev ánnssidij, divna tjuokka dættodin man ájnas sámeigiella I. Duola degu lij ájnas oadotjot giellagájbbádusáv sihkoduvvam ierit 1902 ednambarggolágas, mij dárogiela máhtov gájbbedij dassta guhti galgaj åttjudit nav gáhtjodum stáhttaednamav oasstet Finnmarkos. Stuorradikken ij lim aktak guhti berustij várjjalit sáme gielav ja kultuvrav. Dárojduhttem lij garram.

Per Fokstad tjálij sierra sáme åhpadusplánav aj mav Dæno sámesiebrre jagen 1924 sáddij Parlamentalasj skåvllåjuohkusij, mij lij nammaduvvam jagen 1922 tjielgadittjat Vuona skåvllå-vidjurijt. Åhpaduspládna lij huj dievalasj ja dættodij divna åhpadus sámeguovlo skávlájn galgaj sámeigiellaj dáhpáduvvat, duodden dárogiellaj åhpadusán. Åhpaduspládna sáddiduváj Girkko- ja åhpadusdepartemænnatj jagen 1923 ja dat nammadij sáme allaskåvllå ásadimev aj. Parlamentalasj skåvllåjuogos sáddij åhpadusplánav guláskuddamij ierit ietján Finnmarko skåvllådirekterraj, mij plánav dagáj dåssjen ja jallan. Sán ierit ietján tjálij:

Åhpadiddje Per Fokstad la vissjalis sámegiela bælostiddje ja luluj sihtat sámegiela anov skåvlân, girkkon, dikken, suohkanij, fylkaj ja stáhta háldadusájn. Suv boahtteájge niehko la jut sáme oadtju åhpadusáv skåvlân iednegiellasisá, de åvddâni vissjalis kultuvrrálmugin... Suv vuojnno la sáme máhttja ja bierriji åvddâni kultuvrrálmugin manna I sierra giella ja girjálasjvuhta. Dát ájádus máhttá suv vuojno milta ålliduvvat gå sámegiella oadtju sæmmi árvov gå dárogiella skåvlâjn, girkkon ja háldadusájn. Sán luluj sihtat aj sáme allaskåvlâv, masi sáme lulun bessat álkkebut, ja diedon sáme giela ja kultuvra várjjalime ja nannima gáktuj... letjá bágoj javladum: gájbbádus jut Vuodna galggá sáme vuojnjalasj kultuvrav åvdedit, mij ij gávnnu. Ulmusj máhtáluluj dáv gáhtjudit tjáppa ájádussan, valla dát la dåssju ájádus mij ij la jávsådahtte.

Aj Buolbmáta åhpadiddje Hans Baukop sáddij 1926:s departemænnatj oajvvadusáv rievddadit skåvllålágav, nav vaj sámegiela anov aj vieledij. Valla sihke Fokstada åhpaduspládna ja Baukopa láhkaoajvvadus hávkkin dárojduhttembiekkaj sisi.



Marit-Hánsa – Hans Baukop (1889-1963), åhpadiddje ja klâhkar. Sán lij Porsáñgon riegádam, våttsij åhpadiddje-skåvlâv Voldan Sámemisjávnâ ruhtaviehkijn. Lij åhpadiddjen Buolbmátin 1925-1945. Doaro manjela sán familijajnis jádij Osloj gâsi sán jámij.

Pávvel-Niljas Piera Per Fokstad (1890-1973), åhpadiddje ja sáme filosâvffâ, vuolle Dænos. Sán tjálij sáme åhpadusplánav (1924) mav Dæno sámesiebre namán sáddij Girko- ja åhpadusdepartemænnatj. Åhpadusplánan oajvvadij sámegiela åhpadusáv nannit skåvlâjn. Skåvllåoajválattja hilggun oajvvadusáv, danen gå dárojduhttempolikhka galgaj joarkeduvvat.


Piera vissjalit tjálij tjállusijt avjsajda ja ájggetjállagijda. Dánna muhtem biekteleis bágo ma almoduvvin Sabmelaš avisan:

Da ulmutja gudi e allasisá berusta sijá ietjasa dilijt gátsedit, e sjatta viehkev oadtjot goassak dajt gievrap ulmutjijs. Sij badjelgehtjaduvvi. Valla sij vuodju aj ietjasa dåbdojda. Ja dat la baháp dille.

Jus sáme e álge væhkkálakkoj sijá ietjasa ássjев gátsedit ja dav åvdedit, de baláv mijá ájgge tjærddan sjaddá oanegasj. Gå akta ulmusjtærdda ietjas bálkes, gå ij suv tjerdistis ane árvov, de láhppá ietjas sissnjálasj fábmojt.

Giella I vájmo dálkkå, sielo gâvvå. Sámegiella dálkku mijá dåbdojt. Dat la mijáv ráhkâdallamgiella, mij vájmonimme báktjasijt Jubmelij dálkku. Dat la mijá ráfe buorástahttemgiella. Dav gielav sihtap gullat mijá manjemu hekkaråhettimin.

Sabmelaš 19.08.1940.



## Suoma biele sámij dille

Doaro ávddála lidjin sáme ássje Suoma bielen vuorbedis dilen. Sámegiella ittjjih heva aneduvá skåvlájn ij ga vuojnjalasj dievnastusájn. Suobma besaj Ruossja fábmodusás ja anij divna fámojdis suoma gielav ja kultuvrav nannitjat ja ávdedittjat. Manjela gå sjattaj sierra ríkkjan jagen 1917, de aneduvvin gis ållo fámosisrikska ríjdojda. Dán dilen hávkkin sáme ássje. Da dássjánibmáj mannin, ij oajválattjaj vuojnno.


Sámij bælostiddje ettjin gal dákida oajválattjaj badjelgæhtjamav. Manjetjavitjan 1932 muhtem suobmelasj profæssura ja dutke tjåhkanin Helsinki universiteettaj vuododittjat Sáme tjuovggidussiebrev man barggon galgaj liehket buojk kursaj ja dutkama almodibme. Álggostivran lidjin profæssura Vainö Lassila, Paavo Ravila, Frans Aima ja dáktára M Mustakallio ja T. I. Itkonen. Stivrra ruvva ævtodij Suoma ráddidussaj sáme dájmajt majt galgaluluj ruvámusát ållidit, ierit ietján:

- stáhta ruhtadárjajn sámegiela ábc girjev almodit.
- stáhta ruhtadárjajn sámegielak avijsav almodit
- stáhta bielen sámegiela kursajt suobmelattjajda fállat, dagu pasiænntasujttárijda ja báhpajda, gudi sáme birrasij ja vidjurij barggi
- divna lága ja njuolgadusá ma sámijda ja Sábmáj guoski, galgalulun sámegiellaj prienntiduvvat.

Ábc-girje ja ietjá almodime ruvva sjaddin siebre ájnnasamos barggon. Ja juo jage 1934 jahketjåhkanibme besaj ávvudallat siebre Sabmelaš-avijsa vuostasj nummara almodimev. Jagev manjela oadtjogådij Sabmelaš stáhtas ruhtadárjav.

*Johan Nuorgam (r. 1910), Idjajávres Anáris, sáme kultuvra berustiddje ja ávdediddje. Sán sjattaj vuorbedisuoda diehti vuolget jagen 1931 Idjajávres Helsinki sujtuu. Boatsoj ij suv tjalmáj tjievttjastam vaj tjalmédibmen sjattaj. Helsinkin ij vihita jage, ájnnasit danen gå ij dutkij sáme giela ja kultuvra rádevadden. Fáron ij vuododimen Sámi Čuvgehussearvi ja álgo rájes ij vissjal siebre bargon. Gå Sabmelaš-avijsa almoduvvagådij (1934), de ij avijsa dájmadahkaj stuora viehkken. Profæssor Paavo Ravila vattij álgus girjev: «Dološ dábit ja vierut Idjajávrri guovlluin Anáris» (1934) majt Johán ij sunji subtsastam. (Almoduváj nuppádis jagen 1982).*

*Johan Nuorgam nuortas jádij Ánarij jagen 1936. Doaroj manjela ij fáron vuododimen Sámiid Lihtu mav måttijt jagijt aj jádedij.*



## Ufuohtá sámesiebrre 1921 - 1925

Birrusij 1920 rahtjagåhtin muhtema Bálággin sámesiebrev vuododit Ufuohtá guovlluj-guovlluj. Njunnutjín gájt lidjin åhpädiddje Nils Johnsen Sarri ja Henrik Kvandal ja ællosábme Pehr Tuuri. Javlamáno 21. bieje 1920 vuododuváj Ufuohtá sámesiebrre. Tjåhkanibme lij Kalvásen-skåvlán gánnå Kvandal lij åhpädiddje. Nils Johnsen Sarri válljiduváj njunnutjín ja Henrik Kvandal tjállan. Dalá manjela lij stuoráp tjåhkanibme. Dalloj lidjin tjåhkanam lagábu 40 sáme. Tjåhkanimen tjielggij Pehr Tuuri sámij dilev birra Svieriga bielen. Pehr Tuuri lij jagen 1920 jáhtám boahtsujis Čohkkiras Ufuohtá guovlojda. Sán vuojn sebraj sáme ríkatjåhkanibmáj Staaren (Östersund) jagen 1918 ja dábdáj buoragit ællo Niehkij gássjelisvuodajt rádjáguovloj.

Ufuohtá sámesiebrre oattjoj buorre aktijuodav oarjelsámij ja anij Waren Sardne avijsav diehtojuohkembargon.

1924 guovvamáno mierredij siebrre sierra sámelistav ásadir dan jage stuorradiggeválgajda. Henrik Kvandal guossidij jahkásasj Májajávrre tjåhkanimev ávtjimin oarjelsámijt sebratjít lisstabargguj. Dasi vuolgi fárruj Elsa Laula Renberg guhti sjattaj lista nuppádin ævtodussan. Lista njunnutjín lij Henrik Kvandal. Lissta oattjoj dássju badjelasj 100 jiena, mij lij Kvandalaj vájven. Sáme ælla vil nuoges láddam aktan bargattjít, sjuohket Waren Sardne avijsan 01.11.1924.

Kvandal-gádtse gæhttjalin ådå sáme ríkatjåhkanimev organiserit, manjela gå lidjin Finnmárkov guossidam giesen 1925 æjvalimen Sáme sentralsearvi vuododiddjij Porsángon, Dænon ja Unjárgan. Valla ássje bátsij, ælla ga miján diedo manen. Ja Ufuohtá sámesiebrre aj hiejtij doajmmamis.

Henrik Kvandal familjajnis. Henrik Kvandal lij riegádam jagen 1865 ja jámij 1950 basádismáno, 85 jage vuorrasin. Famillja bargaj boahtsuj valla lidjin árrudahtjám Kvandalen-bájkkáj lahka Bjerkvika. Henrik barggagádij ræjnnuhiddjen, valla láhpan suv famillja någåj. Åt gaskav lij Lofåhtan guollimin, valla dáppe gal lij suv buoremus ájgge «dalloy gå besaj gátten liehket», subtsastam la.



Sán válldegádij oahpov ja váttsjå åhpadiddjeskávlåv Elverumbájken 1894-1896. Bargaj åhpadiddjen sihke Lágesvuonan, Ivgon ja Divtasvuonan ávddál gå árruj márkosáme Kalvásen-bájkkáj jagen 1902. Muhtem jage ávddála lij válldum bájke nejsutjijn Eline Johnsdatterijn, guhti lij 12 jage sujsta nuorap. Dáppe Henrik bargaj åhpadiddjen desik vuorastuváj.

Henrik Kvandal vissjalit sáddij tjállusijt Samefolkets *Egen Tidning* ja *Waren Sardne* avijsajda. Waren Sardne-dájmaddidje Daniel Mortensson guossidij suv giesen jagen 1922 ja tjálij aviisanis duola degu návti suv birra:

*Kvandal la 55-jahkásasj álmåj ja muv stuorrudagán. Sán la goarves. Sujna li skávtjá ja sujna li tjáhppisrusjkis tjalme ja tjáhppisrusjkis vuopta. Gápptáj tjágná bæjválattjat. Sán la tjiehpes tjálle ja tjiehpes diktatjálle. Dán jage la oadtjum stáhttastipendav dutkatjít Ufuohtá guovlo árromav, æládusájt ja subtsasijt. Sujna l hálvva stuorra sijda girjjevuorkká, gánnå gávná vijssudagá gáldojt. Rámádav dåbddå ja buoragit máhttá. Sán la læstadiánalasj åskulasj dagu ienemus Ufuohtá sáme.*

Sán berustij aj sáme histåvrás ja almodij gálmámmá girje dan birra: Samefolkets historie I-III. Gå suv manjemus girje almoduváj jagen 1947, de lij iehpedahtjám sámij boahtteájge hárráj. Dárojduvvá gus sáme kultuvrra állu? La gus mijá ájgge nåhkåmin?



Pehr Tuuriha gáván gáro bielen, ja de Henrik Kvandal ja suv iemet Eline. Pehr Tuuri jádij Svieriga biele Dálmas Vuona bælláj Ufuohtá guovlluj boahtsujis. Manjela jádij Alaskaj gánnå bargaj ræjnnuhiddjen.

Dárojduhttempolikhka lij garram ja vuosedij gássjel lij adnalit hekkan Vuona biele sáme siebrijt, ma oanegis ájgen hiejttin doajmmamis. Dasi duodden muhtema jádediddjijs jábmin dán ájge. Ja Waren Sárdne-aviissa aj láhpaduváj. Vuojnunagi lidjin nahkam sámijt hávkkadit álmmugin, gájt Vuona bielen, jáhkin vissjalamos dárojduhette. Dav tsoavtsoj Finnmarko skåvllådirektra. Valla aj muhtem dutke lidjin dan vuojnon, duola degu lappologa J. Qvigstad guhti jagen 1935 dåbdåstij: Gå sáme gáhtu, de merkaj adnegåhti látte biktasijt, viessomvuogev ja gielav ja hiejtti sámástimes, de ládden anáduvvi.

Valla nav ittij geva – állu. Dan birra tjielggip boahtte kapihtalijen.

## Hárjjidusá

1. Manen lij Anders Larsenij ja Isak Sabaj luondu-lasj sæbrrat bargatjít aktan dárojduhttempolitihka vuosstij?
2. Gåktu organisierija dav bargov?
3. Isak válljiduváj Vuona Stuorradiggáj jagen 1906. Sán lij válggaj sæbrram sierra sáme-politihkalasj prógrámmajn. Manen?
4. Elsa Laula Renberg lij njunnjutjin organisierimin oarjjelsáme siebrijt. Tjielggi suv sáme-politihkalasj berustimijt!
5. Goassa lij vuostasj sáme ríkkatjåhkaniibme? Tjielggi tjåhkanime oajvveássjijt!
6. Riikkatjåhkanimen oarjjelsámeguovtes Elsa Laula Renberg ja Daniel Mortensson ejga guorrasa oarjjelsámij ællobargo boahtteájge hárráj. Manen? Tjielggi sunnu vuojnojt!
7. Goassa vuododuváj vuostasj sáme ríkkasiebrre? Mij lij dan namma?
8. Gudi lidjin siebre duogen?
9. Majt oattjoj siebrre ájggáj sáme-politihkalattjat?
10. Manen hiejttin sáme siebre doajmmamis 1920-lágo láhpan?

## Duodde hárjjidusá

### Diehto I fábmo

Dát báhko bierriluluj juohkka skåvllåuvsa badjel tjuodtjot. Danen gá made ienep ájgge vássá, dade ienep duohtan gávnaduvvá, jut diehto I fábmo. Dálusj ájgijn vuorjámusát mijá ednamin máhttin láhkåt ja tjállet. Dalloj ulmusj bierggij huj buoragit, jus ij máhttám stávit avtav aj bágó, ij ga ietjas namáv tjállet. Vájk man hædjo suv girjálasj diehto luluj, de ittijj huoman sjatta skámo vuolláj, jus dåssju ietján lij dåjmalasj ja låjes ulmusj.

Valla dálla ij la desti navti. Dálla ienep gájbbeduvvá gá jut ulmusj máhttá guollit, ednamav barggat, slihturij gehtjatjít, muorrit, giedajis duodjuhit ja nav vil. Dálla gájbbeduvvá moatte lágásj girjálasj diehto, vájku mij iellemdilijt ietján lulun. Ja gá ájgge vássá, ienep ja ienep gájbbeduvvá. Dij, gudi dálla lihpit vuorrasa ja tjuorggada, buoremusát diehtebihtit gåktu gájbbádusá ájge milta li stuorrum ja stuorrum, jut iellem ij la desti nav avtagerdak gá dijá nuorravuoda ájge lij.

Dálen girjálasj diehto lij buorre ja sávadahtte. Dálla I dárbusj. Dan diehti ij ulmusj desti iesj mierreda galggá gus diedov åmastit vaj ij. Dálla diehto nággiduvvá ulmutja nali. Stáhtta I ássjev válldám hálldusis. Dálla ij la desti æjgádij mielan, sidátji gus mánájdisá skåvllåj sáddit vaj e. Sij hæhttuij nav dahkat dajna gá láhka nav gáhttju.

Ja lisj dávk sihke buorre ja ávkálasj ja dárbusj jut nav la. Danen gá æjgáda álu e ietja dádjada mij la mánájda stuoramus ávkken. Moadda æjgáda dåssju ájádalli dasi, mij la sidjij gæhppadamos. Ja sijá mielas vuojnnu degu li buoragit bierggim almma diedo dagi, de vil máná aj máhti sæmmi láhkáj bierggit. Valla dat la boasstot. Æjgáda e bierri ájádallat manus, dan dile ja dan gájbbádusá nali ma dalloj lidjin gá ietja lidjin nuora. Val-la bierriji agev ávddálijguovlluj ájádallat, dan ájge ja dile ja dan gájbbádusá nali ma sjattatji gá máná stuorru. Ja bierriji mujtet dade manjen gá ájgge vássá, de iellemdille rievddá, ja gájbbádusá stuorru.

Dát tjálos lij Same Usteb-avijsan jagen 1899. Li gus dá ájádusá ájn uddni ájggeguovddelisá? Tjále essayav, 2-3 biele!

# SÁME DÅHKKIDUVVI SIERRA ÁLMMUGIN DÁROJDUHTTEMA LÅHPADIBME 1945-1980

## Sáme oahpestiddje válldi åvdåsvásstádusáv

Nuorttarijkajn – Vuonan, Svierigin ja Suoman – li oajválattjaj vuojno sámij hárráj manjela doaro ednagit rievddam dan gáktuj mij lij dáhpáduvvam ávddála doaro. Dálla galggin njunnusj oajválattja válldet åvdåsvásstádusáv várjjalimes ja sáme kultuvrav ja sebrudakiellemav ávdedit. Diedon dat ittijj dáhpáduvá sæmmi jáhtelit divna ríkajn. Lidjin stuorra sieradusá ríkas ríkkaj sámij organisierimij, sámepolitihkalasj árbbedábij, sámij árromij ja ulmusjlågo hárráj. Ja ienemus sáme årrun Vuonan.

Sáme gudi lidjin njunnutjin vájkkudimen dárojduhttema låhpabimáj, dåbdddin buoragit sámij rahtjamusájt gádodit oajválattjaj mieladis dárojduhttempolitihkav mij lij doaro ávddála. Sij dåbdddin aj buoragit stáhttasebrudagáv ja ieneplágov jali látte kultuvrav. Duodden buoragit dåbdddin sáme sebrudagáv ja sámij gierddamusájt låsemus dárojduhttemájge. Buoragit diehtin gáktu sáme-egiela dille lij ja gáktu stáhta politikhka lij sámij økonomijjalasj iellemdilláj ja tjerdalasj iesjdåbdduj vájkkudam. Sáme lidjin ietja álggám bilkkedit gielasja kultuvrasa. Lij noaden sábmen liehket, ja moadda æjgáda lidjin hæjttám sámástimes mánájdisesa, vájku ietja lidjin sámegielaga.

Dáv ettjin sámij ådå oahpestiddje máhte dåhkkit. Sidjij lij ájnas juohket diedoxt oajválattjajda man vuorbedis dilen sáme sebrudahka moatte gáktuj lij. Sámijn ællim makkirak rieutesvoda sábmen. Sijá berustime ettjin vieleduvá. Stuorrasebrudagá berustime lidjin mærrádusáj vuodon. Jus návti galgaj joarkket, de sáme gielan ja kultuvran ij lim boahtteájgge.

Jus dát barggo galgaj vuorbástuvvat, de sámij oahpestiddje gávnadin ájnas lij hekkav båssistit sáme siebjida ma lidjin sjávunam ávddål doaro. Barggo hæhttuj buoragit organisieruvvat. Valla ij lim nuoges barggat sáme siebjij baktu dåssju ríjka sinna. Danen áasaduváj jagen 1956 Nuorttarijkaj Sámeráde mij galgaj liehket sámegatjálvisáj aktisasjbargo orgána Suoma, Vuona ja Svieriga gaskan.


Vuona bielen lidjin njunnusj oahpestiddje duola degu Heandarat-Hánsa – Hansa J Henriksen, Pávvel-Niljas Piera – Per Fokstad, Hans Guttorm ja Hjalmar Pavel. Svieriga bielen lidjin njunnusj oahpestiddje Israel Ruong ja Per Idivuoma, ja Suoma bielen gis Biehtár-Ánde – Pekka Lukkari ja Oula Aikio. Sijá bargo lidjin vuodon dasi mij la gåhtjoduvvam Sáme lihtudissan.

Sáme lihtidisá bargguj sæbrrin akademijjalasj sámerádna gudi viehka mudduj sæbrrin hábbmitjit nuorttarijkalasj sáme-politihkav, duola degu konserváhtor/profæssor Asbjørn Nesheim, profæssor Gutorm Gjessing ja fil.cand. Karl Nickul.

## Sáme oahpestiddje 1950 ja 1960-jagijn:



**Heandarat-Hánsa – Hans J. Henriksen (1903-1977).** Finnmark sámeráde háldadusá bæjválasj jádediddje 1953-1964 ja Vuona sámeráde háldadusá jádediddje 1964-1971. Gehtja ienep suv birra bielen 275.



**Pávvel-Niljas Piera – Per Fokstad (1890-1973),** Dænno. Sáme filosoaffa. Gergaj áhpadiddjeskávli Råmså 1912. Vuolle Dæno Dárosuollu áhpadiddje ja manjela rievtor. Gattsaj lasse oahpov álggorijkjan: Danmárkon, Englándan ja Frankrijkan. Barggjibelludagá ájrrasin lij sán Dæno suohkana suohkanoajvven 1937-1948. Finnmark sámeráde njunnusj 1953-1964. Sáme-komitiedja sebrulasj 1956-1959. Gehtja ienep suv birra bielen 261.




**Hans Guttorm** (r. 1927), Kárásjjáhkå. Sán lågåj Oslo ja sebraj vuododittjat Oslo Sáme siebrev (mij rievddaduváj Sáme Siebrren jagen 1951). Lij moadda jage Sáme siebre ruhtavásstiddje. Bargaj muhtem ájge Sijdadoajm-maskåvlå áhpadiddjen Guovddagæjnon ja dan manjela vidnudakbagádallen. Sán lij Sámeálmmuga lista njunnusj jage 1969 stuorradiggeválgajda. Sán lij Kárásjjágå suohkana suohkanoajvve 1972-1975 ja 1980-1983.



**Hjalmar Pavel** (r. 1922), Dædno. Sán lågåj lágav Oslo universitetan ja sjattaj jurisstan buorre karaktieraj. Bargaj álon vuostasjtjálen Ednambargodepartementan. Nammaduváj

duobmárin Áltáj jagen 1956. Dan manjela virggájbiejaduváj juridihkalasj tjállen ja rádevadden man barggosadje lij Ednambargodepartemænnta. Suv ávdåsvásstádus lij duola degu barggat ællobarggo ja Dænotjáhtjádagá luossaguollimássjít. Jagiin 1965-1992 lij Luondoháldadimdirektorahta kontåvrájådediddje. Sán sebraj vuododittjat Oslo Sáme siebrevjagen 1948, mij rievddaduváj Sáme Siebrren Jagen 1951. Sán lij Sáme siebre tjállen 1953-1956. Sán ávdastij Sáme siebrev nuorttarijkasj konferánsan Jåhkåmåhken 1953, gánnå mierreduváj vuododit nuorttarijkaj sámerádev mij Kárásjjágår dáhpáduváj jagen 1956.



**Israel «Isse» Ruong** (1914-1985), Árjapluovve. Sáme ideologa, dutke ja politihkkár. Gehtja ienep suv birra bielen 277.



**Per Idivuoma** (1914-1985), Láttevárre. Ællosábme.



**Biehtar-Ánde - Pekka Lukkari** (r. 1918), Ohcejohka. Álmmukskåvllåähpaddje. Berustij ájnnasit giella ja kultuvrraássjíjs. Novellajt, divtajt ja kultuvrapolitihkalasj tjállagijt tjálij. Almodij lávllomgirjev «Lávllaga» ja låhkåmgirjev «Låhkåmusá».




**Oula Aikio.** Vuohču, Soadegilli. Ællosábme ja sámepolitihkkár.

## Sáme rádna gudi sæbrrin ávdedittjat sáme gielav ja kultuvrav:



Asbjørn Nesheim (1906-1989), Oslo. Vuona Álmmukdávvvervuorká sáme ássudagá konservátor ja jádediddje 1951-1976. Duodden lij sáme giela ja kultuvra profæssor Oslo universitetan 1959 rájes. Sámekomitea njunnusj 1956-1959. Sáme siebre njunnusj 1951-1952 ja siebre «Sáme Ællin»-tjállaga dåjmadiddje 1952-1970.

Gutorm Gjessing, Oslo. Professor. Sáme siebre njunnusj 1956-1959.



Karl Nickul. Fil.cand., Helsinki.





## Sámegiella vieleduvvá

Vuona bielen rjika skåvllåoajválattja gehtjadahttjájin sámegiela áhpadusá máhttelisvuodajt aj. Giesen 1947 gåhtjoj Girkko- ja áhpadusdepartemænnta sáme ássjedåbddijt Råmssåj sámegiela áhpadusgatjálvisájt tjelgadittjat. Ávddål Råmså tjåhkáname departementa virgeulmusj guossidij Svieriga bielen jáhttesámeskåvlåjt sijá áhpadusdilida oahpásmuvátjít.

Tjåhkanimen guorrasin hilggot dárojduhttemav mij lij læhkám rjika skåvllåpolitihkkan 1850-lágo rájes. Ja de tjåhkanibme dættodij stáhta ávdåsvásstádus lij sámegiela áhpadusdárbojt tjoavddet. Dat ittijj galga desti vatteduvvat misjåvnnásiebrij ja ietjá organisasjåvnåj hállduj. Vijddásappot lij dárbbó áhpadiddje-áhpadusáv nannit mij luluj gárvedahttet áhpadiddijt bargat sámegiela guovlojn. Tjåhkanibme aj vuojnij ájnnasin jut Vuona ja Svieriga oajválattja lulun dâhkkidit aktisasj nuorttasámegiela tjállemvuogev, mij dáhpáduváj jagen 1950 (Bergsland-Ruonga tjállemvuohke). Jagev mannjela almoduváj Margrethe Wiig sámegiela ábc-girje.


Oajválattja vaddegåhtin stipendajt aj sámijda gudi sámegiela oahpov váldin Råmså áhpadiddjeskåvlán. Sij vælloggissan dagáduvvín áhpadittjat vihta jage sámegiela guovlon. Jagen 1952 álgaduváj sijdadoajmmaskåvllå Guovddagæjnnuj ja jagen 1954 rabáduváj rádevadde virgge duoje ja duodjekursajda. Dan virggáj namma-duváj Lauri Keskitalo.

Margrethe Wiig sámegiela áppesgirji mij jage 1951 almoduváj: Tjáleduvvam Bergsland-Ruonga tjállemvuoge miltta, mij jagen 1950 dâhkkiduváj.

Kárásjjágå skåvllåstivrra sárnoj jut dárojduhttem galgaj joarke-duvvat:

Ássjiv navti vuojnnep ahte sámegiela álmmuk la oassen Vuona álmmugis. Vaj stuovesårrosáme økonomijjalattjat ávddåni buragit, de sihtap sidjij áhpadusáv man ulmmen la dievva dárojduhttem.

Kárásjjágå skåvllåpolitihkav ja dárojduhttemav ållåsit stivrrijin muhem látte, gej njunnusj lij Hans Rønbeck.



Råmså tjåhkanibme vállijj sáme skåvllåjuohkusav mij de galgaj vijddásappot barggat áhpadusgatjálvisáj. Jagev mannjela ævtodij juogos duola degu ájnas lij ásadir sámegiela oahppogirji, sámegiela áhpadusáv álgadit áhpadiddijda ja diehtojuohkemtjállagijt ásadir sámegiellaj.

Girkko- ja áhpadusdepartemænnta guorrasij sáme skåvllåjuohkusa oajvvadusájda gájt buoredin ájn sámegiela áhpadusáv sáme guovlojn. Dájt lidjin aj gájbbedam Oslo sámij siebrre ja Vuona Ælosámij Rikasiebrre – VÆR. VÆR gájbbedij aj sierra sámeskåvlåjt ællösámij mánájda.



Oslo sámij siebre vuododimtjåhkanimen Oslo 1948 guovvamáno. Gáro bieles: studænnta Thor Frette, Kárásjjáhkå; studænnta Hjalmar Pavel, Dædno; Samuel Balto, Kárásjjáhkå ja Ole Klemetsen Hætta, Guovddagæjnnno.



Vuona Ællösámij Rijkasiebrre vuododuváj Roandemin 1947 gålgådismáno. Njunnjutjin válljiduváj oarjelsábme Lars Danielsen ja sadjásasj njunnjutjin Anders Bær, Kárásjjåhkå. Gåvvá vuoset jahketjåhkanimev Rørosin jagen 1953.

Vuododuváj de sierra Sis-Finnmárko skåvlláráde, mij ájnnasit galgaj oahppogirjijt ávdedit ja ásadit. Skåvlláráde ittijí heva ájgás boade danen gávvá skåvllåstivra binnáv berustin ráde oajvvadusájs. Ájnnasit Kárásjjågå skåvllåstivrra vuosteldij ráde bargojt.

Oajválattja gávnadin dárbbó lij sierra orgánav vuododit mij luluj oajválattjaj sámeássjij rádevadden. Jage 1953 de vuododuváj Finnmárko Sámeráde. Ráden lidjin vihtta sebrulattja ja dan njunusj sjattaj Per Fokstad. Ráde dâjmadahká ásaduváj Tjáhtjesuolluj ja dan jádediddjen nammaduváj Hans J. Henriksen. Ráde tjadádij stuorra tjielggidusbargojt ja ævtodij tjoavddusijt. Dasi duodden dâjmadahká viekedij sámijt sosiálla ja vidnudakbagádallam ássjijin ja biejadij sáme nuorajda skåvllåstipendajt.

## Heandarat-Hánsa – Hans J. Henriksen

(1903-1977), riegádam Fanasgietten Dænon.

Heandarat-Hánsa lij Finnmárko sámeráde háldadusá bæjválasj jádedid-djen 1953-1964 ja Vuona sámeráde háldadusá jádediddjen 1964-1971.

Heandarat-Hánsa lij Fanasgietten riegádam jagen 1903 ja jámij Oslon jagen 1977. Sán vierttij barggat værámus dárojduhttempolikhka ájge.

Nuorran bargaj ståbe svájnnasin, gieladij ja luosav guollij. Sán lij skåvllå-tjehppe ja danen sáddiduváj Osloj rámátskåvlláj. Dåppe sjattaj profæssor Konrad Nielsena giellabarggen.

Manjep væráltdoaro manjela dárojduhttempolikhka nåhkågoahtá. Dalloj vuododuvvin sáme organisasjåvnå. Oajválattja dárba hin aj orgánav jali ása-dusáv mij sáme ássjij bargaj. Navti ásaduváj Finnmárko Sámeráde jagen 1953. Barggosadje lij Tjáhtjesuoloj.


Heandarat-Hánsa nammaduváj Finnmárko Sámeráde bæjválasj jádedid-djen sæmmi jage. Ráde njunnjutjin válljiduváj Per Fokstad, Dænos .


Duodden Ráde bargojda Hánsa bargaj aj sosiála ja vidnudakbagádallam ássjij. Suv ávdåsvásstádus lij aj bagádit sáme nuorajt válldet alep åhpodusáv. Hánsa dáv kontårvåv jádedij jage 1964 rádjáj. Dalloj ásaduváj Vuona Sámeráde mav sán stivriij gitta dallutjij gávvá jámij jagen 1971.

Hánsa sebraj vuododittjat Nuorttaríkjaj Sámerádev, mij Kárásjjågånu vuododuváj jagen 1956. Sán jádedij ráde Vuona juhkusav måttijt jagijt. Hánsa sebraj aj Oslo sámij siebre vuododibmáj jagen 1948.

Hánsa lij profæssor Konrad Nielsena giellatjehppe 1953 rádjáj. Sán viehke-dij profæssurav stuorra báhkogirjebargojn: *Lappisk ordbok* (1932-1962).

Hánsa dárogielas sámegiellaj járggålij oahppogirjijt, mánájgirjijt, láhka-tjállusijt, divtajt, vuojñjalasj tjállusijt, sálmajt jnv Hánsa sebraj álgadittjat Ságat-avijsav jagen 1956, ja muhtem ájge sán dâjmadij dav. Hánsa oattjoj Vuona kultuvrraráde guddnebálkáv ja Gánågisá medáljav gállen jagen 1974.





Girkko-ja áhpadusdeparte-  
mænnta almodij girjev  
sámegiellaj Jåhkåmåhke  
tjåhkanime ságaj. Järggå-  
liddje: Heandarat-Hánsa –  
Hans J Henriksen.

## Sáme nuorttaguovlo dásen barggagåhti

Sáme njunnusjoahpestiddje vuojnnin dárbbon aktan barggát nuorttaguovlo dásen. Jagen 1953 de lij stuoráp sámetjåhka-nibme Sámij álmmukallaskåvlân Jåhkåmåhken Svierigin. Bisspa Bengt Jonzon, guhti lij skåvllåstivra njunnusj, rabáj tjåhkanimev javladijen duola degu:

*Ælla goassak ávddåla náv ålos gudi sáme kultvra ja æladusá vidjurij barggi oajválattjaj, ásadusáj, organisasjávnåj ja ietjá dâmaj, tjåhkanam nav edna sámij váj aktan guoradallap ja árvustallap sámij bierggimvuoge vidjurijt ja æladus ja kultuvrra-gatjálvisájt.*

Moadda sáme tjåhkanibmáj sæbrrin. Aj Vuona, Svieriga ja Suoma virggeulmutja sæbrrin tjåhkanibmáj. Tjåhkanimen duola degu tjielggiduváj ållu vuodulasj tjielggidusá birra mij lij dagáduvvam sámij dile birra Suoman 1950-lågo álon. Vuona ja Svieriga bielen lij binná dagáduvvam dan hárráj. Dájn ríkajn aj hæhttujin sæmmi láhkáj tjielggit, javladuváj tjåhkanimen.



Sáme tjåhkanibme Jåhkåmåhken jagen 1953.  
Gåro bielen nubben: Hjalmar Pavel, Dædno; Hans J. Henriksen (1903-1977), Dædno; Per Idivuoma (1914-1985), Láttevárre; Israel Ruong (1914-1985), Arjapluovve, Asbjørn Nesheim, Oslo; ja de suomelaš virggeulmusj, ja oalges rabdan suomelaš Karl Nickul, Helsinki.



Israel «Isse» Ruong (1914-1985), riegádam ja bajás sjaddam Árjapluoven Svierigin. Sáme ideologa, dutke ja politihkkár. Sán váldij áhpadiddje oahpov ja muhtem ájge lij jáhtesáme áhpadiddje Čohkkirasin.

Isse dutkaj bihtámsámij ielemuogijt ja kultuvrav ja váldij dákta grádav jagen 1944. Sán lij Uppsála universitehta sáme-giela ja etnologijja dosænntan 1947-1967 ja de profæssurin.

Sán sebraj álgadimen Svieriga sámij ríkasiebrev ja dan njunnutjin lij 1959-1967. Sán sebraj vuododittjat Nuorttarijkaj Sámerádev jagen 1956.

Jagijt 1960-1973 dâjmadij Samefolket-bládev. Gåvvå vuoset Isse sárnnomin Sámekonferánsan Ánarin jagen 1959.

Tjåhkanime ságastallama ja oajvvadusá duodastin man dárbulasj lij ásadir sáme rádev mij luluj barggat nuorttaguovlo dásen. Konferánssa válljjí juohkka ríkka gáktuj juohkusav ma galggin ássjít gárvedahttet boahtte konferánssaj.

Nuorttarijkaj Sámeráde de vuododuváj nuppát nuorttarijkalasj sámekonferánsan Kárásjjágán jagen 1956 sáme vidjurij aktisasi-bargo orgádnan Suoma, Vuona ja Svieriga gaskan.

## Nuorttarijkaj Sámeráde sebrulattjan válljiduvvin jagen 1956:

### Vuona bieles:

Åhpadiddje Edel Hætta Eriksen, Guovddagæjnno Ællosábme  
Johan Mattis Eira, Guovddagæjnno Ællosábme Johan Johnsen,  
Fuoldás, Nordlánnda Rádevadde Hans J. Henriksen, Tjáhtjesuoloj  
Vuostasjtálle Hjalmar Pavel, Oslo

### Svieriga bieles:

Jåhttesámeskåvlå bærrájgæhttje dr. Israel Ruong, Uppsálla  
åhpadiddje Carl Johansson, Jiellevárre  
Ællosábme Per Idivuoma, Láttevárre Ællosábme Anders Åhrén,  
Frostviken

### Suoma bieles:

Fil. cand. Karl Nickul, Helsinki  
Ællosábme Oula Aikio, Vuohču, Soađegilli Åhpadiddje Hans A.  
Gutterm, Vuovdaguoika  
Nuorttarijkaj Sámeráde politihkka garrisit rievda 1970-lágo álgo  
rájes. Dasi vájkkudin nuorra sáme politihkkára ja studenta.  
Jagen 1971 mierredij Jielleváre sámekonferánssa sáme kultuvra-

Sámekonferánsan  
Heahztán jagen 1968.  
Gáro bieles: Nils Jernslet-  
ten, Dædno; Israel  
Ruong, Uppsála; Karl  
Nickul, Helsinki ja Reidar  
Suomenrinne, Ohcejåhkå.

politihkalasj prográmmav, mij vuodov dagáj sámij nuorttarijka-  
lasj aktisasjbargguj. Konferánssa válljij giellanammadusáv mij  
vissjalit ja sávret bargaj sámijt oattjotjit guorrasit aktisasj tjállem-  
vuohkáj. Ja vijmak jage 1978 giellanammadus buvtij aktisasj  
nuorttasámegiela tjállemvuoge oajvvadusáv sámekonferánssaj  
mij dav dåhkidij. Jagev manjela Vuodna dåhkkidij tjállemvuogev  
skåvllåadnuj, ja Suoman sämmiláhkáj dagáduváj. Svierigin aj  
adnegåhtin säemmi tjállemvuogev. Aj julev- ja oarjjelsámegiela  
tjállemvuoge dåhkkiduvvin 1980-lågon.



Jage 1980 Sámekonferánssa, mij lij Råmså stádan, dåhkkiidij vuodulap sámepolitihkalasj prográmmav, mij dáj bágoj álgaduvvá:

## Sáme tjerdalasj vuodoækto

Mij, sáme, lip aktisasj tjærddaa, e ríkaj rájá galga mijáv doadjet tjerda aktijuodav.

Miján li iehtjama histåvrrå, árbbedábe, kultuvrra ja giella. Æjgádjistema li árbben oadtxum ednamja luondoboanndudagájt ja æladusriektájt.

Mijá nanos rievtesvuoha ja ávdedit æladusájimme ja sebrudagájimme aktisasj ævtójimme milta, ja mij aktisattjat ájggop ednamijdema gáhttít, luondoboanndudagájdimme ja tjerdalasj árbáma boahtte buolvajda.

1970-lågon sáme sæbrrin aj ríkajgasskasasj iemeálmmugij aktisasjbargguj, gå lidjin fáron vuododimen *Iemeálmmugij Væráldarádev* (WCIP) jagen 1975. Jagen 1977 lij Væráldaráde nuppát konferánssá Gierunin. Navti sáme sjaddin oassen stuoráp ríkajgasskasasj iemeálmmuklihtudisás.



*Iemeálmmugij væráldakonferánssa Austrálian jagen 1981.*



*Austrália konferánsan jagen 1981. Oarjjelsábme Ingvar Åhren buorástahttemin iemeálmmuk nissunijt.*

## Jage 1956 Sámekomitiedja – ájgge sámij bælláj járgijdij

Finnmárko Sámeráde, Sáme siebrre ja Vuona Ællosámij Ríkasidebrre sáddigåhtin oajválattjajda ienep ja ienep árvvalusájt ja oajvvadusájt gáktu sáme sebrudagá vuododárbojt tjoavddet ja ávdedit sámij rievtesvuodajt. Nágin látte dutke sæbrrin aj ávttimusájda.

Ássje ságastaláduváj Vuona radio ráde tjåhkanimen, man sebrulattjan lij Ørnulv Vorren. Sán lij Rámså Dávvervuorká konserváhtor ja bajás sjaddam Njavddamin Oarjjel-Várjagin. Sán lij tjállám tjielggidusáv «SAMENE I NORGE». En utredning i tilknytning til Norsk Rikskringkastings sendinger på samisk». Danna oajvvadij vijdedit sámegielak radiosáddagijt ma dåssju duolloj dálloj gullujin. Ássje járgijdij sámij bælláj. Vuona radiojádediddje tjálij de girjev Girkko- ja åhpadusdepartemænnatj snjilltjamáno 7. biejve jagen 1955 ja oajvvadij biedjet bargguj juohkusav mij luluj tjielgadit sámij boahtteájge dárbojt Vuonan.



Ørnulv Vorren, Njavddamin Oarje-Várjagin bajássjadam, Rámså dávvervuorká konserváhtor. Kringkastingsrådet-sebrulattjan jagen 1955 ævtodij vijdedit sámegielak radiosáddagijt ma dåssju duolloj dálloj gullujin. Suv oajvvadusá diehti nammaduváj Sámekomitiedja jagev manjela sáme vidjurijt tjielgadittjat.

Girkko- ja åhpadusdepartemænnta gehtjadij oajvvadusáv jagev ávddål gá de nammadij Komitiejav mij galggá sáme vidjurijt tjielgadit. Komitiedja galgaj prinsihpalasj bielijt tjielgadit sebrudagatjálvisájs ma sámijda guoski. Ja de galgaj ævtodit konkrehta økonomijjalasj ja kultuvralasj dåmajt vaj sjaddá máhettelis sámijt tjiehpében dahkat sebrudagán bierggit.

Galggá mielan adnet nammadusá sebrulasj Per Fokstad la subtsastam komitiedja nammaduváj manjela gá sán persåvnålattjat lij tjadádam «sit-Down»-strejkav stáhttaráde kontåvrán Oslo.



### Sámekomitiedja

Åvddårájdon gáro bieles: Nordlanda fylka sámesunnde Peder Hagen; nammadusá tjálle Erland Aalde, Girkko- ja åhpadusdepartemænnta; konserváhtor Asbjørn Nesheim, njunnjusj, Oslo; Finnmárko Sámeráde njunnjusj, åhpadiddje Per Fokstad, Dædno. Manjep rájdon gáro bieles: Vuona Ællosámij Ríkasidebrre njunnjusj, ællosábme Paul Danielsen, Meråker; Kárásjjágå suohkanoajve, åhpadiddje L. Lind Meløy; Guovddagæjno suohkanoajve, lænsska Arvid L Dahl; Porsango suohkanoajve, liknikhoavdda Hans A. Opstad; Sáme siebre njunnjusj, profæssor Guttorm Gjessing, Oslo.

Lij vuostasj bále oajválattja duodaj hæhttujin prinsihpalasj bielijt tjielgadit sáme álmmuga vidjurijs Vuonan. Tjielgas lij departemænnta sidáj sihke gielalasj, kultuvralasj ja æladusøkonåvmå ássjedåbddijt tjielgadittjat sámij boahtteájgev Vuonan. Komitieja njunnutjin nammaduváj konservátor Asbjørn Nesheim, Oslo. Komitedja oattjoj rievtesvuodav Finnmark Sámeráde háldadusá jádediddjev adnet Hans J. Henriksenav rádevadden dárbo milta.


Komitiedja mij bargonis állij jagen 1959., árvvalij oajválattajda állu dárojduhttempolikhav guodet. Duola degu sámegielan hárráj sárnoj komitedja:

*Jus sámegielan galggá liehket máhttelisvuohta rijbbat, de hæhttudat aneduvvat guovlon gánnå sámegielaga li ieneplågon. Dákkár guovllo i sis Finnmark, gánnå li Guovddagæjno, Kárásjjágå ja Buolbmáta suohkana. Aj Unjárgga, Dædno ja Čuđegiedde (Porsánŋgo) gullujii sáme guovdásj guovlluj.*

Dánnna nammadip oajvvetjuokkajt majt komitedja ævtodij oajválattajda tjadádit:

- gáhttit sáme gielav ja kultuvrav
- åhpodusfálaldagájt buoredit ja åhpadiddjeåhpodusáv nannit
- sierra sáme joarkkaskåvllåsuorjev ásadit
- åttjudit ienep sámegielan oahppogirjít
- stipænndaårdnigav ásadit sáme nuorajda
- vieledit sámij riektávuojnov
- Nuorttarijkaj Sámerádev dåhkkidit, mij lij vuododuvvam jagen 1956 sámij rádevadde orgádnan
- dåhkkidit sámegielan máhtudagáv gó ulmutjít nammadi háldadusvirgjida sáme guovlojn.

Sihke Vuona Ælosámij Ríkjasiebrre ja Finnmark Sámeráde doarjun Sámekomitea oajvvadusájt. Aj Sáme siebrre, manna dálla lidjin bájkálasj siebre sihke Oslo ja Kárásjjágán, doarjoj dâjmaj oajvvadusájt. Guovddagæjno suohkan aj doarjoj komitieja prinsihpalasj vuojnov.



Sámekomitea almodij dáv kártav, mij sámegielagij lágojt tjielggij iesjguhtik guovlon Finnmarkon.

Valla Finnmark látte politihkkára ja avisa gal komitieja oajvvadusájt garrisit vuostálassttin. Sierralágásj tjoarvváj lij Kárásjjágå suohkanoajve ja lárde Hans Rønbeck. Bæssásjtjåhkanibme Kárásjjágán jagen 1960 mav sán organisierij la dåbdos. Tjåhkanibmáj lidjin boahtam 89 gullaliddje, ja 87 sijájs doarjun oajvvadusáv mav mañjela dåbddåp namájn bæssásjoajvvadus. Dat ierit ietján sárnnu:

Sáme dåbtti sij gulluji ríjka álmmugij ja e lágeda sierrarieutesvuodajt ja sierravælggogisvuodajt ríjkaálmmuga gáktuj.

Tjåhkanibme ij doarjo makkirak láhkáj komitieja sámepolitihka boahtteájge ulmev, ja sihtá juohkka láhkáj dâjmajt vuosteldit ma galgalulun sáme sebrudagáv bisodit Sis-Finnmarkon.

Tjåhkanibme vuostelt sierra sáme orgánaj ásadimev ja sihtá láhpadit Finnmark Sámerádev. Dá li ber dåssjen. Ep máhte ep ga sidá ávddånimev ganugahttet, mij uddni tjielggasit rievddá dan guovlluj jut dárogiela adno lassán, aj sáme sijdajn.

Garrasit sihtap dættodit jut sámeigiella ij galga aneduvvat iehtjá-din gá viehkkegiellan.

Gájbbedip jage 1898 Girkkodepartementa skåvllånuolgasus galggá liehket mijá bájke skåvlå boahtteájge njuolgasussan.

Kárásjågå skåvllåstivrra dåhkkidij komitieja ájnnasamos oajvvadusájt, valla suohkanastivrra gal mierredij tjielggidusáv hilggot. Buolbmáta suohkan hilgoj álon tjielggidusáv, valla gá nuppádis giehtadallin de dåhkkidij ájnnasamos oajvvadusájt. Dæno, Unjárga ja Čuđegiette (Porsango) suohkana ettjin sidá sámeigela áhpadusáv nannit skåvlájn. Merragátte suohkana, gánnå árrun binnep sámegielaga, ettjin ávvánis berusta Sámekomitea tjielggidusáv giehtadallat.

*Finnmarkposten 19. 5. 1960 - Nr. 57*

## Tilhengerne av samekomiteen forlot Polmak-møtet

FOR Å FORHINDRE AT DET BLE FATTET NOE VEDTAK

"Et folk kan ikke flykte fra seg selv", hevdet Hans J. Henriksen

Diskusjonen omkring samekomiteens innstilling har hittil hovedsagelig vært koncentrert i Karasjok, men søndagens folkemøte i Polmak viste at saken i like grad engasjerer befolkningen der og vel også i alle kommuner i Indre Finnmark hvor det finnes en samisktalende befolkning. Diskusjonen dreiet seg bare om noen få linjer i innstillingen som er på nærmere 100 sider, nemlig det avsnitt

hvor komiteen foreslår mer samisk i skolen, nærmest som et utvidet hjelpesprog i forhold til hva det er nu. Samekonsulent Hans J. Henriksen gjorde det helt klart i sin innledning som ble holdt både på samisk og norsk, etter krav fra møtet, at når komiteen har foreslatt mer samisk i skolen er det kun ut fra en pedagogisk vurdering, nemlig at den som behersker sitt eget sprog fullt ut, vil også kunne lære seg et fremmed sprog lett-

ere og riktigere. Henriksen uttalte at det fra samekomiteens side er uttalt at innstillingen ikke vil bli gjennemført mot en mer eller mindre enstemmig samisk opinion. Han nevnte at samene har levet sammen med det tallmessig og kulturelt sterke norske folk og har kanskje følt at de ikke rekker langt med sitt eget sprog.

— Men likevel, sa Henriksen, — et folk kan ikke flykte fra seg selv. Hvis vi vender oss bort fra vårt samiske sprog så

# Stor uenighet i Polmak om samekomiteens innstilling

*Finnmarken 16. 5. 1960 - Nr. 57*

## Folkemøtet samlet fullt hus

Også i Polmak samler Samekomiteens innstilling meget stor interesse. Søndag hadde formannskapet innkalt til folkemøte på skoleinternatet for å lodde stemningen blant befolkningen før kommunestyret avgir sin uttalelse i saka til dette jo i første rekke skulle være et orienteringsmøte. Det var imidlertid ganske mange som ga uttrykk for at de støttet det synet som var kommet til uttrykk gjen-

Buolbmáta suohkan hilgoj álon tjielggidusáv, valla gá nuppádis giehtadallin de dåhkkidij ájnnasamos oajvvadusájt. Finnmarken (16.05.1960) ja Finnmarkposten (19.05.1960) tjállin álmmuktjähkanime birra mij lij Buolbmáta skåvlå Sámekomitea oajvvadusáj hárráj. Moattes doarjun komitieja oajvvadusájt, ájnnasit Sirbmá bájke ulmutja ja Sirbmá skåvlå áhpadiddje Einar Gullichsen, guhti lij ládde. Valla lidjin moattes gudi sihtin oajvvadusájt hilggot, dárojduhtem galgaj joarkeduvvat.

Stuorradigge giehtadaláj Sámekomitea tjielggidusáv gidán jagen 1963 ja dåhkkidij dan oajveprinsihpajt ja doajmmaoajvvadusájt. Dalloj Vuona almulasj politika ulmme målsoduváj sáme-álmmuga gáktuj. Dárojduhttempolitikk galgaj láhpaduvvat, ja sáme kultuvra galgaj dássta duohku várjaluvvat.

Tjuovvovasj jagjتåssju oase tjadáduvvvin. Vuona Sámeráde vuododuváj jagen 1969, ja vuodoskávlláláhka rievddaduváj jagen 1969 nav vaj sáme oahpppe oadtjun rievtesvuodav oahppat vehi sámegielav skåvlå. Valla sámij oahpestiddje ællim dudálattja oajvvadusáj tjadádime fártajn. Dat dættoduváj Vuona Sámij Rikasiebrre vuododimtjähkanimen jagen 1968.

## Sáme politihkalasj organisierim ådåstuhteduvvá ja dåbmarabbon sjaddá

Vuona bielen lij Vuona Ællosámij Ríkásiebrre vuododuvvam jagen 1947. Dat lij ællosámijda. Jagev manjela, jagen 1948, Oslo sámij siebrre vuododuvváj. Dat rievddaduvváj ríkavijddásasj Sáme Siebrren jagen 1951. Siebre njunnjutja (åvddåulmutja) lidjin miehtáj 1950 ja 1960-jagij látte akademihkkára, gudi sáme kultura várjalimev baelostin.

Valla gå sis Finnmárko sáme sæbrragåhtin sáme siebrij bargoja 1960-lágo rájes, de oattjoj organisierimbarggo fártav jali valludagáv. Sáme siebre ma lidjin álgaduvvam, tjåhkanin Guovdagæjnnuj basádismáno 30. biejee 1968 vuododittjat ríkavijddásasj organisasjávnáv, mav sáme ietja galggin stivrit. Navti vuododuvváj Vuona Sámij Ríkásiebrre – NSR. NSR vuostasj njunnjutjin válljiduvváj Guovdagæjnok Johan M. Klemetsen. Tjåhkanibme mierredij dåssju sáme máhti liehket NSR ålles jali dievva sebrullattjan.

NSR:a vuododimtjåhkaines Guovddagæjnon 30.11.1968. Gáro bieles: Hans J. Henriksen, Vuona Sámeráde kontåvråjådediddje; Mikkel Gaup, Máze; Marit Stordahl, Kárásjjåhkå; Peder Andersen, Porsáñingo; Hans Hansen, Porsáñingo, Olav Guttorm, Kárásjjåhkå ja Per Fokstad, Dædno.



NSR:a vuostasj stivrra. Gáro bieles:  
Hans Nergård, sadjásasj njunnjusj, Kárásjjåhkå;  
Johan M. Klemetsen, njunnjusj, Guovdagæjnon ja Peder Andersen, stivrrasebrulasj, Porsáñingo.



NSR jahketjåhkaines Kárásjjågán biehtsemáno 22.-24. bievjijt jagen 1969. Profæssor Gutorm Gjessing ságaastallamin tiemájn: «Norsk kolonialisme i Nord-Norge». Heandarat Hánsa – Hans J. Henriksen dálkkumin.



NSR stivratjåhkanibme Kárásjjågán 1973 gålgådismáno. Gáro bieles: Sadjásasj njunnjusj Peder Andersen, stivrrasebrulasj Alf Isak Kesktalo, njunnjusj Regnor Solbakk, ruhta vásstediddje Edel Hætta Eriksen ja tjállle Johan Klemet Kalstad.



Vuona Sámij Rijkasiebrre – NSR – vissjalit barggagådij sáme giela, kultuvra, áhpadusá ja rievtesvuoda ássjij. Juo vuododimtjåhkani men dættoduváj sámij rievtesvuoda ednamijda ja tjátijida galggi liehket organisasjåvnå guovdásj ássjen. Sámij riektávidjura ællim tjielgaduvvam. Lij ájnas tjielgadit dajt, dagu Sámekomitea aj lij ævtodam jagen 1959. Da dáhpáduvvin 1980 ja 1990-lågojn.

NSR njunnutja ællim dudálattja Finnmark stuorradikki politikhkárij, gudi ettjin heva sáme ássjij berusta. Danen ásaduváj sierra sámeálmmuga lissta 1969 stuorradiggeválgajda. Lista njunnutjin lijga Hans Guttorm, Kárásjjåhkå ja Edel Hætta Eriksen, Guovddagæjnno. Lissta tsieggiduváj aj danen gå Láhpe (Loppa) sábme ja stuorrediggeáirras Harald Samuelsberg lij Finnmark Barggijbelludagá nominasjåvnnå-tjåhkani men hæjtädallam. Sán lij mak ilá sámij bielen Stuorradikken lähkám Sámekomitea árvvalusá giehtadaládijen jagen 1963. Stuorradiggeájgegávdanis lij Samuelsberg Oslo Sáme siebre sebrulattjan.


Åvddål Vuona Sámij Rijkasiebre vuododime gehtjaduvvin sáme njunnutja ja bælostiddje niehkoværálda juhtusin ja idiedjalisstan. Valla 1970-lågo álgo rájes almulasj dágastallamijn, ájnnasit Finnmark aviksajn, sámij oahpestiddjijit gáhtjudahtjin «ekstremisstan». Sijá ulmmen lij sáme stáhtav vuododit. Dat tjuottjodus la ájn vuotum manemus jagjit, ájnnasit Finnmark aviksajn.

*Harald Samuelsberg ja suv iemet Hanna. Samuelsberg lij Láhpe (Loppa) sábme ja stuorradiggeájras. Sán bælostij Sámekomitea oajveprinsihpajt gå Stuorradigge giehtadaláj komitjea doajmma-oajvadusájt gidájtjåhkani men jagen 1963.*



Sáme-álmmuga lissta Stuorradikkeválgajda ásaduváj Kárásjjågåan biehtsemáno 24. bieje 1969 (sæmmi ájge gå NSR rijkatjåhkaniibme lij Kárásjjågåan). Lista njunnutjin lijga Hans Guttorm, Kárásjjåhkå ja Edel Hætta Eriksen, Guovddagæjnno.

## Stem Samefolkets liste Sámi-ál'bmuga listo



*Edel Hætta Eriksen, riegádam 1921. Åhpadiddje oahppo. Bargaj guhkijt åhpadiddjen Guovddagæjnon. Jage 1977 sán nammaduváj Sáme åhpadusráde bæjválasj jádediddjen ja bargaj dajna desik pensjåvnnåj manáj. Ráde lij ásaduvvam muhtem jage ávddåla ja lij Girkko- ja åhpadusdepartementa sáme åhpadusá ássjedåbdde ráde. Jagen 2000 biejaduváj ráde Sámedikke hállduj ja sjattaj Sámedikke åhpadusåssudahkan.*

## «Vuosedup sáme vuojŋjanav» – ČSV-seminára Guovddagæjnon 1970

NSR ulmutja, moattes sijájs nuorra sáme studenta, tjåhkanad-din dágástalátjtit sámij vuorbedis dilev ja gáktu máhtáluluj sámij ælädusvuogijt ja kultuvrav ávdedit ja nannit boahtte buolvajda ávkken. NSR namán, man duogen lidjin NSR Regnor Solbak, Ságat-dájmadiddje Odd Mathis Hætta ja Vuona Sámeráde kontávrrájádediddje Hans J Henriksen, ásadín de nav gáhtjodum ČSV-seminárv Guovddagæjnnej ávddála javlaj jagen 1970.

Studenta Johan Albert Kalstad, Johan Klemet Kalstad ja Ole Henrik Magga ságastallin unneplågo álmmuga dile birra Vuonan.

Åhpadiddje Nils Jernsletten ságastaláj sámij kultuvrradájmaj birra ma unnán vuohttuin garra dárojduhttempolitihka diehti. Sáme girjálasjvuhta vargga ittjjí gávnnu. Sáme musihkka jali juooggam ittjjí gullu. Juooggam lij aj gieldeduvvam Guovddagæjno skåvián. Lij suddo juoigatjít, lij skåvllåstivrra mierredam. Sáme teáhtar-vuosádusá soajtemláhkáj ásaduvvin. Vuona ríkateáhtar lij 1963 ja 1965 ásadam sáme «revijja» manna lij vehi juooggam ja girjálasjvuhta. Lij 5-6 ulmutja juogos mij sáme bájkijt guossidij Finnmarkon. Åbbánagi, ettjin gávnnu kultuvrra-organisasjávnå ma lulun huksat dájt kultuvralasj dåmajt.

Odd Mathis Hættan gis lij biektelis ságastallam gáktu sámeássje háldaduvvi almulasj orgánajn. Da aj dáhpáduvvi soajtemláhkáj. NSR bieri dájt ássjijt gátsedahtjat. Ij la ávkke dåssju resolu-sjávnåt sárnnot, valla aj tjuovvolit dajt. Dat mij viehket, la «kon-frontasjávnnå oajválattjaj». «Låjes máná e majdik oattjo», lidjin suv sárnnoma manjemus bágo.

Sáme dutkamidle lij viek guovdásj ássje semináran. Dan birra ságastaláj Alf Isak Keskitalo. Sáme ællim makkirak láhkáj fáron stivrrimin sáme dutkamav. Dåbdos lij váves dutkam mij lij gálldå-sámij hárráj dáhpáduvval nuortta Suoman. Jage 1966 rájes 1970 rádjáj båhtin badjel tjuohte dutke 16 ríkas

Anára ja Čeavetjávre guovlluj dutkat «the human biological characteristics and the epidemiological pattern in Lapp populations». Båhtusin lij almoduvvin ållo dutkamtjállusa ma vas dahkin dutke oadtjun dosænnta ja profæssor-virgijt sihke nuorttarijkajn ja ålggorijkan. Gálldásámijda ij lim gal dát dutkam heva ávkken.

Danen lij ájnas ásadir sáme dutkaminstituhtav mij luluj bærráj-gæhttjat dutkamijt sáme berustimij ja dárboj milta. Tjåhkanibme válljjí juohkusav mij galgaj vijddásappot ássjíjn barggat. Juohkusa sebrulattjan válljiduvvin:

*Alf Isak Keskitalo, Nils Jernsletten, Johan K. Kalstad, Ole Henrik Magga, Aslak Nils Sara ja Hans Øvregård.*

### ČSV-semináran Guovddagæjnon 1970 javllamáno:

*Andreas Njarga, Ole Henrik Magga ja Maj-Lis Skaltje.*



*Marit Oskal, Inga Ravna Eira ja Johan Albert Kalstad.*





## VET DU

- at en intellektuell og en sameprofet er den samme?
  - at de såkalte intellektuelle nå planlegger en revolusjon, og som de sammenligner med Lars Jakobsen Hætta & Co. for 118 år siden?
  - at de intellektuelle består av akademikere og studenter og teoretikere som ikke har noen som helst støtte av «den tause majoritet»?
  - at de kritiserer det som dyktige kommunepolitikere i Karasjok og Kautokeino gjør, uten at de selv har noen alternativ eller kurs, og
  - at det viktigste for dem er å KRITISERE?
- (Fra Kautokeino kommunehusets veggavis 21. des. 70.)


ČSV-seminára manjela idij tjálos  
Guovddagæjno suohkan-vieso  
siejnetálluj.



Ole Henrik Magga.



Aslak Nils Sara.




Alf Isak Keskitalo.



Johan K. Kalstad.



Hans Øvregård.



Nils Jernsletten.

ČSV-seminárra válljj juohkusav mij galgaj sáme instituhta ásadimev tjielgadit.

## Oasse muhtem juogosbargos:


### Grupperapport:

### Gruppe: T

#### Hvorfor?

Hvis myndighetene først anerkjenner at det er samer i Norge bør de også erkjenne at samene har rettigheter og forpliktelser ut fra menneskerettighetsdeklarasjonen. Teoretisk kan man si at samer er anerkjent som en minoritet i Norge, men en praktisk ordning av hvordan man skal ordne minoritetens sak har man egentlig ikke kommet fram til. Det kan man se ut fra Samekomiteen, stortingsvedtak av 62 at det er ikke blitt gjort noe særlig. Praktisk talt er ingenting av det realisert. For å få sakene gjennom papirmølla og nå opp til det høyeste plan, på kommune-, fylkes- og statsplan, så bør det finnes et sammenbindende ledet og dette bør være en samisk organisasjon. Det er sameorganisasjonenes plikt å finne fram til dette sammenbindende ledet. Det kan være et direktorat eller en ombudsman.

Men bør gå inn for å bevisstgjøre samene om den situasjon de befinner seg i i dag. Hvordan de står i forhold til majoritetem og og også det at samene blir orientert om storsamfunnet. Vi så det som et mål å få en sterkt samlende organ noe i likhet med SSR, som har felles program. Man kan ha underorganisasjoner, hvor de forskjellige samegrupper kan ta opp sine egne spesialsaker og framlegge dette for en hovedorganisasjon, som igjen fører dem videre.



Semináran gullugáhtin vuostasj bále ČSV-bokstáva: *Vuoseda sáme vuojŋjanav!* Bokstáva huomahiddje lij Johan Jernsletten, guhti dalloj lij åhpadiddjen Guovddagæjnon. Oassálasste doajvvun ČSV galgaj de sjaddat sámeálmmuga aktisasj tjoahkkimærkkan. Sárggum: *Kirstin Biti Johansen* (1972).

Nuorra sáme gudi li válldemin alep åhpodusáv, li tjåhkanam tjielgadittjat nuorttarijkaj sáme instituhta ásadimev, man vuoduj li muhtem almulasj oajvvadusá ássjen. Miejnnip gå oajvvadusá galggi sjaddat konkrieha pládnan, de la luondulasj jut mij sáme lip dâjmalattjat fáron dakhamin dáv sáme instituhtav. Danen ævtodip nav jáhtelit gå máhettelis luluj vuoduvvat juogos mij luluj barggat vijddásappot instituhttagatjálvisájn. Ihkap la luondulasj jut Nuorttarijkaj Sámeráde luluj dáv juohkusav nammadir. Manjela I luondulasj vaddet sáme organisasjávnaj hállduj juohkusa vijddásap bargov hábbmit. Tjåhkanibme miejnni juogos åvdás sámijt gudi njuolggia vierrejjí dákkár instituhttaj tjanáduvvat, ja sihtap plánimbarggij fárruj juo álgo rájes. Tjåhkanibme I danen juohkusav vuododam mij galggá gárvedit ja ævtodit instituhta organisasjávnáhámev, dâjmaiv ja tsieggima ávddánimev.

*Guovddagæjnonno, javllamáno 12. bieje 1970.*



*Odd Mathis Hætta, riegádam 1940 Guovddagæjnon. Åhpadiddje oahppo. Cand.philol. Sán la lèhkám Finnmárko skåvllådirekterraámmáda sáme skåvllåássjjí rádevadde, NSR njunnusj 1974-1976, Sáme åhpadusráde njunnusj, Ságat-avijsa dâjmadiddje 1968-1974. Finnmárko allaskåvlå vuostasjamanuænssa ja dekanus. Sán la vissjalis fáhka-girjjetjálle.*

*Gåván, oalges bielen, ságájdahtemin la Per Fokstadav, gen birra la tjállám girjen «sohtái – til kamp», CálliidLágádus, 1999.*



*Kárásjjágák Aslak Nils Sara lij Sámeinstiuhtha vuostasj direkterra.*

Instituhta njuolgadusáján javladuváj dat galgaj dievnnot Nuorttarijkaj sáme álmmugav, buoredit dan sosiála, kultuvralasj, riektálasj ja ruhtadilev. Instituhtta galgaj dutkamij, guoradallamij, åhpodusá ja dievnastusdâjmaj baktu sámeálmmugav viehkedit sihke teorijjalasj ja praktihkalasj vidjurijn. Dat galgaj aj barggat dan ávddáj jut ieneplágo álmmuk ja oajválattja oadtnjun riekta diedoit sámij ja sijá dile birra.

Jage 2009 Sámeinstiuhtha sjattaj oassen Sáme allaskåvlås, mij álgaduváj jagen 1989.

Juogos, mij NSR namán bargaj, gárvedij instituhta organisasjávnnáhámev ja dâjmaiv ja sáddij dav nuorttarijkaj Sámerádáj. Sámeráde mierredij árvvalusáv tjielgadit Sámekonferánsan Jielleváren 1971 bårggemáno. Navti sámepolitihkalasj bajemus mierrediddje tjåhkanibme, Sámekonferánssa, giehtadaláj instituhttaássjiev, mij de vijddásappot lápptiduváj nuorttarijkaj njunnusjoajvá-lattjaj ávddáj gudi mierredin vuododit ja ruhtadit Nuorttarijkaj Sámeinstiuhtha. Ja gálimmá jage manjela, jagen 1974. Sámeinstiuhtha de álgadij bargostis gudájn barggijin dåbdddobágoj: Sáme instituhtta I sáme álmmuga álgga ja åbmudahka.

## Sáme njunnjutjijt ja oahpestiddijjt váksjodahttjájin

Viek ájnas ásadus Vuona stáhta dievnastusájn la nav gáhtjodum váksjomdievnastus – POT – mij galggá dakkárijt váksjot majt jákki sihti demokratijav njejjdet jali tsuvkredit. 1970-lágon váksjodin ájnnasit ulmutjijt gejt jáhkin gullujin marksisma-leninissma-juohkusija ma sihtin revolusjávnå baktu Vuona stivrrimav muhttet. Sæmmi ájge váksjogáhtin aj nav gáhtjodum «sáme ekstremistajt». Duola degu dái birra tjálleba Trond Bergh ja Knut Einar Eriksen girjenisá: «Dav hemmelige krigen. Overvåkning i Norge 1914-1997, bd. 2, 1998».

Juo 1950-lágon Vuona váksjomdievnastusá politijja berustahtjájin sáme «ekstremistajs». Dalloj lidjin dakkár diedoxt oadtkum jut sáme njunnjutja rahtjin ásadittjat sierra sáme stáhtav.

Dat nav gáhtjodum «sámeekstremissma» lij ájton Vuona stáhttaj ja váksjumdievnastus – POT – ittij riektá máhte tjielggít gási dat gulluj. 1970-lágon lij POT gájt dan gátton «sáme ekstremista» gullujin marksisma/leninissma-lihtudissaj Vuonan ja sihtin sierra sáme stáhtav ásadir. Dan ávdás bargaj «sáme tjegos organisasjávnå ČSV», tjielggi Oarjjelij-Várjjaga váksjumdievnastusá ássudahka muhtem girjen 31.12 1975 POT-jádediddjáj.

Váksjodimpolitija ballin aj aktijuhta lij sámenjunnjutjij ja Sovjet-oajválattjaj gaskan. Vissa lidjin dáhpáduvvam tjegos tjåhkanime sijá gaskan.

Jagen 1975 muhtem váksjodimpolitija tjállá tjielggidusánis dåb-dos sáme njunnjutja, degu Ole Henrik Magga, Odd Mathis Hætta ja Aslak Nils Sara gullujin góroekstremissta sáme juohkusij. Sáme ekstremisma váksjom galgaj vuoroduvvat. Dat mierreduváj muhtem barggotjåhkanimen nuorttan jagen 1976. Tjåhkanime tiebmán lij: «Samiske organisasjoner og grupperinger – ekstrem politisk virksamhet». Ájnnasit galggin váksjut 20-30 sáme aktivista. Ja huj ájnas oasse dán bargos lij sámiyt váksjot gudi gullujin Sáme instituhta birrasij. Aj Máze skåvlå áhpadiddje ja Sáme vuorkkádávverij bargge Kárásjággán galggin kárttiduvvat. Váksjodimpolitija lidjin viek vissjala Áltá-aksjávnåj bále 1978-


1981. Vuojná Vuona Stuorradigge lij mierredam basádismáno 30. bieje 1978 buodot Áltá-Guovddagæjno tjáhtjádagáv. De tjuodtje-lin sáme miellavuosádusá jali demonstrasjávnå Olson. Gudi lidjin dái demonstrasjávnåj duogen? Makkir doajimma lij Vuona Sámij Ríkkasiebren? POT ballo lij dáhpáduvvvi sabotássja-aksjávnå, duola degu Áltán.

Váksjodimpolitija hiejjtin hæhkkat jagijn 1983, 1984 sáme ekstremismas berustimes. Dan sivvan lij dávk politihkalasj oajválattja dállea sihtin vieledit sámi gájbbádusájt tjielgadittjat sámi tjáhtje ja ednamrievtesvuodajt. Vuona ráddidus nammadij de guokta juohkusa sámi rieftesvuodajt ja kultuvrragatjálvisájt tjielgadittjat, majna l læhkám juo dat vájkkudus jut Sámedigge ásaduváj jagen 1989.

Áltá-aksjávnåj birra la TjállijAlmmudahka sierra tiebmágirjev almodam: «Áltá-Guovdageainnu stuimmi birra, 2010». Girje gâbttjá dáv oasev sáme ádåájige histåvrås.



Váksjomdievnastus – POT – galgaj duola degu váksjot Sáme instituhta barggijt ja sijáv gudi dan birrasij gullujin.



Váksjodimpolitija tjálos sáme akademihkkárij birra gudi ájggun «lánestit» sáme álmmugav.

## 1970-låhko – sáme kultuvrradájmaj luorkijdibme

1970-låhko i viehka sierralágásj sáme ádåájge histåvrán. Dat la duodaj sáme lihtudisá badjánime ájgge, muhtem sáme kultuvrrapolitikkár dav ájgegávdav gåhtjudij. Dalloj sjaddá politikhka állásit sáme organisasjávnåj hállduj, ja guovdásj oajválattja guládalli organisasjávnåj ævtoj hárraj. Sáme politikhka állu ádåstahteduvvá. Sáme girjálasjvuota luorkudahttjá. Dåbdos la girjálasjvuoda seminárra Sirbmán tjavtjan jagen 1972. Dat la aj gåhtjoduvvam ČSV-tjähkanibmen. Tjähkanimen tjáleduvvin moadda divta ma ČSV-bokstávaj álggin. Divta almoduvvin Jurdagat ja sánit-girjen jagen 1975. Girjev dåjmadij Anders Guttormsen, guhti lij tjähkanime oajvvejádediddje. Måttij jagij tjadá lij sán Nuorttanaste-avijsa dåjmadiddje.

Nuora juojggagáhti. Juojgga gullugoahrtá sihke dálusj ja ádå vuogij baktu. Sáme duodje ja gåvvådájdda ællá. Sáme siebre duodjekursajt ásadahtjáji. Divna dá dåjma dahki ahte sáme kultuvrraorganisasjávnå vuododuvvi. Dáj birra I tjáleduvvam Sáme ájgij tjadá 2-girjen, mij la joarkkáskåvllåj.



Sámij rahtjamusá ja aksjávnå måvtåstuhttin dáiddárij dahki duola degu plakáhtajt ma sámijt subtsastin gáhttsomav ja tjuodtjelimev. Dåbdon la Arvid Sveen plakáhitta jages 1981, gåhtjoduvvam «Frigjøring 1972-1981».

## Hárjjidusá

1. Doaro maŋjela nuorttarijka vieledahttjáin sáme kultuvra suodjalimev ja ávddånahttemav. Manen?
2. Goassa ásaduváj Finnmárko Sámeráde, ja manen?
3. Manen álggin sáme barggat aktan nuorttaguovlo dásen 1950-lågon? Tjielggi ájnas dáhpádusájt!
4. Nammada sámijt gudi lidjin njunnjutjin dájn rahtjamusájn!
5. Mij lij Sámekomitea vuododime duogásj?
6. Stuorradigge giehtadaláj Sámekomitea oajvva-dusájt jagen 1963. Majt sárnoj Stuorradigge ja mak-kir vájkkudusá lidjin dassta?
7. Goassa vuododuváj Vuona Ællosámij Ríjkasiebrre ja mij lij siebre ulmmen?
8. Goassa vuododuváj Vuona Sámij Ríjkasiebrre? Gudi lidjin dan álgadiddje?
9. Manen ásaduváj sierra sámelissta 1969 stuorra-diggeválgajda Finnmárkon?
10. Manen tjuodtjel ČSV sámij tjoahkkimmærkkan jali buojkuldahtkan 1970-lågon?

## Duodde hárjjidusá

Dát tjálos la oasásj girjes «DEN HEMMELIGE KRIGEN. Overvåking i Norge 1914-1997. Bind 2. Storhetstid og stormkast 1955-1997». Vissásit dijá skåvlå guovlon li muhtema, ájnnasit gudi lidjin NSR sebrulattja, váksjoduvvam. Åhpadiddje organisieri juohkusijt ma de gæhttjali aktijuodav oadttjot muhtemij gudi váksjoduvvin. Gatjádallit sijáv ja buktit ávddán diedádusáv klássalanján. Låhpan máhttebihtit dágástallat sámij váksjumav Vuonan.

Senere på 1970-tallet ble POTs overvåkingsarbeid i de samiske miljøene mer målrettet. Overvåkingspolitiet konsegnerte seg nå om 20–30 samiske aktivister.<sup>62</sup> På arbeidsmøter nordpå i 1976 var et av hovedtemaene «Samiske organisasjoner og grupperinger – ekstrem politisk virksomhet». Hensikten med drøftingene var å avklare sameproblemene og komme fram til et koordinert overvåkingsopplegg. «Under tvil» oppsummerte tjenestemennene at det fantes en ekstremistisk organisasjon blant samene som kunne tenkes å bruke metoder «som ligger langt over grensen for det som kan aksepteres». For overvåkingspolitiet måtte utgangspunktet for det videre arbeid være å skille skarpt mellom dem som drev mest med snakk, og «de som kan tenkes å følge opp med ulovlige handlinger». Etterforskningen av sameekstremismen skulle prioritertes, og politiet i Bodø skulle lede overvåkingsarbeidet. I første omgang skulle overvåkingstjenesten i Nord-Norge konsegnere seg om å foreta undersøkelser i samemiljøet ved Nordisk Samisk Institutt i Kautokeino.<sup>63</sup>

I 1976 ble også en omfattende kartlegging av sameaktivister innledet. Ved siden av en sjekking av ansatte ved Nordisk Samisk Institutt, ble senere bl.a lærerne ved Masi-skolene, og ansatte og styret ved De samiske samlinger i Karasjok undersøkt. Samemiljøet ved Universitetet i Tromsø synes derimot å ha vært av liten interesse for POT.<sup>64</sup>

Høsten 1976 oppsummerte overvåkingspolitiet i Bodø resultatene av etterforskningen så langt. Samene var vanskelige å komme inn på, men en så det fortsatt som meget sannsynlig at det eksisterte en samisk undergrunnsorganisasjon. Arbeidet ble derfor fortsatt gitt høy prioritet. I 1977 ble også ledelsen i Bergen Samiid Sær'vi (Bergens sameforening) undersøkt.<sup>65</sup>

## Gåvvågáldo

Arvid Sveen: 154  
 Aschehougs Norges historie, bd. 4, 1996: s. 47 (vuolit)  
 Aschehougs Norges historie, bd. 8, 1997: s. 192, 194, 195  
 Borg Mesch: s. 202, 224 Arbeiderbevegelsens arkiv: s. 203  
 Christine Hoel: s. 89 (bajimus), 96 (bajit)  
 Davvi Girji: s. 34, 58, 67, 75 (vuolit), 76, 84, 101 (kárta), 105, 107 (kárta), 113 (kárta), 116, 125, 128, 133, 134, 139, 148, 150, 175, 180, 185, 227 (bajit)  
 Deanu Musea: s. 98 (bajit)  
 E. Wessel: s. 181  
 Edel Hætta Eriksen: s. 255 (olgeš)  
 Guovdageainnu historjásearvi: s. 206 (vuolit), 207  
 Hans Kristian Eriksen: s. 87  
 Isak Johansen: s. 96 (vuolit)  
 John Arne Eidsmo: s. 28 (kárta)  
 Jon Ole Andersen: s. 98 (vuolit)  
 Jämtlands läns museum: s. 253  
 Kirsti Grotmol: s. 74  
 Kvandal fotosamling: s. 265  
 Loppa Kommune: s. 290  
 Manker & Vorren: Samekulturen 1957: s. 88, 92  
 Mihkku Solbakk: b. 11, 19, 45, 69, 81, 85 (bajit), 95 (bajit), 101 (govva), 107 (govva), 111 (govva), 115 (kárta), 138, 182, 212, 213 (kárta), 217, 219, 230  
 Minna Saastamoinen: s. 218 (bajit)  
 NBR:a arkiiva: s. 274 Finnmarksbiblioteket: s. 158 (vuolit), 112  
 Nickel arkiiva: 277, 279 Per Ola Utsi: s. 281  
 Nils Jernsletten: s. 271 (bajimus gurut), 293, 294, 295 (bajimus gasku, vuolimus olges)

Noras fotoarkiiva: s. 156, 162, 183, 184, 186 (Friis), 187, 200, 208 (vuolit), 209, 247, 255 (gurut ja gasku), 257, 260, 261, 262, 270, 273 (vuolit), 276, 291  
 Norsk Folkemuseum: s. 220, 221  
 Odd Mathis Hætta: s. 269, 273 (bajit), 275, 288, 289, 296  
 Per Chr. Biti: s. 295 (vuolimus gurut ja gasku)  
 Reidar Wigelius: s. 85 (vuolit)  
 RiddoDuottarMuseat: s. 95 (vuolit)  
 Saemien Sijte: s. 222, 228  
 Samemisjonen: s. 216  
 Sturla Brørs: s. 218 (vuolit)  
 Sør-Varanger Museum: s. 231, 232, 233, 234, 235, 236, 237, 238  
 Tromsø Museum: s. 90, 208 (bajit), 241, 242, 252, 256, 264, 282, 283  
 Universitetsbiblioteket, Trondheim: s. 249, 250  
 Várjjat Sámu Musea: s. 151  
 Vorren/Manker: Samekulturen 1957: s. 225, 227 (vuolit), 229  
 Örnsköldsviks Museum: s. 245

ČálliidLágádus - TjállijAlmmudahka - ForfatternesForlag  
Pb 140, 9735 Kárášjohka - Karasjok

poasta@lagadus.no  
post@forfatternesforlag.no  
post@authorspublisher.no

Neahntagirjegávpi – Næhntagirjjeoases - Nettbokhandel – On line Book Store:  
[www.gavpi.org](http://www.gavpi.org)

Dán almmudusá bargo li dákddobarggo njuolgadusáj miltá suodjalum.  
ČálliidLágádusa ja tjállij sierra loabe dagá le gájklágásj åvddånbuktema ja  
adnomáhttelisvuoda dåssju loahpe dan mudduj mav láhka miedet.

Sámedigge Vuonan le vaddán økonomaliasj doarjjagav girjev almmudit.

© Tjálle & ČálliidLágádus 2025  
Gráfaliasj bargov vássteda ČálliidLágádus  
ISBN 978-82-8263579-0